

ԺԱՄԱԳԻՐՔ

ՀԱՅԱՍՏԱՆԵԱՅՑ Ս. ԵԿԵՂԵՑԻՈՅ

ԱՐԱՐԵԱԼ ՍՐԲՈՅ ԹԱՐԳՄԱՆՉԱՅՆ ՄԵՐՈՅ

ՍԱՀԱԿԱՅ ԵՒ ՄԵՍՐՈՊԱՅ

ԵՒ ԵՐԱՆԵԼԻ ՀԱՅՐԱՊԵՏԱՅՆ ՄԵՐՈՅ

ԳԻԻՏՈՅ ԵՒ ՅՈՎՀԱՆՆՈՒ ՄԱՆԴԱԿՈՒՆԻՈՅ ԵՒ ՍՐԲՈՅՆ ՆԵՐՄԻՄԻ

ՇՆՈՐՀԱԼԻՈՅ

ՀՐԱԺԱՐՈՒՄՆ

Հրաժարիմք ի սատանայէ եւ յամենայն խաբէութենէ նորա՝ ի պատրանաց նորա, ի խորհրդոց նորա, ի գնացից նորա, ի չար կամաց նորա, ի չար հրեշտակաց նորա, ի չար պաշտօնէից նորա, ի չար կամարարաց նորա եւ յամենայն չար զօրութենէ նորա հրաժարելով հրաժարի'մք:

*Ջայս երիցս կրկնէ՝ երես ի յարեւմուտս եւ ձեռս ի կոր ունելով, եւ ապա դառնայ յարեւելս եւ սկսանի գղաւանութիւն ուղղափառ հաւատոյ քացագլուխ եւ ձեռնամած կերպիւ եւ ասէ.*

Խոստովանիմք եւ հաւատամք ամենակատար սրտիւ զՀայրն Աստուած անեղ, անծին եւ անսկիզբն, այլեւ ծնող Որդոյ եւ բղիտղ Հոգւոյն Սրբոյ:

Հաւատամք զԲանն Աստուած անեղ, ծնեալ եւ սկսեալ ի Հօրէ նախ քան զյաւիտեանս, ո'չ յետոյ եւ ո'չ կրտսեր, այլ որքան Հայրն Հայր, ընդ նմին եւ Որդին Որդի:

Հաւատամք զՍուրբ Հոգին Աստուած անեղ, անժամանակ, ոչ ծնեալ, այլ բղխեալ ի Հօրէ, եակից Հօր եւ փառակից Որդոյ:

Հաւատամք զԵրրորդութիւնն Սուրբ մի բնութիւն, մի Աստուածութիւն. ոչ երեք Աստուածք, այլ մի Աստուած, մի կամք, մի թագաւորութիւն, մի իշխանութիւն, Արարիչ երեւելեաց եւ աներեւութից:

Հաւատամք յԵկեղեցի սուրբ, զթողութիւն մեղաց, հաղորդութեամբ սրբոց:

Հաւատամք զՄինն յԵրից Անձանց զԲանն Աստուած ծնեալ ի Հօրէ նախ քան զյաւիտեանս, ի ժամանակի իջեալ յԱստուածածին կոյսն Մարիամ, առեալ յարենէ նորա՝ միաւորեաց ընդ իւրում Աստուածութեանն, իննամսեայ ժուժկալեալ յարգանդի անարատ Կուսին, եւ եղեւ Աստուածն կատարեալ մարդ կատարեալ հոգւով եւ մտօք եւ մարմնով, մի անձն, մի դէմ եւ միաւորեալ մի բնութիւն: Աստուածն մարդացեալ առանց փոփոխման եւ առանց այլայլութեան, անսերմն յղութիւն եւ անապական ծնունդ. որպէս ոչ է սկիզբն Աստուածութեան նորա, եւ ոչ վախճան մարդկութեան նորա (զի Յիսուս Քրիստոս երէկ եւ այսօր, նոյն եւ յաւիտեան):

Հաւատամք զՏէրն մեր Յիսուս Քրիստոս շրջեալ ի վերայ երկրի, յետ երեսուն ամաց եկեալ ի մկրտութիւն: Հայր ի վերուստ վկայեալ. «Դա՛ է Որդի իմ սիրելի», եւ Հոգին Սուրբ աղանակերպ իջեալ ի վերայ նորա: Փորձեալ ի սատանայէ եւ յաղթեալ նմա, քարոզեալ մարդկան զփրկութիւն, աշխատեալ մարմնով, վաստակեալ, քաղցեալ եւ ծարաւեալ, յետոյ եկեալ կամաւ ի չարչարանս, խաչեալ եւ մեռեալ մարմնովն եւ կենդանի Աստուածութեամբն: Մարմինն եղեալ ի գերեզմանի միաւորեալ Աստուածութեամբն, եւ Հոգւովն իջեալ ի դժոխս անբաժանելի Աստուածութեամբն, քարոզեալ հոգւոցն՝ աւերեալ զդժոխս եւ ազատեալ զհոգիս: Յետ երից աւուրց յարուցեալ ի մեռելոց եւ երեւեալ աշակերտացն:

Հաւատամք զՏէրն մեր Յիսուս Քրիստոս նովին մարմնովն համբարձեալ յերկինս եւ նստեալ ընդ աջմէ Հօր: Այլեւ գալոց է նովին մարմնովն եւ փառօք Հօր՝ ի դատել զկենդանիս եւ զմեռեալս: Որ եւ յարութիւն ամենայն մարդկան:

Հաւատամք եւ զհատուցումն գործոց. արդարոցն՝ կեանք յաւիտենական, եւ մեղաւորացն՝ տանջանք յաւիտենական:

## ԶՂՋՈՒՄՆ

Մեղա՛յ ամենասուրբ Երրորդութեանն՝ Հօր եւ Որդւոյ եւ Հոգւոյն Սրբոյ: Մեղուցեա՛լ եմ Աստուծոյ: Խոստովանիմ առաջի Աստուծոյ եւ սրբուհւոյ Աստուածածնին եւ առաջի քո, հա՛յր սուրբ, զամենայն մեղս, զոր գործեալ եմ: Քանզի մեղայ խորհրդով, բանիւ եւ գործով, կամայ եւ ակամայ, գիտութեամբ եւ անգիտութեամբ, մեղա՛յ Աստուծոյ:

Մեղա՛յ հոգւովս եւ զօրութեամբ սորա, մտօքս եւ շարժմամբ սորա, մարմնովս եւ զգայութեամբ սորա: Մեղայ զօրութեամբ հոգւոյս՝ խորամանկութեամբ, անզգամութեամբ, յանդգնութեամբ եւ երկչոտութեամբ, շռայլութեամբ եւ ժլատութեամբ, զեղխութեամբ եւ անիրաւութեամբ, չարահաւանութեամբ, յուսահատութեամբ եւ թերամտութեամբ. մեղա՛յ Աստուծոյ:

Մեղա՛յ չար խորհրդով մտացս՝ նենգութեամբ, ատելութեամբ, իւեթիւ, մախանօք, յաչաղանօք, թուլութեամբ, պոռնկական խորհրդով, արուական, իգական, անասնական, գրաստական, գազանական, ի գիշերի եւ ի տուրնջեան. երազական գիջութեամբ եւ անբջական գարշ աղտեղութեամբ. մեղա՛յ Աստուծոյ:

Մեղա՛յ ցանկութեամբ մարմնոյս՝ հեշտութեամբ, պղերգութեամբ, յօրանջմամբ քնոյ, շարժութեամբ մարմնոյս եւ զազրագործութեամբ ի պէս-պէս ախտս. հեշտալրութեամբ լսելեացս, արատութեամբ աչացս, ցանկութեամբ սրտիս,

իգութեամբ ոնգացս, պագշոտութեամբ բերանոյս, անժուժկալութեամբ, շուայտութեամբ եւ արբեցութեամբ. մեղա՛յ Աստուծոյ:

Մեղա՛յ չարաբանութեամբ լեզուիս՝ ստախօսութեամբ, սուտ երդմամբ, երդմնազանցութեամբ, հակառակութեամբ, վիճաբանութեամբ, բանսարկութեամբ, շոգմոգութեամբ, քսու, դատարկաբանութեամբ եւ ծաղու, զրախօսութեամբ, հերձախօսութեամբ եւ անիծաբանութեամբ, տրտնջելով, դժգոհելով, բամբասելով եւ հայհոյելով. մեղա՛յ Աստուծոյ:

Մեղա՛յ գողութեամբ ձեռացս՝ ազահելով, զրկելով, հարկանելով, սպանանելով եւ ընդ քարշս ածելով, մեղա՛յ Աստուծոյ:

Մեղա՛յ ամենայն յօդուածովք շինուածոյս եւ ամենայն անդամօք մարմնոյս. հնգեակ զգայարանօքս եւ վեցեկի շարժմամբս. վերամբարձ ոտնահարութեամբ եւ վայրաքարշ մեղկութեամբ, յաջ եւ յահեակ խոտորելով, զառաջնոցն մեղանչելով եւ վերջնոցն չար նշուակ գոլով, մեղայ Աստուծոյ:

Այլ եւ մեղա՛յ եօթնիցս յանցանօք մահացու մեղօք՝ հպարտութեամբ եւ մասամբք նորին, նախանձու եւ մասամբք նորին, բարկութեամբ եւ մասամբք նորին, ծուլութեամբ եւ մասամբք նորին, ազահութեամբ եւ մասամբք նորին, որկրամոլութեամբ եւ մասամբք նորին, բղջախոհութեամբ եւ մասամբք նորին. մեղա՛յ Աստուծոյ:

Այլ եւ մեղա՛յ ամենայն պատուիրանացն Աստուծոյ՝ յանձնառելեացն եւ հրաժարելեացն. զի ոչ զյանձնառականսն կատարեցի եւ ոչ ի հրաժարելեացն հեռացայ, զօրէնս առի եւ յօրինացն հեղգացայ, ի կարգս քրիստոնէութեան հրաւիրեցայ եւ գործովս անարժան գտայ, զիտելով զչարն՝ կամաւ կորացայ եւ ի բարեաց գործոց ես ինձէն հեռացայ. վա՛յ ինձ, վա՛յ ինձ, վա՛յ ինձ: Չո՞րն ասեմ, կամ զո՞րն խոստովանիմ, զի անթիւ են յանցանք իմ, անասելի են անօրէնութիւնք իմ, աններելի են ցաւք իմ, եւ անբժշկելի են վերք իմ. մեղա՛յ Աստուծոյ:

Հա՛յր սուրբ, զքեզ ունիմ միջնորդ հաշտութեան եւ բարեխօս առ Միածին Որդին Աստուծոյ, զի իշխանութեամբդ, որ տուեալ է քեզ, արձակեցես զիս ի կապից մեղաց իմոց, աղաչե՛մ զքեզ:

## ԱՐՁԱԿՈՒՄՆ

Ողորմեսցի քեզ մարդասէրն Աստուած եւ թողութիւն շնորհեսցէ ամենայն յանցանաց քոց՝ խոստովանացելոցն եւ մոռացելոցն: Եւ ես կարգաւ քահանայական իշխանութեան եւ հրամանաւն աստուածային, թէ՛ լճոր արձակիցէք յերկրի, եղիցի արձակեալ յերկինս, նովին բանին արձակեմ զքեզ յամենայն մասնակցութենէ մեղաց քոց՝ ի խորհրդոց, ի բանից եւ ի գործոց յանուն Հօր եւ Որդոյ եւ Հոգւոյն Սրբոյ: Եւ դարձեալ տամ զքեզ ի խորհուրդս սուրբ եկեղեցոյ, զի գոր ինչ գործիցես բարիս, եղիցի քեզ ի բարեգործութիւն եւ ի փառս հանդերձեալ կենացն. ամէն:

Խրատք ժամատեղեաց ըստ արեւելեան սահմանացն սկսուածոց եւ ասութեանց աղօթից, գոր ինդրեաց սուրբ վարդապետն Յակոբ Ղրիմեցի ի մեծ բարունւոյն Գրիգորէ Խլաթեցոյն: Եւ կատարեաց այսպէս:

Որ դասի, որ աւուր ձայնն լինի, այս է՝

Տէ՛ր, եթէ զշրթունսն: Ջքէն գոհանամքն: Օրհնեալ Տէր մեր Յիսուս Քրիստոսն: Կանոնագլուխն: Կանոնի աղօթքն: Ջկնի ալելուիայից եւ թագաւորացն՝ Սաղմոսիք եւ օրհնութեամբն եւ այլն, որ լինի: Մեծացուցէի աղօթքն, այլ եւ Ողորմի փառքն: Սուրբ Աստուածի աղօթքն: Արձակման աղօթքն, թէ՛ պահոց եւ թէ՛ ուտեաց: Արեւազալի Սուրբ եւ Տէրն եւ արձակմանն: Ճաշու Առաջնորդեայն: Հայր գթութեանցն: Անկեալն: Ճաշու սկսուածքն: Լուր ձայնիցն: Համբարձին: Յոյս կենացն: Խաղաղականին՝ Շնորահատու բարեացն:

Իսկ կողման դասուն այս է՝ սկսուածք օրհնութեան եւ հարցին եւ իւր աղօթիցն: Տէր յերկնիցն եւ իւր փառացն: Սուրբ եւ, Տէրն, զկնի մանկանցն: Արեւազալի աղօթքն:

Ձառաւօտնու զաղօթս: Ճաշու իսաղաղութեամբ: Փարատեա: Քրիստոս Որդի Աստուծոյն: Իսկ ժամամուտ եւ շարական՝ ձայնին է:

Կիրակէից ճաշու՝ Եսային եւ աւետարանն՝ ձայնին է: Առաքեալն՝ կողմանն է: Իսկ լուր աւուր գիրք՝ կողմանն է: Աւետարանն ձայնին է: Երեկոյի Խոնարհեցոն՝ ձայնին է: Ապրեցոն, Հայր գթածն, Տէր բարերարն, Քրիստոս Որդին՝ կողմանն է: Հայր մերն՝ ձայնին է:

Հաւատով խոստովանիմ աղօթքն Ի՜Դ տուն է՝ ըստ Ի՜Դ ժամուցն: Իսկ Տէր մեր եւ Փրկիչ, Տէր Աստուած մերն՝ ի կարգէ դուրս է, ժամարարին է եւ հարկեւոր հիւրին: Այս է արեւելեան տան սահմանն ժամակարգութեան ի փառս Աստուծոյ: Յորժամ թուականն հայոց կոճատ լինի, բուն ձայնքն՝ աճ. բճ. դճ, յաջակողման դասուն լինին, ուր սուրբ Աւագանն է, եւ յորժամ դար լինի, ձախոյն լինին:

Կարգաւորութիւն հասարակաց աղօթից Հայաստանեայց Եկեղեցւոյ, որ կատարի ի մէջ գիշերի ի դէմս Հօր Աստուծոյ:

Օրհնեալ Տէր մեր Յիսուս Քրիստոս. ամէն:

Հայր մեր, որ յերկինս ես, սուրբ եղիցի անուն քո: Եկեցցէ արքայութիւն քո, եղիցին կամք քո որպէս յերկինս եւ յերկրի: Ձեաց մեր հանապազորդ տուր մեզ այսօր, եւ թող մեզ զպարտիս մեր, որպէս եւ մեք թողումք մերոց պարտապանաց: Եւ մի՛ տանիր զմեզ ի փորձութիւն, այլ փրկեա՛ զմեզ ի չարէ: Ձի քո է արքայութիւն եւ զօրութիւն եւ փառք յաւիտեանս. ամէն.

Տէ՛ր, եթէ զշրթունս իմ բանաս, բերան իմ երգեսցէ զօրհնութիւնս քո:

Տէ՛ր, եթէ զշրթունս իմ բանաս, բերան իմ երգեսցէ զօրհնութիւնս քո:

Օրհնեալ համագոյ եւ միասնական անբաժանելի Սուրբ Երրորդութիւնն՝ Հայր եւ Որդի եւ Հոգի Սուրբ այժմ եւ միշտ եւ յաւիտեանս յաւիտենից. ամէն:

Տէ՛ր, զի՛ բազում եղեն նեղիչք իմ, եւ բազումք յարեան ի վերայ իմ,

Բագումք ասէին զանձնէ իմմէ, թէ՛ չիք փրկութիւն սորա առ Աստուած իւր:  
Այլ դու, Տէ՛ր, օգնական իմ ես, փառք իմ եւ բարձրացուցիչ զլիտյ իմոյ:

Ձայնիւ իմով ես առ Տէր կարդացի, եւ լուաւ ինձ ի լեռնէ սրբոյ իւրմէ:

Ես ննջեցի եւ ի քուն եղէ, զարթեայ եւ Տէր ընդունելի իմ է:

Ոչ երկայց ես ի բիրաւոր զօրաց նոցա, ոյք շուրջանակի պատեալ պաշարեալ  
պահէին զիս:

Արի՛, Տէ՛ր, եւ փրկեա՛ զիս, Աստուա՛ծ իմ,

զի դու հարեր զամենեսեան, ոյք էին ընդ իս թշնամութեամբ ի տարապարտուց,  
եւ զատամունս մեղաւորաց փշրեցես:

Տեառնդ է փրկութիւն, ի վերայ ժողովրդեան քո օրհնութիւն քո:

Տէ՛ր Աստուած փրկութեան իմոյ, ի տուէ կարդացի եւ զիշերի առաջի քո:

Մտցեն աղօթք իմ առաջի քո, Տէ՛ր, խոնարհեցի ունկն քո ի խնդրուածս իմ:

Ձի լցաւ չարչարանօք անձն իմ, եւ կեանք իմ ի դժոխս մերձեցան,

եւ համարեցայ ես ընդ այնոսիկ, որք իջանեն ի գուր:

Եղէ ես որպէս մարդ առանց օգնականի եւ ի մեռեալս ազատ,

որպէս զվիրաւորս, որք ննջեն ի գերեզմանի:

Ձորս դու ոչ յիշեցեր, նոքա ի ձեռանէ քումմէ մերժեցան:

Եղին զիս ի գբի ներքնումն, ի խաւարի եւ ի ստուերս մահու:

Յիս հաստատեցաւ սրտմտութիւն քո, զամենայն զբօսանս քո ածեր ի վերայ իմ:

Հեռի արարեր յինէն զծանօթս իմ, եւ եղին զիս նշաւակ իւրեանց:

Մասնեցայ եւ ոչ ելանէի, աչք իմ տկարացան յաղքատութենէ:

Աղաղակեցի առ Տէր զօրհանապագ եւ համբարձի առ քեզ զձեռս իմ:

Միթէ մեռելոց առնիցե՞ս զսքանչելիս քո,

կամ բժիշկք յարուցեալ խոստովան առնիցի՞ն առ քեզ:

Միթէ պատմեցե՞ոք երբեք ի գերեզմանի զողորմութիւնս քո

կամ ճշմարտութիւնս քո ի կորստեան:

Միթէ ճանաչիցի՞ն ի խաւարի սքանչելիք քո, կամ արդարութիւն քո յերկիր  
մոռացեալ:

Ես առ քեզ, Տէ՛ր, աղաղակեցի, առաւօտու աղօթք իմ ժամանեցեն առ քեզ:  
Ընդէ՞ր, Տէ՛ր, մերժես զանձն իմ կամ դարձուցանես զերեսս քո յինէն:  
Տնանկ եւ վաստակաւոր եմ ես ի մանկութենէ իմմէ,  
ի բարձրութենէ խոնարհեցայ եւ ապշեցայ:  
Յիս հաստատեցաւ բարկութիւն քո, արհաւիրք քո խոռվեցուցին զիս:  
Շրջեցան զինեւ, որպէս ջուր, զօր ամենայն պաշարեցին զիս ի միասին:  
Հեռի արարեր յինէն զբարեկամս իմ եւ զճանօթս իմ վասն թշուառութեան իմոյ:  
Օրհնեա՛, ա՛նձն իմ, զՏէր, եւ ամենայն ոսկե՛րք իմ, զանուն սուրբ նորա:  
Օրհնեա՛, ա՛նձն իմ, զՏէր, եւ մի՛ մոռանար զամենայն տուրս նորա,  
Ո քաւէ զմեղս քո, բժշկէ զամենայն հիւանդութիւնս քո,  
Ո փրկէ յապականութենէ զկեանս քո, պսակէ զքեզ ողորմութեամբ եւ զթութեամբ,  
Ո լնու ի բարութենէ զցանկութիւն քո, նորոգեցի որպէս արծուոյ մանկութիւն քո:  
Առնէ ողորմութիւնս Տէր եւ իրաւունս ամենայն զրկելոց:  
Եցոյց Տէր զճանապարհս իւր Մովսիսի եւ որդւոցն Իսրայելի՝ զկամս իւր:  
Գթած, ողորմած է Տէր, երկայնամիտ եւ բազումողորմ:  
Ոչ ի սպառ բարկանայ մեզ Տէր եւ ոչ յաւիտեան պահէ ոխս:  
Ոչ ըստ մեղաց մերոց արար մեզ Տէր եւ ոչ ըստ անօրէնութեան մերում հատոյց  
մեզ:  
Այլ որպէս բարձր են երկինք յերկրէ, այնպէս զօրացոյց Տէր զողորմութիւն իւր ի  
վերայ երկիւղածաց իւրոց:  
Որչափ հեռի են արեւելք յարեւմտից, այնչափ հեռի արար ի մենջ զանօրէնութիւնս  
մեր:  
Որպէս գթայ հայր ի վերայ որդւոց իւրոց, այնպէս գթացի Տէր յերկիւղածս իւր:  
Զի նա զիտաց զստեղծուածս մեր եւ յիշեաց, թէ հող եմք:  
Մարդոյ որպէս խոտոյ են աւուրք իւր. որպէս ծաղիկ վայրի, այնպէս ծաղկի:  
Շնչէ ի նմա հողմ, եւ ոչ է, եւ ոչ եւս երեւի տեղի նորա:  
Բայց ողորմութիւն Տեառն մնայ յաւիտեանս յաւիտենից ի վերայ երկիւղածաց  
իւրոց,  
եւ արդարութիւն նորա յորդւոց մինչեւ յորդիս,

ոյք պահեն զուխտս նորա, յիշեն զպատուիրանս նորա եւ առնեն զնա:  
Տէր յերկինս պատրաստեաց զաթոռ իւր, արքայութիւն նորա ամենեցուն տիրէ:  
Օրհնեցէ՛ք զՏէր, ամենայն հրեշտա՛կք նորա, հօ՛րք զօրութեամբ,  
ոյք առնէք զբան նորա ի լսել ձայնի պատգամաց նորա:  
Օրհնեցէ՛ք զՏէր, ամենայն զօրութի՛ւնք նորա, պաշտօնեա՛յք եւ արարո՛ղք կամաց  
նորա:  
Օրհնեցէ՛ք զՏէր, ամենայն գո՛րծք նորա, զի ընդ ամենայն տեղիս է տէրութիւն  
նորա.  
օրհնեա՛, ա՛նձն իմ, զՏէր:  
Տէ՛ր, լո՛ւր աղօթից իմոց, ո՛ւնկն դիր խնդրուածաց իմոց ճշմարտութեամբ քով:  
Լո՛ւր ինձ արդարութեամբ քով եւ մի՛ մտաներ ի դատաստան ընդ ծառայի քում,  
զի ոչ արդարանայ առաջի քո ամենայն կենդանի:  
Հալածեաց թշնամին զանձն իմ, խոնարհ արար յերկիր զկեանս իմ  
եւ նստոյց զիս ի խաւարի, որպէս մեռեալ յաւիտենից:  
Ձանձրացաւ յիս հոգի իմ, եւ սիրտ իմ խռովեցաւ յիս:  
Յիշեցի զաւուրսն զառաջինս, խորհեցայ յամենայն գործս քո,  
յարարածս ձեռաց քոց խորհեցայ եւ համբարձի առ քեզ զձեռս իմ:  
Անձն իմ որպէս զերկիր ծարաւի է առ քեզ,  
վաղվաղակի լո՛ւր ինձ, Տէ՛ր, զի նուաղեցաւ յինէն հոգի իմ:  
Մի՛ դարձուցաներ զերեսս քո յինէն. նմանիցիմ այնոցիկ, ոյք իջանեն ի գուր:  
Լսելի՛ արա ինձ առաւօտու զողորմութիւնս քո, զի ես ի քեզ, Տէ՛ր, յուսացայ:  
Յո՛յց ինձ ճանապարհ, յոր եւ գնացից, զի առ քեզ, Տէ՛ր, համբարձի զանձն իմ:  
Փրկեա՛ զիս ի թշնամեաց իմոց, Տէ՛ր, զի զքեզ ապաւեն ինձ արարի:  
Ուսո՛ ինձ առնել զկամս քո, զի դու ես Աստուած իմ:  
Հոգի քո բարի առաջնորդեսցէ ինձ ի յերկիր ուղիղ:  
Վասն անուան քո, Տէ՛ր, կեցուցես զիս,  
արդարութեամբ քով հանցես ի նեղութենէ զանձն իմ:  
Ողորմութեամբ քով սատակեա՛ զթշնամիս իմ  
եւ կորո՛ր զամենայն նեղիչս անձին իմոյ, զի ես ծառայ քո եմ:

Փառք Հօր եւ Որդւոյ եւ Հոգւոյն Սրբոյ  
այժմ եւ միշտ եւ յաւիտեանս յաւիտենից. ամէն:

Երգ Տեառն Ներսիսի Հայոց Կաթողիկոսի՝ ասացեալ  
ի պաշտաման գիշերոյ

Յիշեցուք ի գիշերի զանուն քո, Տէ՛ր,  
Բղխեցեն սիրտք մեր զբան բարի, եւ լեզուք մեր պատմեցեն զգործս երկնաւոր  
թագաւորիդ:

Ի մէջ գիշերի յարուցեալ խոստովանեցուք զքեզ, Տէ՛ր:

Ձաղօթս մեր տացուք քեզ, Տէ՛ր, ի գաւիթս քո՝ ի մէջ Նոր Երուսաղեմի:

Ի գիշերի համբարձցուք զձեռս մեր սրբութեամբ առ քեզ, Տէ՛ր:

Ի ձայն գոհութեան, ամենա՛յն հոգիք, օրհնեցէ՛ք զՏէր:

Ձարթի՛ք, փա՛ռք իմ, զարթի՛ք. եւ ես զարթեայց առաւօտուց. ալէլուիա:

Ձարթի՛ք ընդ գուարթունս, մանկո՛ւնք Վերինն Սիոնի. ալէ.

Ձարթի՛ք, որդի՛ք լուսոյ, ի յօրհնութիւն Հօրն լուսոյ. ալէ.

Ձարթի՛ք, փրկեա՛լք արեամբ, եւ տուք զփառս Փրկողին. ալէ.

Ձարթի՛ք, նո՛ր ժողովուրդք, նոր երգս առեալ Նորոգողին. ալէ.

Ձարթի՛ք, հարսո՛ւնք, հոգւով սպասեալք գալոյ սուրբ Փեսային. ալէ.

Ձարթի՛ք, վառեա՛լք լուսով ըստ իմաստուն սուրբ կուսանացն. ալէ:

Ձարթի՛ք, պատրաստեցէ՛ք իւղ լապտերաց՝ զջերմ արտասուս. ալէ:

Ձարթի՛ք եւ մի՛ ննջէք, նման յիմար կուսից նիրհէք. ալէ.

Ձարթի՛ք, երկիրպագցուք եւ արտասուօք զայս ասացուք. ալէ.

(փ)

Ձարթի՛ր, ընդէ՛ր ննջես. Տէ՛ր, մի՛ մերժեր զմեզ իսպառ:

Արի՛, Տէ՛ր, օգնեա՛ մեզ. տացուք անուանդ քում զփառս:

Այժմ եւ յաւէտ Հօր եւ Որդւոյ եւ Սուրբ Հոգւոյն. ամէն:

(փ)

Ձարթուցեալքս ի զբաղմանէ գիշերային հանգստենէ:

Շնորհեացէ մեզ մարդասէր Տէր մխիթարութիւն եւ ի սփոփանս Եկեղեցոյ:

Ահիւ եւ դողութեամբ կացցուք ի յաղօթս:

Եկեալ խոստովանեսցուք զյանցանս եւ գտցուք ի Քրիստոսէ զքաւութիւն եւ զմեծ գողորմութիւն:

(կց) Անբաժանելի եւ համագոյ Երրորդութեանդ, համաձայնեալք ընդ զօրս երկնից. փառս մատուցանեմք:

Փա՛ռք քեզ, որ յանարուեստ յաթոռ բարձրացեալ հանգչիս, սո՛ւրբ Աստուած՝ հզօր եւ սքանչելագործ:

Փա՛ռք քեզ, որ յանէից գոյացուցեր զամենայն արարածս, սո՛ւրբ Աստուած՝ անճան Հօր անե՛ղ Որդի:

Փա՛ռք քեզ, որ տեսչութեամբ խնամես զամենայն արարածս, սո՛ւրբ Աստուած՝ բղիտ՛ւմն անսպառ աղբեր:

Տէ՛ր, ժողովրդապետք եկեղեցոյ ի քէն հայցեն՝ ասելով. «Հովի՛ւ բարի, ողորմեա՛ բանաւոր հօտի»:

Ամէն. ալելուիա, ալելուիա, ալէ:

Ամէն. ալելուիա, ալելուիա, ալէ:

### Քարոզ

Զարթուցեալքս ամենեքեան ի հանգստենէ քնոյ, զոր շնորհեաց մեզ մարդասէրն Աստուած ի մխիթարութիւն եւ սփոփանս տկարութեան մերում, եւ եկեալքս միաբան հոգեւոր երգով ի փառաբանութիւն եւ ի պատիւ ամենասուրբ անուան Տեառն մերոյ եւ Փրկչին Յիսուսի Քրիստոսի, ահիւ եւ դողութեամբ կացցուք յաղօթս առաջի նորա եւ գոհացարուք զնմանէ ի գիշերային ժամուս յայսմիկ վասն իրաւանց եւ արդարութեան նորա, որ ընտրեաց զմեզ ողորմութեամբն իւրով եւ շնորհեաց մեզ բերել զնմանութիւն երկնային հրեշտակացն ի փառաբանիչս Տեառն Աստուծոյ ամենեցուն եւ մեզ լինիլ: Եւ մեք, այսուհետեւ սրբելով զանձինս մեր ի խղճէ եւ ի չար գործոց, համբարձցուք զձեռս մեր ի սրբութիւն առանց բարկութեան եւ երկմտութեան, հաւատով խնդրեսցուք ի նմանէ զքաւութիւն եւ զթողութիւն յանցանաց մերոց՝ խոստովան լինելով զգաղտնիս սրտից մերոց ծածկագիտին

Աստուծոյ: Որպէս զի, ընդունելով զպաղատանս մեր աղօթիւք եւ բարեխօսութեամբ սրբոց, շնորհեսցէ մեզ մարդասէրն Աստուած կեալ առաքինութեամբ եւ անարատ վարուք ըստ կամաց նորա յայսմ աշխարհիս եւ արժանաւոր լինելով յաւիտենական եւ երկնային խորանացն, զոր խոստացաւ սիրելեաց իւրոց ճշմարիտն Աստուած՝ Յիսուս Քրիստոս. Տէր մեր, կեցո եւ ողորմեա':

Կեցո, Տէ'ր:

Զմնացուած գիշերիս խաղաղութեամբ անցուցանել հաւատով ի Տեառնէ խնդրեսցուք:

Շնորհեա', Տէ'ր:

Զհրեշտակ խաղաղութեան պահապան անձանց մերոց ի Տեառնէ խնդրեսցուք:

Շնորհեա', Տէ'ր:

Զքաւութիւն եւ զթողութիւն յանցանաց մերոց ի Տեառնէ խնդրեսցուք:

Շնորհեա', Տէ'ր:

Զսրբոյ խաչին մեծ եւ կարող զօրութիւնն յօգնութիւն անձանց մերոց ի Տեառնէ խնդրեսցուք:

Շնորհեա', Տէ'ր:

Եւ եւս միաբան վասն ճշմարիտ եւ սուրբ հաւատոյս մերոյ զՏէր աղաչեսցուք:

Տէ'ր, ողորմեա':

Զանձինս մեր եւ զմիմեանս Տեառն Աստուծոյ ամենակալին յանձն արասցուք:

Քեզ՝ Տեառնդ, յանձն եղիցուք:

Ողորմեա'ց մեզ, Տէ'ր Աստուած մեր, ըստ մեծի ողորմութեան քում:

Ասասցուք ամենեքեան միաբանութեամբ՝

Տէ'ր, ողորմեա', Տէ'ր, ողորմեա', Տէ'ր, ողորմեա':

-----

Եւ ասի Տէ'ր, ողորմեա' ըստ պատշաճի աւուրն. ի կիւրակէս եւ ի տօնս տէրունականս՝ երեք Տէ'ր, ողորմեա', իսկ ի տօնս սրբոց՝ յիսուն Տէ'ր, ողորմեա', եւ յաւուրս պահոց՝ հարիւր Տէ'ր, ողորմեա'

Տեառն՝ Ներսիսի Հայոց Կաթողիկոսի՝ ողբերգութիւն անձին գղջացելոյ եւ բողոք  
իւրաքանչիւրոյ դիմի խոստովանաբար

Աշխարհ ամենայն, առ իս նայեցեալ՝ ախտակից լերուք:

Բանամ զշրթունս, բարբառիմ լեզուսս, բողոքեմ զանձնէս.

Տէ՛ր, ողորմեա՛, Տէ՛ր, ողորմեա՛, Տէ՛ր, ողորմեա՛:

Գող եղէ մեղաց, գտող կորստեան, գուր ինձ փորեցի:

Դաւեցի զանձն իմ, դաւաճանեցի, դարան գործեցի:

Տէ՛ր, ողոր.

Երբեմն էի լոյս եւ այժմ եմ խաւար եւ ստուեր մահու:

Զիա՞րդ պատմեցից զթիւ մեղաց իմոց, զի բազում են յոյժ.

Տէ՛ր, ողոր.

Էրկինք եւ երկի՛ր, էկայք ողբացեք եղկելի զանձն իմ:

Ընտրեցի զչարն, ընկալայ կամաւ գիտլս մեղաց.

Տէ՛ր, ողոր.

Թաթաւիմ տղմով, թաւալիմ ի մեղս, թօթափիլ չկարեմ:

Ժանտ ախտիւ լցեալ՝ ժահահոտ եղէ ժամանակս բազումս.

Տէ՛ր, ողոր.

Ի բաց մեկնեցայ ի սուրբ խորհրդոց, ի բարեաց գործոց:

Լաւ վարկաւ անձն իմ լուսոյն հեռանալ, լինել ընդ խաւար.

Տէ՛ր, ողոր.

Խորհուրդք չարին խաբեն զհոգիս, խորասոյգ առնեն,

Ծածկեն անդնօք, ծիծաղին գլորմամբս, ծանակ զիս առնեն.

Տէ՛ր, ողոր.

Կամաւ կորացայ, կարկամեալ անձամբս կանգնիլ ոչ կարեմ:

Հուր մեղաց կիզող հրդեհեաց որ յիս հոգետր բարիս.

Տէ՛ր, ողոր.

Ձաղկեցայ մեղօք, ձաղեցին տեսողք, ձանձրացաւ հոգիս:

Ղեղի դառնութեան ղօղեալ ի սիրտ իմ, դամբար իմ շիջաւ.

Տէ՛ր, ողոր.

Ճաշակմամբ մեղաց ճաշեցի զմահ, ճոխս աղքատացայ:

Մեռեալ եմ հոգւովս, մոլորեալ՝ մտօքս, միայն կամ մարմնովս.

Տէ՛ր, ողոր.

Յորոգայթ մահու յորսողին անկայ, յաղթեցայ յախտից:

Նետից թշնամւոյն նշաւակ եղէ, նոր միշտ խոցոտիմ.

Տէ՛ր, ողոր.

Շուրջ պատեալ զինեւ շունք բագումք եղեն, շաղախին արեամբս:

Որս եղէ չարին. ուռկանաւ մեղաց որսացաւ զանձն իմ.

Տէ՛ր, ողոր.

Չարաչար վշտօք չարչարի անձն իմ, չունիմ դադարումն:

Պարտապան գտայ պարտուց յանցանաց պարտեալս ի մեղաց.

Տէ՛ր, ողոր.

Ջանամ զղջանալ, ջեռանիմ դարձեալ, ջեռնում հրով մեղաց:

Ռաբբի կոչեցայ, ռակայ անուանիմ ռամկական վարուքս.

Տէ՛ր, ողոր.

Սիրով ցանկութեան սաստիկ բարկութեան սիրտ իմ խոցեալ է:

Վիրօք յանցանաց վշտանայ հոգիս, վարանեալ շրջիմ.

Տէ՛ր, ողոր.

Տիրեցին ինձ չարք, տարագիր հանին տիրական գրկացն:

Ըաբունւոյն բարւոյ ըախճական ձայնին ըոտինս ոչ լուայ.

Տէ՛ր, ողոր.

Ցանկութիւն չարեաց ցանկալի դիմօք ցաւեցոյց զաչս իմ:

Իւրաքանչիւրոց լիւսմամբ խուռն ախտից լիւծեալ է հոգիս.

Տէ՛ր, ողոր.

Փութացիր, ա՛նձն իմ, փախչիլ ի չարեաց, փափագիլ բարեաց:

Քեզ միշտ մերձ ծանիր քուն մահու եկեալ քննող դատաւոր.

Տէ՛ր, ողոր.

Աստուածածնին բարեխօսութեամբ յիշեա՛, Տէ՛ր, եւ ողորմեա՛:

-----  
Նորին Տեառն Ներսիսի Հայոց Կաթողիկոսի երգ աղօթական ի դեմս Սրբոյ  
Երրորդութեան, նաեւ իւրաքանչիւրոյ դիմի Երրորդութեանն առանձնակի

Առաւօտ լուսոյ, արեգա՛կն արդար, առ իս լոյս ծագեա:

Բոխտ՛ւմն ի Հօրէ, բոխեա՛ ի հոգւոյս բան քեզ ի հաճոյս:

Գա՛նձդ ողորմութեան, գանձիդ ծածկելոյ գտո՛ղ զիս արա:

Դուռն ողորմութեան դաւանողիս բաց, դասեցո՛ վերնոցն:

Երբեա՛կ միութիւն, եղելո՛ց խնամող, եւ ինձ ողորմեա՛:

Զարթի՛ր, Տէ՛ր, յօգնել, զարթո՛ զթմրեալս՝ զուարթնոց նըմանիլ:

Էդ Հայր անակիգբն, էակից Որդի, է միշտ Սուրբ Հոգի:

Ընկա՛լ զիս, գթա՛ճ, ընկա՛լ, ողորմա՛ճ, ընկա՛լ, մարդասէ՛ր:

Թագաւո՛ր փառաց, թողութեա՛նց տուող, թո՛ղ ինձ զյանցանս:

Ժողովո՛ղ բարեաց, ժողովեա՛ եւ զիս ժողովս անդրանկաց:

Ի քէն, Տէ՛ր, հայցեմ, ի մարդասիրէդ, ինձ բժշկութիւն:

Լէ՛ր կեանք մեռելոյս, լոյս՝ խաւարելոյս, լուծանող՝ ցաւոյս:

Խորհրդո՛ց գիտող, խաւարիս շնորհեա՛ խորհուրդ լուսաւոր:

Ծնո՛ւնդ Հօր ծոցոյ, ծածկելոյս ստուերաւ ծագեա՛ զլոյս փառաց:

Կենարա՛ր Փրկիչ, կեցո՛ զմեռեալս, կանգնեա՛ զզլորեալս:

Հաստեա՛ հաւատով, հաստատեա՛ յուսով, հիմնեցո՛ սիրով:

Զայնիւս աղաչեմ, ձեռօքս պաղատիմ, ձիր բարեաց շնորհեա՛:

Ղամբարամբ լուսոյ, ղեկավա՛ր ճարտար, ղօղեալս ամբացո՛:

Ճառագա՛յթ փառաց, ճանապարհ ինձ ցոյց՝ ճեպել ի յերկինս:

Միածի՛նդ Հօր, մո՛յճ զիս յառագաստ մաքուր հարսանեացդ:

Յորժամ գաս փառօք յահագին Աւուրն, յիշեա՛ զիս, Քրիստո՛ս:

Նորոգո՛ղ հնութեանց, նորոգեա՛ եւ զիս, նորոգ զարդարեա՛:

Շնորհատո՛ւ բարեաց, շնորհեա՛ զքաւութիւն, շնորհեա՛ զթողութիւն:

Ուրախացո՛, Տէ՛ր, ոգւոյս փրկութեամբ, ոյր վասն եմ ի սուգ:

Չար մշակողին, չար սերմանց նորին չորացո՛ զպտուղն:

Պարգևի՛չ բարեաց, պարգևեա՛ իմոց պարտեացս թողութիւն:  
Ջուր շնորհեա աչացս` ջերմ հեղուլ զարտօսք, ջնջել զյանցանս:  
Ռէտի՛նդ քաղցու, ռամ հոգւոյս արբո, ռահ ցոյց ինձ լուսոյ:  
Սէ՛ր անուն Յիսուս, սիրով քով ճմլեա՛ սիրտ իմ քարեղէն:  
Վասն գթութեան, վասն ողորմութեան վերստին կեցո՛ւ:  
Տենչալւոյդ տեւեամբ տուր ինձ յագենալ, Տէ՛ր Յիսուս Քրիստոս:  
Բարո՛ւնդ երկնաւոր, բոտեա՛ զաշակերտս քամից երկնայնոց:  
Տօղ արեան քո, Տէ՛ր, ցօղեա՛ ի հոգիս, ցնծասցէ անձն իմ:  
Իիծեալս մեղօք լիծեալ աղաչեմ լիսել ինձ բարիս:  
Փրկի՛չ բոլորից, փութա՛ զիս փրկել փորձութեանց մեղաց:  
Քաւի՛չ յանցանաց, քաւեա՛ զօրհնաբանս` քեզ երգել զփառս:  
Աստուածածնին բարեխօսութեամբ յիշեա՛, Տէ՛ր, եւ ողորմեա՛:

#### Զկնի ասի աղօթքս

Զքէն գոհանամք, Տէ՛ր Աստուած մեր, որ շնորհեցեր մեզ հանգիստ քնոյ խաղաղութեամբ եւ զարթուցեալ` ժամանեցուցեր զմեզ կանխել յերկրպագութիւն ահաւոր եւ փառաւորեալ անուանդ քում սրբոյ: Տո՛ւր մեզ, Տէ՛ր, աղաչե՛մք զքեզ, զմնացուած գիշերիս խաղաղութեամբ անցուցանել եւ զամենայն ժամանակս կենաց պանդխտութեան մերոյ երկիւղիւ քո ամրացո՛ւ եւ պահեա՛: Որպէս զի, զգուշութեամբ եւ անարատ վարուք կրօնաւորեալք յայսմ աշխարհիս, ժամանեցուք յանքոյթ եւ ի խաղաղ նաւահանգիստ յաւիտենական ի կեանսդ շնորհօք եւ մարդասիրութեամբ Տեառն մերոյ եւ փրկչին Յիսուսի Քրիստոսի, ընդ որում քեզ` Հօր եւ Հոգւոյդ Սրբոյ վայելէ փառք իշխանութիւն եւ պատիւ այժմ եւ միշտ եւ յաւիտեանս յաւիտենից. ամէն:

Խաղաղութիւն ամենեցուն:

Աստուծոյ երկիրպագեցուք:

Նայեա՛ց, Տէ՛ր բարերար, ողորմութեամբ քով յերկրպագուս եւ ի փառաբանիչս անուանդ քում սրբոյ: Տէ՛ր զօրութեանց, խաղաղացո՛ր զանձինս մեր յամենայն սատանայական խռովութեանց եւ յաշխարհական զբօսանաց: Ջիրէշտակ խաղաղութեան քո առաքեա՛ առ մեզ, որ եկեալ պահեսցէ զմեզ անխռովս ի տուէ եւ ի գիշերի, յարթնութեան եւ ի հանգստեան մերում: Որպէս զի բարեպաշտութեամբ եւ արժանաւորապէս քեզ՝ Տեառնդ, ծառայելով ի կեանս յայտոսիկ, ժամանեցուք յաւիտենական երկնից արքայութեան քոյ, զոր պատրաստեցեր ի սկզբանէ աշխարհի սրբոց քոց, եւ ընդ նոսին գոհանալով՝ փառաւորեցուք զՀայր եւ զՈրդի եւ զՍուրբ Հոգիդ այժմ եւ միշտ եւ յաւիտեանս յաւիտենից:

Օրհնեալ Տէր մեր Յիսուս Քրիստոս. ամէն:

Ալէլուիա, ալէլուիա:

Աստ ասի սաղմոսս ըստ ձայնին եւ զկնի սաղմոսին ասի ըստ ձայնին  
կանոնագլուխ

Կանոնագլուխք կարգաւ ըստ ութ ձայնից:

(աձ)

Դատեա՛, Տէ՛ր, զայնոսիկ, ոյք դատեն

զիս. ալէլուիա.

մարտի՛ր ընդ այնոսիկ, ոյք մարտնչին ընդ իս. ալէլուիա:

Ա՛ն զզէն եւ զասպար քո եւ արի՛ յօգնել ինձ, հա՛ն զսուր քո ընդդէմ հալածչաց իմոց, արգե՛լ զնոսս եւ ասա՛ դու ցանձն իմ, թէ՛՝ փրկութիւն քո ես եմ:

Ամաչեցեն եւ յամօթ լիցին, ոյք խնդրէին զանձն իմ, դարձցին յետս եւ ամաչեցեն, ոյք խորհէին ինձ չար:

Եղիցին նոքա որպէս փռշի առաջի հողմոյ, եւ հրէշտակ Տեառն նեղեցէ զնոսս:

Եղիցին ճանապարհք նոցա ի խաւար եւ ի գայթակղութիւն, եւ հրէշտակ Աստուծոյ հալածեցէ զնոսս:

Ի նանիր թաքուցին ինձ որոգայթ յապականութեան իւրեանց եւ ի նանիր նախատեցին զանձն իմ:

(փ) Տէ՛ր, յերկինս է ողորմութիւն քո, ճշմարտութիւն քո մինչեւ յամպս. ալէլուիա, ալէլուիա:

Արդարութիւն քո, որպէս լերինք, Աստուա՛ծ, իրաւունք քո, որպէս խորք բազումք, զմարդիկ եւ զանասուն կեցուցանես դու, Տէ՛ր:

Որպէս զի բազում արարեր զողորմութիւն քո, Աստուա՛ծ. այլ որդիք մարդկան ի հովանի թեւոց քոց յուսասցին: Արբեացին նոքա ի պարարտութենէ՛ տան քո, եւ զուղիս փափկութեան քո տասցես ըմպել նոցա:Ի քէն է, Տէ՛ր, աղբիւր կենաց, եւ լուսով երեսաց քոց տեսանեմք զլոյս: Ծագեա՛ գողորմութիւնս քո, ոյք ճանաչեն զքեզ, զարդարութիւնս քո, ոյք ուղիղ են սրտիք: Մի՛ եկեացեն ի վերայ մեր ոտք ամբարտաւանից, եւ ձեռք մեղաւորաց մի՛ դողացուցեն զմեզ: Անդ անկցին ամենեքեան, ոյք գործեն զանօրէնութիւն, մերժեցին եւ այլ մի՛ կարասցեն հաստատիլ: Փառք Հօր եւ Որդոյ եւ Հոգւոյն Սրբոյ այժմ եւ միշտ եւ յաւիտեանս յաւիտենից. ամէն. ալէլուիա, ալէլուիա: -----

(ակ)

Ասաց անզգամն ի սրտի իւրում, թէ՛ ՝ Ոչ գոյ Աստուած. ալէլուիա:

Ապականեցան եւ պղծեցան յանօրէնութեան իւրեանց, եւ ոչ ոք է, որ առնէ զքաղցրութիւն. ալէլուիա:

Աստուած յերկնից նայեցաւ յամենայն որդիս մարդկան՝ տեսանել, թէ իցե՞ որ իմաստուն, որ խնդրիցէ զԱստուած:

Ամենեքեան խոտորեցան ի միասին եւ անպիտանացան:

Ոչ ոք է, որ առնէ զբարի, եւ չէ ոք մինչեւ ի մի:

Որպէս ոչ ծանիցեն ամենեքեան, ոյք գործեն զանօրէնութիւն,

ոյք ուտէին զժողովուրդ իմ, որպէս կերակուր հացի, եւ առ Աստուած ոչ կարդացին:

(փ) Զի ոչ գոյր նոցա փոխանակ, եւ ոչ երկեան յԱստուծոյ.

ալէլուիա, ալէլուիա:

Զգեաց զձեռն իւր՝ ի հատուցանել նոցա, եւ նոքա պղծեցին զօրէնս նոքա:

Բաժանեցան ի սրտմտութենէ երեսաց նոքա, եւ եհաս ի սիրտս նոցա:

Կակուղ էին բանք նոցա, քան զձեթ, եւ ինքեանք՝ որպէս սլաք:

Ընկեա՛ ի Տէր զհոգս քո, եւ նա կերակրէ զքեզ եւ ոչ տայ յաւիտեան սասանութիւն արդարոյ:

Դու, Աստուա՛ծ, իջուցես զնոսա ի գուրբ ապականութեան.

որք արիւնահեղք եւ նենգաւորք, մի՛ հասարակեցեն զաւուրս իւրեանց, այլ ես ի քեզ, Տէ՛ր, յուսացայ:

Փառք Հօր եւ. այժմ եւ միշտ. ալէլուիա, ալէլուիա:

-----

(բձ)

Ի քեզ, Տէ՛ր, յուսացայ, մի՛ ամաչեցից յաւիտեան. ալէլուիա.

Յարդարութեան քում փրկեա եւ ապրեցո՛ զիս. ալէլուիա:

Խոնարհեցո առ իս զունկն քո եւ կեցո՛ զիս:

Լէ՛ր իմ, Աստուա՛ծ, ապաւեն եւ տեղի ամուր՝ կեցուցանել զիս, զի հաստատութիւն իմ եւ ապաւեն իմ դու ես:

Աստուա՛ծ իմ, փրկեա՛ զիս ի ձեռաց մեղաւորի, ի ձեռաց անօրինի եւ անիրաւի:

Դու ես համբերութիւն իմ, Տէ՛ր.

Տէ՛ր, յոյս իմ ի մանկութենէ իմմէ:

Ի քեզ հաստատեցայ եւ յարգանդէ, յորովայնէ մօր իմոյ դու ես ապաւեն իմ, եւ առ ի քէն է օգնութիւն իմ յամենայն ժամ:

(փ) Երկիրպագցեն նմա ամենայն թագաւորք երկրի, եւ ամենայն ազգք ծառայեցեն նմա. ալէլուիա, ալէլուիա:

Զի փրկեաց զաղքատն ի ձեռաց հզօրի, զաղքատն եւ զոնանկն, որոյ ոչ է իւր օգնական:

Անխայեցէ նա յաղքատն եւ ի տնանկն եւ զանձինս տնանկաց կեցուցէ, ի վաշխից չարաց փրկեցէ զանձինս նոցա:

Պատուական է անուն նորա առաջի նոցա, կեցցէ եւ տացի նմա յոսկւոյն արարացւոց:

Յաղօթս կացցեն առ նա յամենայն ժամ եւ զօրհանապազ օրհնեցեն զնա:

Եղիցի հաստատութիւն ընդ ամենայն երկիր եւ ի վերայ գլխոց լերանց:

Բարձրասցի քան զԼիբանան պտուղ նորա եւ ծաղկեացի ի քաղաքի Տեառն, որպէս խոտ երկրի: Եղիցի անուն Տեառն օրհնեալ յաւիտեան, զի յառաջ, քան զարեւ է անուն նորա:

Ի նա օրհնեացին ամենայն ազգք երկրի, եւ ամենայն ազինք երանիցեն նմա:

Օրհնեալ Տէր Աստուած Իսրայելի, որ առնէ սքանչելիս միայն, եւ օրհնեալ է անուն սուրբ փառաց նորա յաւիտեան. լցցի փառօք նորա ամենայն երկիր. եղիցի, եղիցի:

Փառք Հօր եւ Որդւոյ. այժմ եւ միշտ. ալէլուիա, ալէլուիա:

-----

(բկ)

Ձողորմութիւնս քո, Տէ՛ր, յաւիտեան օրհնեցից. ալէլուիա.

ազգէ յազգ պատմեցից զճշմարտութիւնս քո բերանով իմով. ալէլուիա:

Ասացեր, թէ՛ աշխարհս ողորմութեամբ շինեցի, յերկինս պատրաստ եղիցի ճշմարտութիւն քո:

Եղի ուխտ ընտրելոց իմոց, երդուայ Դաւթի ծառայի իմոյ. □Յաւիտեան հաստատեցից զգաւակ քո եւ շինեցից ազգէ յազգ զաթոռ քո□:

Խոստովան եղիցին երկինք սքանչելեաց քոց, Տէ՛ր, եւ ճշմարտութիւն քո յեկեղեցիս սրբոց:

Ո՞վ է յամպս, որ հաւասարի քեզ, կամ ո՞վ նմանիցի Տեառն յորդիս Աստուծոյ:

(փ) Դարձուցեր զօգնութիւն ի սրոյ նորա եւ ոչ ընկալար զնա ի պատերազմի. ալէլուիա, ալէլուիա:

Անարգեցեր զսրբութիւն նորա եւ զաթոռ նորա յերկիր կործանեցեր:

Նուազ արարեր զաւուրս ժամանակաց նորա եւ հեղեր զնովաւ զամօթ:

Մինչեւ յե՞րբ դարձուցանես զերեսս քո իսպառ, բորբոքեացի որպէս հուր բարկութիւն քո:

Իսկ արդ յիշեա՛ եւ տե՛ս, թէ ո՞վ է իմ հանգիստ. միթէ ի գո՞ւր ինչ ստեղծեր զամենայն որդիս մարդկան:

Ո՞վ է մարդ, որ կեցցէ եւ ոչ տեսցէ զմահ կամ փրկեսցէ զանձն իւր ի ձեռաց  
դժոխաց:

Ո՞ւր են ողորմութիւնք քո, Տէ՛ր, առաջինք, զոր երդուար Դաւթի ճշմարտութեամբ  
քով:

Յիշեա՛ զնախաստինս ծառայի քո, զոր ընկալայ ի ծոց իմ յազգաց բազմաց:

Չոր նախաստեցին թշնամիք քո, Տէ՛ր, նախաստեցին փոխանակ օծելոյ քոյ:

Օրհնեալ Տէր Աստուած յաւիտեանս յաւիտենից. եղիցի, եղիցի:

Փառք Հօր եւ. այժմ եւ միշտ. ալէլուիա, ալէլուիա:

(գձ)

Խոստովան եղերուք Տեառն, զի քաղցր է, ալէլուիա, զի յաւիտեան է ողորմութիւն  
նորա. ալէլուիա:

Ո՞ խօսեսցի զգօրութիւնս Տեառն, լսելի արասցէ զամենայն օրհնութիւնս նորա:

Երանի՛, ոյք պահեն զիրաւունս եւ առնեն զարդարութիւն յամենայն ժամ:

Յիշեա՛ զմեզ, Տէ՛ր, ընդ հաճոյս ժողովրդեան քոյ եւ ա՛յց արա մեզ ի փրկութեան  
քում:

Տեսցուք մեք զքաղցրութիւն ընտրելոց քոց, ուրախ եղիցուք մեք յուրախութիւն  
ազգի քոյ եւ գովիցուք մեք ի ժառանգութեան քում:

Մեղաք մեք ընդ հարսն մեր, անօրինեցաք եւ յանցեաք:

(փ)

Մատնեաց զնոսա ի ձեռս հեթանոսաց, տիրեցին նոցա աստելիք իւրեանց, եւ  
թշնամիք իւրեանց նեղեցին զնոսա, եւ խոնարհ եղեն ի ներքոյ ձեռաց նոցա.  
ալէլուիա, ալէլուիա:

Բազում անգամ փրկեաց զնոսա, եւ նոքա դառնացուցին զնա ի խորհուրդս  
իւրեանց եւ կորացան յանօրէնութեան իւրեանց:

Հայեցաւ Տէր ի նեղութիւնս նոցա ի լսել ձայնի աղօթից նոցա:

Յիշեաց զուխտ իւր եւ գղջացաւ ըստ բազում ողորմութեան իւրում եւ ետ զնոսա ի  
գթութիւնս առաջի ամենայն գերչաց նոցա:

Փրկեա՛ զմեզ, Տէ՛ր Աստուած մեր, եւ ժողովեա՛ զմեզ ի հեթանոսաց:  
Խոստովան եղիցուք անուան քում սրբոյ եւ պարծեսցուք յօրհնութիւնս քո:  
Օրհնեալ Տէր Աստուած Իսրայելի յաւիտեանս յաւիտենից:  
Եւ ասացէ ամենայն ժողովուրդն՝ եղիցի, եղիցի:  
Փառք Հօր եւ. այժմ եւ միշտ. ալէ. ալէ:

(գկ)

Արարի իրաւունս եւ արդարութիւն. ալէլուիա, մի՛ մատներ զիս ի ձեռս նեղչաց  
իմոց. ալէլուիա:  
Ընկալ զծառայս քո ի բարի, զի մի՛ ամբարտաւանք զգուեսցեն զիս:  
Սպասեցին աչք իմ փրկութեան քում, Տէ՛ր, եւ բանից արդարութեան քո:  
Արա՛ ընդ ծառայի քում, Տէ՛ր, ըստ ողորմութեան քում. զարդարութիւնս քո ուսո՛  
ինձ:  
Ծառայ քո եմ ես, իմաստո՛ւն արա զիս, եւ ծանեայց զվկայութիւնս քո:  
Ժամ է պաշտել զՏէր. խափանեցին զօրէնս քո:

(փ)

Մերձեսցին խնդրուածք իմ առաջի քո, Տէ՛ր, ըստ բանի քում իմաստո՛ւն արա զիս.  
ալէլուիա, ալէլուիա:  
Մտցեն աղօթք իմ առաջի քո, Տէ՛ր, եւ բանիւ քով փրկեա՛ զիս:  
Բղիսեսցեն շրթունք իմ զօրհնութիւնս քո, յորժամ ուսուցես ինձ զարդարութիւնս  
քո:  
Խօսեսցի լեզու իմ զբանս քո, զի ամենայն պատուիրանք քո արդարութեամբ են:  
Եղիցի ձեռն քո ի կեցուցանել զիս, զի զպատուիրանս քո ընտրեցի.  
Ցանկացայ փրկութեան քում, Տէ՛ր, եւ օրէնք քո խօսք իմ էին:  
Կեցցէ անձն իմ, օրհնեսցէ զքեզ, եւ իրաւունք քո օգնեսցեն ինձ:  
Մոլորեցայ ես որպէս գոչսար կորուսեալ, խնդրեա՛ զծառայս քո, զի զպատուիրանս  
քո ես ոչ մոռացայ:  
Փառք Հօր եւ. այժմ եւ միշտ. ալէլուիա, ալէլուիա:

-----  
(դձ)

Օրհնեա, ա'նձն իմ, զՏէր,

Օրհնեցից զՏէր ի կեանս իմ. ալէլուիա.

Սաղմոս ասացից Աստուծոյ իմոյ, մինչեւ եմ ես. ալէլուիա:

Մի՛ յուսայք յիշխանս՝ յորդիս մարդկան, զի ոչ գոյ փրկութիւն ի նոսա:

Ելցէ հոգի ի նոցանէ, եւ դարձցին անդրէն ի հող, եւ յայնմ աւուր կորիցեն ամենայն  
խորհուրդք նոցա:

Երանի՛ ազգի, որոյ Տէր Աստուած Յակոբայ օգնական է նմա,

եւ յոյս նորա ի Տէր Աստուած է,

Ո արար զերկինս եւ զերկիր, զծով եւ զամենայն, որ է ի նոսա,

Ո պահէ զճշմարտութիւն յաւիտեան եւ առնէ իրաւունս զրկելոց:

(փ)

Գովեա՛, Երուսաղէ՛մ, զՏէր. ալէլուիա:

Եւ օրհնեա՛ զԱստուած քո, Սիոն՛ն,

Զի զօրացոյց զնիզս դրանց քոց եւ օրհնեաց զորդիս քո ի քեզ:

Ո եղ զսահմանս քո ի խաղաղութիւն, պարարտութեամբ ցորենոյ լցոյց զքեզ:

Առաքէ զբան իւր յերկիր, վաղվաղ ընթանան պատգամք նորա:

Դնէ զձիւն, որպէս զասր, եւ զմեզ որպէս փոշի ցանեաց:

Արկանէ զսառն որպէս պատառս. առաջի ցրտոյ նորա ո՞ կարէ կալ:

Առաքէ զբան իւր եւ հալէ զնոսա, շնչեսցեն հողմք, եւ գնացեն ջուրք:

Պատմէ զբան իւր Յակոբայ, զարդարութիւն եւ զիրաւունս Իսրայելի:

Ոչ այսպէս արար ամենայն ազգաց Տէր եւ զդատաստանս իւր ոչ յայտնեաց նոցա:

Փառք Հօր եւ. այժմ եւ միշտ. ալէլուիա:

-----  
(դկ)

Միբեցից զքեզ, Տէ՛ր, զօրութիւն իմ.

ալէլուիա.

Տէր հաստատիչ իմ, ապաւեն իմ եւ փրկիչ իմ. ալելուիա:

Աստուած օգնական իմ, եւ ես յուսամ ի նա, ապաւեն իմ, եղջիւր փրկութեան իմոյ,  
ընդունելի իմ է:

Օրհնելով կարդացից առ Տէր եւ ի թշնամեաց իմոց ապրեցայց:

Շուրջ եղեն զինեւ երկունք մահու, եւ ուղիք անօրէնութեան խռովեցուցին զիս:

Վիշտք դժոխոց պաշարեցին զիս, եւ ժամանեցին ինձ որոգայթք մահու:

Ի նեղութեան իմում ես առ Տէր կարդացի եւ առ Աստուած իմ աղաղակեցի:

(փ)

Զգեցուցեր ինձ զօրութիւն ի պատերազմի եւ զյարուցեալսն ի վերայ իմ ներքոյ իմ  
արարեր. ալելուիա, ալելուիա:

Զթշնամիս իմ հալածականս արարեր եւ զատելիս իմ սատակեցեր:

Աղաղակեցին, եւ ոչ ոք էր, որ փրկէր զնոսա. կարդացին առ Տէր, եւ ոչ լուսւ նոցա:

Մանրեցից զնոսա որպէս փոշի առաջի հողմոյ եւ որպէս կաւ գոեհաց կոխեցից  
զնոսա:

Փրկեցէ զիս Տէր ի հակառակութենէ ժողովրդոց եւ կացուցէ զիս գլուխ  
հեթանոսաց:

Ժողովուրդ, զոր ոչ զիտէի, ծառայեաց ինձ եւ ի լուր ականջաց լուսւ ինձ:

Որդիք օտարաց ստեցին ինձ, որդիք օտարաց մաշեցան եւ կաղացան ի շաւղաց  
իւրեանց:

Կենդանի է Տէր եւ օրհնեալ է Աստուած եւ բարձր եղիցի Աստուած փրկութեան իմոյ:

Աստուած է, որ ինդրէ զվրէժ իմ եւ հնազանդ առնէ զժողովուրդս ընդ ինեւ:

Փրկիչ իմ ի թշնամեաց իմոց բարկացողաց,

յայնցանէ, որ յարուցեալ են ի վերայ իմ, բարձր արարեր զիս եւ յառնէ անիրաւէ  
փրկեցեր զիս:

Վասն այսորիկ խոստովան եղէց քեզ ի հեթանոսս եւ անուան քում սաղմոս  
ասացից:

Մեծ արարեր զփրկութիւն թագաւորի նորա՝ առնել ողորմութիւն ընդ օծելոյ նորա

Դաւթի եւ ընդ զաւակի նորա ազգէ մինչեւ յազգ:

Փառք Հօր եւ այժմ եւ միշտ. ալէլուիա, ալէլուիա:

-----

Բայց թէ կանոնագլուխն ընդ սաղմոսին ասի, յետին գոբղայն զայն, որ է այլոց մարգարէից, եւս ասի: Իսկ եթէ ոչ ասի ընդ սաղմոսին, որպէս է սովորութիւն ոմանց, զկնի կանոնագլխոյն ասի՝ եւ եւս խաղաղութեան: Օրհնութիւն եւ փառք: Եւ ապա պաշտօն առնի ըստ ձայնին, եւ զկնի հանգստեան աւետարան ընթերցեալ լինի: Իսկ եթէ հանդիսի օր լինի կամ խաչի տօն, Այսօր անճառ ասի եւ խաչելութեան աւետարան ընթերցեալ լինի: Զկնի աւետարանին՝ Նորոգող տիեզերաց, ապա՝ Հոգւոցն հանգուցելոց:

Իսկ ոմանք ընդ օրհնութեանն կցորդեն զպաշտօնն եւ զկնի օրհնութեանն զաւետարան ընթեռնուն եւ զկնի՝ Հոգւոցն հանգուցելոց եւ Քրիստոս Որդի Աստուծոյ:

-----

*Կանոնագլուխ Բուն Բարեկենդանին  
եւ Նոր Կիրակէին*

(սղ)

Օրհնեա՛, ա՛նձն իմ, զՏէր, օրհնեցից զՏէր ի կեանս իմ,  
սաղմոս ասացից Աստուծոյ իմոյ, մինչեւ եմ ես:

Մի՛ յուսայք յիշխանս՝ յորդիս մարդկան, զի ոչ գոյ փրկութիւն ի նոսա:

Ելցէ հոգի ի նոցանէ, եւ դարձցին անդրէն ի հող,

եւ յայնմ աւուր կորիցեն ամենայն խորհուրդք նոցա:

Երանի՛ ազգի, որոյ Տէր Աստուած Յակոբայ օգնական է նմա,

եւ յոյս նորա ի Տէր Աստուած է,

Ո արար զերկինս եւ զերկիր, զծով եւ զամենայն, որ է ի նոսա,

Ո պահէ զճշմարտութիւն յաւիտեան եւ առնէ իրաւունս զրկելոց:

Տայ հաց քաղցելոց եւ արձակէ զկապեալս Տէր,

Տէր բանայ զաչս կուրաց եւ կանգնէ զգլորեալս Տէր,

Տէր սիրէ զարդարս, Տէր պահէ զպանդուխտս,  
զորքս եւ զայրիս ընդունի Տէր  
եւ զճանապարհս ամբարշտաց կորուսանէ:  
Թագաւորեցէ Տէր յաւիտեան,  
Աստուած քո, Սիոն, ազգէ մինչեւ յազգ:

(վ)

Օրհնեցից զքեզ գոհութեամբ ի կեանս իմ,  
սաղմոս ասացից քեզ, Քրիստոս'ս թագաւոր,  
յաղթական նոր երգով օրհնութեամբ:

(սդ)

Օրհնեցէ՛ք զՏէր, զի բարի է, սաղմոս.

Աստուծոյ մերում քաղցր եղիցի օրհնութիւն:

Շինէ զԵրուսաղէմ Տէր եւ զցրուեալսն Իսրայելի ժողովէ,

Բժշկէ զբեկեալ սիրտս եւ պատէ զամենայն վէրս նոցա:

Ո թուէ զբազմութիւն աստեղաց

եւ զամենեսեան զնոսա յանուանէ կոչէ:

Մեծ է Տէր մեր, եւ մեծ է զօրութիւն նորա,

իմաստութեան նորա ոչ գոյ բաւ:

Ընդունի զհեզս Տէր եւ խոնարհ առնէ զամբարտաւանս մինչեւ յերկիր:

Օրհնեցէ՛ք զՏէր խոստովանութեամբ, սաղմոս'ս ասացէք նմա օրհնութեամբ:

Ո զգեցոյց զերկինս ամպովք, պատրաստ արար զանձրեւ իւր յերկիր,

Բուսոյց զխոտ ի լերինս, զդալարի ի ծառայութիւն մարդկան:

Ո տայ անասնոց կերակուր, ձագուց ագռաւուց, որ կարդան առ նա:

Ոչ թէ ընդ զօրութիւնս ձիոյ կամեցաւ Տէր, եւ ոչ ընդ իրանս առն սկայի հաճեցաւ,

Այլ հաճեցաւ Տէր ընդ երկիւղածս իւր եւ ընդ այնոսիկ, ոյք յուսան յողորմութիւն  
նորա:

(վ)

Քաղցրասցին քեզ, Քրիստոս'ս, գոհութիւնք երկիւղածաց անուան քո, զոր յուսացուցեր ողորմութեամբ քով ի խորհուրդս կենսաբեր գալստեանդ քոյ:

(սդ)

Գովեա', Երուսաղէ'մ, զՏէր,

եւ օրհնեա' զԱստուած քո, Սիո'ն:

Զի զօրացոյց զնիզս դրանց քոց եւ օրհնեաց զորդիս քո ի քեզ:

Ո եղ զսահմանս քո ի խաղաղութիւն, պարարտութեամբ ցորենոյ լցոյց զքեզ:

Առաքէ զբան իւր յերկիր, վաղվաղ ընթանան պատգամք նորա:

Դնէ զձինն որպէս զասր եւ զմեզ որպէս փռշի ցանեաց:

Արկանէ զսառն որպէս պատառս. առաջի ցրտոյ նորա ո՞ կարէ կալ:

Առաքէ զբան իւր եւ հալէ զնոսա, շնչեացեն հողմք, եւ զնացեն ջուրք:

Պատմէ զբան Յակոբայ, զարդարութիւն եւ զիրաւունս Իսրայելի:

Ոչ այսպէս արար ամենայն ազգաց Տէր եւ զդատաստանս իւր ոչ յայտնեաց նոցա:

(փ) Զքեզ, Քրիստոս'ս, գովէ Եկեղեցի՝ փրկեալ քո սուրբ.

ցնծալով տեսանէ զքեզ՝ զՓրկողդ, եկեալ հայրական իշխանութեամբ՝

ի պսակել զսուրբս քո:

-----

### *Կանոնագրոյս մեծի ուրբաթու*

(սդ)

Իշխանք հալածեցին զիս ի նանիր, ալէլուիա.

եւ ի բանից քոց երկեալ սիրտ իմ, ալէլուիա:

Ցնծացայ ես ի բանս քո, որպէս այն, որ գտանէ աւար բագում. ալէլուիա, ալէլուիա.

Զմեղս ասեցի եւ անարգեցի եւ զօրէնս քո սիրեցի:

Եօթն անգամ յաւուր օրհնեցից զքեզ վասն իրաւանց եւ արդարութեան քո:

Խաղաղութիւն բագում է այնցիկ, ոյք սիրեն զօրէնս քո, եւ ոչ գոյ ի նոսա

գայթակղութիւն: Սպասեցի փրկութեան քում, Տէ'ր, եւ զպատուիրանս քո սիրեցի:

Պահեաց անձն իմ զվկայութիւնս քո եւ սիրեաց զնոսա յոյժ:

Պահեցից զպատուիրանս եւ զվկայութիւնս քո, զի ամենայն ճանապարհք իմ առաջի քո են:

(փ) Մերձեցին խնդրուածք իմ առաջի քո, Տէ՛ր, ըստ բանի քում իմաստո՛ւն արա զիս. ալէ. ալէ. ալէ.

Մտցեն աղօթք իմ առաջի քո, Տէ՛ր, բանիւ քով փրկեա՛ զիս:

Բղիւսեցն շրթունք իմ զօրհնութիւնս քո, յորժամ ուսուցես ինձ զարդարութիւնս քո:

Խօսեցի լեզու իմ զբանս քո, զի ամենայն պատուիրանք քո արդարութեամբ են:

Եղիցի ձեռն քո ի կեցուցանել զիս, զի զպատուիրանս քո ընտրեցի:

Ցանկացայ փրկութեան քում, Տէ՛ր, եւ օրէնք քո խօսք իմ էին:

Կեցցէ անձն իմ, օրհնեցէ զքեզ, եւ իրաւունք քո օգնեցեն ինձ:

Մոլորեցայ եւ որպէս զոչխար կորուսեալ, խնդրեա՛ զճառայս քո, զի զպատուիրանս քո եւ ոչ մոռացայ:

Փառք Հօր եւ. այժմ եւ միշտ. ալէ. ալէ. ալէ.

Եւ դնեն զգրակալն եւ զսուրբ Աւետարանն ի վերայ եւ զՍաղմոսարանն եւ ասեն

երկու քահանայք գ. գ. փոխս: Առաջին սաղմոս Բ. Ընդէ՞ր խոռվեցան հեթանոսք:

Տէ՛ր, զի՛ րազում եղեն: Ի կարդալ իմում լուար: Եւ այլքն եղանակեն ձայնիւ կցորդ:

(դկ) Իշխանք ժողովեցան ի միասին վասն

Տեառն եւ վասն օծելոյ նորա:

Երիցս անգամ ասասցեն եւ զլետինն՝ բարձր:

-----

Երգ տեառն Ներսիսի Հայոց Կաթողիկոսի՝ ասացեալ յաղագս մեծի ուրբաթու  
գիշերին արևտարանացն

Այսօր անձառ լուսոյն ծագումն

ի փրկութեան մեր կատարումն  
խոնարհի ի վերնատունն  
ի ստուերական տօնից լրումն.  
նախ քան զընթրիսն խորհրդոյ  
սփածաւ զենջակ արկողն լուսոյ  
եւ ջուր առեալ ծառայաբար՝  
զոտս լուանայր զաշակերտացն:

Քանին Հօր փառաց լուսոյ  
Պետրոս մերձիլ յոտս ոչ ներեր  
այնմ ձեռաց, որոյ են գործք  
երկնից երկինք եւ երկրաւորք,  
որով կուրաց աչք բացան,  
խուլք եւ համերք արձակեցան,  
որ վեր ածեաց զինքն ի ծովէն,  
սաստեաց ալեացն, եւ լռեցին:

Գլխոյն ընտրեալ հօտին փոքու  
սաստեր զխորհուրդն ոչ զիտելոյ,  
որով դառնայր եւ հնազանդեր,  
զոտս եւ զգլուխս մաքրել մաղթեր.  
զլխոյս, ասէ, չէ՛ ինչ պիտոյ լուացումն ջրոյ,  
զի լուացեալ է, ոտիցդ պետք են մաքրութեան՝  
յօդիլ ի գլուխս սրբութեամբ:

Պասուց իւրոց աշակերտաց,  
զոր նախ բանիւ վարդապետեաց,  
այսօր գործով զծայրագոյնն  
եցոյց յինքեան զխոնարհութիւն՝  
սպասաւորեալ հողեղինաց այն,

որ անտեսն է հրեղինաց,  
տարեալ պաշտօն իւր ծառայիցն  
այն, որ պաշտին ի սրովբէից:

Եթէ Տէրս, ասէ, էից  
եւ վարդապետս բոլորից  
զաշակերտացոյ եւ զծառայից  
զոտս լուացի ի հնոյ աղտից,  
միմեանց եւ դուք համաբնութեամբ  
ցուցէք զնոյն խոնարհութիւն՝  
բարձրացելոյն ի կործանումն  
եւ անկելոյ բնութեանդ կանգնումն:

Ձոր մաքրեցեր յաւազանին  
մաքուր ձեռօք զոտս նոցին  
եւ ուսուցեր խոնարհութեամբ  
յաղթող լինել չար հպարտին,  
եւ զի՛մ լուա զտիղմն մեղաց  
աղաչանօք սրբոյ գնդին  
եւ զգնացս ուղղեա՛ զոտին  
խոնարհութեամբ ելիք յերկինս:

Օրթի: Աւետարան Յովհ. ՃԺԸ ԺԴ. 16: Ամէն ամէն:

Վերջ ԺԸ. 1. եւ աշակերտքն իւր:

-----  
*Երկրորդ սաղմոս՝ Խ: Երանի՛, որ խորհի: Որպէս փափաքի: Դատ արա:*

Բան անօրէնութեան եղին ի վերայ իմ.

Տէ՛ր, Տէ՛ր, մի՛ թողուր զիս:

Էլից զօրէնսն Մովսիսի,

զոր խօսեցաւ ի Սինայի,

եկեր զգառն օրինակին

եւ զբաղարջն ընդ եղեգին,

զՀինն ի Նորս փոխելով՝

զստուերն ի լոյս ճշմարտելով՝

փոխան գառինն ինքն գոլով

Գառն Աստուծոյ նուիրելով:

Ընդ բաղարջին հաց անխմոր

ետ զմարմինն իւր զերկանաւոր՝

զկուսածինն՝ անսերմնաւոր

զանապականն եւ զհոգեւոր,

ընդ ոչխարին արեանն ուխտին

ետ մեզ զարիւնն իւր ուխտ կրկին

եւ եղեգան դառնագունին փոխան՝

զվարս աստուածային:

Թագաւորն արարածոց

զհացն կենաց ետ քաղցելոց

եւ զբաժակն ուրախարար՝

որք յԱդամայ տրտմեցելոց.

□Այս նոր ուխտ է իմոյ արեան,

փոխան հնոյ ուխտին արեանց,

զոր յիշատակ իմ առնիցէք,

մինչեւ եկից ես միւսանգամ□:

Ժողովեալքս ի քէն հայցեմք  
ընդ ժողովեալ մետասանին,  
որ զկենարարդ քո մարմին  
բաշխեալ՝ ետուր ընդ բաժակին,  
շնորհեա՛ եւ մեզ, Տէ՛ր, ընդ նոսին  
հաղորդ լինել քում սեղանին՝  
կենաց հացիդ, յոր փափաքիմք,  
եւ ըմպելոյդ, ում ծարաւիմք:

Ի յընտրելոց աշակերտացն  
Յուդաս, մեկնեալ ի սուրբ գառանցն,  
զբարձող մեղաց զԳառն Աստուծոյ  
մատներ ի մահ ընդ արծաթոյ.  
Ի յընթրիսն հոգեւոր մերձի  
Ժպիրին եւ նենգաւորն.  
ուտելով ընդ վարդապետն՝  
յաճախէ զխաբէութիւն:

Լոյսն խօսէր աղերսալի  
խաւարելոյն վասն դարձի.  
□Մի ոմն ի ձէնջ, ասէ, եղբա՛րք,  
զիս մատնելոց է առ ի մահ□:  
Պետրոս, լուեալ զայն, զարհուրէր  
եւ ակնարկէր առ Յովհաննէս՝  
հարցանել, թէ՛ ո՞վ իցէ  
դաւաճանող վարդապետին:

Օրթի: Աւետարան Ղուկ. մկ, ԻԲ 1: Մերձեցաւ տօն բաղ. Վերջ 65. խօսէին ի նա:

*Երրորդ սաղմոս՝ ՕԸ: Փրկեա զիս ի: Աստուած, մերժեցեր: Լո՛ւր, Աստուած, աղօթից:*

Փրկեա՛ զիս ի թշնամեաց իմոց, Աստուած, եւ ի հալածչաց իմոց ապրեցո՛ զիս:

Խնամով սիրոյն յիւր սիրելեացն  
գորտմութիւնն փարատեաց.  
Թացեալ պատառ՝ տայ Յուդայի՝  
նշաւակեալ զգողն մատնիչ,  
գոր առեալ եւ մերկացաւ  
յաստուածային Հոգւոյն շնորհաց,  
մատնեցաւ նախաչարին  
ընդ մատնութեան Վարդապետին:

Ծայրագոյն լուսոյն զրկեալ  
խաւարասերն արտաքս ելեալ,  
Տէրն յայտնէր լոյս եղելոցն  
զգայթակղիւն ի գիշերի,  
Պետրոս խօսէր խրախուսելի  
եւ կշտամբիւր հաւախօսի,  
զիւրն յաշխարհէ զփոխիւն ասէր  
եւ զգալուստ Հոգւոյն պատմէր:

Վեղբոնեան յայնկոյս ձորոյ  
ի վերնատունն ել խորհրդոյ,  
եմուտ պարտեզ ընդ պարտիզի,  
եմոյծ զԱդամ յադին դրախտին,  
մուծցես եւ զմեզ, Տէ՛ր, ընդ նմին,  
ուստի հաներ նախ զառաջինն,

զի ժառանգել զհայրենին  
արժանասցուք մեք վերստին:

Հոգայր զկրիցն տրտմաբար  
երիւքն եղեալ առանձնաբար,  
փրկել զաշխարհս հոգիս յօժար,  
բայց է բնութիւն մարմնոյս տկար,  
ոչ ոմն ուժեղ եւ զօրաւոր,  
եւ ոմն՝ անզօր վտանգաւոր,  
այլ մի եւ նոյն գոլ միաւոր՝  
կրէր զկիրսն կամաւոր:

Ձայնիւ մաղթէր աղօթական  
վասն իմ առ Հայր իւր էական,  
ծունր դնէր խոնարհական,  
որում կրկնի ծունր ամենայն.  
Եթէ փրկիլ մարդկան հնար է  
առանց մահու իմ, որ գրեալ է,  
բաժակ մահուս յինէն անցցէ  
ոչ իմ կամաւ, այլ քոյդ եսցէ:

Ղօղեալ յերկիւղ քրտանց հոսման  
ոլորնաձեւ կայլակ վիժման,  
ի զօրանալ հրեշտակ մերձեալ,  
զօրինական գիրն լցեալ,  
զի կատարեալ էառ զբնութիւն  
Աստուածն բան զմարդկութեան.  
պարտ էր զերկիւղ եւ զտրտմութիւն  
յիւրումն կրել տնօրէնութիւն:

*Օրթի. Աւետարան Մարկոսի՝ ՃԿԸ: ԺԴ. 27: Եւ ասէ ցնա Յիսուս: Վերջ 72. եւ սկսաւ լալ:*

-----

*Չորրորդ սաղմոս՝ ՀԸ: Աստուած մտին հե. Որ հովուեսդ Իս. Յնծացէք առ Աստուած:*

Նոքա ի ձեռանէ քումմէ մերժեցան. մէք ժողովուրդք եւ խաշն արօսի քո:

Ճառագայթ փառաց Էին,  
որ ըստ բնութեանս մարդկային  
տազնապեցար ի գիշերին,  
աղօթեցեր առ Հայր յերկինս,  
ծագեա՛ ի մեզ զլոյսդ երկնային  
եւ փարատեա՛ զերկիւղ չարին,  
մասունք հոգւոց մեր եւ մարմին  
յերկիւղ քո սուրբ բեւեռեցին:

Մերձեալ Յուդաս, որ մատնելոց,  
հանդերձ դասուն փարիեսցոց,  
անկան նման ստորանկելոցն,  
որք յաւիտեան չեն կանգնելոց,  
Յուդաս նենգաւ համբուրելով՝  
առիթ մահու նշան տալով,  
փոխան սիրոյ զնա մատնելով,  
չար ընդ բարոյ վճարելով:

Յայնժամ առ գութ սիրոյն Պետրոս  
զձառային՝ անուն Մաղքոս,

Էհատ սուսերբ զականջն աջոյ,  
որ ոչ լուաւ Տեառն իւրոյ,  
իսկ Տէրն մեր արագապէս  
յունկն մերձեալ բժշկապէս,  
առողջացոյց աստուածապէս,  
զոր ոչ տեսին կուրացն հանդէս:

Նոր հօտին փոքու ցրուեալ,  
քանզի զՀովին քաջ հարեալ,  
Պետրոս միայն զհետ երթեալ,  
ի յաղջկանէ վիմին շարժեալ,  
նշանակեալ հաւն խօսէր,  
առ ի Պետրոս Տէրն ակնարկէր,  
զբանն յիշէր, դառն արտասուէր,  
ի գլորմանէն դարձեալ կանգնէր:

Շնորհեալ վիմին եկեղեցոյ,  
զոր պահեցեր ի հոսելոյ  
եւ կանգնեցեր ի գլորելոյ  
վասն սրտին արտասուելոյ,  
կանգնեա՛ եւ զիս, Տէ՛ր, ընդ նմին  
ի գլորմանէ սայթաքողին,  
տալով աչացս յորդ արտասուս  
եւ ջուր՝ նման ծովու գլխոյս:

Ով կամաւ զանկապելին  
կապեալ զձեռս Արձակողին  
ի յապարանսն տանէին  
Կայիափայ եւ Աննային.  
Ծառայն զերեսն այն ապտակէր,

յորմէ սրովբէն թեւասքողէր,  
թուք արձակեալ պիղծ բերանովն  
յայն, որ կուրին լոյս ծագեաց թքովն:

*Օրթի: Աւետարան Մատթէոսի. ՄՁԸ. ԻՁ. 31 Յայնժամ ասէ ցնոսա: Վերջ 56. եւ  
փախեան:*

-----  
*Հինգերորդ սաղմոս ՃԸ: Աստուած օրհնութեան:*

*Ասաց Տէր ցՏէր իմ: Խոստովան եղերուք:*

Խօսեցան զինէն լեզուաւ նենգաւորաւ եւ բանիւ ատելութեան զիս պաշարեցին:

Չար կապանաց մարդկան լուծիչ,  
որ կապեցար ընդ կապելոյն,  
զիս արձակեա յինքնակապէս  
մեղաց կապից դժոխայնոյն,  
որ ընդ մեղօք պարտաւորին  
կացեր անմեղդ ի յատենի,  
յորժամ փառօք գաս հայրենի,  
մի' դատեսցես զիս ընդ նոսին:

Պատկառանօք հինն Ադամայ,  
որ ձաղեցար վասն նորա,  
ջնջեա' գամօթ մեղաց լրբին,  
որով զերեսս իմ ծածկեցին,  
որ ներեցեր չար ծառային`  
ածել ձեռօք քեզ ապտակին,

հա՛ր ուժգնակի զղէմս չարին,  
որպէս եւ զիս եհար ուժգին:

Ջահն լուսոյ յառաւօտին  
ի յուրբաթուն հնոյ զատկին  
կայր առաջի դատաւորին,  
ծառայն նստէր ի յատենին.  
ի հարցանել Պիղատոսի  
Տէրն ոչ առնէր պատասխանի,  
զի կանխասաց զիրն լցցի.  
□Եղէ ես մարդ, որ ոչ խօսի□:

Ռամկական դասք զինուորացն  
արկին հանդերձ նախատանաց  
այնմ, որոյ զգեստն է լոյս փառաց,  
իբրեւ զօթոց զինքեամբ արկած,  
ի ծունր իջեալ կատակէին,  
զզլուխն եղեգամբ հարկանէին,  
պսակ ի փշոց բալորէին  
զփուշ մեղացն բարձողին:

Սոսկալին քերովբէից  
բառնայր ինքեամբ զփայտ խաչին,  
մինչ ի տեղի Գողգոթային,  
յորում եղեալ մարդն առաջին,  
ետուն ըմպել զինի զմոսեալ  
եւ կերակուր լեղեաւ խառնեալ,  
որով զպտղոյն դառն ճաշակ  
փոխեաց մեզ քաղցր եւ ախորժակ:

Վերնականքն զարհուրեալ  
տեսին զՏէրն մերկացեալ  
եւ զհանդերձսն բաժանեալ,  
պատմուճանին վիճակ արկեալ,  
զձեռսն եւ զոտսն ծակեցին՝  
ըստ յայտնապէս Դաւթեան ձայնին,  
ընդ փայտ խաչին բեւեռեցին  
զմատունսն, որ գրեաց ի տախտակին:

*Օրթի: Աւետարան Մատթէոսի՝ 32: Ի.Ձ. 57: Իսկ նոցա կալեալ. Վերջ 75 էլաց  
դառնապէս:*

*Վեցերորդ սաղմոս ՃԺԷ: Խոստովան եղերուք Տեառն, զի բա. մինչեւ ցայն տունն, որ  
ասէ՝ բացէք ինձ զղորունս արդարութեան:*

Խոստովան եղերուք Տեառն, զի բարի է, զի յաւիտեան է ողորմութիւն նորա:

Տարածեալ ձեռք ընդ ձեռաց,  
ոտք ընդ ոտից ընթանալեաց,  
փայտ ընդ փայտի դառն պտղոյ  
կեանք ընդ մահու փոխարկելով,  
ի մէջ երկուց անօրինաց  
կայր մերկացեալ Տուողն օրինաց,  
զոր ոչ տեսին ազգն կուրաց,  
բայց ի միոյն յաւազակաց:

Բոպէից արեգականն  
զտին արար զիշերանման,  
զստուերն քօղ արկ մերկութեան,  
զի մի՛ տեսցէ ակն անարժան,

ի միջօրեայն նսեմացաւ,  
յորժամ Ադամ մեղօք մեռաւ,  
ի յիններորդն ի լոյս դարձաւ,  
յորժամ մահուամբ մահն լուծաւ:

Յօղէր արտօսք ցաւագին  
մայր Տեառն, որ կայր մերձ առ խաչին.  
յորժամ լսէր զծարաւին  
բարբառելոյ իւր Միածնին.  
Ետուն քացախ խառնեալ լեղի  
այնմ, որ բղխեաց գետ յաղենի  
եւ ի վիմէն վտակ բարի  
արբոյց տոհմին դառնացողի:

Իհիծեալ յերրորդ ժամու օձին  
զմիտս նախնւոյ մօրն Եւայի.  
ի վեցն անկեալ մարդն առաջին  
հաւանական բանիւ նորին.  
ի սոյն ժամու Տէրն ի խաչին,  
զի քաւեսցէ զմեղս նոցին.  
եւ յորժամ ել Ադամն հին,  
եղ զաւագակն ի մէջ դրախտին:

Փարելի բարբառ ընդ իմ  
□Էլի', էլի'□ առ Հայր գոչէր.  
զհոգին կամաւ Հօր աւանդէր,  
զհոգիս մարդկան նոյն ընծայէր.  
Երկիր հիմամբք սասանեցաւ,  
եւ վարագոյրն ընդ մէջ հերձաւ,  
վէմք ի յինքեանց պատառեցան,

Եւ գերեզմանք մահու բացան:

Քարոզի ի սքանչելեացս

Աստուած մարմնով վասն իմ խաչեալ,

մերով բնութեամբս մեռանի,

Աստուած անմահ խոստովանի,

կրկնավտակ կողին աղբերքք

Եկեղեցի իւր հաստատի,

ջրովն մաքրի, զարիւնն ըմպէ,

զՈրդի ընդ Հօր փառաւորէ:

*Օրթի: Աւետարան Յովհ. ՃԺԷ: ԺԸ. 2 Գիտէր եւ Յուդա: Վերջ 27. հաւ խօսեցաւ:*

-----

Կանոնազույս մեծի շարաթուն

*Դատեա՛, Տէ՛ր, զայնոսիկ, ոյք դատեն*

զմահու *Դատեան* ասա:

-----

*Նորին Ներսիսի երգ մեծի ուրբաթու ցերեկին*

(բկ) (դկ)

Նորոզո՛ղ տիեզերաց,

որ զգեցուցեր մեզ լոյս փառաց,

արկար զքեւ ի զինուորաց

քղամիդ կարմիր նախատանաց,

մերկեա՛ յինէն զքուրձ մեղաց՝

զտրտմագինն արեամբ ներկած,

Եւ զգեցո՛ գուրախալին՝

զպատմուճանն իմ զառաջին:

Երկնաւոր թագաւորիդ  
ի ծունր իջեալ խաղ առնէին,  
ծածկեալ զգլուխդ կռփէին  
եւ եղեգամբ հարկանէին,  
եւ զիմ անկեալ մինչ ի գետին՝  
ի հնազանդել կամաց չարին,  
մի՛ թողուցուս խաղալ սովին,  
այլ կանգնեսցես զիս վերստին:

Բամեալ բոլորդ քո մարմին  
յետ վճռոյ դատաւորին  
սաստիկ էառ զհարուած գանին  
վասն գանից նախաստեղծին,  
զիս, որ յոտից մինչեւ ցգլուխ  
ցաւօք նեղիմ անհնարին,  
առողջացո՛ դարձեալ կրկին,  
որպէս շնորհօք յԱւագանին:

Սրբափայլ պճնեալ զարդուն,  
զոր զգեցուցեր Ահարոնին,  
փոխան պսակ ի փշոց եղին  
մշակք այգւոյն Իսրայելին,  
զփուշ մեղաց հանցես յինէն,  
զոր յիս եհար իմ թշնամին,  
եւ ողջացո՛ զխայթուած վիրին,  
զի սպիք մեղացն ջնջեսցին:

*Օրթի: Աւետարան Մատթէոսի՝ ՅԺԷ: ԻԷ. 1: Իբրեւ այգ եղև: Վերջ 56. եւ մայր  
որդւոցն Ձերեթեայ:*

-----

(բձ) (դձ)

Ետուն ըմպել քեզ զլեղին  
եւ զքացախն ի ծարաւին.  
արբեր կամաւ, զի քաղցրասցին  
ճաշակք պտղոյն դառնագունին,  
զդառնութիւն թիւնաւորին,  
զոր ի մասունս հոգւոյս արկին,  
հերքեա՛ ի բաց հանդերձ սովին,  
եւ քաղցրասցի սեր քո ի սմին:

Ստեղնեալ ծառոյ մահաբերին  
այնմ, որ բուսաւ ի մէջ դրախտին,  
փոխան բարձեր զփայտ խաչին,  
ի Գողգոթա հաներ տեղին,  
զիմ առ ի մեղս անկեալ զոգի  
եւ ծանրագոյն, բարձո՛ղ բերին,  
բա՛րձ ի յուսոյդ ըստ ոչխարին,  
հա՛ն ի յերկինս՝ յուխտեալ տեղին:

Ի յուրբաթու ժամ երրորդին  
բեւեռեցար, Տէ՛ր, ի խաչին.  
լուծեր զկապանս նախաստեղծին  
եւ կապեցեր զթշնամին,  
զիս ամբացո՛ ընդ հովանեաւ  
կենդանարար քո նշանին

Եւ ի ծագելն յարեւելից  
լուսաւորեա՛ լուսով նորին:

Էրանեալ աւագակին  
բացեր գոռուն աղին դրախտին,  
ըստ հաւատոյ սրտի նորին  
կատարեցեր զխնդրելին,  
տո՛ւր եւ ինձ, Տէ՛ր, ընդ նմին  
լսել զնոյն պատասխանին.  
□Այսօր ընդ իս իցես յաղին՝  
ի հայրենիս քո առաջին□:

*Օրթի: Աւետարան Մարկոսի՝ ՃՂԸ: ԺԵ 1: Եւ վաղվաղակի: Վերջ 41. Եկեալ էին  
յԵրուսաղէմ:*

-----

(ակ) (գկ)  
Բարբառելով զօղի էլիօն՝  
հիմունք երկրի տատանէին,  
Եւ վարագոյր հին օրինին  
վերուստ ի վայր պատառէին.

արդ, ընդ վիմացն, որ շարժէին,  
շարժեա՛ զանշարժ սիրտս ի բարին,  
ընդ պատառել վարագուրին  
զի՛մ պատառեա զգիր պարտին:

Արեգական լոյս արկեալ  
խաւարանայր միջօրէին,

Եւ գերեզմանք բանային,  
մարմինք սրբոցն յառնէին,  
ընդ խաւարել լուսաւորացն  
մաքրեա՛ յինէն զգործ խաւարին,  
ընդ մեռելոցն, որք յառնէին,  
կանգեա՛ զմեղօք մեռեալ հոգիս:

Նոր սիրոյ պատուիրանին  
գործով լցող եղեր բանին,  
աղօթելով առ Հայր յերկինս՝  
թողուլ զմեղս, որ ի խաչին,  
ինձ, որ հոգւովս հաւատացեալ  
երկրպագեմ քեզ, Միածի՛ն,  
թո՛ղ զլուծումն հրամանին,  
մի՛ յիշեսցին մեղքն առաջին:

Մարսեցին սանդարամետք  
ի յաւանդել առ Հայր զհոգիդ.  
որ ի դժոխս իջեր ներքին՝  
ի բանտ մահու եւ խաւարին.  
կապեալ զիշխանն մահածին՝  
հաներ զհոգիսն, որ ի բանտին,  
Եւ զի՛ս հանցես, Տէ՛ր, ընդ նոսին  
բանտէ մեղաց աղջամղջին:

*Օրթի: Աւետարան Ղուկասու՝ ՄՂԵ: ԻԲ. 66: Եւ իբրեւ այգ եղև: Վերջ ԻԳ. 49.  
տեսանէին զայն:*

Աղբերացն անապական,  
որ յետ մահուն անմահարար,  
բղիւեալ ի քէն վտակ կրկին  
ի նորոգումն կողածնին,  
բաց զբերան իմ յարբուցումն  
քո արեան կենարարին,  
լուա՛ դարձեալ յԱւագանին,  
թէ ոչ շնորհօք, այլ արտասուօք:

Յանմահիդ մեռանելոյ  
զմեռեալ հոգիս կենդանացո,  
թաղմամբ ի նոր գերեզմանի  
զթաղեալս ի մեղս վերածեա՛,  
ի գբի ներքնումն իջանելով  
ի գբոյն մեղաց վերաբերեա՛,  
ի ստուեր մահու քո բնակելով  
լուսաւորեա՛ եւ զիս հոգւով:

Միրտ իմ առ քեզ աղաղակէ,  
Բա՛նդ, որ ընդ Հօր ի սկզբանէ,  
որ կամաւոր վասն մարդկան  
կրեցեր մարմնով զայս ամենայն,  
ինձ լսելի՛ արա զձայն  
յարքայութեանդ քո կոչման՝  
ընդ ժողովոցն անդ անդրանկացն  
օրհնել զքեզ միշտ յաւիտեան:

*Օրթի: Աւետարան ըստ Յովհաննու՝ ՃՂԷ: ԺԹ. 17. Եւ նորա առեալ: Վերջ 37. յոր  
խոնկեցինն:*

Ի հանդիսի տերունիս կամ ի տօնս խաչի զկնի Այսօր անճառին ասի սաղմոս կցորդ. Նշանեցաւ: Փոխ. Ի կարդալ իմում: Եւ ապա ընթերցեալ լինի աւետարան խաչելութեան ըստ ձայնին. եւ զկնի ասի շարական՝ *Նորոգող*: Իսկ ոմանք զաւետարանի շարականն միայն ասեն, եւ ոմանք զՆորոգողն համայն ասեն. կամք քո է: Բայց յորժամ զպաշտաման շարականսն հանգստեան ասես, զկնի շարականացն ասի սաղմոս ըստ ձայնին, եւ ընթերցեալ լինի աւետարան ըստ ձայնին. եւ զկնի աւետարանին ասի յԱստուած անեղ *էն* փոխ մի. զկնի Աստուած անեղին՝ *Հոգւոցն հանգուց*: Եւ ոմանք ընդ Աստուած անեղին երբեմն-երբեմն կցորդեն *Արարիչ* եւ մարդասէրի *զմի տունն*. եւ կամ Ես ասացի *էն զմի տունն*՝ կամք քո է: Եւ ապա Հոգւոցն հանգու: Քրիստոս Որդի Աստուծոյ եւ Հայր մեր, որ յերկինս:

-----

*Սաղմոսք ըստ ութ ձայնիցն նախ քան զաւետարանն:*

(աձ) Տէ՛ր, մի՛ տրտմութեամբ քով յանդիմաներ զիս եւ մի՛ բարկութեամբ քով խրատեր զիս:

Ողորմեա՛ ինձ, Տէ՛ր, զի հիւանդ եմ ես, բժշկեա՛ զանձն իմ, զի խռովեցան ոսկերք իմ: Անձն իմ յոյժ խռովեցաւ, եւ դու, Տէ՛ր մինչեւ յե՞րբ:

Դա՛րձ, Տէ՛ր, եւ փրկեա՛ զանձն իմ, կեցո՛ւ զիս, Տէ՛ր, ըստ ողորմութեան քում:

Զի ոչ ոք է, որ ի մահու յիշէ զքեզ, կամ ի դժոխս խոստովան առնիցի առ քեզ:

Վաստակեցայ ես ի հեծութեան իմում, լուսցի զամենայն զիշեր զմահիճս իմ եւ արտասուօք իմովք զանկողինս իմ թացի:

Խռովեցաւ ի սրտմտութենէ ակն իմ, մաշեցայ ես ի վերայ ամենայն թշնամեաց իմոց:

Ի բա՛ց կացէք յինէն ամենեքեան, ոյք գործէք զանօրէնութիւն:

Լուաւ Տէր ձայնի լալոյ իմոյ, լուաւ Տէր աղօթից իմոց եւ Տէր զինդրուածս իմ ընկալաւ:

Ամաչեացեն եւ խոովեցին յոյժ ամենայն թշնամիք իմ, դարձցին յետս եւ ամաչեացին յոյժ վաղվաղակի եւ խոովեցին:

*Ի տէրունի աւուրս, եթէ ԱԶ է, զայս սաղմոս ասա:*

(աձ) Տէ՛ր, ո՞վ կացցէ ի խորանի քում, կամ ո՞վ բնակեցէ ի լեառն սուրբ քո:

Որ գնայ անբիծ, գործէ զարդարութիւն, խօսի զճշմարտութիւն ի սրտի իւրում, որ ոչ նենգաւորեաց լեզուաւ իւրով եւ չար ընկերի իւրում ոչ արար:

Նախաստինս ի մերձաւորաց նա ոչ առնու, արհամարհեալ է առաջի նորա չարագործն:

Զերկիւղածս Տեառն փառաւոր առնէ, որ երդնու ընդ ընկերի իւրում եւ ոչ ստէ, զարծաթ իւր ի վարձու ոչ տայ եւ կաշառս ի վերայ իրաւանց ոչ առնու. որ զայս արասցէ, նա մի՛ սասանեցի յաւիտեան:

-----

(ակ) Բարձր առնեմ զքեզ, Տէ՛ր, զի ընկալար զիս, եւ ոչ ուրախ արարեր զթշնամին իմ յիս:

Տէ՛ր Աստուած իմ, կարդացի առ քեզ, եւ բժշկեցեր զիս. Տէ՛ր, հաներ ի դժոխաց զանձն իմ, փրկեցեր զիս յայնցանէ, որ իջանեն ի գուր:

Սաղմո՛ս ասացէք Տեառն, սո՛ւրբք նորա, եւ խոստովա՛ն եղերուք յիշատակի սրբութեան նորա:

Սրտմտութիւն է ի բարկութեան նորա, եւ կեանք են ի կամաց նորա:

Ընդ երեկոյս հանգիցեն լալիք, առաւօտու եղիցի ուրախութիւն:

Ես ասացի ի բարեկենդանութեան իմում, թէ ոչ սասանեցայց յաւիտեան:

Տէ՛ր, ի կամս քո ետուր գեղոյ իմոյ զօրութիւն, դարձուցեր զերեսս քո յինէն, եւ ես եղէ խոովեալ:

Առ քեզ, Տէ՛ր, կարդացի, եւ առ Աստուած իմ աղաղակեցի. զի՞նչ օգուտ է քեզ յարենէ իմմէ, թէ իջանեմ ես յապականութիւն:

Միթէ՛ հող խոստովա՞ն առնիցի առ քեզ կամ պատմեցէ՞ զճշմարտութիւնս քո:

Լուաւ ինձ Տէր եւ ողորմեցաւ եւ Տէր եղեւ ինձ օգնական:

Դարձոյց զսուգ իմ յուրախութիւն, եզերծ յինէն զքուրձ եւ ինձ զգեցոյց զուրախութիւն:

Որպէս սաղմոս ասասցեն քեզ փառք իմ, եւ այլ մի՛ եւս զղջացայց. Տէ՛ր Աստուած իմ, յաւիտեան խոստովան եղէց քեզ:

-----

(բձ) Աստուա՛ծ, յանուան քում կեցո՛ղիս եւ ի զօրութեան քում իրա՛ւ արա ինձ:

Աստուա՛ծ, լո՛ւր աղօթից իմոց, ո՛ւնկն դիր քանից բերանոյ իմոյ:

Օտարք յարեան ի վերայ իմ, եւ հօրք ինդրեցին զանձն իմ եւ ոչ համարեցան զքեզ Աստուած առաջի իւրեանց:

Ահա Աստուած օգնական իմ, եւ Տէր ընդունող հոգւոյ իմոյ:

Ի դարձուցանել զչարն ի թշնամիս իմ, ճշմարտութեամբ քով սատակեա՛ զնոսա:

Ես կամօք իմովք պատարագս մատուցից քեզ, խոստովան եղէց անուան քում, Տէ՛ր, զի բարի է:

Յամենայն նեղութենէ իմմէ փրկեցեր զիս, եւ ի թշնամիս իմ ետես ակն իմ:

-----

(բկ) Աստուա՛ծ, ողորմեա՛ մեզ եւ օրհնեա՛ զմեզ, երեւեցո՛ղ զերեսս քո ի մեզ եւ ողորմեա՛ մեզ:

Ճանաչել յերկրի ճանապարհս քո, յազիս ամենայն զփրկութիւնս քո:

Խոստովան եղիցին առ քեզ ժողովուրդք, Աստուա՛ծ, խոստովան եղիցին առ քեզ ժողովուրդք ամենայն:

Ուրախ եղիցին եւ ցնծասցեն ազինք, զի դու դատես զժողովուրդս ուղղութեամբ եւ ազգաց երկրի դու առաջնորդես:

Խոստովան եղիցին առ քեզ ժողովուրդք, Աստուա՛ծ, գոհասցին զքէն ժողովուրդք ամենայն:

Երկիր ետ զպտուղ իւր, եւ օրհնեաց զմեզ Աստուած, Աստուած մեր:

Աստուած մեր օրհնեսցէ զմեզ, եւ ի նմանէ երկիցեն ամենայն ծագք երկրի:

-----  
(գձ) Հաճեցար, Տէ՛ր, ընդ երկիր քո եւ դարձուցեր զգերութիւն Յակոբայ:

Թողեր զանիրաւութիւն ժողովրդեան քո եւ ծածկեցեր զամենայն մեղս նոցա:

Լռեցուցեր զամենայն սրտմտութիւնս քո եւ դարձար ի բարկութենէ սրտմտութեան քո:

Դա՛րձ առ մեզ, Աստուած փրկի՛չ մեր, եւ դարձո՛ գարտմտութիւնս քո ի մէնջ:

Մի՛ յաւիտեան բարկանար մեզ, Տէ՛ր, եւ մի՛ ձգեր զբարկութիւն քո ազգէ մինչեւ յազգ:

Աստուա՛ծ, դու դարձեալ կեցուցես զմեզ, եւ ժողովուրդ քո ուրախ եղիցի ի քեզ:

Ցո՛յց մեզ, Տէ՛ր, զողորմութիւնս քո, եւ զփրկութիւնս քո տո՛ւր մեզ:

Լուաք՝ զինչ խօսի Տէր Աստուած մեր. խօսեցի զխաղաղութիւն ժողովրդեան իւրոյ առ սուրբս իւր եւ առ այնոսիկ, որ դարձեալ են առ նա սրտիւք:

Սակայն մերձ է առ երկիւղածս իւր փրկութիւն նորա՝ բնակիլ փառաց նորա յերկրի մերում:

Ողորմութիւն եւ ճշմարտութիւն պատահեցին, արդարութիւն եւ խաղաղութիւն համբուրեցին:

Ճշմարտութիւն յերկրէ բուսաւ, արդարութիւն յերկնից երեւեցաւ:

Տէր տացէ զբաղցրութիւն, եւ երկիր մեր տացէ զպտուղ իւր. արդարութիւն առաջի նորա գնասցէ, դիցէ ի ճանապարհի զգնացս իւր:

-----  
(գկ) Տէ՛ր, լո՛ւր աղօթից իմոց, աղաղակ իմ առ քեզ եկեացէ, եւ մի՛ դարձուցաներ զերեսս քո յինէն:

Յաւուր նեղութեան իմոյ խոնարհեցո՛ առ իս զունկն քո, յորում աւուր կարդամ առ քեզ, վաղվաղակի լո՛ւր ինձ:

Սպառեցան որպէս ծուխ աւուրք իմ, եւ ոսկերք իմ որպէս խոփ չորացան:

Հարայ ես որպէս խոտ, եւ ցամաքեցաւ սիրտ իմ, մոռացայ ուտել զհաց իմ ի ձայնէ հեծութեան իմոյ:

Կցեցաւ ոսկր իմ ի մարմին իմ, նմանեցայ եւ հաւալսան անապատի:

Եղէ եւ որպէս բու յաւերակի, տքնեցայ եւ եղէ եւ որպէս ճնճողուկ միայն ի տանիս:

Նախատեցին զիս թշնամիք իմ զօրհանապագ, եւ գովիչք իմ ինեւ երդնուին:

Զմոխիր որպէս հաց կերայ եւ զըմպելին իմ արտասուօք խառնեցի յերեսաց  
բարկութեան սրտմտութեան քո, զի դու բարձրացուցեր եւ խոնարհեցուցեր զիս:

Աւուրք իմ որպէս հովանի անցին, եւ եւ որպէս խոտ ցամաքեցայ:

Դու, Տէ՛ր, յաւիտեան կաս, եւ յիշատակ քո ազգէ մինչեւ յազգ:

Դու յարուցեալ գթասցիս ի վերայ Միոնի, ժամանակ գթալոյ նորա հասեալ է ժամ:

-----

(դձ) Մերձեցին խնդրուածք իմ առաջի քո, Տէ՛ր, ըստ բանի քում իմաստո՛ւն արա  
զիս:

Մտցեն աղօթք իմ առաջի քո, Տէ՛ր, եւ բանիւ քով փրկեա՛ զիս:

Բղխեցեն շրթունք իմ զօրհնութիւնս քո, յորժամ ուսուցես ինձ զարդարութիւնս  
քո:

Խօսեցի լեզու իմ զբանս քո, զի ամենայն պատուիրանք քո արդարութեամբ են:

Եղիցի ձեռն քո ի կեցուցանել զիս, զի պատուիրանս քո ընտրեցի:

Ցանկացայ փրկութեան քում, Տէ՛ր, եւ օրէնք քո խօսք իմ էին:

Կեցցէ անձն իմ, օրհնեցէ զբեզ, եւ իրաւունք քո օգնեցեն ինձ:

Մոլորեցայ եւ որպէս զոչխար կորուսեալ, խնդրեա՛ զճառայս քո, զի զպատուիրանս  
քո եւ ոչ մոռացայ:

-----

(դկ) Տէ՛ր, լո՛ւր աղօթից իմոց, ո՛ւնկն դիր խնդրուածաց իմոց ճշմարտութեամբ քով:

Լո՛ւր ինձ արդարդութեամբ քով եւ մի՛ մտաներ ի դատաստան ընդ ճառայի քում,  
զի ոչ արդարանայ առաջի քո ամենայն կենդանի:

Հալածեաց թշնամին զանձն իմ, խոնարհ արար յերկիր զկեանս իմ եւ նստոյց զիս ի  
խաւարի՝ որպէս մեռեալ յաւիտենից:

Զանձրացաւ յիս հոգի իմ, եւ սիրտ իմ խռովեցաւ յիս:

Յիշեցի զաւուրսն զառաջինս, խորհեցայ յամենայն ի գործս քո, յարարածս ձեռաց քոց խորհեցայ եւ համբարձի առ քեզ զձեռս իմ:

Անձն իմ որպէս զերկիր ծարաւի է առ քեզ, վաղվաղակի լո՛ւր ինձ, Տէ՛ր, զի նուաղեաց յինէն հոգի իմ:

Մի՛ դարձուցանէր զերեսս քո յինէն. նմանիցիմ այնոցիկ, ոյք իջանեն ի գուր:

Լսելի՛ արա ինձ առաւօտուց զողորմութիւնս քո, զի ես ի քեզ, Տէ՛ր, յուսացայ:

Ցո՛յց ինձ ճանապարհ, յոր եւ գնացից, զի առ քեզ, Տէ՛ր, համբարձի զանձն իմ:

Փրկեա՛ զիս ի թշնամեաց իմոց, Տէ՛ր, զի զքեզ ապաւէն ինձ արարի:

Ուսո՛ ինձ առնել զկամս քո, զի դու ես Աստուած իմ:

Հոգի քո բարի առաջնորդեսցէ ինձ ի յերկիր ուղիդ:

Վասն անուան քո, Տէ՛ր, կեցուցես զիս, արդարութեամբ քով հանցես ի նեղութենէ զանձն իմ:

Ողորմութեամբ քով սատակեա՛ զթշնամիս իմ եւ կորո՛ զամենայն նեղիչս անձին իմոյ, զի ես ծառայ քո եմ:

-----

*Ի Տէրունի աւուրս, եթէ ձայնն դկ իցէ, զայս սաղմոս ասա*

(դկ) Ի խորոց կարդացի առ քեզ, Տէ՛ր. Տէ՛ր, լուր ձայնի իմում,

Եղիցին ականջք քո ի լսել զձայն աղօթից իմոց:

Թէ զանօրէնութիւնս իմ քննես, Տէ՛ր. Տէ՛ր, իսկ ո՞ կարէ կալ առաջի քո. զի ի քէն է քաւութիւն:

Վասն անուան քո համբերի, Տէ՛ր, համբեր անձն իմ բանի քում, յուսացաւ անձն իմ ի Տէր:

Ի պահէ առաւօտու մինչեւ յերեկոյ, ի պահէ առաւօտու յուսացաւ Բարայէլ ի Տէր:

Ի Տեառնէ է ողորմութիւն բազում, ի նմանէ է փրկութիւն, եւ նա փրկեաց զԲարայէլ յամենայն նեղութեանց նորա:

-----

*Ձկնի սաղմոսացս ընթերցեալ լինի աւետարան ըստ ձայնին:*

*Մրբոյ աւետարանիս Յիսուսի Քրիստոսի, որ ըստ Մատթէոսի. ԺԳ. 36:*

*Տեառն մերոյ Յիսուսի Քրիստոսի.*

(Բկ) (դկ)

Յայնժամ թողեալ Յիսուսի գժողովորդսն՝ եկն ի տուն: Մատեան առ նա աշակերտքն եւ ասէն. «Մեկնեա՛ մեզ գառակ որումանցն ագարակի»: Նա պատասխանի ետ եւ ասէ ցնոսա. «Որ սերմանէ սերմն բարի, է որդի մարդոյ, եւ ագարակն աշխարհս է: Մերմն բարի նոքա են, որ որդիքն արքայութեան են, իսկ որումն որդիք չարին են: Եւ թշնամին, որ վարեաց զայն, սատանայ է, եւ հունձքն կատարած աշխարհիս է, եւ հնձողքն հրեշտակք են: Որպէս ժողովի որումն եւ ի հուր այրի, այնպէս եղիցի ի կատարածի աշխարհիս. առաքեսցէ որդի մարդոյ զհրեշտակս իւր, եւ ժողովեսցեն յարքայութենէ նորա զամենայն գայթակղութիւնս եւ զայնոսիկ, ոյք գործեն զանօրէնութիւն, եւ արկցեն զնոսա ի հնոց հրոյ. անդ եղիցի լալ եւ կրճել ատամանց: Յայնժամ արդարքն ծագեսցին, իբրեւ զարեգակն, յարքայութեան երկնից: Որ ունիցի ականջս լսելոյ, լուիցէ՛:

Դարձեալ՝ նման է արքայութիւն երկնից գանձի ծածկելոյ յագարակի, զոր գտեալ մարդոյ՝ թաքոյց. եւ ի խնդութենէ անտի երթայ վաճառէ զամենայն ինչ, զոր ունի, եւ գնէ զագարակն զայն:

Դարձեալ՝ նման է արքայութիւն երկնից առն վաճառականի, որ խնդրիցէ մարգարիտս գեղեցիկս: Եւ գտեալ մի պատուական մարգարիտ՝ երթեալ վաճառեաց զամենայն, զոր ինչ ունէր, եւ գնեաց զայն մարգարիտ:

Դարձեալ՝ նման է արքայութիւն երկնից ուռկանի՝ արկելոյ ի ծով եւ յամենայն ազգաց ժողովելոյ, զոր իբրեւ լցաւ, հանեալ ի ցամաք եւ նստեալ ժողովեցին զբարի բարին յամանս եւ զխոտանն ի բաց ընկեցին: Այնպէս եղիցի ի կատարածի աշխարհիս. ելցեն հրեշտակք եւ մեկնեսցեն զչարս ի միջոյ արդարոց եւ արկցեն զնոսա ի հնոց հրոյն. անդ եղիցի լալ եւ կրճել ատամանց:

Ասէ ցնոսա Յիսուս. □Իմացարո՞ւք զայս ամենայն□: Ասեն ցնա. □Այո՛, Տէ՛ր□: Եւ նա  
ասէ ցնոսա. □Վասն այսորիկ ամենայն դպիր՝ աշակերտեալ արքայութեան  
երկնից, նման է առն տանուտեառն, որ հանէ ի գանձէ իւրմէ զնոր եւ զհին:

-----

*Սրբոյ աւետարանիս Յիսուսի Քրիստոսի որ ըստ Մարկոսի. Դ. 26:*

*Տէրն մեր Յիսուս Քրիստոս.*

(բձ) (դձ)

Եւ ասէր. □Այսպէս է արքայութիւն Աստուծոյ, որպէս զի այր մի արկանիցէ  
սերմանիս յերկիր եւ ննջիցէ եւ յառնիցէ զցայգ եւ զցերեկ. եւ սերմանիքն  
բուսանիցին եւ աճիցեն. եւ նա ոչ գիտէ, թէ երկիրն ինքնին բերէ զպտուղ. նախ՝  
զիտոն եւ ապա՝ զհասկն, եւ ապա՝ զցորեանն ատոք ի հասկին: Այլ յորժամ  
տայցէ զպտուղն, վաղվաղակի առաքի մանգաղ, զի հասեալ են հունձք: Եւ ասէր.  
□Ո՞ւմ նմանեցուցուք զարքայութիւնն Աստուծոյ կամ որո՞վ առակաւ առակեցուք  
զնա. որպէս հատն մանանխոյ, որ յորժամ սերմանիցի յերկրի, փոքրագոյն է, քան  
զամենայն սերմանիս, որ են յերկրի. եւ յորժամ սերմանիցի, բուսանի եւ լինի մեծ,  
քան զամենայն բանջար, եւ արձակէ ոստս մեծամեծս, մինչեւ բաւական լինել ընդ  
հովանեաւ նորա թռչնոց երկնից բնակել□: Եւ այնպիսի առակօք խօսէր ընդ նոսա  
զբանն, որպէս կարող լինէին լսել, եւ առանց առակի ոչինչ խօսէր ընդ նոսա, բայց  
առանձինն աշակերտացն իւրոց մեկնէր զամենայն:

-----

*Սրբոյ աւետարանիս Յիսուսի Քրիստոսի, որ ըստ Ղուկասու. ԺԲ. 32:*

*Տէրն մեր Յիսուս Քրիստոս ասէ.*

(ակ) (գկ)

□Մի՛ երկնչիր, ho՛տ փոքրիկ, զի հաճեցաւ

Հայր ձեր տալ ձեզ զարքայութիւն: Վաճառեցէ՛ք զինչս ձեր եւ տո՛ւք ողորմութիւն.  
Եւ արարէք ձեզ քսակս առանց հնանալոյ, գանձ անպակաս յերկինս, ուր ոչ գող  
մերձենայ, եւ ոչ ցեց ապականէ: Զի ուր գանձն ձեր է, անդ եւ սիրտք ձեր եղիցին:

□ Եղիցին գօտիք ձեր պնդեալ ընդ մէջս, եւ ճրագունք՝ լուցեալք, եւ դուք՝  
նմանողք մարդկան, որ ակն ունիցին տեառն իւրեանց, թէ երբ դառնայցէ ի  
հարսանեաց, զի յորժամ գայցէ եւ բաղիսիցէ, վաղվաղակի բանայցեն նմա: Երանի՛  
իցէ ծառայիցն այնոցիկ, զորս եկեալ Տէրն գտցէ արթունս. ամէն ասեմ ձեզ, զի գօտի  
ընդ մէջ ածցէ, եւ բազմեցուցէ զնոսա, եւ անցեալ պաշտեցէ զնոսա: Եւ եթէ  
յերկրորդ կամ յերրորդ պահու եկեացէ եւ գտցէ այնպէս, երանելի են ծառայքն  
այնոքիկ: Բայց զայն գիտասցիք, եթէ զիտէր տանուտէրն՝ յորում ժամու գող գայ,  
հսկէր եւ չտայր թոյլ ական հատանել ի տան իւրում: Եւ դուք եղերո՛ւք պատրաստք,  
զի յորում ժամու ոչ կարծիցէք, գայ Որդի մարդոյ:

Ասէ Պետրոս. □ Տէ՛ր, առ մե՞զ ասացեր զառակոյ գայոյ, թէ՞ առ ամենեսեան: □  
Եւ ասէ Տէր. □ Ո՞վ իցէ հաւատարիմ տնտես եւ իմաստուն, զոր կացոյց տէր իւր ի  
վերայ գերդաստանի իւրոյ՝ տալ ի ժամու զկերակուրս: Երանի իցէ ծառային  
այնմիկ, զոր եկեալ տէր իւր գտանիցէ արարեալ այնպէս: Արդարեւ ասեմ ձեզ, զի ի  
վերայ ամենայն ընչից իւրոց կացուցէ զնա: Ապա թէ ասիցէ ծառայն այն ի սրտի  
իւրում. □ Յամէ տէր իմ ի գալ, եւ սկսանիցի հարկանել զծառայսն եւ զաղախնայսն,  
ուտել եւ ըմպել եւ արբենալ, եկեացէ տէր ծառային այնորիկ յաւուր, յորում ակն ոչ  
ունիցի, եւ ի ժամու, յորում ոչ գիտիցէ, ընդ մէջ կտրեցէ զնա, եւ զմասն նորա ընդ  
անհաւատս դիցէ: Եւ ծառայ, որ գիտիցէ զկամս տեառն իւրոյ եւ ոչ պատրաստիցէ  
ըստ կամաց նորա, արբցէ զան բազում:

Եւ որ ոչն գիտիցէ եւ արժանի գանի ինչ գործիցէ, արբցէ զան սակաւ. ամենայնի  
որում շատ տուաւ, շատ խնդրեցի ի նմանէ, եւ որում բազում աւանդեցաւ, առաւել  
եւս պահանջեցեն ի նմանէ:

-----  
*Մրրոյ աւետարանիս Յիսուսի Քրիստոսի, որ ըստ Յովհաննու. Ե. 19:*

*Տէրն մեր Յիսուս Քրիստոս.*

(աձ) (զձ)

Պատասխանի ետ Յիսուս եւ ասէ ցնոսա. ՝Ամէն ամէն ասեմ ձեզ. ոչ կարէ Որդի մարդոյ առնել յանձնէ եւ ոչ ինչ, եթէ ոչ տեսանիցէ զՀայրն, զի առնէ. զի զոր նայն առնէ, զնոյն եւ Որդին նմին նման գործէ: Զի Հայր սիրէ զՈրդի, եւ զամենայն ինչ ցուցանէ նմա, զոր ինքն առնէ. եւ մեծամեծս եւս քան զսոյնս ցուցանէ նմա զգործս, ընդ որ դուքդ զարմանայք: Զի որպէս Հայր յարուցանէ զմեռեալս եւ կենդանի առնէ, նոյնպէս եւ Որդի, զորս կամի, կենդանի առնէ: Եւ ոչ եթէ Հայր դատի զոք, այլ զամենայն դատաստանն ետ Որդոյ իւրոյ. զի ամենեքեան պատուեցեն զՈրդի, որպէս պատուեն զՀայրն. որ ոչ պատուէ զՈրդին, ոչ պատուէ զՀայր զառաքիչն նորա: Ամէն ամէն ասեմ ձեզ, զի որ զբանն իմ լսէ եւ հաւատոյ այնմ, որ առաքեացն զիս, ընդունի զկեանսն յաւիտենականս. եւ ի դատաստան ոչ մտանէ, այլ փոխեցաւ ի մահուանէ ի կեանս: Ամէն ամէն ասեմ ձեզ, զի զայ ժամանակ, եւ արդէն իսկ է, յորժամ մեռեալք լսիցեն ձայնի Որդւոյն Աստուծոյ, եւ որք լսիցենն՝ կեցցեն: Զի որպէս Հայր ունի կեանս յանձին իւրում, նոյնպէս ետ եւ Որդւոյն ունել կեանս յանձին իւրում: Եւ իշխանութիւն ետ նմա դատաստան առնել. եւ զի Որդի մարդոյ է, ընդ այն զի՞ զարմանայք. զի եկեցէ ժամանակ, յորում ամենեքին, որ ի գերեզմանս կայցեն, լուիցեն ձայնի նորա եւ եկեցցեն արտաքս. որոց բարիս գործեալ իցէ՝ ի յարութիւն կենաց, եւ որոց զչար արարեալ՝ ի յարութիւն դատաստանաց: Ոչ կարեմ ես յանձնէ առնել եւ ոչ ինչ, այլ որպէս լսեմ, դատիմ, եւ դատաստանն իմ արդար է. զի ոչ խնդրեմ զկամս իմ, այլ զկամս այնորիկ, որ առաքեացն զիս:

-----

*Երգ տեառն Ներսիսի՝ ասացեալ առ ի Քրիստոս ննջեցելոց.*

(բկ) (դկ)

Աստուած անեղ, անժամանակ՝

Հայր անսկիզբն եւ անքանակ,  
Որդւոյ պատճառ ծննդեամբ,  
անճառ Հոգւոյն բղխմամբ անքննաբար,  
աղաչե՛մք զքեզ, գթա՛ծ,  
երկայնամիտ եւ ողորմա՛ծ,  
ողորմեա՛ քո ստեղծուածոյս՝  
յուսով ի քեզ ննջեցելոյս:

Բանդ, որ ի ծոց Հօր Միածին  
եւ կերպարան սկզբնատպին,  
որով երկինք գոյացան,  
աշխարհ լրիւ հաստատեցան,  
հայցեմք ի քէն, Տէր եւ Փրկի՛չ,  
ամենողորմ եւ կեցուցի՛չ,  
ողոր.:

Գերագոյն շնորհաց բաշխող  
երկնաւորաց եւ երկրայնոց,  
կեանք եւ կենաց տուող Հոգի՛,  
Հօր եւ Որդւոյ Արարչակի՛ց,  
ինդրե՛մք ի քէն, աղբի՛ւր բարեաց,  
արբուցանողդ ծարաւեաց,  
ողոր.:

Դաւանիմք ընդ սրովբէից  
զկենդանարարդ համայնից,  
երեքսրբեան մի տէրութիւն  
զՀայր եւ զՈրդի եւ Սուրբ զՀոգիդ,  
յոր հանգուցեալս մկրտեալ  
եւ հաւատով խոստովանեալ,

ողորդ:

Երրակի թիւ կատարեալ,  
յերիս անձինս բաժանեալ,  
Երրորդութեամբ միաւորեալ,  
միով բնութեամբ հաւասարեալ,  
յորմէ կապեալք եւ արձակիմք  
եւ վերստին անլոյծ կապիմք,  
ողորդ:

Զեակիցդ Հօր զՈրդի  
փառաւորեմք անլռելի.  
որ իջեր յարգանդ Կուսին,  
զաղամայինն առեր մարմին.  
աղաչանօք Աստուածածնին՝  
անապական քում ծնողին,  
ողորդ:

Էրեւեցար մարմնով յերկրի,  
որ ի Հօրէ անմեկնելի,  
ընդ հողեղէնս բնակեցար  
ի հրեղինաց երկրպագեալդ,  
պաղատանօք երկնաւորաց՝  
փառաբանչաց քոց հրեշտակաց,  
ողորդ:

Ըստ օրինացն Մովսիսի  
ընծայեցար ի տաճարին,  
զի զբնութիւնս մարդկային  
ընծայեցես Հօր ի յերկին,

խնդրուածովք սուրբ ծերունայն՝  
քեւ ի կապից արձակելոյն,  
ողոր.:

Թագաւո՛րդ հրեղինաց,  
որ ընդ մարդկան հողեղինաց  
շրջեցար տնօրինաբար,  
կրեցեր զկիրս մարդկաբար,  
որ վասն մեր գայս ամենայն  
ի յանձն առեր խոնարհութեամբ,  
ողոր.:

(բձ) (դձ)  
Ժողովեալքս ի հրաժարումն  
ծառայի քո աշխարհէ,  
հայցեմք ի քէն արտասուելով  
եւ պաղատիմք գայս ասելով.  
□Ճանապարհ ընդ քեզ ելից  
ննջեցելոյս լե՛ր ուղեկից,  
ի յօթեանս Հօր քոյ լուսոյ  
զննջեցեալս մեր հանգո՞:

Ի փրկութեան մերոյ սկզբան  
մկրտեցար ի Յորդանան,  
գոր շնորհեցեր նոր Աւագան  
ի մաքրութիւն մեղաց մարդկան,  
հայցմամբ կրկին կարապետին՝  
մեծին ի ծնունդս՝ մկրտչին,  
ի յօթ:

Լուսաւոր ձայնիւ յերկնից  
զքեզ դաւանեաց Հայր Էակից,  
աղանակերպ Հոգին իջեալ,  
առ համագոյդ իւր հանգուցեալ,  
զմկրտեալս նովին Հոգւով  
յորդեգրութիւն Հօր հաւատով,  
ի յօթ:

Խաւար մեղաց հալածեցաւ,  
լոյս գիտութեան քել ծագեցաւ,  
խայթուած օձին բժշկեցաւ,  
հիւանդութիւն մեր ողջացաւ,  
կենդանարա՛րդ մեռելոց  
եւ լուսատո՛ւղ խաւարելոց,  
ի յօթ:

Ծագո՛ւմն անուն առ ի Հօրէ,  
որ ընտրեցեր ի յաշխարհէ  
լուսաւորիչ տիեզերաց  
զդասս ընտրեալ աշակերտացն,  
աղաչանօք առաքելոցն  
փող յարութեան մեր եղելոց  
ի յօթ:

Կեա՛նք ի կենաց, լո՛յս ի լուսոյ,  
որ ստեղծեր զմեզ ի հողոյ,  
նորոգեցեր դարձեալ կրկին  
ծննդեամբ սրբոյ Աւագանին,  
զոր կեցուցեր շնորհիւ քոյին  
ի մահուանէն այն առաջին,

ի յօթ:

Հոգւով լցեր զմարդն առաջին,  
զոր կորուսեալ իսարմամբ չարին,  
զնոյն Հոգի բանիւ քոյին  
հեղեր յոգիս մեր վերստին,  
նովին Հոգւով սուրբ եւ բարի  
առաջնորդեա՛ հոգւոյ սորին

ի յօթ:

Ձայնեցեր առ Ղազարոս,  
որով ետուր մեռելոց յոյս,  
կենդանութեամբ չորեքօրեայն  
կենդանացան որք յԱդամայն,  
կենաց ձայնիւ վերջին փողոյ  
կոչեա՛ զսա յայսմ հողոյ

ի յօթ:

Ղօղեալ սարսեաց պահակ մահու  
ի կենարար ձայնին լրոյ,  
արագապէս զոյգ ընդ բանին  
ետ զմեռեալն ըստ հրամանին.  
իշխանք օդոյս այս սարսեացեն,  
զհոգի սորա մի՛ արգելցեն

ի յօթ:

(ակ) (զկ)

Ճանապարհ մոլորելոց  
եւ ճառագայթ իսաւարելոց,

հրաւիրեցեր գորդիս լուսոյ  
ի յերկնային հարսանիս քո,  
ընդ գուարճալից անդ ժողովոց  
արժանացո՛ղ զսա դասուց.  
լի լապտերօք մո՛յծ յառագաստ  
ընդ իմաստուն սուրբ կուսանացն:

Մերով բնութեամբ, զոր զգեցար,  
ի փայտ խաչին բեւեռեցար,  
լուծանելով զմեզ ի մեղաց  
ի նախաձօրն կապանաց,  
լո՛յծ եւ զսա ի յանցանաց  
վասն քո սուրբ չարչարանաց.  
լի լապ:

Յետ կամաւոր մահու խաչի  
եղար ի նոր գերեզմանի,  
երեքօրեայ թաղմամբ յերկրի  
նոր ստեղծեր զմեզ կենդանի,  
զիջեալս ընդ քեզ ի հող մահու  
վերակոչեա՛ ձայնիւ փողոյ.  
լի լապ.

Նստեալ կանանցն իւղաբերից  
եւ ողբային արտասուալից  
իբր զմեռեալ անյուսալից  
զկենդանիդ յաւիտենից.  
վասն նոցին սուրբ արտասուաց  
մաքրեա՛ զսա ի յանցանաց. լի լապ:

Շարժեալ հիմանցն դժոխոց  
ի տեսանել զքեզ ներքնոց  
հաներ զհոգիսն, որ ի բանտին,  
կապեալ զիշխանն մահաձին,  
ընդ հանգուցեալ հոգիս սրբոց  
հանգո՛ զհոգիս ննջեցելոյս.  
լի լապ:

Ուրախութեամբ զօրք երկնային  
յերկնից յերկիր իջանէին,  
յորժամ յարեար ի մեռելոց,  
լոյս ծագեցար արարածոց,  
սուրբ յարութեամբ քո կենարար  
յարո՛ զսա ի կեանս անահ.  
լի լապ:

Չհանդուրժեալ պահապանացն  
ի յերկիրդէ երկնաւորացն,  
որք աւետիս տային կանանց,  
թէ՛ մահ լուծաւ մահկանացուաց.  
սա, որ մահու քո տնկակից,  
լիցի՛ կենացդ հաղորդակից.  
լի լապ:

Պարակցեալ անմարմնականքն  
առ կենսատու սուրբ գերեզմանն  
տան աւետիս ազգի մարդկան  
վասն կենացն յաւերժական,  
դասաւորեա՛ պարուց նոցին  
զննջեցեալս յօրն վերջին.

լի լապ:

Ջահաւորեալ նշան խաչին  
յարեւելից փայլեալ ծագին,  
հաւատացեալքն ի քեզ բերկրին,  
եւ ուրացողքն կոծեսցին,  
զերկրպագուս սրբոյ խաչին  
պայծառացո՛ր լուսով նորին.

լի լապ:

(աձ) (զձ)

Ռահ գործեալ երկնաւորաց  
գան առաջի քո նախընթաց,  
զընտրեալս քո ժողովելով՝  
քեզ ընդ առաջ բերեն ամպով,  
ընդ աղանեաց օղապարից  
խառնեա՛ զսա սուրբ երամից,  
դասաւորեա՛ զսա վերնոցն՝  
երգել զփառս ընդ զուարթնոցն:

Սարսափին տարերք երկրի,  
յորժամ փառօք գաս հայրենի,  
արեգական լոյս խաւարի,  
լուսինն աստեղքն նուաղի,  
զսա յաւուրն աներեկի  
լուսաւորեա՛ լուսով քոյին.  
դասա:

Վերնական զօրացն պետ  
փողէ բարբառ աւետաբեր՝

արի՛ք, մեռեա՛լք, որք յԱդամայ,  
քանզի ահա եկն փեսայ.  
ընդ հարսնացեալ մաքուր հոգւոց  
կարգեա՛ զսա ի թիւ սրբոց.  
դասա:

Տիրական յաթոռ նստիս,  
յարարածոց երկրպագիս,  
արդարութեամբ զաշխարհ դատես,  
վարձս ըստ գործոց հատուցանես,  
յայնժամ շնորհեա՛ ողորմութիւն՝  
ննջեցելոյս մեր թողութիւն.  
դասա:

Բամեալ մարդկան ազգ ժողովին,  
որք յԱդամայ ծնեալք լինին,  
եւ հրեղինաց դասք երկնային  
համանգամայն վայրաբերին,  
ի յայնմ ահեղ հրապարակին  
յիշեա՛ զսա յօրն ահագին.  
դասա:

Յուցանին գաղտնիք մարդկան  
իւրաքանչիւր, որ գործեցան,  
բարեաց գործողքն պսակին,  
չարեացն՝ ի հուրն անշէջ մատնին,  
յայնժամ յիշեա՛ զսորա բարին,  
գործք մեղացն ջնջեսցին.  
դասա:

Իհիսին պսակք զանագանեայք  
եւ պատմուճանք լուսափայլեայք,  
սուրբ վկայիցն ի գլուխ եղեալ  
եւ արդարոցն զարդարեալ,  
հաղո՛րդս արա հայցմամբ նոցին  
զսա լուսոյ փառաց նոցին.  
դասա:

Փառաց ի փառս բարձրանան,  
աջակողմեանքն վերանան,  
յորժամ լսեն զերանական  
ձայն օրհնութեան ի քէն կոչման,  
ննջեցելոյս մեր լսեցո՛  
զաստուածային բարբառոյ քո.  
դասա:

Քահանայք եւ ժողովուրդք  
հայցեմք ի քէն, Տէ՛ր բարեգութ,  
ընդ ննջեցեալսն հաւատով  
ընկա՛լ զմեզ նովին յուսով  
յԵրուսաղէմ քաղաք վերին,  
յորում արդարքն ժողովին,  
փառս վերերգել միշտ ընդ նոսին  
Երրորդութեանդ Երբեակ Անձին:

(զձ)

Արարիչ եւ մարդասէ՛ր,  
անոխակալ եւ բարեգո՛ւթ,  
որ գովիսդ ի սրովբէից,

Տէ՛ր, դատաւո՛ր արդարութեան,  
ընդ սրբոց առաքելոց,  
Տէ՛ր, պսակեա՛ զմեր ննջեցեալսն.  
ողորմա՛ծ Տէր, ողորմեա՛ հոգւոցն մեր ննջեցելոց:

Յորժամ գրեալքն կատարին,  
որ զայնմ աւուր մեզ պատմեցին,  
մարգարէից բանքն յարգին,  
առաքելոցն վճարին.  
ողոր.:

Ի Վերինն Երուսաղէմ՝  
ի բնակարանս հրեշտակաց,  
ուր Ենովք եւ Եղիաս  
կան ծերացեալ աղանակերպ  
ի դրախտին եղեմական  
պայծառացեալ արժանապէս.  
ողոր.:

Թագաւո՛ր փառաց Քրիստոս,  
որ ժամանեալ գաս ի յերկնից  
ի վերայ թեւոց հողմոց  
քո հայրենի կերպարանօք  
եւ առնես հրափորձութեամբ  
զքննութիւն որդւոց մարդկան.  
ողորմած Տէր:

Ի դնել բեմին բազմի Փեսայն,  
եւ առագաստն զարդարի,  
գաբրիէլեան փողն գոչէ,

սուրբք ամենայն անդր հաւաքին,  
արդարոց դասքն բերկրին,  
իսկ մեղսասէրքն թախանձին.  
ողոր.:

Յորժամ հնչին փողոյն լինի,  
եւ դէտական գիրն յայտնի,  
ճառագայթք սրբոյ խաչին  
յարեւելից փայլեալ ծագին,  
հրեշտակաց գունդք ծաւալին,  
հրեշտակապետք պարունակին.  
ողոր.:

Ահեղ խորհուրդ քահանային  
բազկատարած կայ ի բեմին՝  
առաջի սուրբ սեղանոյն.  
հուր շիջանի, խաւար մերժի,  
տրտմեալ հոգիքն ուրախանան,  
զի թողութիւն մեղաց լինի.  
ողոր:

Մովսէս աստուածախօս  
եւ Ահարոն դէտացին,  
մարգարէքն Իսրայելի  
եւ քահանայք հին օրինին  
յառաջագոյն մեզ ծանուցին  
եւ զգալուստ սուրբ Միաձնիդ  
ի փրկութիւն մեզ յայտնեցին,  
յանապատի կերակրէին.

ողորդ:

Տրտմահաղորդ չարչարանօք  
ի յանձն առեր զմահ խաչին  
եւ փայտին բարձող եղեր  
վասն Ադամայ նախաստեղծին.

ողորդ:

Զարհուրեցան զօրք երկնային,  
յորժամ տեսին զՏէրդ ի խաչին,  
արեգական լոյս քօղ արկեալ,  
եւ լոյս լուսնին նուաղեցաւ.  
յահեղ փառաց Աստուածորդւոյն  
խաւար եղել ընդ տիեզերս.

ողորդ:

Ուրախացան ազգք մարդկան,  
յորժամ լուսն զքո յարութիւնդ,  
նորափետուր զարդարեցան  
ի յարութեան սուրբ Միածնիդ.

ողորդ:

Աղաչանօք սրբոյ խաչին  
եւ անբարբառ բարեխօսին,  
եւ սրբոյ Աստուածածնին,  
եւ Յովհաննու կարապետին,  
եւ սրբոյն Ստեփանոսին  
եւ առաջին մարտիրոսին,  
եւ սրբոյ Լուսաւորչին  
Հայաստանեայց հայրապետին,

Եւ սրբոց առաքելոց

Եւ համօրէն մարտիրոսաց.

ողորմա՛ծ Տէր:

-----

Ես ասացի ի վերանալ յինէն աւուրց իմոց՝ յո՛վ երթայցեմ եւ ես այսօր. յառաջին օթեվանին, զոր ոչ գիտէի, օգնեա՛ եւ ինձ, Քրիստո՛ս, այսօր. յառաջին ճանապարհին եւ ի միւսանգամ գալստեանն քո օգնեա՛ ինձ:

Եկն եհաս օր վախճանի իմոյ, լալումն, ողբումն եւ աշխարումն, սիրտ իմ խռովեցաւ յիս, եւ ոսկերք իմ ցամաքեցան. օգնեա՛:

Ի մահիճս իմ զարթուցին զիս պահանջողք հոգւոյ իմոյ, տանէին զիս ճանապարհ հեռաւոր, զոր ոչ գիտէի. օգնեա՛:

Նայեցայ, եւ ոչ ոք էր, որ օգնէր ինձ, ապաւինեցայ յԱստուած փրկութեան իմոյ, ցնծասցէ հոգի իմ յարքայութեան քում. օգնեա՛:

Գրեցայ ես ի գիր կենդանութեան եւ մեկնեցայ երթալ առ Արարիչն երկնի եւ երկրի. օգնեա՛:

Յանաստուէր եւ յանեղ լուսոյն հեռացայ խաբմամբ խաւարային, ճաշակեցի զմահառիթ պտուղն, հողանայ պատկեր բարերար Ստեղծողիդ. օգնեա՛:

Յանջատման հոգւոյս ի մարմնոյս ի քակտիլ գեղեցիկ շինուածոյս զարհուրիմ ի սպառնալեաց թագաւորին, թէ պահանջէ յինէն զտաղանդ պատուիրանին. օգնեա՛:

Կուսածին մարդացեալ Աստուա՛ծ իմ Յիսուս, յայնմ աւուր ահեղ ատենին զգինս արեան քո մի՛ դատապարտեր. օգնեա՛:

Սոսկալի է օր վախճանին, եւ ահեղ՝ օր դատաստանին. յայնմ աուր ահեղ ատենին զգինս արեան քո մի՛ անտես առներ, զի պատկեր եմ բարերար Ստեղծողիդ. օգնեա՛ ինձ:

Զահաւոր դատաստան Դատաւորիդ տեսի եւ զարհուրեցայ, զի անպատրաստ եգիտ զիս, ի հրամանաց քոց, թագաւո՛ր յաւիտենից. օգնեա՛ ինձ:

Աստուածածի՛ն, անարատ մայր Տեառն եւ կո՛յս սուրբ, բարեխօսեա՛ առ Որդին քո Միածին, զի փրկեցել զմեզ ի սպառնալեաց գեհե՛նոյն եւ պարգեւեցել մեզ զերկնից զարքայութիւնն եւ հանգուցել զհոգիս մեր ննջեցելոցն. օգնեա՛:

### Մաղթանք

Հոգւոցն հանգուցելոց, Քրիստո՛ս Աստուած, արա՛ հանգիստ եւ ողորմութիւն եւ մեզ՝ մեղաւորացս, շնորհեա՛ զթողութիւն յանցանաց:

(քրզ) Եւ եւս խաղաղութեան զՏէր աղաչեցուք:

Վասն հանգուցեալ հոգւոցն աղաչեցուք զՓրկիչն մեր Քրիստոս, զի գնոսա ընդ արդարսն դասեցել եւ զմեզ կեցուցել շնորհիւ ողորմութեան իւրոյ: Ամենակա՛լ Տէր Աստուած մեր, կեցո՛ եւ ողորմեա՛:

Տէ՛ր, ողորմեա, Տէ՛ր, ողորմեա, Տէ՛ր, ողոր:

(աղ) Քրիստո՛ս, Որդի՛ Աստուծոյ, անոխակալ եւ բարեգութ, գթա՛ քո արարչական սիրովդ ի հոգիս հանգուցեալ ծառայից քոց: Յիշեա՛ յաւուր մեծի գալստեան արքայութեան քոյ, արա՛ արժանի ողորմութեան, քաւութեան եւ թողութեան մեղաց, դասաւորեալ պայծառացո՛ ընդ սուրբս քո յաջակողմեան դասուն: Զի դու եւ Տէր եւ Արարիչ ամենեցուն, դատաւոր կենդանեաց եւ մեռելոց, եւ քեզ վայելէ փառք իշխանութիւն եւ պատիւ այժմ եւ միշտ եւ յաւիտեանս յաւիտենից. ամէն:

-----

Եւ ապա՝ Օրհնեալ Տէր մեր. Հայր մեր, որ յեր: Մաղթանք. Քրիստոս Աստուած մեր, անճառելի մարդասիրութեանդ շնորհիւ եւ բարեխօսութեամբ օրհնաբանեալ անարատ ծնողիդ սրբուհոյ Աստուածածնին եւ միշտ կուսին լուսաւորեալ պայծառացո՛ղ զհոգիս համօրէն հաւատացելոց յուսով ի քեզ ննջեցելոց եւ այնոցիկ, որ ընդ հովանեաւ սրբոյ տաճարիս են հանգուցեալ: Եւ եւս խաղա: Օրհնութիւն եւ փառք:

Օրհնեսցուք զՏէր:

Ապա ասի Օրհնութիւն ըստ պատշաճի աւուրն կամ ի ձայնէն

*Եւ զկնի Մաղթանքն, Քարոզն եւ Աղօթքն սոքա են.*

*Մաղթանք տէրունական տօնից*

Փա՛ որք հրաշափառ *Ծննդեան* քո, Տէ՛ր, զօրհնեալ եւ զփառաւորեալ, զհրաշալի եւ զյաղթող *զծնունդ* քո սուրբ օրհնեմք եւ փառաւորեմք:

Մարդասէ՛ր Տէր, վասն սրբուհոյ անարատի մօր քո եւ կուսի եւ վասն խաչի քո պատուականի ընկա՛լ զաղաչանս մեր եւ կեցո՛ղ զմեզ:

*Սոյնպէս ասա եւ յամենայն տօնս տէրունականս ըստ պատշաճի աւուրն՝ թէ՛ Յայտնութեան, թէ՛ Գալստեան, թէ՛ Տնօրէնութեան, թէ՛ Մատնութեան, թէ՛ Խաչելութեան, թէ՛ Թաղման, թէ՛ Յարութեան, թէ՛ Համբարձման, թէ՛ Գալստեան Հոգւոյն Սրբոյ եւ թէ՛ Պայծառակերպութեան, իսկ ի տօնս սրբոյ Խաչի եւ Եկեղեցւոյ ասա՝ Փառք տէրութեան քո: Բայց ի Գալստեան*

*Հոգւոյն Սրբոյ* զՄարդասէր Տէրն *այսպէս ասա՝* մարդասէ՛ր Տէր, վասն սրբուհոյ անարատի մօրն եւ կուսի եւ վասն խաչին պատուականի՝ ընկալ զաղա: *Զի սխալին, որք ասեն առ Հոգին Սուրբ, թէ՛ մօր քո կամ խաչի քո:*

*Մաղթանք ի տօնս սրբոց*

Բարեխօսութեամբ սրբուհոյ Աստուածածնին եւ Յովհաննու մկրտչին, սրբոյն Ստեփանոսի նախավկային եւ սրբոյն Գրիգորի մերոյ Լուսաւորչին, յիշատակաւ եւ աղօթիք սրբոց *այս անուն*, որոց այսօր է յիշատակ, եւ վասն խաչի քոյ պատուականի, Տէ՛ր, ընկա՛լ զաղաչանս մեր եւ կեցո՛ր զմեզ:

---

*Մաղթանք Պահոց*

(դկ) Քրիստոս է իմ Աստուած, եւ փառաւոր առնեմ զսա, Աստուած Հօր իմոյ, եւ բարձր արարից զսա:

Մարդասէր Տէր, վասն.

(աձ) Տո՛ւք փառս Աստուծոյ, տուք օրհնութիւն Մարդասիրին՝ Թագաւորին յաւիտենից, որ փրկէ զճառայս իւր եւ կեցուցանէ:

Մարդասէ՛ր Տէր, վասն.

(ակ) Դու ես Տէր մեր, դու ես, Քրիստո՛ս, Փրկիչ մեր, զքեզ օրհնեն անձինք մեր:

Մարդասէ՛ր Տէր, վասն.

(բձ) Բարձրացաւ եղջիւր իմ յԱստուած փրկիչ իմ, հաստատեցաւ սիրտ իմ ի Տէր տերամբ եւ հաւատով:

Մարդասէ՛ր Տէր, վասն.

(բկ) Խաղաղութեանց տուո՛ղ Քրիստոս, զխաղաղութիւն եւ զերկնային ողորմութիւն քո պարգեւեա՛լ յարարածս քո:

Մարդասէ՛ր Տէր, վասն.

(գձ) Յո՛յս կենդանութեան, յոյս եւ ապաւե՛ն փրկութեան, Տէ՛ր Յիսուս՝ Փրկի՛չ, փրկեա՛ եւ փարատեցո՛ր զցաւս անձին իմոյ:

Մարդասէ՛ր Տէր, վասն.

(գկ) Եկեացեն աղօթք մեր ի տաճար սուրբ քո, խոնարհեցի ունկն քո ի խնդրուածս մեր:

Մարդասէ՛ր Տէր, վասն.

(դձ) Լո՛ւր մեզ, Տէ՛ր, լո՛ւր մեզ, աստուածային ողորմութեամբ եւ գթութեամբ քո խնայեա՛լ յարարարծս քո:

Մարդասէ՛ր Տէր, վասն.

-----  
*Քարոզ եւ Աղօթք* երանեալ եւ Իբրեւ կանոնաց:

(բկ) (դկ)

Վասն ի վերուստ խաղաղութեան եւ փրկութեան անձանց մերոց զՏէր աղաչեսցուք:  
Տէ՛ր, ողորմեա՛:

Վասն լսելի լինելոյ Տեառն Աստուծոյ ձայնի աղաչանաց մերոց զՏէր աղա.

Վասն քաւիչ եւ ներող լինելոյ Աստուծոյ ի վերայ մեղաց մերոց զՏէր աղա.

Վասն թողլոյ մեզ զամենայն յանցանս մեր՝ զկամայ եւ զակամայ, զՏէր աղա.

Վասն զի մի՛ ընդ խոտանսն գտանիցիմք յաւուրն պատասխանատութեան զՏէր աղա.

Վասն հոգւոցն հանգուցելոց, որք ճշմարիտ եւ ուղիղ հաւատով ի Քրիստոս ննջեցին, զՏէր աղա.

Եւ եւս միաբան վասն ճշմարիտ եւ սուրբ հաւատոյս մերոյ զՏէր աղա:

Զանձինս մեր եւ զմիմեանս Տեառն Աստուծոյ ամենակալին յանձն արասցուք:

Քեզ Տեառնդ յանձն եղի.

Ողորմեա՛ց մեզ, Տէր Աստուա՛ծ մեր, ըստ մեծի ողորմութեան քում. ասասցուք ամենեքեան միաբանութեամբ՝ Տէ՛ր, ողորմեա, Տէ՛ր, ողոր., Տէ՛ր, ողոր.:

*Աղօթք*

Տէ՛ր տուրնջեան եւ գոյացուցի՛չ զիշերոյ, որ արարեր զտիւ ի զբօսանս բարեգործութեան ի փրկութիւն անձանց մերոց եւ զզիշեր՝ ի հանգիստ քնոյ տկարացեալ բնութեան մերոյ, իսկ այժմ զարթուցեալ՝ բացեր զբերանս մեր յօրհնաբանութիւն ահաւոր եւ փառաւորեալ անուանդ քում սրբոյ: Ընկա՛լ եւ այժմ զաղաչանս մեր եւ յաջողեա՛ մեզ ուղիղ հաւատով եւ առաքինասէր վարուք ի նոյն

պաշտօն քո կանխել միշտ եւ նովին կանոնիւս անդադար փառաւորել զՀայր եւ զՈրդի եւ զՍուրբ Հոգիդ այժմ եւ միշտ եւ յաւիտեանս յաւիտենից. ամէն:

Խաղաղութիւն ամենեցուն:

Աստուծոյ երկիրպագեացոյք:

Զքեզ, որ յամենայնի գթած եւ մարդասէր Տէրդ ես, աղաչե՛մք հանապագ, զի զօրացուցես զմեզ օր ըստ օրէ կալ ի կարգի կրօնաւորութեան մերում: Թեթեւացո՛ւ, Տէ՛ր, զքաղցր լուծ քո, զոր եղիր ի վերայ մեր, զի կարասցոյք կալ ի պատուիրանի քում եւ զհաճոյսն առնել առաջի քո յամենայն ժամ ի տուէ եւ զիշերի, հրեշտակային երգակցութեամբ զքեզ օրհնել, զքեզ գովել եւ քեզ գոհութիւն եւ փառս մատուցանել ամենազօր տէրութեանդ այժմ եւ միշտ եւ յաւիտեանս յաւիտենից. ամէն:

### *Մաղթանք*

Մաղմոսիք եւ օրհնութեամբ եւ երգօք հոգեւորօք անդադար փառաւորեմք զՀայր եւ զՈրդի եւ զՍուրբ Հոգիդ այժմ եւ միշտ եւ յաւիտեանս յաւիտենից. ամէն:

Օրհնեալ Տէր մեր Յիսուս Քրիստոս. ամէն:

Հայր մեր, որ յերկինս.

-----  
Քարոզ եւ աղօթք՝ *Երկինք պատմեն եւ Տէր ապաւեն կանոնաց:*

*աճ, զճ*

Վասն ի զիշերի եւ ի տուրնջեան եւ յամենայն ժամու խօսիլ մեզ զքան Տեառն զՏէր աղաչեացոյք:

Տէ՛ր, ողորմեա՛:

Վասն չանկանելոյ մեզ ի փորձութիւն, որում ոչ կարեմք հանդուրժել, զՏէր աղա:

Վասն անբիծ եւ անդատապարտ կալոյ մեզ առաջի ահեղ ստենին Քրիստոսի զՏէր աղա:

Վասն առաջնորդելոյ մեզ ի նաւահանգիստն կենաց անվախճանից զՏէր աղա:

Վասն արժանի լինելոյ մեզ վերին կոչմանն եւ երկնից արքայութեանն զՏէր աղա:  
Վասն հոգւոցն հանգուցելոց, որք ճշմարիտ եւ ուղիղ հաւատով ի Քրիստոս  
ննջեցին, զՏէր աղա.

Եւ եւս միաբան վասն ճշմարիտ եւ.

Զանձինս մեր եւ զմիմիեանս Տեառն.

Քեզ՝ Տեառնդ, յանձն եղիցուք:

Ողորմեա՛ց մեզ, Տէ՛ր Աստուած մեր.

Տէ՛ր, ողորմեա՛, Տէ՛ր, ողոր., Տէ՛ր, ողոր.:

### *Աղօթք*

Ի գիշերի եւ ի տուրնջեան եւ յամենայն ժամու զքեզ աղաչեմք եւ ի քէն  
խնդրեմք, մարդասէ՛ր Տէր: Լո՛ւր մեզ, Աստուած Փրկի՛չ մեր, խոնարհեսցի ունկն քո  
ի խնդրուածս մեր, զի մի՛ ունայն լիցին վաստակք ծառայից քոց, այլ համարեա՛  
զաշխատութիւնս մեր ի գործ արդարութեան եւ ի պտուղ աստուածպաշտութեան:  
Ընկա՛լ, Տէ՛ր, զաղօթս եւ զերկրպագութիւնս մեր եւ հատո՛ մեզ զողորմութիւն քո  
առատապէս. ծածկեա՛ զմեզ ընդ հովանեաւ ամենագոր աջոյ քոյ, զօրացո՛ զմեզ, Տէ՛ր,  
զօրութեամբ Սուրբ Հոգւոյդ, պահեա՛ զմեզ որպէս բիբ ական եւ արա՛ առ մեզ նշան  
բարի ի գովեստ եւ ի փառաբանութիւն անուանդ քում սրբոյ: Զի ի քոյ փառս  
կատարի ամենայն արարածոց մշտնջենաւոր փառաբանութիւն ի բարձունս՝ Հօր  
եւ Որդւոյ եւ Հոգւոյն Սրբոյ այժմ եւ միշտ եւ յաւիտեանս յաւիտենից. ամէն:

Խաղաղութիւն ամենեցուն:

Աստուծոյ երկիրպագեսցուք:

Հովի՛ւ քաջ, հովի՛ւ բարի եւ յաւիտենական, նայեա՛ց եւ ա՛յց արա բանաւոր հօտի քո,  
զոր ժողովեցեր առ քեզ զթութեամբ քով: Զի քո առաջի կամք, Տէ՛ր, եւ առ ի քէն  
ողորմութեանցդ եւ զթութեանցդ ակն ունիմք: Զամենեսեան օրինեա՛, զամենեսեան  
իմաստնացո՛ եւ ամենեցուն պարգեւեա՛ զերկնից արքայութիւնդ:

Վասն զի դու ես Տէր կենաց եւ Աստուած ողորմութեան, եւ քեզ վայել է փառք,  
իշխանութիւն եւ պատիւ այժմ եւ միշտ եւ յաւիտեանս յաւիտենից. ամէն:

### *Մաղթանք*

Ի գիշերի եւ ի տուրնջեան եւ յամենայն ժամու անդադար փառաւորեմք զՀայր եւ  
զՈրդի եւ զՍուրբ Հոգիդ այժմ եւ միշտ եւ յաւիտեանս յաւիտենից.

ամէն:

*Քարոզ եւ աղօթք՝ Մի՛ նախանձիր եւ Խոստովան կանոնաց:*

*ակ, զկ*

Վասն ուղղելոյ զգնացս մեր ի ճանապարհս խաղաղութեան զՏէր աղաչեսցուք:  
Տէ՛ր, ողորմեա՛:

Վասն ցրելոյ ի մէնջ զամենայն խորհուրդս չարին զՏէր աղա:

Վասն պարգեւելոյ մեզ առողջ խորհուրդս եւ առաքինի վարս զՏէր աղա:

Վասն պահելոյ զմեզ ընդ հովանեաւ ամենագոր աջոյն իւրոյ զՏէր աղա:

Վասն խորտակելոյ զհակառակորդն վաղվադակի ընդ ոտիւք մերովք զՏէր աղա:

Վասն հոգւոցն հանգուցելոց, որք:

Եւ եւս՝ միաբան վասն ճշմարիտ եւ:

Զանձիս մեր եւ զմիմեանս Տեառն:

Քեզ՝ Տեառնդ, յանձն եղիցուք:

Ողորմեա՛ց մեզ, Տէր Աստուա՛ծ մեր: Տէ՛ր, ողորմեա՛, Տէ՛ր, ողոր., Տէ՛ր, ողոր.:

### *Աղօթք*

Տէ՛ր երկնի եւ երկրի, Արարի՛չ ամենայն արարածոց՝ երեւելեաց եւ աներեւութից,  
առ քեզ կարդամք յամենայն ժամ, զի ընդ ամենայն տեղիս է տէրութիւն քո, եւ  
արքայութիւն քո ամենեցուն տիրէ: Շնորհեա՛ մեզ երկիւղիւ ի պաշտօն քո կանխել

հանապազ, սիրելի զքեզ ի բոլոր սրտե եւ ի բովանդակ մտաց եւ յամենայն զօրութենէ մերմէ, պահել զպատուիրանս քո, համբառնալ առ քեզ զձեռս մեր ի սրբութիւն առանց բարկութեան եւ երկմտութեան եւ գտանել ի քէն զշնորհս եւ զողորմութիւն եւ զառաքինասէր գործոցն յաջողութիւն: Վասն զի դու ես Տէր կենաց եւ Աստուած ողորմութեանց, եւ քեզ վայել է փառք, իշխանութիւն եւ պատիւ այժմ եւ միշտ եւ յաւիտեանս յաւիտենից. ամէն:

Խաղաղութիւն ամենեցուն:

Աստուծոյ երկիրպագեցուք:

Քում ամենագօր եւ յաղթող տէրութեանդ կրկնի ամենայն ծունր յերկրպագութիւն, եւ փառաւորի յամենեցունց թագաւորութիւն քո: Նայեա՛ յերկրպագութիւնս մեր եւ ուսո՛ մեզ առնել զարդարութիւն ճշմարտութեան: Վասն զի դու ես Աստուած խաղաղութեան, որ բարձեր զթշնամութիւն ի միջոյ եւ արարեր զխաղաղութիւն յերկինս եւ յերկրի, հեռաւորաց եւ մերձաւորաց աւետարանեցեր զնոր պարգեւս քոյին բարեացդ: Որում եւ զմեզ մեծի շնորհացդ արժանաւորս արացես՝ դասելով ընդ ճշմարիտ երկրպագուս քո, Աստուած մեր եւ Տէ՛ր մեր եւ Փրկի՛չ Յիսուս Քրիստոս, որ եւ օրհնեալ ընդ Հօր եւ ընդ Սուրբ Հոգւոյդ այժմ եւ միշտ եւ յաւիտեանս յաւիտենից. ամէն:

*Մաղթանք*

Յերգս օրհնութեան եւ ի ձայն սաղմոսաց անդադար փառաւորեմք զՀայր եւ զՈրդի եւ զՍուրբ Հոգիդ այժմ եւ միշտ եւ յաւիտեանս յաւիտենից. ամէն:

-----

*Քարոզ եւ աղօթք՝ Ողորմեա եւ ի նեղութեան կանոնաց:*

բձ, դձ

Վասն գտանելոյ մեզ զշնորհս եւ զողորմութիւն ի բարերար Տեառնէ մերմէ զՏէր աղաչեսցուք: Տէ՛ր, ողորմեա՛:

Վասն փրկելոյ զմեզ ի զրպարտութենէ մարդկան եւ յորոգայթից սատանայի զՏէր աղա.:

Վասն ամենայն անձանց քրիստոնէից եւ տանց հաւատացելոց զՏէր աղա.:

Վասն որք ի լերինս, յայրս եւ ի փապարս բնակեալ են՝ սուրբ հարքն մեր, զՏէր աղա.:

Վասն որք սաղմոսիք եւ օրհնութեամբ կատարեն զամենայն ժամանակս կենաց իւրեանց զՏէր աղա.:

Վասն հոգւոցն հանգուցելոց, որք:

Եւ եւս՝ միաբան վասն ճշմարիտ եւ:

Զանձինս մեր եւ զմիմեանս Տեառն:

Քեզ՝ Տեառնդ, յանձն եղիցուք:

Ողորմեա՛ց մեզ, Տէ՛ր Աստուած մեր:

Տէ՛ր, ողորմեա՛, Տէ՛ր, ողորմեա՛, Տէ՛ր, ո.:

### *Աղօթք*

Գոհանամք զքէն, Տէ՛ր Աստուած մեր, որ զարթուցեր զմեզ ի հանգստենէ քնոյ շնորհիւ ողորմութեան քո, զարթո՛ն՝ զմիտս մեր արդարութեամբ առ քեզ, Տէր Աստուած մեր, զի տեսցեն աչք մեր զփրկութիւն քո: Եկեսցէ եւ բնակեսցէ առ մեզ Աստուածութիւն քո, եւ ողորմութիւն քո հովանի եւ պահապան լիցի ի վերայ պաշտօնէից քոց: Եւ զմեզ՝ զճառայքս քո, արժանի՛ արա ի տուէ եւ ի գիշերի եւ յամենայն ժամու միշտ խորհիլ ի սէր պատուիրանաց քոց եւ գոհութեամբ փառաւորել զՀայր եւ զՈրդի եւ զՍուրբ Հոգիդ այժմ եւ միշտ յաւիտեանս յաւիտենից. ամէն:

Խաղաղութիւն ամենեցուն:

Աստուծոյ երկիրպագեսցուք:

Կենդանարար զօրութիւն եւ աղբիւր անմահութեան դու ես, Քրիստոս Աստուած Փրկի՛չ մեր: Որ շնորհեցեր մեզ ի մէջ գիշերի յառնել եւ խոստովան լինիլ առ քեզ վասն իրաւանց եւ արդարութեան քո, եւ այժմ աղաչեմք զքեզ, Տէր Աստուած մեր, արա՛ զմեզ արթունս եւ պատրաստս ի ժամ առաւօտու ընդ սուրբս քո: Եւ ընդ նոսին գոհանալով փառաւորել զքեզ ընդ Հօր եւ ընդ Սուրբ Հոգւոյդ այժմ եւ միշտ եւ յաւիտեանս յաւիտենից. ամէն:

### *Մաղթանք*

Գոհութեամբ եւ ճշմարիտ խոստովանութեամբ անդադար փառաւորեմք զՀայր եւ զՈրդի եւ զՍուրբ Հոգիդ այժմ եւ միշտ եւ յաւիտեանս յաւիտենից. ամէն:

### *Թագաւորք Ապաշխարութեան*

#### ԵՐԿՈՒՇԱԲԹԻ

Թագաւոր յաւիտեան:

Լո՛ւր մեզ, Աստուած Փրկի՛չ մեր, եւ կեցո՛ւ զմեզ, որ յամենայնի կարողդ ես:

Սդ. Լո՛ւր մեզ, Աստուած Փրկի՛չ մեր, յոյս ամենայն ծագաց երկրի, եւ որ ի ծով հեռի:

Ո պատրաստէ զլերինս զօրութեամբ իւրով եւ զգեցեալ է զօրութիւն,

եւ կեցո զմեզ, որ յամենայնի կարողդ ես:

(փ) Լո՛ւր աղաչանաց մերոց, Տէ՛ր մարդասէր, եւ գթա՛ ի մեզ:

(թ) Մի՛ զիս անտես առներ, այլ օգնեա՛ ինձ, մարդասէ՛ր:

(սդ) Մի՛ ընկենուր զիս, Տէ՛ր, յերեսաց քոց, եւ զՀոգի քո Սուրբ մի՛ հաներ յինէն:

Այլ տո՛ւր ինձ ցնծութիւն փրկութեան եւ հոգւով պետութեան քո հաստատեա՛ զիս. այլ օգ:

(փ) Մի՛ անտես առներ զիս, Տէր Աստուած՝ փրկի՛չ իմ, այլ շնորհեա՛ ինձ թողութիւն, բազմագո՛ւրթ մարդասէր, եւ կեցո՛ւ:

(թ) Երկինք եւ երկիր գոհանան զքէն, Տէ՛ր, արարածք ամենայն քեզ երկիրպագանեն, եւ հրեշտակք ի բարձունս աղաղակեն եւ ասեն. Ռոդորմեա՛, դու ստեղծեր, մի՛ կորուսաներ:

(սղ) Երկի՛նք երկնից, ջո՛ւրք, որ ի վերոյ քան զերկինս, օրհնեցէ՛ք զանունն Տեառն: Ջի նա ասաց, եւ եղեն, հրամայեաց, եւ հաստատեցան. եւ հրեշտակք ի բարձունս աղա.:

(փ) Երկինք եւ երկիր հանապազ զքեզ գովեն, Թագաւո՛ր փառաց, սերովբէք եւ քերովբէք ի խնարհ ունելով զդէմս իւրեանց եւ միաձայն բարբառովն աղաղակեն եւ ասեն. Սո՛ւրբ, սո՛ւրբ, սո՛ւրբ, Տէ՛ր զօրութեանց:

### ԵՐԵՔՇԱԲԹԻ

Երկայնամիտ եւ, Տէ՛ր, առ ամենեսեան, եւ գթա՛, Տէ՛ր, ի վերայ մեր, որպէս եւ յաւազակին, Փրկի՛չ, եւ կեցո՛:

(սղ) Երկայնամիտ, բազումողորմ եւ ճշմարի՛տ, նայեա՛ց առ իս եւ ողորմեա՛ց ինձ: Տո՛ւր զօրութիւն ծառայի քոյ, կեցո՛ զորդի աղախնոյ քոյ եւ արա՛ առ իս զնշան բարութեան. եւ գթա՛:

(փ) Տէ՛ր, որ գթացար յաւազակն՝ խաչակից լինիլ քեզ, եւ մաքրեցեր զաղտեղութիւն յանցանաց նորա յաղբերէ կողի քոյ, գթա՛ եւ յիս՝ ի մեղաւորս, որ ծարաւիս եմ առ քեզ եւ փափագիմ ի գաւիթս քո, որպէս զմի ի յեղջերուաց ի յաղբերս ջուրց:

(թ) Մարտեաւ ընդ իս թշնամին. հանապազ զիս կամի կորուսանել, այլ դու, Տէ՛ր իմ, ա՛յց արա մոլորեալ ոչխարիս եւ կեցո՛:

(սղ) Մարտեան ընդ իս ի տարապարտուց եւ փոխանակ սիրոյ իմոյ մատնէին զիս, այլ եւ յաղօթս կայի:

Հատուցին ինձ չար փոխանակ բարւոյ, ատելութիւն փոխանակ սիրոյ իմոյ, այլ դու, Տէ՛ր իմ, ա՛յց արա:

(փ) Որ հովիւդ եւ հօտից բանաւոր կենդանեաց, տո՛ւր ինձ յոյս կենաց ապաշխարութեան եւ դարձո՛ զմոլորեալս ի հօտ քո, Քրիստո՛ս, եւ կեցո՛:

(թ) Մեղա՛յ եւ աղաչեմ զքեզ՝ թողութի՛նս շնորհեա մեղաց իմոց, քաւի՛չ իմ լեր քո գթութեամբդ, որ միայնդ ես փրկիչ, եւ կեցո՛ւ:

(սդ) Մեղա՛յ, Տէ՛ր, մեղա՛յ, եւ զանօրէնութիւնս իմ ես ինձէն գիտեմ:

Աղաչեմ եւ խնդրեմ ի քէն, թո՛ղ ինձ, Տէ՛ր, թո՛ղ ինձ եւ մի՛ կորուսաներ զիս ըստ անօրէնութեան իմոյ, քաւի՛չ իմ լեր:

(փ) Մեղա՛յ քեզ, Տէ՛ր, մեղա՛յ քեզ, Տէ՛ր, մեղա՛յ, եւ քան զաւագ ծովու բազում են յանցանք իմ. պատրանք աշխարհիս խաբեցին զիս, եւ եղէ անպտուղ ի կենաց յուսոյդ, այլ դու, անոխակալ եւ անյիշաչա՛ր Փրկիչ, ինայեա՛ ի մեղուցեալ ծառայս եւ կեցո՛ւ:

### ՉՈՐԵՔՇԱԲԹԻ

Տէ՛ր իմ, բազում են անօրէնութիւնք անձին իմոյ, ոչ յիշեցի զահեղ զդատաստանս քո:

Արդ անկեալ զքեզ աղաչեմ՝ շնորհեա՛ ինձ ապաշխարութիւն, Տէ՛ր, եւ ողորմեա՛:

(սդ) Անօրէնութիւնք իմ բարձրացան քան զգլուխ իմ եւ որպէս բեռն ծանր ծանրացան ի վերայ իմ:

Նեխեցան եւ փտեցան վերք իմ յերեսաց անզգամութեան իմոյ. ոչ յիշեցի զահեղ զդա.:

(փ) Պաղատանս մատուցանեմք քեզ, Հա՛յր երկնաւոր, մի՛ անտես առներ զաղաչանս մեր, այլ անցո՛ւ զցասումն քո ի մէնջ եւ յիշեա՛, զի պատկեր եմք բարերարութեանդ:

(թ) Տէ՛ր իմ, գթութիւնք քո բազում են յոյժ, առ իս արա՛ զբարերարութիւնս քո. որպէս եւ մաքսաւորին եւ ի՛նձ ողորմեա:

(սդ) Գթութիւնք քո բազում են, Տէ՛ր, եւ ըստ իրաւանց քոց կեցո՛ւ զիս:

Բազում են, որք հալածեն եւ նեղեն զիս, ի վկայութեանց քոց եւ ոչ խոտորեցայ, առ իս արա՛ զբա.

(փ) Անոխակալ եւ անյիշաչա՛ր Տէր, որ զթալով ի մեղաւորս՝ շնորհեցեր ապաշխարութիւն, արդ գթա՛ եւ յիս, Տէ՛ր, ի մեղուցեալ եւ յանօրինեալ քո ծառայս, եւ փոխարկեա՛ զգործողս չարեաց ի գոջումն ապաշխարութեան եւ կեցո՛ւ:

(թ) Ի տաճարի քում սրբութեան փառաւորելով զքեզ. դու ունիս իշխանութիւն, ողորմեա՛ մեզ:

(ս) Այլ ես ըստ բազում ողորմութեան քում մտից ի տուն քոյ եւ երկիր պագից ի տաճար սուրբ քո երկհիւղի քո: Տէ՛ր, առաջնորդեա՛ ինձ յարդարութեան քում վասն թշնամեաց իմոց եւ ուղի՛ղ արա առաջի իմ զճանապարհս քո. դու ունիս իշ.:

(փ) Ի տաճարի քում սրբութեան հանապազ զքեզ գովեմք, Թագաւո՛ր փառաց. որ ունիս իշխանութիւն կենաց եւ փրկութեան, ողորմեա՛ մեզ:

-----

### ՀԻՆԳՇԱԲԹԻ

Ապաշխարութեան արտասուս աւագան լինի եւ լուանայ զբազմութիւն մեղաց. սովաւ շնորհեա՛ յառաջ, քան զվախճան, զքաւութիւն եւ զմեծ քո զողորմութիւն:

(սղ) Ծարաւի է անձն իմ առ քեզ, Աստուա՛ծ հզօր եւ կենդանի, ե՞րբ եկից երեւեցայց երեսացդ Աստուծոյ:

Եղեն ինձ արտասուք իմ կերակուր ի տուէ եւ ի գիշերի. եւ այն, զի ասէին ցիս զօրհանապազ, թէ՛ ո՞ւր է Աստուած քո, սովաւ շնորհեա յա:

(փ) Յորժամ գաս փառօք Հօր յահագին Աւուրն՝ ի դատել զերկիր, եւ դողան սարսափմամբ երկրածինքս ամենայն ի յահէ քումմէ. ի նստիլ քո յատենի, Դատաւո՛ր ահեղ, եւ յակնարկել քո յարարածս, յիշեա՛ եւ զիս՝ զբազմամեղս, որ ընկղմեալս եմ յանցանօք բանսարկուին խաբմամբ եւ հայցեմ զաւագակին, Տէ՛ր, եւ զի՛ս յիշեա, որ միա՛յնդ ես փրկիչ:

(թ) Զիս, որ ի նաւի աշխարհի ալեկոծեն մեղք իմ, նաւահանգիստ ապաշխարութեան շնորհեա՛ ինձ, բազումողո՛րմ, եւ կեցո՛:

(սղ) Կեցո՛ զիս, Աստուա՛ծ, զի հասին ջուրք յանձն իմ, ընկլայ եւ ի խորս անդնդոց, ուր ոչ գոյ ինձ հանգիստ, նաւահանգի՛ստ ապաշխարութեան:

(փ) Նաւապէ՛տ բարեգութ, առ քեզ ապաւինիմ, տո՛ւր ինձ ձեռն, որպէս երբեմն Պետրոսին ի վերայ ալեացն, որ ծփիմս ալեկոծեալ յանցանօք մեղաց, եւ կեցո՛:

(թ) Դու ես, Քրիստոս'ս, աղբիւր կենաց, բղխումն ողորմութեան, շնորհեա', Փրկի'չ անձանց մերոց, զթողութիւն մեղաց մերոց:

(սդ) Ի քէն է, Տէ'ր, աղբիւր կենաց, եւ լուսով երեսաց քոց տեսանեմք զլոյս:

Ծագեա' զողորմութիւնս քո, որք ճանաչեն զքեզ, զարդարութիւնս քո, որք ուղիղ են սրտիւք, շնորհեա', Փրկի'չ, անձանց:

(փ) Որ աղբիւրդ ես ծարաւեաց եւ հանգիստ աշխատելոց, ճանապարհ մոլորելոց եւ հովիւ հոգեւոր բանաւոր հօտի, փափագողացս առ քեզ, Քրիստոս'ս, լե'ր նաւահանգիստ եւ արբո' մեզ՝ ծարաւեացս, զբաժակ քո քաղցրութեան յանսպառ յաղբերէդ:

-----

#### ՈՒՐԲԱԹ

Ի տաճարի սրբութեան քում լո'ւր, Տէ'ր, ձայնի իմում, եւ աղաչանք իմ ժամանեացեն ի յականջս քո, Տէ'ր:

(սդ) Լուաւ ինձ ի տաճարէ սրբոյ իւրմէ ձայնի աղօթից իմոց, եւ աղաղակ իմ առաջի նորա մտցէ յականջս նորա, եւ աղաչանք.

(փ)(աղց) Որ լուսատու ես տիեզերաց, Քրիստոս'ս Աստուած, լուսաւորեա' զիմ զխաւարային խորհուրդս եւ կեցո':

(փ) (ննջ) Օրհնեալ ես, Տէ'ր, եւ փառաւորեալ է քո անբաւ մարդասիրութիւնդ. զաղաչանս մեր քեզ մատուցանեմք, որ թագաւորդ ես յաւիտենից, զննջեցեալսն մեր արժանի արա, Տէ'ր, ընդունիլ ի կեանսդ յաւիտենից:

(թ) Արտասուս ինձ շնորհեա' ի յապաշխարութիւն, Տէ'ր, զի լուացից զմեղս անձին իմոյ. որպէս պոռնիկն աղաչեմ. եւ կեցո':

(սդ) Վաստակեցայ ես ի հեծութեան իմում, լուացի զամենայն զիշեր զմահիճս իմ եւ արտասուօք իմովք զանկողինս իմ թացի, զի լուացից զմեղս անձին իմոյ:

(փ) Որ աղբիւրդ ես անապական, Քրիստոս'ս Աստուած, զվիրաւորեալ անձն իմ ի մեղաց բժշկեա', Տէ'ր, բղխմամբ արտասուաց, եւ կեցո':

(թ) Չմոլորեալ ծառայս ինդրեա', Տէ'ր, եւ մի' դատապարտեր զիս ի յաւուրն այցելութեան քոյ, Մարդասէ'ր:

(սդ) Կեցցէ՛ անձն իմ, օրհնեսցէ՛ զքեզ, եւ իրաւունք քո օգնեսցեն ինձ:

Մոլորեցայ եւ որպէս զոչխար կորուսեալ, խնդրեա՛ զծառայս քո, զի զպատուիրանս քո եւ ոչ մոռացայ, եւ մի՛ դատապարտեր զիս:

Որ մոլորեցայ ի հօտէ քումմէ, Հովի՛ւ բարի, խնդրեա՛ զիս՝ զմոլորեալս, եւ արժանաւորեա՛ խառնիլ ի հօտ քո, Քրիստո՛ս, եւ կեցո՛:

-----

*Թագաւորք Մարտիրոսաց*

Թագաւոր յաւիտեան:

(աձ) Բարեխօսութեամբ սրբոց (*այս անուն*) աղաչե՛մք զքեզ, թողութի՛ն շնորհեա յանցանաց մերոց, բարերա՛ր Քրիստոս:

(սդ) Մերձ է Տէր առ այնոսիկ, որք մաշեալ սրտիւք, եւ զխոնարհս հոգւով կեցուցանէ: Բազում նեղութիւնք են արդարոց, յամենայնէ փրկէ զնոսա Տէր եւ պահէ զամենայն ոսկերս նոցա, եւ մի ի նոցանէ ոչ կորիցէ. թողութի՛ն շնորհեա:

(փ) Որ յաղթող զօրութեամբ ի հանդէս ճգնաւորական անարատ պահեցեր զխոստովանող վկայս քո, Քրիստո՛ս Աստուած, տո՛ւր մեզ զօգնութիւն ի նեղութեան մերում բարեխօսութեամբ սրբոց մարտիրոսաց եւ կեցո՛:

-----

Թագաւոր յաւիտեան:

(ակ) Ձողորմութիւն քո, Տէ՛ր, արա ի մեզ եւ բարեխօսութեամբ սրբոցն (*այս անուն*) մի՛ կորուսաներ զմեզ.

Երրորդութի՛ն Սուրբ, ողորմեա՛ց մեզ:

(սդ) Փրկութիւն արդարոց ի Տեառնէ է, վերակացու է նոցա ի ժամանակս նեղութեան: Օգնեսցէ նոցա Տէր եւ փրկեսցէ զնոսա, ապրեցուցէ ի մեղաւորաց եւ կեցուցէ զնոսա, զի յուսացան ի նա. եւ բարեխօսութեամբ:

(փ) Որք զտանջանս եւ զմահ վասն քո յանձն առին եւ հեղին զարիւնս իւրեանց վասն անուանդ քո սրբոյ, բարեխօսութեամբ սոցա մի՛ կորուսաներ զմեզ.

Երրորդութիւն:

-----

(բձ) Բարեխօսութեամբ սրբոցն (*այս անունն*) պարգևեա՛ մեզ, Տէ՛ր, առնուլ մասն եւ բաժին ընդ հրաւիրեալսն ի կոչումն արքայութեան երկնից:

(սդ) Սքանչելի է Աստուած ի վերայ սրբոց իւրոց, Աստուած Իսրայելի: Նա տացէ զօրութիւն հաստատութեան ժողովրդեան իւրոյ, օրհնեալ է Աստուած. առնուլ մասն եւ.

(փ) Մարտիրոսք երանեալք եւ փառաւորեալք, որք բազում տանջանացն համբերեցիք, դուք զլոյսն կենաց զգեցեալ ունիք, եւ առ Քրիստոս վասն մեր բարեխօսեցէք:

(բկ) Դու ես, Քրիստոս'ս, աղբիւր կենաց, բղիտումն ողորմութեան, շնորհեցեր սրբոցն (*այս անունն*) յաղթող զնահատակութիւն՝ հալածել զխաւարն եւ լուսաւորել զանձինս մեր:

(սդ) Աստուած փառաւորեալ է ի խորհուրդս սրբոց իւրոց, մեծ եւ սհաւոր՝ ի վերայ այնոցիկ, որք շուրջ են զնովա:

Տէ՛ր Աստուած զօրութեանց, ո՞ նմանի քեզ, հզօր ես դու, Տէ՛ր, եւ ճշմարտութիւն քո շուրջ է զքեւ, շնորհեցեր սրբոցն (*այս անունն*) յաղթող զնահատակութիւն՝ հալածել զխաւարն եւ լուսաւորել զանձինս մեր:

(փ) Որ շնորհօք Սուրբ Հոգւոյն յաղթեցիք թշնամւոյն, երանեալ սուրբ վկայք Քրիստոսի, վասն ձեր սօնողացս հայցեցէ՛ք յԱստուծոյ զթողութիւն մեղաց:

(փ) Որ պսակդ էք պարծանաց ամենայն առաքինեաց, նախաշաւիղ եւ առաջնորդ կենացն յաւիտենից, ո՛վ սուրբ վկայք, առ Պսակիչն սրբոց եւ վասն մեր բարեխօսեցէք՝ շնորհելով ողորմութիւն յանսպառ աղբերէն կենացն յաւիտենից:

-----

(գձ) (գկ)

Զճգնութիւն սրբոցն (*այս անուն*), բարեխօս ունիմք առ քեզ, Քրիստոս'ս, եւ աղաչեմք սոքօք՝ շնորհեա՛ զթողութիւն յանցանաց մերոց եւ ի կեանսդ յաւիտենից նորոգեա՛ եւ կեցո՛:

(սդ) (զձ) Լոյս ծագեաց արդարոց, ուղղոց սրտից եղև ուրախութիւն:

Ուրա՛խ եղերուք, արդա՛րք, ի Տէր, եւ խոստովան եղերուք յիշատակի սրբութեան նորա.

Եւ աղաչեմք սոքօք՝ շնորհեա՛:

(սդ) (զկ)

Պատուական է առաջի Տեառն մահ սրբոց իւրոց, ո՛ Տէր, եւ ծառայ քո եմ, ծառայ եւ որդի աղախնոյ քոյ:

Հատեր զկապանս իմ, քեզ մատուցից պատարագ օրհնութեան եւ զանուն Տեառն կարդացից. եւ աղաչեմք.

(փ) Հանդիսացեալք ի մարտս պատերազմի յաղթող գտայք, սո՛ւրբ վկայք, քանզի ճանապարհ հորդեցիք զմեզ յերկնային քաղաքն յԵրուսաղէմ, ընդ անմարմնոցն դասս փառաւորելով Սուրբ զԵրրորդութիւնն:

(դձ) Որք ի խորանս սրբութեան եմք ժողովեալ՝ օրհնել զքեզ, Քրիստոս'ս, աղաչանօք սրբոցն (*այս անուն*) զպաղատանս մեր մի՛ անտես առներ, որ միայնդ եւ բազումողորմ, թագաւո՛ր փառաց Քրիստոս:

(սդ)

Մերձ է Տէր առ ամենեսեան, որք կարդան առ նա, առ ամենեսեան, որք կարդան առ նա ճշմարտութեամբ:

Զկամս երկիւղածաց իւրոց առնէ Տէր, աղօթից նոցա լսէ եւ կեցուցանէ զնոսա. աղաչանօք սրբոցն (*այս անուն*) զպաղատանս մեր մի՛ անտես առներ, որ միայնդ եւ բազումողորմ, թագաւո՛ր փառաց Քրիստոս:

-----  
*Առաքելոց եւ Մարգարեից՝ այս է.*

(սդ) Ոչ են բանք, եւ ոչ են խօսք, որոց ոչ լսին ձայնք նոցա:

Ընդ ամենայն երկիր ել բարբառ նոցա, եւ մինչեւ ի ծագս աշխարհի եւն խօսք նոցա.  
աղաչանօք սրբոց (*այս անուն*):

(փ) Նահատակք եւ վկայք Քրիստոսի Աստուծոյ, ընդհանուր տիեզերաց քարո՛ղք փրկութեան, որք զանձինս ձեր մատուցիք պատարագ եւ զենումն Աստուծոյ Հօր ի հոտ անուշից, ժողովելոցս ի կատարել գլխատակ անուան ձերոյ, բարեխօսեցե՛ք առ Տէր վասն քաւութեան մեղաց մերոց:

-----  
Ձերեքսրբեան տէրութիւնդ քո միաբան աղաչեմք՝ լո՛ւր, Տէ՛ր, աղաչանօք սրբոցն (*այս անուն*) խնայեա՛ ի մեզ եւ կեցո՛:

(սղ) Ուրախ լիցին ամենեքեան, որք յուսացեալ են ի քեզ, յաւիտեան ցնծացեն, եւ բնակեցիս դու ի նոսա:

Պարծեսցին ի քեզ սիրելիք անուան քոյ, զի օրհնեսցես դու զարդարն, Տէ՛ր, որպէս զինու հաճութեամբ քով պսակեցեր զնոսա. աղաչանօք սրբոցն:

Տօնէ այսօր եկեղեցի սուրբ գլխատակս ձեր, սո՛ւրբ վկայք, որք զօրութեամբ Սուրբ Հոգւոյն վանեցիք զպատերազմն չարին եւ ի կամարս լուսեղէնս թագաւորեալք.

օրհնել Սուրբ զԵրրորդութիւնն:

-----  
*Սրբոյն Ստեփանոսի*

Այսօր դասք հրեշտակաց ուրախանան ընդ ճգնութիւն սրբոյն Ստեփանոսի նախավկային:

Քանզի գոչէ եկեղեցի քո, Քրիստո՛ս, զյաղթանակ մարտ հեղման արեան սորա ի վերայ մեծի անուան քոյ, Տէ՛ր:

Բազում համարձակութիւն է սորա առաջի Աստուծոյ ի ձեռն հեղման սուրբ արեան իւրոյ,

Քանզի յօժարութեամբ մատնեաց զանձն իւր չարաչար եւ դառն տանջանաց վասն մեծի անուանն Տեառն,

Քանզի արհամարհելով անարգեաց զանցաւոր զկեանս աշխարհիս եւ փափագեաց  
յաւիտենական կենացն. եւ միշտ եւ հանապազ ուրախանայ ընդ Տեառն իւրոյ  
յանսպառ յուրախութիւնսն:

Քանզի գոչէ եկեղեցի քո, Քրիստոս'ս, զյաղթանակ մարտ հեղման արեան սորա ի  
վերայ մեծի անուան քոյ, Տէ'ր:

Փա՛ռք Հօրն էականի, Որդւոյն Միածնի եւ ազատիչ Սուրբ Հոգւոյն վայել է փառք,  
պատիւ եւ իշխանութիւն այժմ եւ միշտ եւ յաւիտեանս յաւիտենից. ամէն:

Եւ յորժամ շարժին երկինք եւ երկիր ի յահէ փառաց Բանին Տեառն Աստուծոյ,  
յայնժամ նստուցանէ ընդ աջմէ իւրմէ զսիրելիս անուան իւրոյ ի լուսեղէն  
խորանսն զուզաւորելով:

Այսօր դասք հրեշտակաց ուրա:

-----

*Ալէլուիք զիշերայինք Տէրունական տօնից կարգաւ:*

*Ալէլուիք ճրագալուցի Ծննդեան*

Ալէլուիա, ալէլուիա, ալէլուիա.

(ալ) Առաքեաց զբան իւր եւ բժշկեաց զնոսս եւ փրկեաց զնոսս յապականութենէ  
իւրեանց:

Խոստովան եղիցին Տեառն ողորմութեանց նորա եւ սքանչելեաց նորա որդիք  
մարդկան:

Ալէլուիա, ալէլուիա, ալէլուիա.

(փ) Իջցէ որպէս զանձրեւ ի վերայ գեղման, որպէս ցօղ, զի ցօղէ յերկիր:

Ծագեացի յաւուրս նորա արդարութիւն, բազում խաղաղութիւն, մինչեւ կատարեացի  
լուսին:

Փառք եւ երկրպագութիւն Հօր եւ Որդւոյ եւ Հոգւոյն Սրբոյ այժմ եւ միշտ եւ  
յաւիտեանս յաւիտենից. ամէն:

Ալելուիա, ալելուիա, ալելուիա:

-----

*Ալելուիա Ծննդեան Տեառն Յիսուսի*

Ալելուիա, ալելուիա, ալելուիա:

(աձ) Տէր հովուեսցէ զիս, եւ ինձ ինչ ոչ պակասեսցի:

Ի վայրի դալարուոջ անդ բնակեցոյց զիս եւ առ ջուրս հանգստեան սնոյց զիս:

Ալէ.

(փ) Իջցէ որպէս զանձրեւ ի վերայ գեղման, որպէս ցօղ, զի ցօղէ յերկիր:

Ծագեսցի յաւուրս նորա արդարութիւն. բազում խաղաղութիւն, մինչեւ կատարեսցի լուսին:

Փառք եւ երկրպագ. այժմ եւ միշտ.

Ալելուիա, ալելուիա, ալելուիա:

*Զկնի զամենայն տէրունական տօնի, որ աձ լինի,*

*զԴասքն ասա*

Դասք հրեշտակաց օրհնեն զքեզ, Քրիստոս'ս, ալելուիա, մարդկան ազգ սաղմոսեն քեզ, ալելուիա, ալէ.

Ալելուիա, ալելուիա, ալելուիա:

(ակ) Լո'ւր, դո'ւստր, եւ տե'ս, խոնարհեցո' զունկն քո, մոռա' զժողովուրդ քո եւ զտուն Հօր քոյ, զի ցանկացաւ թագաւոր գեղոյ քոյ:

Սա ինքն է Տէր քո, երկիր պագցես սմա, եւ դուստր Ծուրայ երկիր պագցէ սմա, եւ պատարագօք զերեսս սորա պաշտեսցեն մեծամեծք ի ժողովրդոց:

(փ) Ալէ. Նա կարդասցէ առ իս` հայր իմ եւ դու, Աստուած ընդունող փրկութեան իմոյ:

Ես անդրանիկ արարից զնա եւ բարձր, քան զամենայն թագաւորս երկրի:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(բձ) Իջցէ որպէս զանձրեւ ի վերայ գեղման, որպէս ցօղ, զի ցօղէ յերկիր:

Ծագեացի յաւուրս նորա արդարութիւն, բազում խաղաղութիւն, մինչեւ  
կատարեացի լուսին:

(փ) Ալէ: Եցոյց Տէր զփրկութիւն իւր, առաջի ազգաց յայտնեաց զարդարութիւն իւր:  
Յիշեաց ողորմութեամբ իւրով զՅակոբ, ճշմարտութեամբ իւրով զտունն Իսրայէլի,  
եւ տեսին ամենայն ծագք երկրի զփրկութիւն Աստուծոյ մերոյ:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա:

(բկ) Նա կարդասցէ առ իս` հայր իմ եւ դու, Աստուած ընդունող փրկութեան իմոյ:

Ես անդրանիկ արարից գնա եւ բարձր, քան զամենայն թագաւորս երկրի:

(փ) Ալէ. Ընդ քեզ է սկիզբն աւուր զօրութեան. ի վայելչութիւն սրբոց քոց. յարգանդէ  
յառաջ քան զարուսեակ ծնայ զքեզ:

Երդուաւ Տէր եւ ոչ եւս զղջացի, թէ դու եւ քահանայ յաւիտեան ըստ կարգին

Մելքիսեդեկի, եւ Տէր ընդ աջմէ քումմէ:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(գձ) Եցոյց Տէր զփրկութիւն իւր, առաջի ազգաց յայտնեաց զարդարութիւն իւր:

Յիշեաց ողորմութեամբ իւրով զՅակոբ, ճշմարտութեամբ իւրով զտունն Իսրայելի,  
եւ տեսին ամենայն ծագք երկրի զփրկութիւն Աստուծոյ մերոյ:

(փ) Ալէ. Յիշեա՛, Տէ՛ր, զԴաւիթ եւ զամենայն հեգութիւն նորա՝ որպէս երդուաւ  
Տեառն եւ ուխտս եղ Աստուծոյ Յակոբայ:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(գկ) Ընդ քեզ է սկիզբն աւուր զօրութեան, ի վայելչութիւն սրբոց քոց. յարգանդէ  
յառաջ քան զարուսեակ ծնայ զքեզ:

Երդուաւ Տէր եւ ոչ եւս զղջասցի, թէ դու եւ քահանայ յաւիտեան ըստ կարգին  
Մեքիսեդեկի, եւ Տէր ընդ աջմէ քումմէ:

Ալէ. (փ) Տէր ասացցիս՝ որդի իմ եւ դու, եւ եւս այսօր ծնայ զքեզ:

Խնդրեա՛ յինէն, եւ տաց քեզ զհեթանոսս ի ժառանգութիւն եւ իշխանութիւն քեզ ընդ  
ամենայն ծագս երկրի:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա.

Ալէլուիա, ալէլուիա, ալէլուիա.

(դձ) Յիշեա՛, Տէ՛ր, զԴաւիթ եւ զամենայն հեգութիւն նորա՝ որպէս երդուաւ Տեառն  
եւ ուխտս եղ Աստուծոյ Յակոբայ:

(փ) Ալէ. Տէր հովուեսցէ զիս, եւ ինձ ինչ ոչ պակասեսցի:

Ի վայրի դալարուոջ անդ բնակեցոյց զիս եւ առ ջուրս հանգստեան սնոյց զիս:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա ալէլուիա.

(դկ) Տէր ասացցիս՝ որդի իմ եւ դու, եւ եւս այսօր ծնայ զքեզ:

Խնդրեա՛ յինէն, եւ տաց քեզ զհեթանոսս ի ժառանգութիւն եւ իշխանութիւն քեզ ընդ ամենայն ծագս երկրի:

(փ) Ալէ. Լո՛ւր, դո՛ւստր, եւ տե՛ս, խոնարհեցո՛ զունկն քո, մոռա՛ զժողովուրդ քո եւ զտուն Հօր քոյ, զի ցանկացաւ թագաւոր գեղոյ քոյ:

Սա ինքն է Տէր քոյ. երկիր պագցես սմա, եւ դուստր Ծուրայ երկիր պագցէ սմա, եւ պատարագօք զերեսս սորա պաշտեսցեն մեծամեծք ի ժողովրդոց:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

*Ալէլուիա ի տօնի Քառասնօրեայ Գալստեան Քրիստոսի Աստուծոյ մերոյ ի տաճարն:*

Ալէլուիա, ալէլուիա, ալէլուիա.

(ալ) Օրհնեալ եկեալ յանուն Տեառն. օրհնեալ, որ գալոց ես:

Տէր Աստուած մեր երեւեցաւ մեզ, արարէ՛ք տօնս ուրախութեան կանխաւ, մինչեւ յանկինս սեղանոյ:

Ալէ. (փ) Տէր ի տաճար սուրբ իւրում, Տէր յերկինս եւ յաթոռ իւրում:

Աչք նորա ի տնանկս հային, եւ արտեւանունք նորա քննեն զորդիս մարդկան:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

*Ալէլուիա Յարութեանն Քրիստոսի*

Ալէլուիա, ալէլուիա, ալէլուիա.

(աձ) Ողորմութեամբ Տեառն լի եղև երկիր,

եւ բանի Տեառն երկինք հաստատեցան,

եւ Հոգւով բերանոյ նորա՝ ամենայն զօրութիւնք նոցա:

(փ) Ալէ. Յարեաւ Աստուած, եւ ցրուեցան ամենայն թշնամիք նորա:

Փախեան ատելիք նորա յերեսաց նորա:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----  
Ալելուիա, ալելուիա, ալելուիա.

(ակ) Ծա'փս հարէք, ամենա'յն հեթանոսք,  
աղաղակեցէ՛ք առ Աստուած ի ձայն ցնծութեան:

Տէր բարձրեալ եւ ահարկու,  
թագաւոր մեծ ի վերայ ամենայն երկրի:

(փ) Ալէ. Հաճեցար, Տէ'ր, ընդ երկիր քո,

եւ դարձուցեր զգերութիւն Յակոբայ:

Թողեր զանիրաւութիւն ժողովրդեան քոյ

եւ ծածկեցեր զամենայն մեղս նոցա:

Փառք եւ երկրպագ. այժմ եւ միշտ.

Ալելուիա, ալելուիա, ալելուիա:

-----  
Ալելուիա, ալելուիա, ալելուիա.

(բձ) Յարեաւ Աստուած, եւ ցրուեցան ամենայն թշնամիք նորա:

Փախեան ատելիք նորա յերեսաց նորա:

(փ) Ալէ. Տէր թագաւորեաց, վայելչութիւն զգեցաւ:

Զգեցաւ Տէր զօրութիւն ընդ մէջ իւր էած:

Փառք եւ երկրպագ. այժմ եւ միշտ.

Ալելուիա, ալելուիա, ալելուիա:

-----  
Ալելուիա, ալելուիա, ալելուիա.

(բկ) Հաճեցար, Տէ'ր, ընդ երկիր քո եւ դարձուցեր զգերութիւն Յակոբայ:

Թողեր զանիրաւութիւն ժողովրդեան քոյ եւ ծածկեցեր զամենայն մեղս նոցա:

(փ) Ալէ. Օրհնեցէ՛ք, մանկո'նք, զՏէր եւ օրհնեցէ՛ք զանունն Տեառն.

Եղիցի անուն Տեառն օրհնեալ յայսմհետէ մինչեւ յաւիտեան:

Փառք եւ երկրպագ. այժմ եւ միշտ.

Ալելուիա, ալելուիա, ալելուիա:

Ալէլուիա, ալէլուիա, ալէլուիա.

(գձ) Տէր թագաւորեաց, վայելչութիւն զգեցաւ:

Զգեցաւ Տէր զօրութիւն ընդ մէջ իւր էած:

(փ) Ալէ. Գովեա', Երուսաղէ'մ, զՏէր եւ օրհնեա' զԱստուած քո, Սիո'ն:

Զի զօրացոյց զնիզս դրանց քոց եւ օրհնեաց զորդիս քո ի քեզ:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(գկ) Օրհնեցէ'ք, մանկո'ւնք, զՏէր եւ օրհնեցէ'ք զանունն Տեառն:

Եղիցի անուն Տեառն օրհնեալ յայսմհետէ մինչեւ յաւիտեան:

(փ) Ալէ. Կենդանի է Տէր, եւ օրհնեալ է Աստուած.

Եւ բարձր եղիցի Աստուած փրկութեան իմոյ:

Աստուած է, որ խնդրէ զվրեժ իմ

Եւ հնազանդ առնէ զժողովուրդս ընդ ինեւ:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(դձ) Գովեա', Երուսաղէ'մ, զՏէր, եւ օրհնեա' զԱստուած քո, Սիո'ն:

Զի զօրացոյց զնիզս դրանց քոց եւ օրհնեաց զորդիս քո ի քեզ:

(փ) Ալէ. Ողորմութեամբ Տեառն լի եղեւ երկիր,

Եւ բանիւ Տեառն երկինք հաստատեցան,

Եւ Հոգւով բերանոյ նորա` ամենայն զօրութիւնք նոցա:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(դկ) Կենդանի է Տէր եւ օրհնեալ է Աստուած,

Եւ բարձր եղիցի Աստուած փրկութեան իմոյ:

Աստուած է, որ խնդրէ զվրեժ իմ

Եւ հնազանդ առնէ զժողովուրդս ընդ ինեւ:

(փ) Ալէ. Ծա'փս հարեք, ամենայն հեթանոսք,

աղաղակեցէ՛ք առ Աստուած ի ձայն ցնծութեան:

Տէր բարձրեալ եւ ահարկու, թագաւոր մեծ ի վերայ ամենայն երկրի:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

*Ալէլուիա համբարձմանն Քրիստոսի:*

Ալէլուիա, ալէլուիա, ալէլուիա,

(աձ) Համբարձէ՛ք, իշխա'նք, զդրունս ձեր ի վեր.

համբարձցին դրունք յաւիտենից, եւ մտցէ թագաւոր փառաց:

Ո՛վ է սա թագաւոր փառաց, Տէր հզօր զօրութեամբ իւրով, Տէր կարող ի պատերազմի:

(փ) Ալէ. Կառք Աստուծոյ բիրապատիկք, հազարք ուղղիչք, եւ Տէր ի նոսա ի Սինէ սրբութեան իւրոյ:

Ել ի բարձունս եւ գերեաց զգերութիւն, էառ աւար, բաշխեաց պարգեւս եւ ետ որդոց մարդկան:

Փառք եւ երկրպագ. այժմ եւ միշտ.

Դասք՝ ալէլուիա, ալէլուիա, ալէ:

-----

Ալէլուիա, ալէլուիա, ալէլուիա.

(ակ) Համբարձաւ Աստուած օրհնութեամբ, եւ Տէր մեր ձայնիւ փողոյ:

Սաղմո'ս ասացէք Աստուծոյ մերում, սաղմո'ս ասացէք Թագաւորին մերում, սաղմո'ս ասացէք:

(փ) Ալէ. Որ հովուեսդ Իսրայելի, նայեա'ց, որ առաջնորդես, որպէս խաշին Յովսեփու:

Որ նստիսդ ի քրովբէս, յայտնեաց առաջի Եփրեմի, Բենիամինի եւ Մանասէի:  
Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

Ալէլուիա, ալէլուիա, ալէլուիա:

(բձ) Կառք Աստուծոյ բիրապատիկք, հազարք ուղղիչք, եւ Տէր ի նոսա ի Սինէ  
սրբութեան իւրոյ:

Ել ի բարձունս եւ գերեաց զգերութիւն, էառ աւար, բաշխեաց պարգեւս եւ ետ որդոց  
մարդկան:

(փ) Ալէ. Ո դնէ յամպս զգնացս իւր եւ շրջի նա ի վերայ թեւոց հողմոց:

Խոստովանութիւն եւ զմեծվայելչութիւն զգեցար, արկար զլոյս՝ որպէս զօթոց,  
ձգեցեր զերկինս՝ որպէս խորան, եւ արկեր ի վերայ ջուրց զվերնայարկս նորա:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

Ալէլուիա, ալէլուիա, ալէլուիա.

(բկ) Որ հովուեսդ Իսրայելի, նայեա՛ց, որ առաջնորդես, որպէս խաշին Յովսեփու:

Որ նստիսդ ի քրովբէս, յայտնեա՛ց առաջի Եփրեմի, Բենիամինի եւ Մանասէի:

(փ) Ալէ. Մեծ եղեւ մինչեւ յերկինս ողորմութիւն քո, եւ մինչեւ յամպս

ճշմարտութիւն քո: Բարձրեալ ես դու զերկինս, Աստուա՛ծ, եւ յամենայն երկրի եւ  
փառք քո:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

Ալէլուիա, ալէլուիա, ալէլուիա.

(գձ) Ո դնէ յամպս զգնացս իւր, եւ շրջի նա ի վերայ թեւոց հողմոց:

Խոստովանութիւն եւ զմեծվայելչութիւն զգեցար, արկար զլոյս՝ որպէս զօթոց,  
ձգեցեր զերկինս՝ որպէս խորան, եւ արկեր ի վերայ ջուրց զվերնայարկս նորա:

(փ) Ալէ. Տէ՛ր, խոնարհեցո՛ր զերկինս եւ է՛ջ, մերձեա՛ ի լերինս, եւ ծխեսցին:

Փայլեա՛ զփայլատակունս քո եւ խոռվեա՛ զնոսա, առաքեա՛ զնետս քո եւ ցրուեա՛ զնոսա:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

Ալէլուիա, ալէլուիա, ալէլուիա.

(գկ) Մեծ եղեւ մինչեւ յերկինս ողորմութիւն քո, եւ մինչեւ յամպս ճշմարտութիւն քո:

Բարձրեալ եւ դու յերկինս, Աստուա՛ծ, եւ յամենայն երկրի եւն փառք քո:

(փ) Ալէ. Խոնարհեցոյց զերկինս եւ էջ, եւ մէզ ի ներքոյ ոտից նորա:

Ել ի քրովբէս եւ թռեաւ, սլացաւ նա ի թելս հողմոց:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

Ալէլուիա, ալէլուիա, ալէլուիա.

Յերեսաց նորա ելցեն հարուածք, եւ զհետ շաւղաց նորա երթիցեն մեծամեծք ի

թռչնոց: Լերինք հալեցին, եւ անտառք վատնեցին. ճանապարհք, որք ի

սկզբանէն էին, կուրացին, եւ ի նմանէ դողացի ամենայն երկիր:

(փ) Ալէ. Համբարձէ՛ք, իշխա՛նք, գորունս ձեր ի վեր. համբարձցին դրունք

յաւիտենից, եւ մտցէ թագաւոր փառաց:

Ո՛վ է սա թագաւոր փառաց, Տէր զօրութեանց. սա ինքն է թագաւոր փառաց:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

Ալէլուիա, ալէլուիա, ալէլուիա:

(դկ) Խոնարհեցոյց զերկինս եւ էջ, եւ մէզ ի ներքոյ ոտից նորա:

Ել ի քրովբէս եւ թռեաւ, սլացաւ նա ի թելս հողմոց:

(փ) Ալէ. Համբարձաւ Աստուած օրհնութեամբ, եւ Տէր մեր ձայնիւ փողոյ:

Սաղմոն'ս ասացէք Աստուծոյ մերում, սաղմոն'ս ասացէք Թագաւորին մերում,  
սաղմոն'ս ասացէք:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

*Ալէլուիա Հոգւոյն Սրբոյ Գալստեանն:*

Ալէլուիա, ալէլուիա, ալէլուիա:

(աձ) Յանկալի է նա, քան զոսկի եւ քան զականս պատուականս բազումս, քաղցր է  
նա, քան զմեղու խորիսիս:

Քանզի ծառայ քո պահեսցէ զայս, ի պահել նմա զհատուցումն բազում:

(փ) Ալէ. Թեք աղաւնոյ արծաթապատ, եւ թիկնամէջ նորա ի գոյն ոսկւոյ:

Ի գումարել երկնաւորին զթագաւորս ի վերայ նորա ձիւնասցին ի Սաղմոն:

Փառք եւ երկրպագ. այժմ եւ միշտ.

Դասք՝ ալէլուիա, ալէլուիա, ալէ:

-----

Ալէլուիա, ալէլուիա, ալէլուիա.

(ակ) Սիրտ սուրբ հաստատեալ յիս, Աստուա՛ծ, եւ հոգի ուղիղ նորոգեա՛ ի փորի  
իմում:

Մի՛ ընկենուր զիս, Տէ՛ր, յերեսաց քոց, եւ զՀոգի քո Սուրբ մի՛ հաներ յինէն:

(փ) Ալէ. Գտի զԴաւիթ ծառայ իմ եւ իւղով սրբով իմով օծի զնա:

Ձեռն իմ ընկալցի զնա, եւ բազուկ իմ զօրացուցէ զնա:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(բձ) Թեք աղաւնոյ արծաթապատ, եւ թիկնամէջ նորա ի գոյն ոսկւոյ:

Ի գումարել երկնաւորին զթագաւորս ի վերայ նորա ձիւնասցին ի Սաղմոն:

(փ) Ալէ. Առաքես զոզի քո եւ ստանաս զնոսա եւ նորոզես զերեսս երկրի:  
Եղիցին փառք Տեառն յաւիտեան, եւ Տէր ուրախ եղիցի յարարածս իւր:  
Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:  
-----

Ալէլուիա, ալէլուիա, ալէլուիա:

(բկ) Գտի զԴաւիթ ծառայ իմ եւ իւղով  
սրբով իմով օծի զնա: Ձեռն իմ ընկալցի զնա, եւ բազուկ իմ զօրացուցէ զնա:  
(փ) Ալէ. Յայտնութիւն բանից քոց լուսաւոր է եւ իմաստուն առնէ զտղայս:  
Զբերան իմ բացի եւ առի զՀոզի. ի պատուիրանս քո փափաքեաց անձն իմ:  
Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:  
-----

Ալէլուիա, ալէլուիա, ալէլուիա.

(զձ) Առաքես զոզի քո եւ ստանաս զնոսա եւ նորոզես զերեսս երկրի:  
Եղիցին փառք Տեառն յաւիտեան, եւ Տէր ուրախ եղիցի յարարածս իւր:

(փ) Ալէ. Հոզի քո Սուրբ եւ բարի առաջնորդեսցէ ինձ ի յերկիր ուղիղ:  
Վասն անուան քո, Տէ'ր, կեցուցես զիս, արդարութեամբ քով հանցես ի նեղութենէ  
զանձն իմ:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:  
-----

Ալէլուիա, ալէլուիա, ալէլուիա.

(զկ) Զբերան իմ բացի եւ առի զՀոզի. ի պատուիրանս քո փափաքեաց անձն իմ:  
Նայեա'ց առ իս եւ ողորմեա'ց ինձ ըստ իրաւունս սիրողաց անուան քոյ:

(փ) Ալէ.

Ի սաստէ քումմէ, Տէ'ր, եւ ի շնչել հոգւոյ բարկութեան քո:

Առաքեաց ի բարձանց եւ ընկալաւ զիս, ընկալաւ զիս ի ջուրց բազմաց:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(դձ) Որպէս իւղ, զի իջանէ ի գլուխ եւ ի մօրուսն Ահարոնի եւ ի մօրուացն իջանէ ի գրապանս զգեստու նորա:

Որպէս ցօղ, զի ցօղէ ի Հերմոնէ ի վերայ լերին Սիոնի:

(փ) Ալէ. Ի վայրի դալարուջ անդ բնակեցոյց զիս, եւ առ ջուրս հանգստեան սնոյց զիս: Դարձոյց զանձն իմ առ իս եւ առաջնորդեաց ինձ ի ճանապարհս

արդարութեան վասն անուան իւրոյ:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(դկ) Ի սաստէ քումմէ, Տէ'ր, եւ ի շնչել հոգւոյ բարկութեան քո:

Առաքեաց ի բարձանց եւ ընկալաւ զիս, ի ջուրց բազմաց:

(փ) Ալէ. Սիրտ սուրբ հաստատեալ յիս, Աստուա'ծ, եւ հոգի ուղիղ նորոգեալ ի փորի իմում: Մի' ընկենուր զիս, Տէ'ր, յերեսաց քոց, եւ զՀոգի քո Սուրբ մի' հաներ յինէն:

Փառք եւ երկրպագ. այժմ եւ միշտ.

Ալէլուիա. ալէլուիա. ալէլուիա:

-----

*Ալէլուիա Խաչի:*

Ալէլուիա, ալէլուիա, ալէլուիա.

(աձ) Յուպ քո եւ գաւազան, նոքա մխիթարեցեն զիս:

Պատրաստ արարեր առաջի իմ գսեղան, ակն յանդիման նեղչաց իմոց:

(փ) Ալէ. Ետուր երկիւղածաց քոց նշան, զի ապրեցին յերեսաց աղեղան:

Որպէս փրկեցան սիրելիք քո, կեցո՛ւ աջով քով եւ լո՛ւր մեզ:

Փառք եւ երկրպագ. այժմ եւ միշտ.

Դասք՝ ալէլուիա, ալէլուիա, ալէ:

-----

Ալէլուիա, ալէլուիա, ալէլուիա.

(ակ) Նետք քո սրեալ են, Հզօ՛ր, եւ ժողովուրդք ի

ներքոյ քո անկցին, ի սիրտս թշնամեաց թագաւորի:

Աթոռ քո, Աստուա՛ծ, յաւիտեանս յաւիտենից. գաւազան ուղղութեան գաւազան արքայութեան քոյ:

(փ) Ալէ. Տո՛ւր զօրութիւն ծառայի քոյ, կեցո՛ւ զորդի աղախնոյ քոյ եւ արա՛ առ իս նշան բարութեան:

Տեսցեն ատելիք իմ եւ ամաչեսցեն, զի դու, Տէ՛ր, օգնեցեր ինձ եւ մխիթարեցեր զիս:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(բձ) Ետուր երկիւղածաց քոց նշան, զի ապրեցին յերեսաց աղեղան:

Որպէս փրկեցան սիրելիք քո, կեցո՛ւ աջով քով եւ լո՛ւր մեզ:

(փ) Ալէ. Դու պատրաստեցեր զուղղութիւն եւ զիրաւունս եւ զարդարութիւն

Յակոբայ դու արարեր:

Բա՛րձր արարէք զՏէր Աստուած մեր, երկի՛ր պագէք պատուանդանի ոտից նոքա, զի սուրբ է:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----  
Ալելուիա, ալելուիա, ալելուիա.

(բկ) Տո'ւր զօրութիւն ծառայի քոյ, կեցո՛ զորդի աղախնոյ քոյ եւ արա առ իս նշան  
բարութեան:

Տեսցեն ատելիք իմ եւ ամաչեսցեն, զի դու, Տէ՛ր, օգնեցեր ինձ եւ մխիթարեցեր զիս:

(փ) Ալէ. Ասաց Տէր ցՏէր իմ՝ նիստ ընդ աջմէ իմմէ, մինչեւ եղից զթշնամիս քո  
պատուանդան ոտից քոց:

Գաւազան զօրութեան առաքեսցէ քեզ Տէր ի Սիոնէ, եւ տիրեսցես դու ի մէջ  
թշնամեաց քոց:

Փառք եւ երկրպագ. այժմ եւ միշտ.

Ալելուիա, ալելուիա, ալելուիա:

-----  
Ալելուիա, ալելուիա, ալելուիա.

(գձ) Դու պատրաստեցեր զուղղութիւն եւ զիրաւունս եւ զարդարութիւն Յակոբայ  
դու արարեր:

Բա՛րձր արարէք զՏէր Աստուած մեր, երկի՛ր պագէք պատուանդանի ոտից նորա,  
զի սուրբ է:

(իփ) Ալէ. Յայտնեսցեն երկինք զվայելչութիւն փառաց նորա, եւ օրհնութեամբ նորա  
լցան տիեզերք:

Ճառագայթք, որպէս ի լուսոյ, հատան ի նմանէ, եւ եղջիրք ի ձեռին նորա գտան,  
եւ անդ հաստատեցաւ զօրութիւն փառաց նորա:

Փառք եւ երկրպագ. այժմ եւ միշտ.

Ալելուիա, ալելուիա, ալելուիա:

-----  
Ալելուիա, ալելուիա, ալելուիա.

(գկ) Ասաց Տէր ցՏէր իմ՝ նիստ ընդ աջմէ իմմէ, մինչեւ եղից զթշնամիս քո  
պատուանդան ոտից քոց:

Գաւազան զօրութեան առաքեցէ քեզ Տէր ի Սիոնէ, եւ տիրեցես դու ի մէջ  
թշնամեաց քոց:

(փ) Ալէ. Նշանեցաւ առ մեզ լոյս երեսաց քոց, եւ ետուր ուրախութիւն սրտից մերոց:

Ի պտղոյ ցորենոյ, գինւոյ եւ ձիթոյ իւրեանց լցուցեր զնոսա:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(դձ) Յայտնեցեն երկինք զվայելչութիւն փառաց նորա, եւ օրհնութեամբ նորա լցան  
տիեզերք:

Ճառագայթք, որպէս ի լուսոյ, հատան ի նմանէ, եւ եղջիրք ի ձեռին նորա գտան, եւ  
անդ հաստատեցաւ զօրութիւն փառաց նորա:

(փ) Ալէ. Յուպ քո եւ գաւազան, նոքա մխիթարեցեն զիս:

Պատրաստ արարեր առաջի իմ զսեղան, ակն յանդիման նեղչաց իմոց:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(դկ) Նշանեցաւ առ մեզ լոյս երեսաց քոց, եւ ետուր ուրախութիւն սրտից մերոց:

Ի պտղոյ ցորենոյ, գինւոյ եւ ձիթոյ իւրեանց լցուցեր զնոսա:

(փ) Ալէ. Նետք քո սրեալ են, Հզօ՛ր, եւ ժողովուրդք ի ներքոյ անկցին ի սիրտս  
թշնամեաց թագաւորի:

Աթոռ քո, Աստուա՛ծ, յաւիտեանս յաւիտենից, գաւազան ուղղութեան գաւազան  
արքայութեան քո:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

*Աղէլուք Եկեղեցւոյ:*

Ալէլուիա, ալէլուիա, ալէլուիա.

(աձ) Լսել ինձ զձայն օրհնութեան քոյ եւ պատմել զամենայն սքանչելիս քո:

Տէ՛ր, սիրեցի զվայելչութիւն տան քո եւ զտեղի յարկի փառաց քոց:

(փ) Ալէ. Երանի՛, զոր ընտրեցեր եւ ընկալար եւ բնակեցին ի գաւիթս քո:

Լցցուք մեք ի բարութենէ տան քոյ, սուրբ է տաճար քո, սքանչելի արդարութեամբ:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(ակ) Մեծ է Տէր եւ օրհնեալ է յոյժ ի քաղաք Աստուծոյ մերոյ, ի լեառն սուրբ նորա:

Հաստարմատ ցնծութեամբ ցնծասցէ ամենայն երկիր, լերինք Սիոնի, կողմանք հիւսիսոյ, ի քաղաք թագաւորին մեծի:

(փ) Ալէ. Հիմունք նորա ի լեառն սուրբ նորա, սիրէ Տէր զորունս Սիոնի առաւել, քան զամենայն յարկսն Յակոբայ:

Փառաւորեալն խօսեցաւ վասն քոյ, ահաւաղիկ քաղաքդ Աստուծոյ:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(բձ) Երանի՛, զոր ընտրեցեր եւ ընկալար, եւ բնակեցին ի գաւիթս քո:

Լցցուք մեք ի բարութենէ տան քոյ, սուրբ է տաճար քո, սքանչելի արդարութեամբ:

Ալէ. Դու, Տէ՛ր, յաւիտեան կաս, եւ յիշատակ քո ազգէ մինչեւ յազգ:

Դու յարուցեալ գթասցիս ի վերայ Սիոնի, ժամանակ գթալոյ նորա հասեալ է ժամ:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(բկ) Հիմունք նորա ի լեառն սուրբ նորա, սիրէ Տէր գորունս Սիոնի առաւել, քան  
զամենայն յարկսն Յակոբայ:

Փառաւորեալն խօսեցաւ վասն քոյ, ահաւաղիկ քաղաքդ Աստուծոյ:

(ւփ) Ալէ. Այսօր է, գոր արար Տէր, եկայք ցնծասցուք եւ ուրախ եղիցուք ի սմա:

Ի Տեառնէ եղեւ այս եւ է սքանչելի առաջի աչաց մերոց:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(գձ) Դու, Տէ՛ր, յաւիտեան կաս, եւ յիշատակ քո ազգէ մինչեւ յազգ:

Դու յարուցեալ գթասցիս ի վերայ Սիոնի, ժամանակ գթալոյ նորա հասեալ է ժամ:

(ւփ) Ալէ. Խոստովան եղեց քեզ, Տէ՛ր, բոլորով սրտիւ իմով, առաջի հրեշտակաց  
սաղմոս ասացից քեզ:

Զի լուար զբանս բերանոյ իմոյ, երկիր պագից ի տաճար սուրբ քո եւ խոստովան  
եղեց անուան քում վասն ողորմութեան եւ ճշմարտութեան քոյ:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(գկ) Այսօր է, գոր արար Տէր, եկայք ցնծասցուք եւ ուրախ եղիցուք ի սմա:

Ի Տեառնէ եղեւ այս եւ է սքանչելի առաջի աչաց մերոց:

(ւփ) Ալէ. Տէ՛ր, ո՞վ կացցէ ի խորանի քում, կամ ո՞վ բնակեսցի ի լեառն սուրբ քո:

Որ գնայ անբիժ, գործէ զարդարութիւն, խօսի ճշմարտութիւն ի սրտի իւրում: Փառք  
եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(դձ) Ուրախ եղէ ես, ոչք ասէին ցիս՝ ի տուն Տեան երթիցուք մէք:

Հասեալ կային ոտք մեր առ դրունս քո, Երուսաղէ՛մ:

(փ) Ալէ. Լսել ինձ զձայն օրհնութեան քոյ եւ պատմել զամենայն սքանչելիս քոյ:

Տէ՛ր, սիրեցի զվայելչութիւն տան քոյ եւ զտեղի յարկի փառաց քոց:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

-----

Ալէլուիա, ալէլուիա, ալէլուիա.

(դկ) Տէր, ո՞վ կացցէ ի խորանի քում, կամ ո՞վ բնակեցցի ի լեան սուրբ քո:

Որ գնայ անբիծ, գործէ զարդարութիւն, խօսի զճշմարտութիւն ի սրտի իւրում:

(փ) Ալէ. Մեծ է Տէր եւ օրհնեալ է յոյժ ի քաղաք Աստուծոյ մերոյ ի լեան սուրբ նորա:

Հաստարմատ ցնծութեամբ ցնծասցէ ամենայն երկիր, լերինք Սիոնի, կողմանք հիւսիսոյ, ի քաղաք թագաւորին մեծի:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

*Ալէլուիա եւ Թագաւոր ի տօնի*

*Հրեշտակապետաց*

Ալէլուիա, ալէլուիա, ալէլուիա.

Ո արար զհրեշտակս իւր յոգիս եւ զպաշտօնեայս իւր ի հուր կիզելոյ: Հաստատեաց զերկիր ի վերայ հաստատութեան իւրոյ, զի մի՛ սասանեցցի յաւիտեան:

(փ) Ալէ. Օրհնեցէք զՏէր յերկնից, օրհնեցէք զնա ի բարձանց:

Օրհնեցէ՛ք զնա, ամենայն հրեշտա՛կք նորա, օրհնեցէ՛ք զնա, ամենայն զօրութի՛ւնք նորա:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

Դասք հրեշտակաց օրհնեն զքեզ, Քրիստո՛ս, ալէլուիա.

մարդկան ազգ սաղմոսեն քեզ, ալէլուիա, ալէ:  
(թ) Երկինք եւ երկիր գոհանան գքէն, Տէ՛ր,  
արարածք ամենայն քեզ երկիր պագանեն,  
եւ հրեշտակք ի բարձունս աղաղակեն եւ ասեն.  
□Ողորմեա՛, դու ստեղծեր, մի՛ կորուսաներ□:

(սղ) Երկի՛նք երկնից, ջո՛ւրք, որ ի վերոյ քան զերկինս, օրհնեցէ՛ք զանունն Տեառն:  
Զի նա ասաց, եւ եղեն, հրամայեաց, եւ հաստատեցան,  
եւ հրեշտակք ի բար:  
(փ) Երկինք եւ երկիր հանապազ գքեզ գովեն, Թագաւո՛ր փառաց,  
սերովբէք եւ քերովբէք ի խոնարհ ունելով զդէմս իւրեանց  
եւ միաձայն բարբառովն աղաղակեն եւ ասեն.  
□Սուրբ, սուրբ, սուրբ, Տէ՛ր զօրութեանց□:

-----

### *Ալէլուիք Ղազարու յարութեանն*

Ալէլուիա, ալէլուիա, ալէլուիա:  
Բարձր առնեմ գքեզ, Տէ՛ր, զի ընկալար զիս եւ ոչ ուրախ արարեր զթշնամին իմ յիս:  
Տէ՛ր Աստուած իմ, կարդացի առ քեզ, եւ բժշկեցեր զիս,  
Տէ՛ր, հաներ ի դժոխսց զանձն իմ եւ փրկեցեր զիս յայնցանէ, որք իջանեն ի գուր:  
(փ) Ալէ. Եհան զիս ի գբոյ տառապանաց, ի կաւոյ եւ ի տղմոյ:  
Հաստատեաց ի վերայ վիմի գոտս իմ եւ ուղղեաց զգնացս իմ:  
Փառք եւ երկրպագ. այժմ եւ միշտ.  
Դասք՝ ալէլուիա, ալէլուիա, ալէլուիա:

-----

### *Ալէլուիք Ծաղկազարդին*

Ալէլուիա, ալէլուիա, ալէլուիա.

Տէր Աստուած մեր երեւեցաւ մեզ, արարէք տօնս ուրախութեան կանխաւ, մինչեւ  
յանկիւնս սեղանոյ:

Աստուած իմ ես դու, եւ խոստովան եղէց քեզ, Աստուած իմ ես դու, եւ բարձր  
արարից զքեզ:

(Վ) Ալէ. Լերինք ցնծասցեն առաջի Տեառն, զի գայ. եւ հասեալ է Տէր ի դատել  
զերկիր:

Դատէ զաշխարհս արդարութեամբ եւ զժողովուրդս իւր ուղղութեամբ:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

---

*Ալէլուիա Աւագ Շաբաթուն*

*(ՈՂՈԳՈՄԵԱՆ)*

ԱԻԱԳ ԵՐԿՈՒՇԱԲԹԻ

Ալէլուիա, ալէլուիա, ալէլուիա.

Զի նա ասաց, եւ եղեն, հրամայեաց, եւ հաստատեցան:

Կարգեաց զնոսա յաւիտեան, սահման եդ, որք ոչ անցանեն:

(Վ) Ալէ. Ի սկզբանէ, Տէ'ր, զհիմունս երկրի հաստատեցեր, եւ գործք ձեռաց քոց  
երկինք են:

Նոքա կորնչին, եւ դու կաս եւ մնաս յաւիտեան:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

---

ԱԻԱԳ ԵՐԵՔՇԱԲԹԻ

Ալէլուիա, ալէլուիա, ալէլուիա.

Կացցե դշխոյ ընդ աջմէ քումմէ ի հանդերձս ոսկեհուռս զարդարեալ եւ  
պաճուճեալ:

Լո՛ւր, դո՛ւստր, եւ տե՛ս, խոնարհեցո՛ զունկն քո, մոռա՛ զժողովուրդ քո եւ զտուն Հօր  
քոյ,

զի ցանկացաւ թագաւոր գեղոյ քոյ:

(փ) Ալէ. Տարցին թագաւորի կուսանք զհետ նորա եւ զընկերս նորա տարցին նմա:

Ածցին ցնծութեամբ եւ ուրախութեամբ եւ տարցին ի տաճար թագաւորի,

եւ փոխանակ հարց քոց եղիցին որդիք քո:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

---

ԱԻԱԳ ՉՈՐԵՔՇԱԲԹԻ

Ալէլուիա, ալէլուիա, ալէլուիա.

Որ ուտէր զհաց իմ, յաճախեաց առնել ինձ խաբէութիւն:

Այլ դու, Տէ՛ր, ողորմեա՛ ինձ եւ կանգնեա՛ զիս, եւ ես հաստուցից նոցա:

(փ) Ալէ. Խորհեցան եւ խօսեցան զչարութիւն եւ զապիրատութիւն ի բարձունս

խորհեցան:

Եղին յերկինս զբերանս իւրեանց եւ զլեզուս իւրեանց յաճէին զերկրաւ:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

---

ԱԻԱԳ ՀԻՆԳՇԱԲԹԻ

Ալէլուիա, ալէլուիա, ալէլուիա.

Լուսցից սրբութեամբ զձեռս իմ եւ շուրջ եղեց զսեղանով քո, Տէ՛ր:

Տէ՛ր, սիրեցի զվայելչութիւն տան քոյ եւ զտեղի յարկի փառաց քոց:

(փ) Ալէ. Պատրաստ արարեր առաջի իմ զսեղան, ակն յանդիման նեղչաց իմոց:

Օձեր իւղով զգլուիս իմ, բաժակ քո որպէս անապակ արբեցոյց զիս:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

---

#### ԱԻԱԳ ՈՒՐԲԱԹ

Ալէլուիա, ալէլուիա, ալէլուիա.

Զարթեալ աղեղն քո, զնեսու կապարճից քոց արբուցեր, զգեսու ցրուեցեր, զերկիր  
դողացուցեր ի սաստկութենէ անձրեւի, որ անցանէ ընդ սա:

Անդունո՞ք աղաղակեցին մեծապէս, լոյս փայլման արեգականն արգելաւ, եւ  
ծագումն լուսնին դադարեցաւ:

(Վ) Ալէ. Մատնեցայ եւ ոչ ելանէի, աչք իմ տկարացան յաղքատութենէ:

Աղաղակեցի առ Տէր զօրհանապագ եւ համբարձի առ քեզ զձեռս իմ:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

---

#### ԱԻԱԳ ՇԱԲԱԹ

Ալէլուիա, ալէլուիա, ալէլուիա.

Եղին զիս ի գբի ներքնումն, ի խաւարի եւ ի ստուերս մահու:

Յիս հաստատեցաւ սրտմտութիւն քո, զամենայն զքօսանս քո աձեր ի վերայ իմ:

(Վ) Ալէ. Եղէ ես որպէս մարդ առանց օգնականի եւ ի մեռեալս ազատ, որպէս  
վիրաւորս, որք ննջեն ի գերեզմանի:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

---

*Յայլ օրինակէ է այս.*

Ինքն ի գերեզմանի գնաց եւ ի տապանի տքնեցաւ:

Քաղցրացան նմա խիճք հեղեղատի, եւ զհետ նորա ամենայն մարդ գնասցէ:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

---

*Ալէլուիք Պայծառակերպութեանն Քրիստոսի, որ ասի Վարդավառ*

Ալէլուիա, ալէլուիա, ալէլուիա.

(կիր) Քո են երկինք, եւ քո է երկիր, զաշխարհ լրի իւրով դու հաստատեցեր:

Զհիւսիս եւ զհարաւ դու արարեր, Թաբոր եւ Հերմոն յանուն քո ցնծասցեն:

(փ) Ալէ. Բարձրութիւնք լերանց նորա են, նորա է ծով, եւ նա արար զնա, եւ զցամաք ձեռք նորա ստեղծին:

Եկայք երկիր պագցուք նմա, անկցուք եւ լացցուք առաջի Տեառն Արարչին մերոյ:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

---

Ալէլուիա, ալէլուիա, ալէլուիա.

(բշ) Բարձրութիւնք լերանց նորա են, նորա է ծով, եւ նա արար զնա, եւ զցամաք ձեռք նորա ստեղծին:

Մովսէս եւ Ահարոն երիցունք նորա, Սամուէլ ընդ այնոսիկ, որք կարդան զանուն նորա:

(փ) Ալէ. Լերինք ցնծասցեն առաջի Տեառն, զի զայ. եւ հասեալ է Տէր ի դատել զերկիր:

Դատէ զաշխարհս արդարութեամբ եւ զժողովուրդս իւր ուղղութեամբ:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

---

Ալէլուիա, ալէլուիա, ալէլուիա.

(գշ) Ի ձեռս նորա են ամենայն տիեզերք երկրի, եւ բարձրութիւնք լերանց նորա են: Նորա է ծով, եւ նա արար զնա, եւ զցամաք ձեռք նորա ստեղծին:

(փ) Ալէ. Լերինք որպէս մոմ հալեցին յերեսաց Տեառն, յերեսաց Տեառն ամենայն երկիր: Պատմեցեն երկինք զարդարութիւն նորա, եւ տեսցեն ամենայն ժողովուրդք զփառս նորա:

Փառք եւ երկրպագ. այժմ եւ միշտ.

Ալէլուիա, ալէլուիա, ալէլուիա:

*Կարգաւորութիւն հասարակաց աղօթից առաւօտու ժամուն, որ կատարի ի դէմս Որդւոյն Աստուծոյ, որ երեւեցաւ իւղաբերիցն*

-----

Օրհնեալ Տէր մեր Յիսուս Քրիստոս. ամէն:

Հայր մեր, որ յերկինս ես:

Լցաք առաւօտու ողորմութեամբ քով, ցնծացաք եւ ուրախ եղաք զամենայն աւուրս կենաց մերոց: Ուրախ եղաք փոխանակ աւուրցն, յորս խոնարհ արարեր զմեզ, եւ ամացն, յորս տեսաք զչարչաչանս:

Հայեա՛, Տէ՛ր, ի ծառայս քո եւ ի գործս ձեռաց քոց եւ առաջնորդեա՛ որդւոց նոցա.

եղիցի լոյս Տեառն Աստուծոյ ի վերայ մեր:

Զգործս ձեռաց մերոց ուղի՛ղ արա ի մեզ, Տէ՛ր, եւ զգործս ձեռաց մերոց յաջողեա՛ մեզ:

Փառք Հօր եւ Որդւոյ եւ. այժմ եւ.

Եւ եւս խաղաղութեան զՏէր աղա.

Օրհնութիւն եւ փառք Հօր եւ:

-----

*Օրհնութիւն երից մանկանցն*

Օրհնեալ ես, Տէ՛ր Աստուած հարցն մերոց, գովեալ եւ փառաւորեալ է անուն քո յաւիտեան:

Յիրաւունս անցուցեր զայս ամենայն ընդ մեզ. արդար ես դու, Տէ՛ր, եւ ամենայն գործք քո ճշմարիտ են:

Ճանապարհք քո ուղիղ են, եւ ամենայն դատաստանք քո արդար են:

Դատաստան արդարութեան ածեր ի վերայ մեր, ըստ ամենայնի, գոր ինչ ածեր ի վերայ մեր եւ քաղաքի սրբոյ հարցն մերոց Երուսաղեմի,

Արդարութեամբ եւ յիրաւի ածեր զայս ամենայն ի վերայ մեր վասն մեղաց մերոց:

Անօրինեցաք եւ յանցեաք՝ ապստամբ լինիլ ի քէն, մեղաք յամենայնի եւ պատուիրանաց քոց մեք ոչ անսացաք:

Ոչ պահեցաք եւ ոչ արարաք, որպէս պատուիրեցեր դու մեզ, զի զբարիս գտցուք մեք ի քէն:

Արդ, զամենայն, գոր արարեր եւ գոր ինչ ածեր ի վերայ մեր, արդար դատաստանաւ արարեր:

Մատնեցեր զմեզ ի ձեռս թշնամեաց մերոց, անօրինաց, խստաց եւ ապստամբողաց, ի ձեռս թագաւորի անօրինի եւ չարի, քան զամենայն երկիր, մատնեցեր զմեզ:

Եւ արդ, ոչ գոյ մեզ ժամ բանալ զբերանս մեր, զի ամօթ եւ նախաստինք եղաք ծառայից քոց եւ պաշտօնէից:

Այլ մի՛ մատներ զմեզ իսպառ վասն անուան քո, մի՛ ցրեր զուխտս քո եւ մի՛ բացեալ առներ զողորմութիւնս քո ի մէնջ վասն Արբահամու սիրելւոյ քո, Իսահակայ ծառայի քո եւ Իսրայելի սրբոյ քո:

Խոստացար նոցա եւ ասացեր. □Բազմացուցից զգաւակ ձեր որպէս զաստեղս երկնից բազմութեամբ եւ որպէս զաւազ առ ափն ծովու□:

Եւ արդ, Տէ՛ր, նուաղեցաք մեք, քան զամենայն ազգս, եւ եմք տառապեալ յամենայն երկրի այսօր վասն մեղաց մերոց:

Ոչ գոյ ի ժամանակի յայսմիկ իշխան, մարգարէ եւ առաջնորդ, ոչ ողջակէզք պատարագաց, ոչ խունկք օրինաց եւ ոչ տեղի պատարագս մատուցանելոյ առաջի քո եւ զողորմութիւն գտանել ի քէն:

Այլ անձամբ խոնարհեալ եւ հոգւով տառապանաց ընդունելի լիցուք մեք, որպէս  
զողջակէզս խոյոց եւ զուարակաց եւ որպէս բիրաւորս գառանց պարարտաց:  
Այնպէս ընդունելի լիցին պատարագք մեր այսօր առաջի քո, զի չիք ամօթ  
յուսացելոցս ի քեզ:

Եւ արդ, գամք զհետ քո ամենայն սրտիւք մերովք, երկնչեմք ի քէն եւ խնդրեմք  
զերեսս քո,

Տէ՛ր, մի՛ յամօթ առնէր զմեզ, այլ արա՛ առ մեզ ըստ հեզութեան քում եւ ըստ  
բազում ողորմութեան քում.

Վերկեա՛ զմեզ վասն սքանչելեաց քոց, Տէ՛ր, եւ փառաւորեցի անուն քո յաւիտեան:  
Յամօթ լիցին ամենեքեան, որ չարչարեն զձառայս քո, ամաչեցեալ լիցին բռնութիւնք  
նոցա, եւ ամենայն զօրութիւնք նոցա խորտակեցին:

Եւ ծանիցեն, զի դու ես Տէր Աստուած միայն, որ փառաւորեալդ ես ի վերայ  
ամենայն տիեզերաց: Օրհնեալ ես դու, Տէ՛ր Աստուած հարցն մերոց, զովեալ եւ  
առաւել բարձրացեալ յաւիտեան:

Եւ օրհնեալ է անուն սուրբ փառաց քոց, զովեալ եւ առաւել բարձրացեալ յաւիտեան:

Օրհնեալ ես ի տաճարի փառաց սրբութեան քո, զովեալ եւ առա:

Օրհնեալ ես ի վերայ աթոռոյ արքայութեան քո, զովեալ եւ առա:

Օրհնեալ ես, որ նստիս ի քերովբէս եւ հայիս յանդունդս, զովեալ եւ առա:

Օրհնեալ ես ի վերայ հաստատութեան երկնից, զովեալ եւ առա:

Օրհնեցէ՛ք, ամենայն զո՛րծք Տեառն, զՏէր, օրհնեցէ՛ք եւ բա՛րձր արարէք զնա  
յաւիտեան:

Օրհնեցէ՛ք, երկի՛նք, զՏէր, օրհնեցէ՛ք եւ բա՛րձր արարէք զնա յաւիտեան:

Օրհնեցէ՛ք, հրեշտա՛կք Տեառն եւ ջո՛ւրք, որ ի վերայ երկնից, զՏէր, օրհ:

Օրհնեցէ՛ք, զօրո՞թի՛նք Տեառն, արեգա՛կն եւ լուսի՛ն զՏէր, օրհ:

Օրհնեցէ՛ք, աստե՛ղք երկնից, անձրե՛ւք եւ ցօ՛ղք, զՏէր, օրհ:

Օրհնեցէ՛ք, ամենայն հո՛ղմք, հո՛ւր եւ ջե՛ր, զՏէր, օրհ:

Օրհնեցէ՛ք, ցո՛ւրտ եւ սօ՛թ, ցօ՛ղ եւ ձիւնաբե՛ր, զՏէր, օրհ: Օրհնեցէ՛ք, սա՛ռն եւ պա՛րզ,  
եղեա՛մն եւ ձի՛ւն, զՏէր, օրհ:

Օրհնեցէ՛ք, տի՛ւք եւ գիշե՛րք, լո՛յս եւ խաւա՛ր, զՏէր, օրհ:Օրհնեցէ՛ք, ա՛մպ եւ  
փայլատակո՛ւնք եւ երկի՛ր, զՏէր, օրհ:  
Օրհնեցէ՛ք, լերի՛նք եւ բլո՛ւրք եւ ամենայն բո՛յսք երկրի, զՏէր, օրհ:Օրհնեցէ՛ք,  
աղբի՛ւրք, ծո՛ւք եւ գե՛տք, զՏէր, օրհ:  
Օրհնեցէ՛ք, կե՛տք եւ ամենայն կայտա՛ռք, որ ի ջուրս, եւ թռչո՛ւնք երկնից, զՏէր, օրհ:  
Օրհնեցէ՛ք, գագա՛նք եւ անասո՛ւնք եւ որդի՛ք մարդկան, զՏէր, օրհ:  
Օրհնեցէ՛ք Իսրայէլ զՏէր, օրհնեցէ՛ք եւ բարձր արասցէ՛ք զնա յաւիտեան:  
Օրհնեցէ՛ք, քահանա՛յք, զՏէր, օրհնեցէ՛ք եւ բա՛րձր արարէք զնա յա:  
Օրհնեցէ՛ք, ծառա՛յք Տեառն, զՏէր, օրհ: Օրհնեցէ՛ք, անձի՛նք եւ շո՛ւնք արդարոց,  
զՏէր, օրհ: Օրհնեցէ՛ք, սո՛ւրբք եւ խոնարհք սրտի՛ւք, զՏէր, օրհ:  
Օրհնեցէ՛ք, Անանիա՛, Ազարիա՛ եւ Միսայէ՛լ, զՏէր, օրհ:  
Փառք Հօր եւ Որդւոյ եւ:

---

### *Մաղթանք*

Օրհնեցէ՛ք, ամենա՛յն արարածք, զԱրարիչն արարածոց, զՏէրն տերանց,  
զԹագաւորն թագաւորաց, զԱստուածն աստուծոց:  
Օրհնեցէ՛ք, գովեցէ՛ք, բարեբանեցէ՛ք, զի քաղցր է, զի յաւիտեան է ողորմութիւն  
նորա:

---

### *Հարցի շարականք*

#### *Սրբոյ Յարութեանն Քրիստոսի*

(աձ) Որ եկիր ի փրկութիւն տիեզերաց, թագաւո՛ր յաւիտենից Քրիստոս, զքեզ  
փառաւորենք, Աստուա՛ծ հարցն մերոց:  
Յանձն առեր զչարչարանս կամաւորապէս եւ զմահ ճաշակեցեր վասն մեր, զքեզ  
փա:  
Կնքեցար վիմով ի գերեզմանի եւ լուծեր զկնիք մահու յանցանաց, զքեզ փա:

(գ) Օրհնեցէ՛ք, ամենայն գո'րծք Տեառն, զՏէր, օրհնեցէ՛ք, բա'րձր արարէք զնա  
յաւիտեան: Զյարուցեալն ի մեռելոց Քրիստոս Աստուած, որ զմահ խափանեաց  
յարութեամբն իւրով, բա'րձր արա:

Զսքանչելի յարութիւնն Քրիստոսի Աստուծոյ, ամենա'յն ժողովուրդք, բարեբանելով  
բա'րձր արա:

---

*Սրբոց հրեշտակապետաց*

(գկ) Անսկիզբն Հա'յր, առաջին լո'յս անճառելի,  
որ ի լուսոյ լոյս ներգործեալ զիմանալեաց գոյական, զքեզ օրհնեմք, Աստուա'ծ  
հարցն մերոց:

Էակի'ցոյ Հօր, ի լուսոյ լոյս ծագումն Որդի, որ արարեր ի պաշտօն փառաց քոց  
զհրեղինացն զօրս, զքեզ օրհ:

Ի Հօրէ բղիտումն, փառակից Որդոյ Հոգի'դ անեղ, որ ստեղծեր ի յոգիս կատարեալ  
զհոգեղինացն դասս, զքեզ օրհ:

(գ) Օրհնեցէ՛ք, ամենայն գո'րծք Տեառն, զՏէր, օրհնեցէ՛ք, բա'րձր արարէք զնա  
յաւիտեան:

Երկնային զուարթո'ւնք, հրեշտա'կք եւ հրեշտակապե'տք, վերին պետութի'ւնք,  
բարձր արարէք զՀայրն երկնաւոր:

Անմարմնոց բազմութի'ւնք, իշխանութի'ւնք, զօրութի'ւնք, անմահ տէրութի'ւնք,  
բա'րձր արարէք զՔրիստոս թագաւորն:

Վեցթեւեան սերովբե'ք, քառակերպեան քերովբե'ք, աթո'ռք անեղին, բա'րձր արարէք  
զՀոգին ճշմարիտ:

-----

*Սրբոց Մարգարեից*

(դձ) Որ ընդ հողեղէն բնութեան մերոյ խառնեցեր զբանական հոգիս՝ ունել զօրութիւն ընդունելոյ զաստուածային եւ զհոգեւոր զշնորհս՝ իջեալ ի վերուստ, օրհնեալ Տէր Աստուած հարցն մերոց:

Որ շնորհեցեր մաքուր հոգւոց յԻսրայելի զհոգի մարգարէութեան, որով ծանուցեր յառաջագոյն բազմապատիկ օրինակօք զանճառելի խորհուրդ քո մարդեղութեանդ, օրհնեալ Տէր:

Որ զանեղ գոյիդ լինելութիւն իբրեւ զեղեալ տեսանէին, յառաջնորդական միտս նոցա տպաւորեալ Հոգիդ զկերպարան իրին, գերագոյն հրաշիւք ի վեր, քան զբան, օրհնեալ Տէր:

(զ) Օրհնեցէ՛ք, ամենայն գո՛րծք Տեառն, զՏէր, օրհնեցէ՛ք, բա՛րձր արարէք զնա յաւիտեան: Ընդ աւետաւորսն յառաջագոյն փրկութեան մերոյ ծա՛փս հարէք, Եկեղեցի՛ք հեթանոսաց, աղաղակելով՝ զՏէր օրհ: Ընդ տեսանողաց մարգարէից հինն Իսրայելի, քահանա՛յք Նորոյ Ուխտիս սպասաւորք, զՏէր օրհ:

-----

### *Սպաշխարութեան*

(աձ) Որ հայիս քաղցրութեամբ յարարածս քո, Հա՛յր ամենակալ, օրհնեա՛լ ես, Աստուա՛ծ հարցն մերոց: Որ իջեր ի փրկել զարարածս քո, Որդի՛դ Միածին, օրհ: Որ խնամես տեսչութեամբ զարարածս քո, Հոգի՛դ ճշմարիտ, օրհ:

(զ) Օրհնեցէ՛ք, ամենայն գո՛րծք Տեառն, զՏէր:

Ամենայն գործք քո զքեզ օրհնեն:

Որ յոչնչէ գոյացուցեր զերկինս եւ զերկիր, յիշեա՛ զմեզ, Տէ՛ր, մարդասիրութեամբ քո, ամե:

Որ անդադար փառաբանիս ի քո յարարածոց, ընկա՛լ զաղաչանս սուրբ Եկեղեցւոյ քո, ամե:

-----

### *Համօրէն առաքելոց*

(աձ) Էակից Բանդ Հօր եւ Հոգւոյն, որ իջեր ի յերկնից ի փրկութիւն ազգի մարդկան, Աստուած հարցն մերոց:

Որ պահեցեր յաղթող զճգնութիւն սրբոց առաքելոցն, այսօր եւ մեք ընդ նոսին ցնծութեամբ օրհնեմք զքեզ, Աստուած հար:

Որ առաւել բարձրացեալդ եւ յաւիտենից, այսօր ընդ դասս վկայից քոց բարեբանեմք զքեզ, Աստուած հար:

(գ) Օրհնեցէ՛ք, ամենայն գո'րծք Տեառն, զՏէր, օրհնեցէ՛ք, բա'րձր արարէք զնա յաւիտեան:

Որ ընտրեաց զերանելի առաքեալսն եւ նոքօք որսաց ի հաւատս գտիւզերս Քրիստոս, բա'րձր ա:

Որք զխաւար կռապաշտութեանցն վանեցին եւ զլոյս գիտութեան ընդհանուր յերկիր ծաւալեցին, ընդ նոսին բա'րձր ա:

-----  
*Համօրէն ննջեցելոց*

(աձ) Օրհնեալ եւ դու, Քրիստոս'ս, որ յարեարդ ի մեռելոց, ողորմա՛ծ, եւ կոխեցեր զմահ, Տէ'ր Աստուած հարցն մերոց: Որ մահկանացուացս կեանքդ եւ, զհոգիս ննջեցելոց մեր ընկալ, Տէ'ր: Զորս փոխեցեր յաշխարհն կենդանեաց, հանգստեան արժանաւորեա, Տէ'ր:

(գ) Օրհնեցէ՛ք, ամենայն գո'րծք Տեառն, զՏէր, օրհնեցէ՛ք եւ բա'րձր արարէք զնա յաւիտեան: Գիշէ'րք, զՏէր օրհնեցէք, որ գալոցն է զօրութեամբ բազմաւ, ազդմամբ ձայնի կենագործէ զննջեցեալսն, զՏէր օրհ: Իսրայել զՏէր օրհնեսցէ: Աղաչե'մք զքեզ, Բարերա'ր, հանգո' զհոգիս ծառայից քոց ընդ սուրբս քո. օրհնեսցուք եւ բարձր արասցուք զանուն քո յաւիտեան:

-----  
*Համօրէն Մարտիրոսաց*

(աձ) Զքեզ, արդար եւ ուղիղ դատաւոր, ի մէջ սրբոց քոց բարեբանիս, հարցն մերոց Աստուած, օրհնեալ եւ յաւիտեան: Զքեզ, որ ի հնոցն իջեր, ապաւէն, խոնարհեալ ի

գունդս մարտիրոսաց գովիս. հարցն: Ջքեզ, որ ահաւոր թագաւոր յաւիտենից,  
այսօր ընդ դասս վկայից քոց բարեբանեմք, հարցն մե:

(գ) Օրհնեցէ՛ք, ամենայն գո'րծք Տեառն, զՏէր, օրհնեցէ՛ք, բա'րձր արարէք զնա  
յաւիտեան: Անբաւելին երկնից եւ հրեղինաց ի հողեղինաց հաճեցաւ ընտրել իւր  
զինուորս, բա'րձր արա: Ուստի եւ մեք՝ հաւատացեալքս Քրիստոսի Աստուծոյ,  
ընդ նոսին խնդրելով զթողութիւն մեղաց մերոց, բա'րձր արա:

-----

### *Քարոզ զկնի Հարցին*

Եկեալքս ամենեքեան ի սուրբ կաթողիկէ եւ առաքելական եկեղեցի աղաչեսցուք  
զՄիաձին Որդին Աստուծոյ՝ զՏէրն մեր եւ զՓրկիչն Յիսուս Քրիստոս, որ էջ փառօք  
Հօր ի մէջ հնոցին եւ փրկեաց զերիս մանկունսն ի քաղդէացոց անտի, լուսաւոր եւ  
սուրբ պահեսցէ զմիտս մեր, զի մի՛ երբեք խաբիցուք մեք ի մեղաց եւ ի ցանկութենէ  
աշխարհի, այլ արժանի եղիցուք պահել զպատուիրանս նորա, առնուլ զպսակն  
լուսոյ եւ կենաց ի յանձինս մեր, զոր խոստացաւ սիրելեաց իւրոց ճշմարիտն  
Աստուած Յիսուս Քրիստոս. Տէ՛ր մեր, կեցո՛ւ եւ ողորմեա՛:

Տէ՛ր, ողորմեա, Տէ՛ր, ողոր, Տէ՛ր, ողոր.:

-----

### *Մաղթանք*

*Կիրակէից եւ այլոց տէրունական տօնից*

Հօր, յաղթող, սքանչելագործ, սուրբ եւ մեծի *յարութեանն* Քրիստոսի Աստուծոյ  
մերոյ վայել է փառք, իշխանութիւն եւ պատիւ այժմ եւ միշտ եւ յաւիտեանս  
յաւիտենից. ամէն:

-----

### *Մաղթանք Մարտիրոսաց*

Յօղեա՛, Տէ՛ր, զցօղ բարերար ողորմութեան քոյ ի մեղուցեալ անձինս մեր, շիջո՛  
զբոց հնոցի յանցանաց մերոց եւ փրկեա՛ զմեզ ի յաւիտենական հրոյն: Արա՛  
արժանի ընդ երիս սուրբ մանկունսն եւ ընդ երանելի սուրբ վկայսն օրհնել զքեզ,  
գովել եւ քեզ գոհութիւն եւ փառս մատուցանել՝ Հօր եւ Որդւոյ եւ Հոգւոյն Սրբոյ,  
այժմ եւ միշտ եւ յաւիտեանս յաւիտենից. ամէն:

-----  
*Մաղթանք Պահոց*

Յօղեա՛, Տէ՛ր, զցօղ բարերար ողորմութեան քոյ ի մեղուցեալ անձինս մեր, շիջո՛  
զբոց հնոցի յանցանաց մերոց եւ փրկեա՛ զմեզ ի յաւիտենական հրոյն: Արա՛  
արժանի ընդ երիս սուրբ մանկունսն եւ ընդ երանելի սուրբ վկայսն օրհնել զքեզ.  
գովել եւ ասել. □Աստուա՛ծ, քաւեա՛ զիս՝ զմեղաւորս, Աստուա՛ծ, քաւեա՛ զիս՝  
զմեղաւորս, Աստուա՛ծ, քաւեա՛ զիս՝ զմեղաւորս ի մեղաց եւ կեցո՛ւ:

-----  
*Երգ Մարիամու Աստուածածնին*

Մեծացուցէ անձն իմ զՏէր, եւ ցնծացէ հոգի իմ Աստուծով Փրկչաւ իմով:  
Այց արար ի վերայ խոնարհութեան աղախնոյ իւրոյ, այսուհետեւ երանիցեն ինձ  
ամենայն ազգք:  
Արար ընդ իս մեծամեծս Հօրն, եւ սուրբ է անուն նորա:  
Ողորմութիւն արար ազգաց յազգս երկիւղածաց իւրոց, արար զօրութիւն բազկաւ  
իւրով:  
Յրուեաց զամբարտաւանս ի մտաց սրտից եւ քակեաց զհօրս յաթոռոց:  
Զխոնարհս բարձրացոյց, զկարօտս ելից բարութեամբ եւ զմեծատունս արձակեաց  
ունայնս:  
Պաշտպանեաց Իսրայելի ծառայի իւրոյ՝ յիշելով զողորմութիւն իւր,  
որպէս խօսեցաւ առ հարսն մեր՝ ընդ Աբրահամու եւ զաւակի նորա յաւիտեան:

-----

*Օրհնութիւն Զաքարիայի՝ Հօրն  
Յովհաննու Մկրտչի*

Օրհնեալ Տէր Աստուած Իսրայելի, որ յայց ել եւ արար փրկութիւն ժողովրդեան իւրոյ:

Յարոյց մեզ եղջիւր փրկութեան ի տանէ Դաւթի ծառայի իւրոյ, որպէս խօսեցաւ բերանովք սրբոցն, որ յաւիտենից մարգարէքն էին:

Փրկութիւն ի թշնամեաց մերոց եւ ի ձեռաց ամենայն ատելեաց մերոց:

Առնել ողորմութիւն առ հարս մեր եւ յիշել զկտակարանս սրբութեան իւրոյ:

Երդումն, զոր երդուաւ Աբրահամու Հօր մերոյ՝ տալ մեզ առանց երկիւղի զփրկութիւն թշնամեաց մերոց:

Պաշտել զնա սրբութեամբ եւ արդարութեամբ առաջի նորա զամենայն աւուրս կենաց մերոց:

Եւ դու, մանո՛ւկ, մարգարէ բարձրելոյն կոչեսջիր, զնասցես առաջի Տեառն՝ պատրաստել զճանապարհս նորա, տալ զգլխութիւն փրկութեան ժողովրդեան իւրոյ՝ ի թողութիւն ամենայն մեղաց մերոց, վասն զթոյ ողորմութեան Տեառն Աստուծոյ մերոյ, որով երեւեցաւ մեզ արեգակն ի բարձանց՝ լուսաւոր առնել զխաւար մեր, ծագել լոյս ի վերայ այսոցիկ, որ նստեաք ի խաւարի եւ ի ստուերս մահու, ուղղել զոտս մեր ի ճանապարհս խաղաղութեան:

*Աղօթք Միմէռնի Ծերունւոյն*

Արդ արձակեա զճառայս քո, Տէ՛ր, ըստ բանի քում ի խաղաղութիւն, զի տեսին աչք իմ զփրկութիւն քո, զոր պատրաստեցեր առաջի ամենայն ժողովրդոց, լոյս յայտնեցաւ հեթանոսաց եւ փառք՝ ժողովրդեան քում Իսրայելի:

Փառք Հօր եւ Որդւոյ եւ:

-----

*Մեծացուցէ Շարականք*

(աձ) Յանճառ փառաց խոնարհեցար ի մեր բնութիւնս, Բա'նդ Աստուած, եւ մարմնացար ի սրբոյ Կուսէն եւ ծնար ի սուրբ Կուսէն անապական մարմնով, զքեզ անդադար բարեբանեալ մեծացուցեմք:

Այսօր զեկեալդ ի փրկութիւն ազգի մարդկան միաբանութեամբ ամենեքեան մեծացուցանեմք:

(զկ) Մա'յր եւ կո'յս, աղախի'ն Քրիստոսի, որ բարեխօսդ ես միշտ աշխարհի, քեզ երանեն ամենայն ազիւնք:

Մաքուր աղանի' եւ հա'րսն երկնից Մարիամ, տաճա'ր եւ աթո'ն Աստուծոյ Բանին, քեզ երա:

Քեւ հաճեցան իմանալիքն ընդ հողեղէնքս, եւ քեւ մերձեցաք ի փայտն կենաց, քեզ երա:

(դձ) Անարատ կո'յս, Աստուածածի'ն Մարիամ, սրբուհի' եւ մա'յր Քրիստոսի, յարգանդի տարար զանտանելին ամենեցուն, օրհնութեամբ զքեզ, Աստուածածի'ն, մեծացուցանեմք:

Զքեզ, երկնային դո'ւռն, զոր ետեսն Եզեկիել, եւ ա'սրն, զոր ծանեաւ Գեղէոն, սերովբե' հողեղէն, վեհագո'յն քերովբէից, օրհնու:

Երիս խորհուրդս սոսկալիս ի քեզ տեսանի, Աստուածածի'ն, յղութիւն անսերմնական, ծնունդ, անարատ կուսութիւն յետ ծննդեան մնալով անապական, օրհնու:

(աձ) Զքեզ, երեւեալ դուռն առ Եզեկիելի մարգարէի, ընդ որ ոչ ոք էանց, եթէ ոչ Աստուած միայն, Աստուածածի'ն կոյս, օրհնութեամբ մեծացուցանեմք:

Զքեզ, որ ի մորենուջն առ Մովսէսի մարգարէի զնոր խորհուրդ կուսի յայտնեցեր մարդկան ազգի, օրհ:

Զքեզ, որ ի Հօրէ անժամանակապէս եւ ի մօրէ անթարգմանաբար ի ժամանակի ծննդեան ի բոլորից փրկութեան յայտնեցար, Որդի' Բարձրելոյն, օրհ:

(աձ) Այսօր, նո՛ր ժողովուրդք, ցնձացէք ընդ գալուստ Հոգւոյն Սրբոյ՝ մեծացուցանելով զելոդն ի Հօրէ:

Այսօր ցնձան առաքեալքն՝ զարդարեալք ի շնորհաց Հոգւոյն Սրբոյ, մեծա:

Այսօր զուարճացան արարածք ճշմարիտ զալստեամբ Հոգւոյն Սրբոյ, մե:

(աձ) Յարուցելոյն ի մեռելոց բնակարա՛ն, մա՛յր եւ կո՛յս, որ զննջեցեալսն յԱդամայ կենագործէ անապական, զքեզ մեծացուցանեմք, որ օրհնեալդ ես ի կանայս:

Արարողին երկնի եւ երկրի եղեր տաճար եւ առագաստ, որ զննջեցեալսն մեր հրեղէն նորոգէ, զքեզ մեծա:

Կերակրողին տիեզերաց արբուցեր զքո սուրբ զկաթն, որ զննջեցեալսն մեր վերստին նորոգէ, զքեզ մեծա:

(աձ) Որ զաւետիս Հոգւոյն ի հրեղէն ի հրեշտակէն ընկալար, ուրա՛խ լեր, բերկրեա՛լդ, Տէր ընդ քեզ, Մարիա՛մ անհարսնացեալ:

Անսկիզբն Բանն հաճեցաւ առնուլ մարդեղութեամբն սկիզբն ի Կուսէդ, Քրիստոս Աստուած՝ Թագաւորն յաւիտենից:

Աղաչե՛մք զքեզ, սուրբ Աստուածածին, առ Քրիստոս բարեխօսեա՛՛ փրկել զժողովուրդս իւր, զոր զնեաց արեամբն իւրով:

-----

### *Քարոզ զկնի Մեծացուցէին*

Սուրբ զԱստուածածինն եւ զամենայն սուրբս բարեխօս արասցուք առ Հայր ի յերկինս, զի կամեցեալ ողորմեսցի եւ զթացեալ կեցուցէ զարարածս իւր: Ամենակալ Տէր Աստուած մեր, կեցո՛ւ եւ ողորմեա՛:

### *Աղօթք*

Ընկա՛լ, Տէ՛ր, զաղաչանս մեր բարեխօսութեամբ սուրբ Աստուածածնին՝ անարատ ծնողի Միածնի Որդւոյ քո, եւ աղաչանօք ամենայն սրբոց քոց եւ աւուրս շնորհիւ:

(կամ որոց այսօր է յիշատակ): Լո'ւր մեզ, Տէ'ր, եւ ողորմեա'։ ներեա', քաւեա' եւ թո'ղ զմեղս մեր:

Արժանաւորեա' գոհութեամբ փառաւորել զքեզ ընդ Որդոյ եւ ընդ Սրբոյ Հոգւոյդ այժմ եւ միշտ եւ յաւիտեանս յաւիտենից. ամէն:

-----  
*Քարոզ կհւրակէից*

Եւ եւս իսաղաղութեան զՏէր աղաչեսցուք:

Վասն սուրբ տեղոյս շինութեան եւ բարեկարգութեան զՏէր աղա:

Վասն ժողովրդեանս, որք մտանեն ընդ դրունս սրբոյ եկեղեցւոյ, զՏէր աղա:

Վասն ընդունելոյ զպաղատանս սոցա ըստ մեծի ողորմութեան իւրում զՏէր աղա:

Եւ եւս՝ միաբան վասն ճշմարիտ եւ:

Զանձինս մեր եւ զմիմեանս Տեառն:

Ողորմեա'ց մեզ, Տէր Աստուած մեր:

*Աղօթք*

Դու եւ թագաւոր յաւիտեանս յաւիտենից, Քրիստոս'ս Աստուած մեր, եւ քեզ ընդ Հօր եւ Հոգւոյդ Սրբոյ վայել է փառք, իշխանութիւն եւ պատիւ այժմ եւ միշտ եւ յաւիտեանս յաւիտենից. ամէն:

-----  
*Երգ Իւղաբերից Աւետարանին*

Եղիցի անուն Տեառն օրհնեալ յայսմհետէ մինչեւ ի յաւիտեան:

Օրհնեցէ՛ք, մանկո'ւնք, զՏէր, եւ օրհնեցէ՛ք զանուն Տեառն:

Եղիցի անուն Տեառն օրհնեալ յայսմհետէ մինչեւ ի յաւիտեան:

Յարեւելից մինչ ի մուտս արեւու օրհնեալ է անուն Տեառն. ի յայսմհետէ մինչեւ ի.

Փառք եւ երկրպագութիւն Հօր եւ Որդւոյ եւ Սրբոյ Հոգւոյն եւ այժմ եւ միշտ եւ յաւիտեանս յաւիտենից ամէն. ի յայսմհետէ մինչեւ ի յաւիտեան:

Արի', Տէ'ր, օգնեա' մեզ եւ փրկեա' զմեզ վասն անուան քո: Արի' եւ մի' մերժեր զմեզ  
ի սպառ վասն անուան քոյ:

Թագաւորեցել Տէր յաւիտեան, Աստուած քո, Սիո'ն, ազգէ յազգ:

Օրհնեա', ա'նձն իմ, զՏէր. օրհնեցից զՏէր ի կենդանութեան իմոյ:

(սրկ) Օրթի:

(քհ) Խաղաղութիւն ամենեցուն:

(դպ) Եւ ընդ հոգւոյդ քում:

(սրկ) Երկիւղածութեամբ լուարուք:

(քհ) Սրբոյ աւետարանիս Յիսուսի Քրիստոսի, որ ըստ *Մատթէոսի*:

(դպ) Փա'ռք քեզ, Տէ'ր Աստուած մեր:

(սրկ) Պոսիւումէ:

(դպ) Ասէ Աստուած:

*Վասն յարութեան Տեառն մերոյ*

*Յիսուսի Քրիստոսի*

Եւ յերեկոյի շաբաթուն, յորում լուսանայր միաշաբաթին, եկն Մարիամ  
Մագդաղենացի եւ միւս Մարիամն տեսանել զգերեզմանն: Եւ ահա շարժումն մեծ  
եղել, զի հրեշտակ Տեառն, իջեալ յերկնից, մատուցեալ ի բաց թաւալեցոյց զվէմն ի  
դրանց անտի

եւ նստեր ի վերայ նորա: Եւ էր տեսիլ նորա իբրեւ զփայլակն, եւ հանդերձ նորա  
սպիտակ, իբրեւ զձիւն: Եւ յահէ անտի նորա խռովեցան պահապանքն եւ եղեն  
իբրեւ զմեռեալս: Պատասխանի ետ հրեշտակն եւ ասէ ցկայանսն. □Մի' երկնչիք  
դուք, գիտեմ, զի զՅիսուս զխաչելեալն խնդրէք. չէ աստ, քանզի յարեաւ, որպէս  
ասացն. եկայք եւ տեսէք զտեղին, ուր կայր: Եւ վաղվաղակի երթայք ասացէք  
աշակերտացն նորա, թէ յարեաւ. եւ ահա յառաջանայ քան զձեզ ի Գալիլիա, անդ  
տեսանիցէք զնա. ահա ասացի ձեզ□:

Եւ ելեալ վաղվաղակի ի գերեզմանէ անտի ահիւ եւ խնդութեամբ բազմաւ  
ընթանային՝ պատմել աշակերտացն: Եւ ահա պատահեցաւ նոցա Յիսուս եւ ասէ.

□Ո՛ղջ էք: Եւ նոքա մատուցեալ կալան զոտս նոքա եւ երկիր պագին նմա: Յայնժամ ասէ ցնոսա Յիսուս. □Մի՛ երկնչիք, երթայք ասացէք եղբարցն իմոց, զի երթիցեն ի Գալիլիա եւ անդ տեսցեն զիս: Իբրեւ նոքա գնացին, ահա ոմանք ի զօրականացն եկին ի քաղաքն եւ պատմեցին քահանայապետիցն զամենայն, որ ինչ եղեն: Եւ նոքա ժողովեալ հանդերձ ծերովքն, խորհուրդ առեալ՝ արծաթ յոյժ ետուն զօրականացն եւ ասեն. □Ասացիք, եթէ աշակերտքն նորա եկեալ զիշերի գողացան զնա, մինչ մեք ի քուն էաք: Եւ եթէ լուր լիցի այդ առ դատաւորն, մեք հաճեսցուք զնա եւ զձեզ անհոգս արասցուք: Եւ նոցա, առեալ զարծաթն, արարին որպէս ուսանն. եւ ել համբաւս այս ի հրէից մինչեւ ցայսօր:

Իսկ մետասան աշակերտքն գնացին ի Գալիլիա՝ ի լեառնն, ուր ժամադիր եղև նոցա Յիսուս: Իբրեւ տեսին զնա, երկիր պագին նմա, եւ ոմանք յերկուացան: Եւ մատուցեալ Յիսուս խօսեցաւ ընդ նոսա եւ ասէ. □Տուա ինձ ամենայն իշխանութիւն յերկինս եւ յերկրի. որպէս առաքեաց զիս Հայր, եւ ես առաքեմ զձեզ: Գնացէք այսուհետեւ, աշակերտեցէք զամենայն հեթանոսս, մկրտեցէք զնոսա յանուն Հօր եւ Որդոյ եւ Հոգւոյն Սրբոյ: Ուսուցէք նոցա պահել զամենայն, զոր ինչ պատուիրեցի ձեզ: Եւ ահաւասիկ ես ընդ ձեզ եմ զամենայն աւուրս, մինչեւ ի կատարած աշխարհի:

-----

*Սրբոյ Աւետարանիս Յիսուսի Քրիստոսի, որ ըստ Մարկոսի*

*Վասն թաղման եւ յարութեան Տեառն մերոյ*

*Յիսուսի Քրիստոսի*

Եւ իբրեւ երեկոյ եղև, քանզի ուրբաթ էր, որ ի շաբաթն մտանէր, եկեալ Յովսէփ, որ յԱրիմաթեայն էր, այր պարկեշտ, նախարար, որ եւ ինքն իսկ ակն ունէր արքայութեանն Աստուծոյ, համարձակեցաւ եմուտ առ Պիղատոս եւ խնդրեաց մարմինն Յիսուսի: Եւ Պիղատոս զարմացաւ, թէ այնչափ վաղ մեռաւ, եւ կոչեցեալ առ ինքն զհարիւրապետն, եհարց զնա եւ ասէ, թէ՝ □Արդարեւ այնչափ վաղ մեռա՞ւ: Եւ իբրեւ ստուգեաց ի հարիւրապետէ անտի, շնորհեաց զմարմինն

Յովսէփայ: Եւ Յովսէփ գնեաց կտաւ եւ, իջուցեալ գնա, պատեաց կտաւովն եւ եղ ի գերեզմանի, գոր էր փորեալ ի վիմէ, եւ թաւալեցոյց զվէմ մի ի դուռն գերեզմանին: Իսկ Մարիամ Մագդաղենացի եւ Մարիամ Յակոբայ եւ Յովսէայ տեսին զտեղին, ուր եղաւ: Եւ իբրեւ անց շաբաթն, Մարիամ Մագդաղենացի եւ Մարիամ Յակոբայ եւ Սողոմվէ չոգան պատրաստեցին խունկս, զի եկեացեն եւ օծցեն գնա:

Եւ ընդ առաւօտս միաշաբաթուն գան ի գերեզմանն ընդ արեւագալն եւ ասէին ցմիմեանս. Ո՞վ թաւալեցուցէ մեզ զվէմն ի դրանց գերեզմանին: Եւ հայեցեալ տեսին, զի թաւալեցուցեալ էր վէմն ի գերեզմանէն. քանզի էր մեծ յոյժ: Եւ մտեալ ի ներքս՝ ի գերեզմանն, տեսին երիտասարդ մի, զի նստէր ընդ աջմէ կողմանէ՝ զգեցեալ պատմուճան սպիտակ, եւ զարիւրեցան: Եւ նա ասէ ցնոսա. Մի՛ երկնչիք. զՅիսուս խնդրէք՝ զնագովրեցի զԽաչելեալն, յարեաւ, չէ՛ աստ. ահաւաղիկ տեղին, ուր եղին գնա: Այլ երթայք ասացէք ցաշակերտս նորա եւ ցՊետրոս, թէ՛ Ահա յառաջագոյն երթայ քան զձեզ ի Գալիլիա, անդ տեսանիցէք գնա, որպէս ասացն ձեզ: Եւ իբրեւ լուան, ելին եւ փախեան ի գերեզմանէն, քանզի զահի հարեալ էին, եւ ոչ ումէք ինչ ասացին, զի երկնչէին:

*Մրրոյ Աւետարանիս Յիսուսի Քրիստոսի, որ ըստ Ղուկասու  
Վասն թաղման եւ յարութեան Տեառն մերոյ Յիսուսի Քրիստոսի*

Եւ ահա այր մի անուն Յովսէփ, որ էր նախարար, այր բարեգործ եւ արդար, սա չէր միաբանեալ ընդ խորհուրդս եւ ընդ գործս նոցա, յԱրիմաթեայ քաղաքէ հրէից, որ եւ ինքն իսկ ակն ունէր արքայութեան Աստուծոյ: Սա, մատուցեալ առ Պիղատոս, խնդրեաց զմարմինն Յիսուսի եւ, իջուցեալ գնա, պատեաց պաստառակալաւ եւ եղ ի կռածոյ գերեզմանի, ուր չէր բնաւ գոք եղեալ: Եւ օրն ուրբաթ, եւ շաբաթ լուսանայր. եւ երթային զհետ նորա կանայք, որք եկեալ էին ընդ նմա ի Գալիլէ. տեսին զգերեզմանն, եւ որպէս եղաւ մարմին նորա:

Դարձան եւ պատրաստեցին խունկս եւ իւղս եւ ի շաբաթուն հանդարտեցին վասն պատուիրանին:

Բայց ի միաշաբաթուն վաղքաջ ընդ առաւօտն եկին ի գերեզմանն, բերին զխունկսն, զոր պատրաստեցին, եւ այլ կանայք ընդ նոսա: Եւ գտին զվէմն թաւալեցուցեալ ի գերեզմանէ անտի եւ, մտեալ ի ներքս, ոչ գտին զմարմինն Տեառն Յիսուսի: Եւ եղև ընդ հիանալն նոցա վասն այնորիկ, եւ ահա արք երկու հասին առ նոսա ի հանդերձս լուսաւորս: Եւ իբրև զահի հարան եւ խոնարհեցուցին զերեսս իրեանց յերկիր, ասեն ցնոսա. «Ձի՞ խնդրէք զկենդանին ընդ մեռեալս, չէ աստ, այլ յարեալ: Յիշեցէ՛ք՝ որպէս խօսեցաւ ընդ ձեզ, մինչ էրն ի Գալիլիա, եւ ասէր, թէ՛ «Պարտ է Որդոյ մարդոյ մատնիլ ի ձեռս մարդոց մեղաւորաց եւ ի խաչ ելանել եւ յերրորդ աւուր յառնել»: Եւ յիշեցին զբանսն նորա: Եւ դարձան պատմեցին զայս ամենայն մետասանիցն եւ այլոցն ամենեցուն: Եւ էին Մարիամ Մագդաղենացի եւ Յովհաննա եւ Մարիամ Յակոբայ եւ այլք ընդ նոսա, որք պատմեցին զայս առաքելոցն, եւ երեւեցան առաջի նոցա շաղկապութիւն քանք նոցա, եւ չհաւատային նոցա: Բայց Պետրոս յարուցեալ ընթացաւ ի գերեզմանն, եւ հայեցեալ տեսանէ զկտաւսն լոկ, զի կային, եւ գնաց՝ ընդ միտս զարմացեալ, թէ զինչ եղև:

-----

*Սրբոյ Աւետարանիս Յիսուսի Քրիստոսի, որ ըստ Յովհաննու  
Վասն թաղման եւ յարութեան Տեառն մերոյ Յիսուսի Քրիստոսի*

Յետ այսորիկ աղաչեաց զՊիղատոս Յովսէփ, որ յԱրիմաթեայ էր, աշակերտ Յիսուսի, ի ծածուկ վասն ահին հրէից, զի բարձցէ զմարմինն Յիսուսի. եւ հրամայեաց Պիղատոս. եկն եւ եբարձ գնա: Եկն եւ Նիկողեմոս, որ եկեալն էր առ Յիսուս ի զիշերի զառաջինն, եւ եբեր զմուռս խառն ընդ հալուէս իբրև լտերս հարիւր: Առին զմարմինն Յիսուսի եւ պատեցին կտաւովք եւ խնկովք հանդերձ, որպէս օրէն էր հրէից պատել: Եւ էր ի տեղոջն, յորում խաչեցաւ, պարտեզ, եւ ի պարտիզի անդ՝ գերեզման նոր, յորում ոչ ոք երբէք էր եղեալ: Անդ վասն ուրբաթուն հրէից, զի մօտ էր գերեզմանն, եղին զՅիսուս:

Եւ ի միաշաբաթոջն Մարիամ Մագդաղենացի զայ առաւօտուն ընդ արշալոյսն ի գերեզման անդր եւ տեսանէ զվէմն բարձեալ ի դրանց գերեզմանին: Ապա ընթանայ

եւ գայ առ Սիմոն Պետրոս եւ առ միւս աշակերտն, զոր սիրէր Յիսուս, եւ ասէ  
ցնոսա. ՝Բարձին զՏէր ի գերեզմանէ անտի, եւ ոչ գիտեմ՝ ուր եղին գնա՞: Ել  
Պետրոս եւ միւս աշակերտն եւ գային ի գերեզմանն, ընթանային երկոքեան ի  
միասին: Եւ միւս աշակերտն յառաջեաց ընթացաւ վաղագոյն, քան զՊետրոս, եւ եկն  
նախ ի գերեզմանն. եւ խոնարհեալ տեսանէ, զի կային անդ կտաւքն, բայց ի ներքս  
ոչ եմուտ: Եկն եւ Սիմոն Պետրոս, որ գայրն զկնի նորա, եւ եմուտ ի գերեզմանն եւ  
տեսանէ զկտաւսն, զի կային անդ. եւ վարշամակն, որ էր ի գլուխ նորա, ոչ ընդ այլ  
կտաւսն կայր, այլ ուրոյն ծալեալ ի մի կողմն: Յայնժամ եմուտ եւ միւս աշակերտն,  
որ եկեալ էր յառաջագոյն ի գերեզմանն, ետես եւ հաւատաց, զի չեւ եւս գիտէին  
զգիրս, թէ պարտ է նմա ի մեռելոց յառնել: Չոգան դարձեալ առ միմեանս  
աշատկերտքն: Բայց Մարիամ կայր արտաքոյ գերեզմանին եւ լայր. եւ մինչդեռ  
լայր, խոնարհեցաւ ի գերեզմանն եւ տեսանէ երկուս հրեշտակս ի սպիտակս, զի  
նստէին. մի՝ ի սնարից, եւ մի՝ յանտից, ուր կայր մարմինն Յիսուսի: Եւ նոքա  
ասէն ցնա. ՝Կի՛ն դու, զի՞ լաս: Ասէ ցնոսա. ՝Զի բարձին զՏէրն իմ եւ ի գերեզմանէ  
աստի, եւ ոչ գիտեմ՝ ուր եղին գնա՞: Զայս իբրեւ ասաց, դարձաւ ի թիկունս կոյս եւ  
տեսանէ զՅիսուս, զի կայր. եւ ոչ գիտէր, թէ Յիսուս իցէ: Ասէ ցնա Յիսուս. ՝Կի՛ն դու,  
զի՞ լաս, զո՞ ինդրես: Նմա այսպէս թուեցաւ, թէ պարտիզպանն իցէ. ասէ ցնա.  
՝Տէ՛ր, եթէ դու բարձեր գնա, ասա՛ ինձ՝ ուր եղիր գնա, զի ես առից գնա: Ասէ ցնա  
Յիսուս. ՝Մարիա՛մ: Եւ նա դարձաւ եւ ասէ ցնա եբրայեցերէն. ՝Ըարբունի՛ (որ  
թարգմանի վարդապետ): Ասէ ցնա Յիսուս. ՝Մի՛ մերձենար յիս, զի չեւ եւս ելեալ եմ  
առ Հայր իմ. այլ ե՛րթ դու առ եղբարսն իմ եւ ասա՛ ցնոսա՝ ելանեմ եւ առ Հայրն իմ  
եւ առ Հայր ձեր եւ Աստուածն իմ եւ Աստուած ձեր: Գայ Մարիամ Մագդաղենացի  
եւ պատմէ աշակերտացն, եթէ ետես նա զՏէր, եւ գայս ինչ ասաց ցնա:

-----  
*Երգ զկնի Իւղարերից Աւետարանին*

Փառք յարութեան քոյ, Տէ՛ր.

Ոչ դադարեցայց, Քրիստո՛ս, օրհնել զքեզ զամենայն աւուրս կենդանութեան իմոյ:

Փառք յարութեան քոյ, Տէ՛ր. ոչ դադարեցայց, Յիսո՛ւս, գովել զքեզ զամենայն աւուրս կենդանութեան իմոյ:

Ես ոչ դադարեցայց, Փրկի՛չ, փառաւորել զքեզ զամենայն աւուրս կենդանութեան իմոյ:

*Երգ աղուհացի կիրակեփոյն*  
(Երիցս կրկնեա եւ գլետիսն բարձր ասա):

Չամենայն աւուրս կենաց իմոց ես ոչ դադարեցայց օրինել զքեզ, Քրիստո՛ս, Փրկի՛չդ աշխարհի:

Ի գիշերի համբարձե՛ք զձեռս ձեր ի սրբութիւն եւ օրհնեցե՛ք զՏէր:

Աստ օրհնեցե՛ք, ամենայն ծառա՛յք Տեառն, զՏէր ի սրբութիւն եւ օրհնեցե՛ք զՏէր:

-----

(գլս) Դասք լուսեղէն զուարթոնցն սպասելին մեծի գալստեանն Տեառն եւ երգելին երգ նոր. □Օրհնեալ է քո սուրբ գալուստդ□:

(գատ) Լուսապայծառ հրեշտակն, նստելով ի կենսատու գերեզմանին, եւ աւետեր կանանցն՝ յարեա՛ւ Աստուած:

(հմբ) Համբարձե՛ք, իշխա՛նք, զդրունս ձեր ի վեր, եւ գայ մտանէ փառօք ի փառս:

(հգլ) Իջեալ Հոգին յառաքեալսն. եւ հրազինեաց զընտրեալսն անկէզ ի սուրբ վերնատունն եւ հանգեաւ նոքօք յազգս մարդկան զանազան լեզուաց բաժանմամբ:

(վար) Յնծայ Թաբոր Հերմոնիւ, եւ առաքեալքն ի հայրական ձայնէն թմրեալք: Եւ կենդանեաց եւ մեռելոց Տէր ծանուցին զքեզ Մովսէս եւ Հեղիաս:

(խաչ) Այսօր եկեալ կամաւ Տէրն ի խաչ եւ տարածեաց զբազուկս իւր ի նմա:

(ծնն) Հոյք հոգեղէնք ընդ հովիւսն քարոզելին ի յանբանից մսուր զԲանն բազմեալ: Եւ մոզքն, աստեղբն զուշակեալ, մատուցին զընծայսն խորհրդոյ:

(տնջ) Քառասնօրեայ տղայ եւ Տէրն օրինադիր տնօրինաբար եկն ի տաճարն:

Եւ Սիմէոն զգուեր գրկօքն եւ յօրինաց կապից լուծումն հայցեր ի կեանս աւետարանի:

-----

*Քարոզ զկնի Իղարերից Աւետարանին եւ երգոցն*

Ձուարճացեալքս մեծաւ ուրախութեամբ աւետեօք յարութեան տեառն մերոյ եւ փրկչին Յիսուսի Քրիստոսի, որ եղև պտուղ եւ անդրանիկ ամենայն ննջեցելոց, խորտակեաց զդրունս դժոխոց եւ ելոյծ զբռնութիւն մահու եւ ետ յոյս հաստատութեան վերստին նորոգման կենդանութեան ամենայն մարդկան, ինդրեսցուք հաւատով ի փրկչն մերմէ Յիսուսէ Քրիստոսէ, զի զմեզ արժանի արասցէ յարութեան իւրոյ, կերպարանակից առնել զմարմին խոնարհութեան մերոյ ըստ նմանութեան մարմնոյ փառաց իւրոց: Վասն զի զայս խոստացաւ՝ զմեծ եւ զանճառելի շնորհս պարգեւել սիրելեաց իւրոց ճշմարիտն Աստուած Յիսուս Քրիստոս Տէր մեր. կեցո՛ եւ ողորմեա՛:

(աղ) Ամենակեցոյց, ճշմարիտ, սուրբ, մեծի յարութեանն Քրիստոսի Աստուծոյ մերոյ վայել է փառք իշխանութիւն եւ պատիւ այժմ եւ միշտ եւ յաւիտեանս յաւիտենից. ամէն:

-----

*Եւ ասի փոխս*

Ողորմեա՛ ինձ, Աստուա՛ծ, ըստ մեծի ողորմութեան քում, ըստ բազում գթութեան քում քաւեա՛ զանօրէնութիւնս իմ:

Առաւել լուա՛ զիս յանօրէնութենէ իմմէ եւ ի մեղաց իմոց սո՛ւրբ արա զիս:

Զանօրէնութիւնս իմ ես ինձէն գիտեմ, եւ մեղք իմ առաջի իմ են յամենայն ժամ:

Քեզ միայն մեղայ, Տէ՛ր, եւ չար առաջի քո արարի:

Որպէս արդար եղիցիս ի բանս քո եւ յաղթող ի դատել քեզ:

Անօրէնութեամբ յղացաւ եւ ի մեղս ծանաւ զիս մայր իմ:

Դու, Տէ՛ր, զճշմարտութիւն սիրեցեր, զանյայտս եւ զճաճկեալս իմաստութեամբ քով յայտնեցեր ինձ:

Յօղեա՛ յիս մշտկաւ, եւ սուրբ եղէց, լուա՛, եւ քան զձիւն սպիտակ եղէց:

Լսելի՛ արա ինձ, Տէ՛ր, զցնծութիւն եւ զուրախութիւն, եւ ցնծասցեն ոսկերք իմ տառապելալք:

Դարձո՛ գերեսս քո ի մեղաց իմոց եւ զամենայն անօրէնութիւնս իմ քաւեա՛ յինէն:

Սիրտ սուրբ հաստատեա յիս, Աստուա՛ծ, եւ հոգի ուղիղ նորոգեա ի փորի իմում:

Մի՛ ընկենուր զիս, Տէ՛ր, յերեսաց քոց, եւ զՀոգի քո Սուրբ մի՛ հաներ յինէն:

Տո՛ւր ինձ ցնծութիւն փրկութեան քոյ եւ Հոգւով պետութեան քոյ հաստատեա՛ զիս:

Ուսուցից անօրինաց զճանապարհս քո, եւ ամբարիշտ առ քեզ դարձցին:

Փրկեա՛ զիս յարենէ, Աստուա՛ծ, Աստուա՛ծ փրկութեան իմոյ, ցնծասցէ լեզու իմ յարդարութեան քում:

Տէ՛ր, եթէ զշրթունս իմ բանաս, բերան իմ երգեսցէ զօրհնութիւնս քո:

Թէ կամեցեալ էիր, պատարագս մատուցանէաք, բայց դու ընդ ողջակէզս իսկ ոչ հաճեցար:

Պատարագ Աստուծոյ հոգի խոնարհ, զսիրտ սուրբ եւ զհոգի խոնարհ Աստուած ոչ արհամարհէ:

Բարի՛ արա, Տէ՛ր, կամօք քովք Սիոնի, եւ շինեսցին պարիսպքն Երուսաղէմի:

Յայնժամ հաճեսցիս ընդ պատարագս արդարութեան, յորժամ ուխտից պատարագս հանցեն ի սեղան քո զուարակս:

Փառք Հօր եւ. այժմ եւ:

-----  
*Ողորմեա շարականք*

(յար) (աձ)

Բանդ, որ ի Հօրէ իջեալ, մարմնացար ի Կուսէն, խաչեցար կամաւ Հօր վասն մեր, զմեղս սպաներ, սո՛ւրբ Աստուած, ողորմեա՛ մեզ:

Որ յարարածոց ես անբովանդակելի, ի խաչափայտին բեւեռելով զմահ կոխեցեր, սո՛ւրբ Աստուած, ողոր.:

Որ ի նախնումն զանկեալն ի ծառայութիւն մահու պատուական մարմնով եւ արեամբդ քո ազատեցեր, սո՛ւրբ Աստուած, ողոր.:

(հրշ) (դձ)

Որ ի հրեղէն զօրաց երկնից փառաբանիս, Աստուա՛ծ, որով զերկնային անապական Աստուածային զշնորհս հեղեր յորդիս Ադամայ, աղաչանօք սոցա ողորմեա՛ մեզ, Աստուա՛ծ:

Երեւելով հողեղինացս անհիւթականքն ի ձեւ մարմնոյ, որք եւ ծանուցին մարգարէիցն զխորհուրդ քո գալստեանդ՝ բազմապատիկ տեսլեամբ օրինակելով, աղաչա:

Անճառելի տնօրէնութեանդ քո աւետաբերք առաքեցան Գաբրիէլ եւ Միքայէլ՝ անմարմնական դասութն իւրեանց յերկրի սպասաւորելով, աղաչանօք սոցա ողորմեա՛ մեզ, Աստուա՛ծ:

(մրգ) (դձ)

Որ աւետաւոր քում գալստեանդ առաքեցեր յաշխարհ զսուրբ մարգարէսն եւ եկեալ խոնարհութեամբ Նոր Օրինօք զթերին լցեր ի գիրս օրինաց եւ մարգարէից, բարեխօսութեամբ սոցա, Քրիստո՛ս, ողորմեա՛ մեզ:

Որ կոչեցեր մարգարէիք յառաջագոյն զհեթանոսս քեզ նոր ժողովուրդ եւ զդուստր Սիոնի՝ զեկեղեցի հեթանոսաց՝ հարսն սիրելի անմահ Փեսային, բարեխօ:

Որ զփառս տաճարիս, զոր շինեցեր, շինո՛ղդ էից, ի վերայ վիմին բարձրագոյն քան զառաջինն, եւ զերագարդ վայելչութեամբ տեսանողքն ծանուցին իմաստիւք Հոգւոյն, բարեխօ.:

(ապշ) (աձ)

Հա՛յր բազումողորմ, խոստովանիմ առ քեզ որպէս զանառակ որդին՝ թո՛ղ ինձ զմեղս իմ եւ ողորմեա՛:

Տէ՛ր, որ զթացար ի կինն քանանացի, գթա եւ յիս՝ ի մեղաւորս, եւ ողոր.:

Տէ՛ր, որ դարձուցեր զմաքսաւորն ի գիտութիւն ճշմարտութեան, դարձո՛ եւ զիս՝ զողորմեալս, եւ ողոր.:

(առք) (աձ)

Տէ՛ր, որ զգթութիւնդ քո զառատ հեղեր յերկնից ի մէջ սրբոց առաքելոց քոց, աղաչանօք սոցա ողորմեա՛:

Որ ի ձեռն սոցա սփռեցան շնորհք Հոգւոյդ Սրբոյ ընդ ամենայն երկիր, աղաչա:

Որ սոքօք լուսաւորեցեր մկրտութեամբ աւագանին զեկեղեցի քո սուրբ, աղա:

(հնգ) (աձ)

Որ ստեղծմամբ ըստ պատկերի քո, Տէ՛ր,

պատուեցեր զմեզ, ընկա՛լ եւ այժմ զնշեցեալսն ի քեզ ուղիղ հաւատով ըստ մեծի քում ողորմութեան:

Որ շնորհօք Սուրբ Հոգւոյն լուսաւորեցեր յիշատակի իւրեանց, զհոգիս նոցա ընկա՛լ, մարդասէ՛ր, ըստ մեծի:

Որք հաղորդեցան մարմնոյ եւ արեան քո, Տէ՛ր, հանգո՛ զհոգիս նոցա ընդ սուրբս քո, Քրիստո՛ս Աստուած, քանզի զինք սուրբ արեան քո են:

(մրտ) (աձ)

Ժողովեալքս ի յիշատակ սրբոց քոց, Քրիստո՛ս, աղաչե՛մք զքեզ, սոցա բարեխօսութեամբ ողորմեա՛:

Երկրպագեմք առաջի բեմի քո, Քրիստո՛ս, ընկա՛լ քո գթութեամբդ զաղաչանս մեր, սոցա բարե:

Զորս հոգւով եւ մարմնով որպէս զանմարմին անարատ ի զալուստ քո պահեցես, մարդասէ՛ր Փրկիչ, սոցա բա:

-----  
*Քարոզ զկնի Ողորմեաին*

Երկրպագեմք քեզ, Տէ՛ր Աստուած մեր, անցեալքս ընդ երկարութիւն գիշերիս եւ կանխեալքս ի տեղոջ խոստովանութեան մատուցանեմք զառաւօտու աղօթս մեր: Զքեզ, Տէ՛ր, օրհնեմք եւ փառաւորեմք եւ զքէն, Տէ՛ր, զոհանամք, որ արժանի արարեր զգիշերս խաղաղութեամբ անցուցանել եւ հասանիլ ի ժամ առաւօտու: Արժանաւորեա՛ զմեզ անճառ խոստմանց քոց, զոր խոստացար սիրելեաց քոց, ճշմարիտդ Աստուած՝ Յիսուս Քրիստոս, Տէր մեր, կեցո՛ եւ ողորմեա՛:

Ողորմեաց մեզ, Տէ՛ր Աստուած մեր, ըստ մեծի ողորմութեան քում. ասացուք  
ամենեքեան միաբանութեամբ.

Տէ՛ր, ողորմեա՛, Տէ՛ր, ողորմեա՛, Տէ՛ր, ո՛:

*Մաղթանք տէրունական տօնից*

Ողորմած, գթած, ճշմարիտ, սուրբ, մեծի *յարութեանն* Քրիստոսի Աստուծոյ  
մերոյ վայել է փառք իշխանութիւն եւ պատիւ այժմ եւ միշտ եւ յաւիտեանս  
յաւիտենից. ամէն:

*Մաղթանք պահոց*

Ողորմութեամբ եւ գթութեամբ քով լո՛ւր մեզ, Տէ՛ր, եւ ողորմեա՛. ներեա՛, քաւեա՛ եւ  
թո՛ղ զմեզս մեր: Արժանաւորեա՛ գոհութեամբ փառաւորել զՀայր եւ զՈրդի եւ  
զՍուրբ Հոգիդ այժմ եւ միշտ եւ յաւիտեանս յաւիտենից. ամէն:

*Մաղթանք տօնից սրբոց*

Բարեխօսութեամբ եւ աղօթիք սրբոց *մարտիրոսացն*, որոց այսօր է յիշատակ, եւ  
ամենայն սրբոց քոց լո՛ւր մեզ, Տէ՛ր, եւ ողորմեա՛. ներեա՛, քաւեա՛ եւ թո՛ղ զմեզս  
մեր: Արժանաւորեա՛ գոհութեամբ փառաւորել զՀայր եւ զՈրդի եւ զՍուրբ Հոգիդ  
այժմ եւ միշտ եւ յաւիտեանս յաւիտենից. ամէն:

-----

Ալէլուիա, ալէլուիա

Օրհնեցէ՛ք զՏէր յերկնից, օրհնեցէ՛ք զնա ի բարձանց:

Օրհնեցէ՛ք զնա, ամենայն հրեշտա՛կք նորա, օրհնեցէ՛ք զնա, ամենայն զօրութի՛նք  
նորա:

Օրհնեցէ՛ք զնա, արեգա՛կն եւ լուսի՛ն, օրհնեցէ՛ք զնա, ամենայն աստե՛ղք եւ լո՛յսք:  
Օրհնեցէ՛ք զնա երկի՛նք երկնից եւ ջո՛ւրք, որ ի վերոյ, քան զերկինս, օրհնեցէ՛ք  
զանուն Տեառն:  
Զի նա ասաց, եւ եղեն, հրամայեաց, եւ հաստատեցան:  
Կացոյց զնա յաւիտեանս յաւիտենից, սահման եղ, եւ ոչ անցանեն:  
Օրհնեցէ՛ք զՏէր յերկրէ, վիշա՛պք եւ ամենայն խո՛րք:  
Հո՛ւր եւ կարկո՛ւտ, ձի՛ւն եւ սա՛ռն, հո՛ղմ եւ մրրի՛կ, որք առնէք զբան նորա:  
Լերի՛նք եւ ամենայն բարձո՛ւնք, ծա՛ռք պտղաբերք եւ ամենայն մա՛յրք,  
Գազա՛նք եւ ամենայն անասո՛ւնք, սողո՛ւնք եւ ամենայն թռչո՛ւնք թեւաւորք,  
Թագաւո՛րք երկրի եւ զօ՛րք իւրեանց, իշխա՛նք եւ ամենայն դատաւո՛րք երկրի,  
Երիտասա՛րդք եւ կուսա՛նք, ծե՛րք եւ տղա՛յք, օրհնեցէ՛ք զանուն Տեառն:  
Բարձրացաւ անուն նորա միայն, խոստովանութիւն նմա յերկինս եւ յերկրի:  
Բարձր առնէ Տէր զեղջիւր ժողովրդեան իւրոյ, օրհնութիւն նմա յամենայն սրբոց  
նորա՝ յորդոցն Իսրայելի ժողովոյն, որ մերձ է առ Տէր:  
Օրհնեցէ՛ք զՏէր յօրհնութիւն ի նոր, օրհնութիւն նմա յեկեղեցիս սրբոց:  
Ուրախասցի Իսրայել յԱրարիչ իւր, որդիք Սիոնի ցնծացեն ի թագաւորն իւրեանց:  
Օրհնեցեն զանուն նորա օրհնութեամբ, սաղմոսիւք եւ օրհնութեամբ սաղմոս  
երգեցեն նմա:  
Հաճի Տէր ընդ ժողովուրդ իւր սուրբ եւ բարձր առնէ զհեզս ի փրկութեան:  
Պարծեսցին սուրբքն փառօք եւ ցնծացեն ի հանգիստ իւրեանց եւ բարձր արասցեն  
զԱստուած բերանովք իւրեանց:  
Սուր երկսայրի ետ ի ձեռս նոցա՝ առնուլ զհատուցումն ի հեթանոսաց ի  
յանդիմանութիւն ամենայն ժողովրդոց:  
Ի կապել զթագաւորս նոցա կապանօք, զգորավարս նոցա ձեռնակապօք երկաթեօք:  
Առնել նոցա դատաստան ըստ գրոց. եւ փառք այս են ամենայն սրբոց նորա:  
Օրհնեցէ՛ք զԱստուած ի սրբութեան նորա, օրհնեցէ՛ք զնա ի հաստատութեան ի  
զօրութեան նորա:  
Օրհնեցէ՛ք զնա ի զօրութեան նորա, օրհնեցէ՛ք զնա ի բազում մեծութեան նորա:  
Օրհնեցէ՛ք զնա ի ձայն օրհնութեան, օրհնեցէ՛ք զնա սաղմոսիւք եւ օրհնութեամբ:

Օրհնեցէ՛ք զնա ցնծութեամբ, գովեցէ՛ք զնա ուրախութեամբ:

Օրհնեցէ՛ք զնա ի բանս քաղցր, գովեցէ՛ք զնա ի բարբառ լսելի:

Օրհնեցէ՛ք զնա ի ձայն գոհութեան, ամենայն հոգիք, օրհնեցէ՛ք զՏէր:

Փառք Հօր եւ. այժմ եւ:

### *Տէր յերկնից շարականք*

(յար) (աձ)

Ընդ լուսանալ միաշաբաթին կանխեցին կանայքն ի գերեզմանն՝ ի խնկել զանապական մարմինն: Եւ գտին զվէմն բարձեալ ի դրանց գերեզմանին եւ լուեալ բարբառ ի հրեշտակէն, եթէ՝ □Յարեաւ Քրիստոս եւ խափանեաց զմահ□: Եւ հանդիպեալ քո, Տէ՛ր, առաքելոցն եւ տուեալ ողջոյն կենդանարար, առաքեցեր զնոսա ի փրկութիւն տիեզերաց:

(հրշ) (դձ)

Անմահ արքային անարուեստ աթո՛ռք, բազմաչեայ քերովբէ՛ք, սրբասաց ձայնիւ սրովբէ՛ք՝ առաջին յերկինս քահանայապէ՛տք, բարեխօս լերուք առ Տէր վասն եկեղեցոյ:

Բարձրելոյն փառաց բարձող տէրութի՛նք, անյաղթելի զօրութի՛նք, վեհագոյն իշխանութի՛նք՝ երկրորդին դասու քահանայապէ՛տք, բարեխօս: Գերագոյն Էին պետութի՛նք վերին, հրեշտակապէ՛տք երկնաւորք, հրեշտակաց զինուորութի՛նք՝ երրորդի յերկինս քահանայապէ՛տք, ձեզ համաձայնեալ երգեմք զփառս ի բարձունս:

(մրգ) (դձ)

Այսօր ժողովուրդք, որք ի հեթանոսաց, հրաւիրեալք յառաջագոյն մարգարէիւք գալ առ Աստուածն Աբրահամու յերկրպագութիւն, օրհնեցէ՛ք զՏէր յերկինս ընդ երկնաւորացն: Այսօր որդիք դասեր Վերին Սիոնի, շինեալք ի վերայ հիման առաքելոց եւ մարգարէից, որք եւ ըմպէք զառատաբուղիս վտակ Հոգւոյն ի յաղբերացն Իսրայելի յեկեղեցիս սրբոց, օրհնեցէ՛ք զՏէր յօրհնութիւն ի նոր: Այսօր

վերին զօրացն համաձայնեալ դասք նահապետաց եւ մարգարէից երգեն Աստուծոյ զերգս հոգեւորս: Ի յիշատակի սոցա երգեմք եւ մեք զփառս ի բարձունս:

(ապշ) (աձ)

Տէ՛ր, որ ի վերայ քերովբէից փառաբանիս, քաղցրութեամբ խոնարհեալ՝ ընկա՛լ զաղաչանս մեր: Տէ՛ր, որ շնորհեցեր ողորմութիւն ազգի մարդկան, քաղց:

Տէ՛ր, որ ուսուցեր մեզ յամենայն ժամ փառս տալ անուանդ քում սրբոյ, քաղց:

(առք) (աձ)

Որք ի սկզբանէ պատուեալ եղեն ի սէր բոլորից Հօր, առաքելական կոչմամբ զտիեզերս հրաւիրեցին յուսով հասանել մասին, վարդապետութեամբ սոցա ամենեքեան օրհնեսցուք զՏէր:

Որք ականատեսք եւ սպասաւորք եղեն մարմնացելոյ Բանին՝ գեր ի վերոյ անմարմնոց դասուցն հանդիպելով շնորհի, վարդա:

Որոց դատողական աթոռ ահեղ ատենին հանդերձեալ մնայ՝ կատարել ի մեզ դատաստան ըստ գրեալսն, առ սոսա անկցուք՝ զղջացեալ անձամբ պաղատելով հաշտեցուցանել սոքօք ընդ մեզ զահաւոր զԴատաւորն:

(առք) (աձ)

Առաքեալք Աստուծոյ, սի՛ւնք հաւատոյ կաթուղիկէ եկեղեցոյ, Քրիստոսի Աստուծոյ երկնաւոր վարդապետին աշակե՛րտք, բարեխօսեցե՛ք շնորհել զխաղաղութիւն ամենայն աշխարհի:

Բարեկա՛մք Քրիստոսի եւ հազարապետք աստուածային խորհրդոցն, ընդունո՛ղք զԲանն կենաց եւ լուսաւորի՛չք տիեզերաց, բարեխօսեցե՛ք շնորհել զխա:

Դատաւո՛րք ահեղ ատենին եւ դատապարտո՛ղք զՔրիստոս ոչ խոստովանողաց, աղաչե՛մք զձեզ. բարեխօսեցե՛ք շնորհել զխաղաղութիւն ամե:

(հնգ) (աձ)

Քեզ վայել է, Աստուա՛ծ, օրհնութիւն,

որ յարութիւնդ եւ ձայնիւ յաւիտենից ննջեցելոցն, թագաւոր եւ իշխա՛ն,  
վերօրհնեմք զքեզ:

Ի միւս անգամ գալստեանն քո, Քրիստո՛ս, փառա՛ց թագաւոր, ի ձայն փողոյ  
նորոգին հոգիք ննջեցելոցն եւ յառնեն ի մեռելոց անապական մարմնով:

Վասն որոյ եւ մեք զքեզ աղաչեմք, Հա՛յր երկնաւոր, դասաւորեա՛ զննջեցեալսն մեր  
ի Վերինդ քո Երուսաղէմ՝ ի ժողովս անդրանկաց գրելոց ի յերկինս:

(հնգ) (աձ)

Ձայն արկեալ կենարարին աստուածային բարբառովն՝ ասէ. Եկա՛յք, օրհնեա՛լք  
Հօր իմոյ, ժառանգեցէ՛ք պատրաստեալ ձեզ զկեանսն ի հանդերձեալ երկրին: Ընդ  
առաջ ելանել քեզ հաւատով ի յօդս վերինս՝ աստուածազգեաց լուսով  
պայծառացեալ ի դասս անմարմնոցն ի լսել զձայն երանաւետ կոչմանն: Ընդ աջմէ  
քումմէ կացո՛ ընդ իմաստուն սուրբ կուսանսն ի լուսեղէն առագաստին  
պայծառացեալ ի դասս անմարմնոցն՝ ի ժողովս անդրանկաց գրելոց ի յերկինս:

(մրտ) (աձ)

Ժողովեալքս ի յիշատակ սրբոց մարտիրոսացն միաբանութեամբ երգելով՝  
օրհնութիւն բարձունս երկնաւոր թագաւորիդ: Քանզի հեղմամբ արեան սոցա  
պարտեցաւ թշնամին, եւ մեծարեալ պարծի Սիոն երգելով. օրհնու:

Դասակցելոցն ընդ զօրս վերին գուարթնոցն յիշատակաւ բերկրեալ, ի սրբութիւն  
սոցա երգեսցուք. օրհնու:

(մրտ) (աձ)

Որք զհանդէս նահատակութեան առ բռնաւորսն ցուցին եւ յաղթեցին հաւատով,  
Երբեակ լուսոյն եղեն մեզ առիթ, աղաչանօք սոցա կեցո՛ զմեզ:

Որք զխաւար կռապաշտութեանցն վանեալ հերքեցին եւ կանգնեցին մեզ նշան  
յաղթող ընդդէմ թշնամւոյն, աղաչա:

Եւ հրաշափառ ճգնութեամբ պատերազմեալք ի յերկրի՝ վերահամբարձեալք  
երկնայնոց դասուցն երգակից, աղաչա:

-----

*Զկնի Տէր յերկնիցին ասի օրհնութիւն առաւօտու ասացեալ յանմարմնոց, այլ եւ ի  
Կոստանդնուպոլսոյ սրբոյ ժողովոյն ՃԾ հայրապետացն*

Փառք ի բարձունս Աստուծոյ, եւ յերկիր խաղաղութիւն, ի մարդիկ հաճութիւն: Եւ օրհնութիւն քեզ ի բարձունս. օրհնեալ ես, Տէ՛ր Աստուած մեր, օրհնեմք զքեզ եւ գովեմք զքեզ: Խոստովանիմք, Տէ՛ր, զքեզ եւ երկիր պագանեմք քեզ, փառաւորեմք զքեզ, գոհանամք, Տէ՛ր, զքէն վասն մեծի փառաց քոց: Տէր թագաւոր, սուրբդ երկնային, Աստուած եւ Հայր ամենակալ: Տէր եւ Որդի Հօր Միածին՝ Յիսուս Քրիստոս եւ սուրբ Որդի:

Տէ՛ր Աստուած, Գա՛ռն Աստուծոյ եւ Որդի՛ Հօր, որ առեր զմերս ի Կուսէն, ողորմեցար, բարձեր զմեղս աշխարհի եւ արդ ընկալ զաղաչանս մեր: Սուրբդ, որ նստիս ընդ աջմէ Հօր, ողորմեա՛ց մեզ: Զի դու միայն սուրբ, դու միայն բարձրեալ ես, դու միայն Տէր մեր Յիսուս Քրիստոս: Տէր եւ Հոգիդ Սուրբ, որ ի փառս Աստուած ընդ Հօր. ամէն:

Եւ յամենայն ժամ օրհնեմք զքեզ, Տէ՛ր, եւ գովեմք զանուն սուրբ քո յաւիտեան եւ յաւիտեանս յաւիտենից: Արժանի՛ արա, Տէ՛ր, զօրս զայս խաղաղութեամբ եւ առանց մեղաց պահեա՛ զմեզ: Օրհնեալ ես, Տէ՛ր Աստուած հարցն մերոց, գովեալ եւ փառաւորեալ է անուն սուրբ քո յաւիտեանս. ամէն: Օրհնեա՛լ Տէր, ուսո՛ ինձ զարդարութիւնս քո (*երիցս կրկնեա*):

Տէ՛ր, ապաւեն եղեր մեր ազգէ յազգ: Ես աղաչեմ, Տէ՛ր, ողորմեա՛ ինձ եւ բժշկեա՛ զանձն իմ. եւ մեղայ քեզ: Տո՛յց մեզ, Տէ՛ր, զողորմութիւնս քո եւ զփրկութիւնս քո սո՛ւր մեզ: Տէ՛ր, ողորմութիւն քո յաւիտեան. զգործս ձեռաց քոց մի՛ անտես առնէր: Տէ՛ր իմ, զքեզ ապաւեն ինձ արարի, ուսո՛ ինձ առնել զկամս քո, զի դու ես Աստուած իմ:

Ի քէն է, Տէ՛ր, աղբիւր կենդանութեան, եւ լուսով երեսաց քոց տեսանեմք զլոյս: Ծագեա՛ զողորմութիւնս քո, որք ճանաչեն զքեզ, Տէ՛ր:

*Մաղթանք*

Փառք, պատիւ եւ երկրպագութիւն ի բարձունս Հօր եւ Որդւոյ եւ Հոգւոյն Սրբոյ  
այժմ եւ միշտ եւ յաւիտեանս յաւիտենից. ամէն:

-----

*Առաւօտու երգք Յարութեան Քրիստոսի  
զկնի Փառք ի բարձունսին*

(աձ) (ակ)

Զյարութիւն զՓրկչին օրհնեսցուք, զՓրկչին մերոյ օրհնեսցուք զյարութիւն:  
Յարեաւ Աստուած, եւ ցրուեցան ամենայն թշնամիք նորա:

(բձ) (բկ)

Զյարութիւն զՓրկչին օրհնեսցուք, զՓրկչ.  
Զյարուցեալն զՔրիստոս օրհնեսցուք եւ զյարութիւն նորա փառաւորեսցուք:

(գձ) (գկ)

Զյարութիւն զՓրկչին օրհնեսցուք, զՓրկչ.  
Որ ելն ի բարձունս, եւ գերեաց զգերութիւն. էտ աւար բաշխեաց պարգեւս եւ ետ  
որդւոց մարդկան:

(դձ) (դկ)

Զյարութիւն զՓրկչին օրհնեսցուք, զՓրկչ.  
Որ համբերեաց խաչի եւ եղաւ ի նորափոր վիմի եւ աստուածային յարութեամբն  
զմահացեալսն վերաբերեաց ի կեանս:

*Համբարձմանն Քրիստոսի*

Զյարութիւն զՓրկչին օրհնեսցուք, զՓրկչին մերոյ օրհնեսցուք զյարութիւն:  
Համբարձաւ Աստուած օրհնութեամբ եւ Տէր մեր ձայնիւ փողոյ:

(հգլ)

Զգալուստ Հոգւոյն օրհնեսցուք, զՀոգւոյն

Սրբոյ օրհնեսցուք զգալուստ:

Յեկեղեցիս բարեբնեցե՛ք զԱստուած եւ զՏէր յաղբերացն Իսրայելի:

*Աղուհացից եւ այլոց ատուրց պահոց*

(բշ) Լո՛յս տուր, Տէ՛ր, աչաց իմոց, զի մի՛ երբեք ննջեցից ի մահ:

Մի՛ ասասցէ թշնամին, թէ յաղթեցի նմա, կամ նեղիչք իմ ցնծասցեն, թէ ես սասանեցայց:

(գշ) Ի քէն ե, Տէ՛ր, աղբիր կենաց, եւ լուսով երեսաց քոց տեսանեմք զլոյս:

Ծագեա՛ զողորմութիւնս քո, որք ճանաչեն զքեզ, զարդարութիւնս քո, ոյք ուղիղ են սրտիւք:

(դշ) Ես ասացի՝ Տէ՛ր, ողորմեա՛ ինձ, բժշկեա՛ զանձն իմ. ես մեղայ քեզ:

Երանի՛, որ խորհի զաղբատն եւ զտնանկն. յաւուր չարի փրկէ զնա Տէր:

(եշ) Ես առ քեզ, Տէ՛ր, աղաղակեցի. առաւօտու աղօթք իմ ժամանեսցեն առ քեզ:

Ընդէ՛ր, Տէ՛ր, մերժես զանձն իմ կամ դարձուցանես զերեսս քո յինէն:

(ուր) Մտցեն աղօթք իմ առաջի քո, Տէ՛ր, խոնարհեցի ունկն քո ի խնդրուածս իմ:

Տէր Աստուած փրկութեան իմոյ, ի տուէ կարդացի եւ գիշերի առաջի քո:

-----

(Ղազ) Տէ՛ր, հաներ ի դժոխոց զանձն իմ, փրկեցեր զիս յայնցանէ, որք իջանեն ի գուր:

Բարձր առնեմ զքեզ, Տէ՛ր, զի ընկալար զիս, եւ ոչ ուրախ արարեր զթշնամին իմ յիս:

(ծաղ) Այսօր մտանէ թագաւորն մեր Քրիստոս ի յԵրուսաղէմ նոր քաղաք Դաւթի:

Ընդառաջ ելին ծերքն ոստովք ձիթենեօք եւ զԱստուածորդին փառաւորէին:

(ՈՂՈԳՄԵԱՆ)

(աւգ) (բշ) Ի սկզբանէ, Տէ՛ր, զերկիր հաստատեցեր,

եւ գործք ձեռաց քոց երկինք են:

Նոքա կորնչին, եւ դու կաս եւ մնաս յաւիտեան:

(գշ) Տարցին թագաւորի կուսանք զհետ նորա, եւ զընկերս նորա տարցին նմա:

Ածցին ցնծութեամբ եւ ուրախութեամբ եւ տարցին ի տաճար թագաւորի:

(դշ) Խորհեցան եւ խօսեցան զչարութիւն

եւ զապիրատութիւն ի բարձունս խորհեցան:

Եղին յերկինս զբերանս իւրեանց եւ զլեզուս իւրեանց ածէին զերկրաւ:

(եշ) Որսացան զանձն արդարոյ եւ զարին ամբիժ պարտաւոր առնէին:

Եղեւ Տէր ապաւեն իմ, Աստուած օգնական յուսոյ իմոյ:

(ուր) Մատնեցայ եւ ոչ ելանէի, աչք իմ տկարացան յաղքատութենէ:

Աղաղակեցի առ Տէր զօրհանապագ եւ համբարձի առ քեզ զձեռս իմ:

(կց) Փոխանակ սիրոյ իմոյ մատնէին զիս, այլ ես յաղօթս կայի:

(փ) Աստուած օրհնութեան իմոյ, մի՛ լռեր, զի բերան մեղաւորի, բերան նենգաւորի  
բացաւ ի վերայ իմ:

*Զփոխն լման ասա. Սաղ. ԸԸ*

(շբ) Եղին զիս ի գբի ներքնումն, ի խաւարի եւ ի ստուերս մահու:

Յիս հաստատեցաւ սրտմտութիւն քո, զամենայն զքօսանս քո ածեր ի վերայ իմ:

(կց) Եղին զիս ի գբի ներքնումն, ի խա:

(փ) Տէ՛ր Աստուած փրկութեան իմոյ, ի տուէ կարդացի եւ զիշերի առաջի քոյ:

*Զփոխն լման ասա. Սաղ. ԶԷ*

(մահ) Դա՛րձ, ա՛նձն իմ, ի հանգիստ քո, զի Տէր կոչեաց զքեզ:

(փ) Սիրեցի, զի լուիցէ Տէր զձայն աղօթից իմոց, զի խոնարհեցոյց զունկն իւր առ իս, եւ ես յաւուրս իմ կարդացի առ նա:

*Զփոխն եւս լման ասասցես. Սաղ. ՃԺԴ*

-----

(եկդ) Տան քում վայելէ սրբութիւն, Տէ՛ր, ընդ երկայն աւուրս:

Տէր թագաւորեաց, վայելչութիւն զգեցաւ, զգեցաւ Տէր զօրութիւն ընդ մէջ իւր էած:

(տպ) (վեր) Արի՛, Տէ՛ր, ի հանգիստ քո, դու եւ տապանակ կտակի սրբութեան քո, Յիշեա՛, Տէ՛ր, զԴաւիթ եւ զամենայն հեգութիւն նորա:

(վար) Քո են երկինք, եւ քո է երկիր. զաշխարհս լրիւ իւրով դու հաստատեցեր:

Զհիւսիս եւ զհարաւ դու արարեր, Թաբոր եւ Հերմոն յանուն քո ցնծասցեն:

(աւե) (ածծ) Իջցէ որպէս զանձրեւ ի վերայ գեղման, որպէս ցօղ, զի ցօղէ յերկիր:

Աստուած, զիրաւունս քո արքայի տուր եւ զարդարութիւնս քո որդոյ թագաւորի:

(խաչ) Ետուր երկիւղածաց քոց նշան, զի ապրեսցին յերեսաց աղեղան:

Որպէս փրկեցան սիրելիք քո, կեցո՛ւ աջով քով եւ լո՛ւր մեզ:

(հրշ) Օրհնեցէ՛ք զՏէր յերկինս, օրհնեցէ՛ք զնա ի բարձունս:

Օրհնեցէ՛ք զնա, ամենայն հրեշտա՛կք նորա, օրհնեցէ՛ք զնա, ամենայն զօրութի՛ւնք նորա:

(առք) Ոչ են բանք, եւ ոչ են խօսք, որոց ոչ լսին ձայնք նոցա:

Ընդ ամենայն երկիր ել բարբառ նոցա, եւ մինչեւ ի ծագս աշխարհի են խօսք նոցա:

(մրգ) Ոչ են բանք, եւ ոչ են խօսք, որոց ոչ լսին ձայնք նոցա:

Յեկեղեցիս բարեբանեցէ՛ք զԱստուած եւ զՏէր յաղբերացն Իսրայելի:

(հայ) Քահանայք քո զգեցցին զարդարութիւն, եւ սուրբք քո ցնծալով ցնծասցեն:

Յիշեա՛, Տէ՛ր, զԴաւիթ եւ զամենայն հեգութիւն նորա:

(մրտ) Պարծեսցին սուրբքն փառօք եւ ցնծասցեն ի հանգիստ իւրեանց:

Օրհնեցէ՛ք զՏէր յօրհնութիւն նոր. օրհնութիւն նմա յեկեղեցիս սրբոց:

(մրտ) (ակ) Առաքեա՛, Տէ՛ր, զլոյս քո եւ զճշմարտութիւնս քո, ցո՛յց մեզ, Տէ՛ր, զողորմութիւն եւ քո ծառայիցս լե՛ր օգնական բարեխօսութեամբ սրբոց *մարտիրոսացն*, որոց այսօր է յիշատակ:

Զի սոքօք առաջնորդեալ ելցուք ի լեառն սուրբ եւ ի յարկս քո, մտից առաջի սեղանոյ Աստուծոյ առ Աստուած, որ ուրախ առնէ զմանկութիւն իմ. ցոյց մեզ, Տէ՛ր, գողոր: (յյտ) Արեգա՛կն արդարութեան, այսօր յայտնեցար ազգի մարդկան. մարդ եղեալ՝ սրբեցեր զջուրս՝ վերածնեալ զմեզ մկրտութեամբն Սրբոյ Հոգւոյն:

Ի վայելչութիւն փառաց սրբութեան քոյ, յարգանդէ յառաջ քան զարուսեակ ծնայ զքեզ. մարդ եղ:

-----

*Քարոզ՝ Կիրակամտից, Կիրակէից եւ Յինանց*

Ասասցուք ամենեքեան միաբանութեամբ՝ Տէ՛ր, ողորմեա՛:

Տէ՛ր, ողորմեա՛:

Վասն խաղաղութեան ամենայն աշխարհի եւ հաստատութեան սրբոյ եկեղեցւոյ զՏէր աղա:

Վասն ամենայն սուրբ եւ ուղղափառ եպիսկոպոսաց զՏէր աղա:

Վասն հայրապետին մերոյ տեառն (*այս անուն*) կենաց եւ փրկութեան հոգւոյ նորին զՏէր աղա:

Վասն վարդապետաց, քահանայից, սարկաւազաց, դպրաց եւ ամենայն ուխտի մանկանց եկեղեցւոյ զՏէր ա:

Վասն բարեպաշտ թագաւորաց եւ աստուածասէր իշխանաց, զօրավարաց եւ զօրաց նոցին զՏէր աղա:

Վասն, զի Տէրն ամենակալ հնազանդեցուցէ առաջի նոցա զամենայն պատերազմունս թշնամեաց զՏէր աղա:

Յաղագս հարց եւ եղբարց մերոց, որք ի գերութեան են եւ ի չար ծառայութեան, զՏէր աղա:

Յաղագս ճանապարհորդաց եւ նաւորդաց խաղաղութեամբ հասանիլ ի նաւահանգիստն բարութեան զՏէր աղա:

Յաղագս հիւանդաց եւ ամենայն վշտացելոց փութապէս առողջութեան զՏէր աղա:

Յաղագս բարեխառնութեան օրոց, անձրեւաց քաղցրութեան եւ պտղոց առատութեան զՏէր աղա:

Յաղագս ուխտաւորաց եւ պտղաբերից ի սուրբ եկեղեցի Աստուծոյ զՏէր աղա:

Եւ յաղագս այնոցիկ, որք մատնեալք են ի ձեռս անօրինաց վասն անուանն Քրիստոսի զՏէր աղա:

Յաղագս հոգւոցն հանգուցելոց, որք ճշմարիտ եւ ուղիղ հաւատով ի Քրիստոս ննջեցին, զՏէր աղա:

Յիշեա՛, Տէ՛ր, եւ ողորմեա՛:

Յաղագս փրկելոյ զմեզ Տեառն Աստուծոյ յերեւելի եւ յաներեւոյթ թշնամոյն զՏէր աղա:

Տէ՛ր, ողորմեա՛:

(մաղ) Բարեխօս ունիմք սուրբ զՄարիամ զԱստուածածինն՝ զփառաւորեալ եւ օրհնեալ միշտ սուրբ կոյսն, սուրբ զՅովհաննէս Մկրտիչն, սուրբ զՍտեփանոս նախավկայն, սուրբ զառաքեալսն եւ զմարգարէսն, զարի եւ զյաղթող սուրբ վկայսն եւ զմեծ խոստովանողն Քրիստոսի զհայրապետն մեր զսուրբն Գրիգոր Լուսաւորիչն Հայաստանեայց աշխարհի:

Յիշեսցիք եւ զամենայն սուրբս եւ նոքօք զՏէր աղաչեսցուք:

Զառաւօտս լուսոյ եւ զառաջիկայ օրս խաղաղութեամբ անցուցանել հաւատով ի Տեառնէ խնդրեսցուք:

Զհրեշտակ խաղաղութեան պահա:

Զքաւութիւն եւ զթողութիւն յան:

Զսրբոյ խաչին մեծ եւ կարող զօրու:

Եւ եւս՝ միաբան վասն ճշմարիտ եւ:

Զանձինս մեր եւ զմիմեանս Տեառն:

Ողորմեա՛ց մեզ, Տէ՛ր Աստուած մեր:

-----

*Քարոզ ի սրբոյն Գրիգորէ Լուսաւորչէն մերմէ ասացեալ վասն սրբոց*

*Հոփսիսմեանց, այլ եւ վասն առաքելոց եւ մարգարէից*

Աստուած մեծ, հօր եւ փառաւորեալ, լուսաւորիչ սրբոց եւ ի սուրբս հանգուցեալ, զճգնութիւն սրբոց *առաքելոցն* Բարեխօս ունիմք առ քեզ, աղա:

Լո'ւր, Տէ'ր, եւ ողորմեա':

Որ անդադար օրինաբանիս ի դասուց հոգեղինաց երկնաւոր զուարթոցն, արժանաւորեա' զմեզ ուղիղ փառատրութեամբ ընդ սուրբս քո երկրպագել մեծի եւ ահաւոր տէրութեանդ քոյ, աղաչե՛մք:

Օրինեմք զքեզ միաբան սիրով ի յիշատակս վկայից քոց, որք հետեւողք եղեն լուսազարդ ճանապարհաց քոց, Տէ'ր, որ վասն մեր յանձն առեր զչարչարանս խաչի եւ մահու, աղաչե՛մք:

Կատարիչք հաճոյից կամաց Աստուածութեանդ քո զանձինս իւրեանց պատարագեցին ի վկայութիւն ճշմարիտ սիրոյ քոյ եւ բուրեցին զհոտ անուշից տէրութեանդ քոյ, աղաչե՛մք:

Սրբեցին զանձինս իւրեանց տաճար անուանդ քում սրբոյ, մաքրեալք զմիտս եւ զխորհուրդս իւրեանց երկիւղիւղ քով սրբով եւ դասակիցք եղեն հոգեղինաց երկնաւոր զուարթոցն, աղաչե՛մք:

Բարեխօսութեամբ սրբուհւոյ Աստուածածնին եւ Յովհաննու կարապետին եւ սրբոց առաքելոց, մարգարէից եւ մարտիրոսաց եւ սրբոյն Գրիգորի մերոյ Լուսաւորչին, բարեխօսութեամբ եւ աղօթիւք սրբոցն (*այս անուն*), որոց այսօր է յիշատակ, եւ ամենայն սրբոց քոց, Տէ'ր, որք միացան ի սէր Աստուածութեանդ քո, յիշեա' զհոգիս ննջեցելոց մերոց եւ ա'յց արա ի քում զալստեանդ, աղաչե՛մք:

Յիշեա', Տէ'ր, եւ ողորմեա':

Եւ եւս առաւել գյորդորումն սիրոյ եւ զգործս բարեաց պարգեւել մեզ խնդրեմք:

Տո'ւր մեզ, Տէ'ր Աստուած:

Զանձինս մեր եւ զմիմեանս Տեառն Աստուծոյ ամենակալին յանձն արասցուք:

Քեզ՝ Տեառնդ, յանձն եղիցուք:

Ողորմեա'ց մեզ, Տէ'ր Աստուած մեր, ըստ մեծի ողորմութեան քում. ասասցուք ամենեքեան միաբանութեամբ՝ Տէ'ր, ողորմեա', Տէ'ր, ողորմեա', լո'ւր, Տէ'ր, եւ ողորմեա':

-----

*Քարոզ հայրապետաց, որ եւ վարդապետաց*

Առաջնորդք եղեն մեզ ուղիղ գնացիւք ի շաւիղս արքայութեան երկնից, մեծապայծառ ջահիւ՝ հաւատով եւ սիրովն իւրեանց, ծագեցին զլոյս աստուածգիտութեան ի սիրտս մեր, աղաչեմք:

Պահպանութեամբ խորհրդոց բանից եւ գործոց մերոց սրբութեամբ փառաւորել զԱմենասուրբ զԵրրորդութիւնն՝ զՀայր եւ զՈրդի եւ զՍուրբ Հոգին յաւիտեանս. ամէն. աղաչեմք:

Աղաչանօք սրբոց հայրապետացն, Տէ՛ր, որք ճգնեցան վասն անուանդ քում սրբոյ, նայեա՛ց յերկրպագութիւն ժողովելոցս եւ շնորհեա՛ մեղաց զթողութիւն եւ հա՛ն մասն եւ բաժին ընդ սուրբս ամենայն, աղաչեմք:

Աղաչանօք սրբոց հայրապետացն, Տէ՛ր, որք զանձինս իւրեանց տաճար մաքրեցին Հոգւոյդ քում Սրբոյ, պարգեւեա յերկրի մերում զքաղցրախառն օղ եւ զգուարճալի զբոյս՝ առ ի լցումն լինիլ ամենայն հարկաւոր պիտոյից մերոց, աղաչեմք:

Բարեխօսութեամբ սրբուհւոյ Աստուածածնին եւ Յով:

*Եւ այլն տե՛ս վերոյ երես 295*

*Քարոզ մարտիրոսաց եւ ճգնաւորաց*

Զճգնութիւն սրբոց մարտիրոսացն բարեխօս ունիմք առ բարերար Որդիդ Աստուծոյ, զի շնորհեցես աշխարհի զանշարժ զխաղաղութիւն եւ պահեցես հաստատուն սուրբ զեկեղեցի՝ հաստատեալ ի վերայ հիման առաքելոց եւ մարգարէից, աղաչե՛մք:

Զճգնութիւն սրբոց մարտիրոսացն բարեխօս ունիմք առ բարերար Որդիդ Աստուծոյ, զի խաղաղացին խռովութիւնք, դադարեցին յարձակմունք թշնամեաց, տնկեցի սէր եւ արդարութիւն ի յերկրի, աղաչե՛մք:

Աղաչանօք սրբոց մարտիրոսացն, Տէ՛ր, որք ճգնեցան վասն անուանդ քում սրբոյ, նայեա՛ց յերկրպագութիւն ժողովելոցս եւ շնորհեա՛ մեղաց զթողութիւն եւ հա՛ն մասն եւ բաժին ընդ սուրբս ամենայն, աղաչե՛ մք:

Աղաչանօք սրբոց արեամբ նահատակեալ վկայիցն, Տէ՛ր, որք զանձինս իւրեանց տաճար մաքրեցին Հոգւոյդ քում Սրբոյ, պարգեւեա՛ յերկրի մերում զքաղցրախառն օղ եւ զգուարճալի զբոյս՝ առ ի լցումն լինիլ ամենայն հարկաւոր պիտոյից մերոց, աղաչե՛ մք:

Բարեխօսութեամբ սրբուհւոյ Աստ:

*Եւ այլն տե՛ս ի վերոյ երես 295*

-----

*Քարոզ Ծննդեան Քրիստոսի եւ Աւետեաց եւ Փոխման Աստուածածնին եւ  
Տեանընդատաջին*

Մայր սուրբ սքանչելի լուսոյն, որ զԱստուածն ամենայն յաւիտեանց յորովայնի քում կրեցեր եւ ցնծութիւն աշխարհի ծնար զԲանն Աստուած, աղաչե՛ մք:

Մա՛յր սուրբ, բարեխօսեա՛:

Աղաչեա՛ վասն մեր զ՞առ ի քէն զմարմնացեալն Աստուած, որ խոնարհեցաւ ի հայրական ծոցոյ, էառ մարմին ըստ մարդկային բնութեանս՝ առնել խաղաղութիւն յերկինս եւ յերկրի, աղաչե՛ մք:

Աղաչեա՛ վասն: Ներել մեզ, անտես առնել զյանցանս մեր եւ տալ օգնականութիւն ընդդիմակաց լինիլ հակառակամարտիցն ի պատերազմի, աղաչե՛ մք:

Աղա. զի լռեսցին պատերազմունք, դադարեսցին յարձակմունք թշնամեաց, տնկեսցի սէր եւ արդարութիւն ի յերկրի, աղաչե՛ մք:

Աղա. աճեցուցանել յերկրի մերում զքաղցր բղիտումն աղբերաց, զառատ պտղաբերութիւն բուսոց եւ տնկոց՝ առ ի զուարճալի լինիլ ամենայն հարկաւոր պիտոյից մերոց, աղաչե՛ մք:

Աղա. զի միաբանեսցէ զեկեղեցի իւր սուրբ՝ շինեալ ի վերայ հիման առաքելոց եւ մարգարէից, պահել անարատ մինչեւ յօր երեւելոյ գալստեան իւրոյ, աղաչե՛ մք:

Աղաչեա՛ վասն մեր, սրբուհի՛, զՄիածին քո զՈրդին եւ վասն հոգւոցն հանգուցելոց ընդունիլ յարքայութիւնն երկնից եւ տալ մասն եւ բաժին ընդ սուրբս ամենայն, աղա:

Յիշեա՛, Տէ՛ր, եւ ողորմեա՛:

Եւ եւս առաւել զոքոքորումն սիրոյ եւ զգործս բարեաց պարգեւել մեզ խնդրեմք:

Տո՛ւր մեզ, Տէ՛ր Աստուած:

Զանձինս մեր եւ զմիմեանս Տեառն Աստուծոյ ամենակալին յանձն արասցուք:

Քեզ՝ Տեառնդ, յանձն եղիցուք:

Ողորմեա՛ց մեզ, Տէ՛ր Աստուած մեր, ըստ մեծի ողորմութեան քում. ասասցուք ամենեքեան միաբանութեամբ՝ Տէ՛ր, ողորմեա՛, Տէ՛ր, ողորմեա՛, լո՛ւր, Տէ՛ր, եւ ողորմեա՛:

-----

*Քարոզ պահոց*

Փառաւորեսցուք զամենակալն Աստուած՝ զՀայր Տեառն մերոյ Յիսուսի Քրիստոսի՝ գոհանալով զնմանէ, որ պահեաց զմեզ խաղաղութեամբ ի գիշերիս յայսմիկ եւ առաջնորդեաց մեզ ի խաւարէ ի լոյս, ի մահուանէ ի կեանս, յապականութենէ յանապականութիւն, յանգիտութենէ ի գիտութիւն ճշմարտութեան իւրոյ: Աղաչեսցուք եւ խնդրեսցուք ի նմանէ, զի զերկարութիւն տուրնջեանս խաղաղութեամբ եւ ամենայն մտադիւր զուարթութեամբ արասցէ անցուցանել ի մենջ: Եւ պարսպեալ պահեսցէ զժողովուրդս իւր աստուածային զօրութեամբն, որ ի վերայ ամենայնի բարերարութեամբն իւրով իշխանութիւն ունի: Ամենակալ՝ Տէր Աստուած մեր, կեցո՛ւ եւ ողորմեա՛:

Զառաւօտս լուսոյ եւ զառաջակայ օրս խաղաղութեամբ անցուցանել հաւատով ի Տեառնէ խնդրեսցուք:

Զիրեշտակ խաղաղութեան պահա.

Զքաւութիւն եւ զթողութիւն յան.

Զսրբոյ խաչին մեծ եւ կարող զօրու.

Եւ եւս՝ միաբան վասն ճշմարիտ եւ.

Զանձինս մեր եւ զմիմեանս Տեառն.

Ողորմեա՛ց մեզ, Տէ՛ր Աստուած մեր:

### *Աղօթք*

Գոհանամք զքէն, Տէ՛ր Աստուած մեր, որ երեւելի լուսով քով զուարճացուցեր զամենայն արարածս քո, իսկ իմանալի լուսով պատուիրանաց քոց զամենեսեան լուսաւորեցեր զհաւատացեալս ի քեզ: Զօրացո՛ւ եւ զմեզ, Տէ՛ր, ի պահպանութիւն պատուիրանաց քոց ի տուրնջեանս յայսմիկ եւ յամենայն ժամանակի, որպէս զի լուսաւորեալ մտօք միշտ զհաճոյս քո արասցուք եւ հանդերձեալ բարեացոյ հասցուք ընդ ամենայն սուրբս քո շնորհօք եւ մարդասիրութեամբ Տեառնդ մերոյ եւ Փրկչիդ Յիսուսի Քրիստոսի, որում վայել է փառք, իշխանութիւն եւ պատիւ այժմ եւ միշտ եւ յաւիտեանս յաւիտենից. ամէն:

Խաղաղութիւն ամենեցուն:

Աստուծոյ երկիրպագեսցուք:

Խաղաղութիւն մեր եւ կեանք, որ ի Հօրէ առաքեցար՝ Միածին Որդի Աստուծոյ, Տէր մեր եւ Փրկիչ Յիսուս Քրիստոս, տո՛ւր մեզ զխաղաղութիւն քո, զոր շնորհեցեր սրբոց քոց առաքելոց փչմամբ քո ի նոսա զկենդանացուցիչ եւ զամենազօր Հոգիդ քո Սուրբ: Որպէս զի եւ մեք, խաղաղացեալք յամենայն աշխարհական սահեցմանց, լիցուք տաճար եւ բնակարան աստուածային շնորհացդ եւ գոհանալով փառաւորեսցուք զքեզ ընդ Հօր եւ Սուրբ Հոգւոյդ, Քրիստոս՝ Աստուած մեր, այժմ եւ միշտ եւ յաւիտեանս յաւիտենից. ամէն:

*Եւ ասի Սուրբ Աստուած ըստ պատշաճի*

*Յաւուրս Աւետեաց եւ Ծննդեան զայս ասս*

Սուրբ Աստուած, սուրբ եւ հօր, սուրբ եւ անմահ, որ յայտնեցար վասն մեր, ողորմեա՛ մեզ:

(զլս) Սուրբ Աստուած, սուրբ եւ հօր, սուրբ եւ անմահ, որ եկիր եւ զալոց ես, ողոր.

*Ուրբաթու մատնութեան գիշերին*

Սուրբ Աստուած՝ որ մատնեցար վասն մեր, ողոր.

*Ուրբաթու ճաշուն եւ յամենայն տօնս սրբոց, Խաչի եւ Եկեղեցւոյ, այլ եւ յաւուրս պահոց*

Սուրբ Աստուած՝ որ խաչեցար վասն մեր, ողոր.

*Ուրբաթու երեկոյին եւ շաբաթու գիշերոյն*

Սուրբ Աստուած՝ որ թաղեցար վասն մեր, ողոր.

*Ջատկի եւ ամենայն Յարութեան Կիրակէից*

Սուրբ Աստուած՝ որ յարեար ի մեռելոց, ողոր.

(հրձ) Սուրբ Աստուած՝ որ համբարձար փառօք առ Հայր, ողոր.

(հգլ) Սուրբ Աստուած՝ որ եկիր եւ հանգեար յառաքեալսն, ողոր.

(վար) Սուրբ Աստուած՝ որ յայտնեցար ի Թաբոր լերինն, ողոր.

(վեր) Սուրբ Աստուած՝ որ եկիր ի փոխումն մօր քոյ եւ կուսի, ողոր:

*Թովմայի առաքելոյ ասացեալ*

Փառաւորեալ եւ օրհնեալ միշտ սուրբ կոյս Աստուածածին Մարիամ՝ մայր Քրիստոսի, մատո՛ր զաղաչանս մեր Որդւոյ քոյ եւ Աստուծոյ մերոյ:

(մաղ) Փրկել զմեզ ի փորձութենէ եւ յամենայն վտանգից մերոց:

Եւ եւս խաղաղութեան.

(քրգ) Վասն լսելի լինելոյ Տեառն Աստուծոյ ձայնի աղաչանաց մերոց բարեխօսութեամբ սուրբ Աստուածածնին եւ իջանելոյ ի վերայ մեր ողորմութեան եւ գթութեան Տեառն Աստուծոյ: Ամենակալ Տէր Աստուած մեր, կեցո՛ւ եւ ողորմեա՛: Օրհնութիւն եւ փառք Հօր եւ Որդւոյ եւ. (մատ)

-----  
*Եւ ասի սաղմոս ձայնի յաւուրս կիրակէից յառաջընթաց աւետարանին*

Եղիցի անուն Տեառն օրհնեալ յայսմիտէ մինչեւ յաւիտեան:

Օրհնեցէ՛ք, մանկո՛ւնք, զՏէր եւ օրհնեցէ՛ք զանուն Տեառն:

Եղիցի անուն Տեառն օրհնեալ յայսմիտէ մինչեւ յաւիտեան:

Յարեւելից մինչ ի մուտս արեւու օրհնեալ է անուն Տեառն:

Բարձր է ի վերայ ամենայն ազգաց Տէր, յերկինս եւ փառք նորա:

Ո՛վ է որպէս Տէր Աստուած մեր ի բարձունս բնակեալ եւ զխոնարհս տեսանէ յերկինս եւ յերկրի:

Յարուցանէ զաղքատս յերկրէ եւ բարձր առնէ զտառապեալս յաղբեաց:

Նստուցանէ զնոսա իշխանս ընդ իշխանս ժողովրդեան իւրոյ:

Բնակեցուցանէ զամուլ ի տան ուրախամիտ, որպէս մայր ողորմվք բերկրեալ:

-----  
*Յաւուրս կիրակէից աստ ընթերցեալ լինի աւետարան բժշկութեան եւ ի տօնս տէրունականս սաղմոսք եւ գիրք եւ աւետարանք ըստ ցուցակին:*

*Սրբոյ Աւետարանիս Յիսուսի Քրիստոսի, որ ըստ Մատթէոսի:*

*Տեառն մերոյ Յիսուսի Քրիստոսի:*

(բկ) (դկ)

Եւ ելեալ անտի Յիսուսի գնաց ի կողմանս

Տիրոսի եւ Սիդոնի: Եւ ահա կին մի քանանացի, ի սահմանաց անտի նոցա ելեալ, աղաղակէր եւ ասէր. Ողորմեա՛ց ինձ, Տէ՛ր, Որդի Դաւթի, դուստր իմ չարաչար այսահարի: Եւ նա ոչ ետ նմա պատասխանի: Եւ մատուցեալ աշակերտքն նորա՝ աղաչէին զնա եւ ասէին. Արձակեա՛ զնա, զի աղաղակէ զհետ մեր: Նա

պատասխանի ետ եւ ասէ. ՌՆՅ ուրեք առաքեցայ, եթէ ոչ առ ոչխարս կորուսեալս տանն Իսրայելի: Եւ նա մատուցեալ երկիրպագանէր նմա եւ ասէր. ՌՏէ՛ր, օգնեա՛ ինձ: Պատասխանի ետ նմա եւ ասէ. ՌՆՅ է բարւոք առնուլ զհաց մանկանց եւ արկանել շանց: Եւ նա ասէ. ՌԱյո՛, Տէ՛ր, քանզի եւ շունք կերակրին ի փշրանաց անկելոց ի սեղանոյ տեառն իւրեանց: Յայնժամ պատասխանի ետ նմա Յիսուս եւ ասէ. ՌՈ՛վ կին դու, մեծ են հաւատք քո, եղիցի քեզ, որպէս եւ կամիս: Եւ բժշկեցաւ դուստր նորա ի նմին ժամու:

-----

*Սրբոյ Աւետարանիս Յիսուսի Քրիստոսի որ ըստ Մարկոսի:*

*Տեառն մերոյ Յիսուսի Քրիստոսի:*

(բձ) (դձ)

Եւ ելեալ միւսանգամ ի սահմանացն Տիրոսի եւ Սիդոնի եւ եկն ի ծովեզրն գալիլացոց ի մէջ սահմանացն ի Դեկապոլիս: Եւ բերին առաջի նորա խուլ մի եւ համր եւ աղաչեցին, զի ձեռն դիցէ ի վերայ նորա: Եւ առեալ զնա մեկուսի յամբոխէ անտի՝ արկ զմատունս իւր ընդ ականջս նորա եւ եթուք անդր. եւ կալաւ զլեզուէ նորա, հայեցաւ յերկինս, յոգւոց եհան եւ ասէ. ՌԵփփաթայ, որ է՝ բացի՛ր: Եւ նոյն ժամայն բացան լսելիք նորա, եւ լուծան կապանք լեզուի նորա, եւ խօսէր ուղիղ: Եւ պատուիրեաց նոցա, զի մի՛ ումեք ասիցեն: Եւ որչափ նա պատուիրէր նոցա, եւս առաւել քարոզէին եւ եւս քան զեւս զարմանային եւ ասէին. ՌԶամենայն ինչ բարւոք գործեաց սա, զի խլից լսել տայ եւ համերց խօսիլ:

---

*Սրբոյ Աւետարանիս Յիսուսի Քրիստոսի, որ ըստ Ղուկասու: Առ Տէրն մեր Յիսուս Քրիստոսու:(ակ) (զկ)*

Եւ եղև ի վաղիւն, մինչ իջանէին նոքա ի լեռնէ անտի, ընդ առաջ եղև նմա ժողովուրդ բազում: Եւ ահա այր մի ի ժողովրդենէ անտի աղաղակեաց եւ ասէ. ՌՎարդապետ, աղաչե՛մ զքեզ, հայեա՛ց յորդի իմ, զի միամօր է ինձ, եւ ահա այս

հարկանի ի նմա եւ յանկարծ գոչէ եւ զարկուցանէ զնա եւ թաւալեցուցանէ զնա եւ փրփրեցուցանէ եւ հազիւ մեկնի ի նմանէ՝ խորտակեալ զնա: Եւ աղաչեցի զաշակերտսն քո, զի հանցեն զնա, եւ ոչ կարացին: Պատասխանի ետ Յիսուս եւ ասէ. ՌՈ՛վ ազգ անհաւատ եւ թիւր, մինչեւ յե՞րբ եղէց ընդ ձեզ եւ անսայցեմ ձեզ: Մատո՛ւ այսր զորդին քո: Եւ մինչդեռ մատչէր, զարկոյց զնա եւ դէն եւ շարժեաց: Սաստեաց Յիսուս այսոյն պղծոյ եւ բժշկեաց զմանուկն եւ ետ զնա ցհայր իւր: Եւ զարմանային ամենեքեան ի վերայ մեծամեծացն Աստուծոյ: -----

*Մրբոյ Աւետարանիս Յիսուսի Քրիստոսի, որ ըստ Յովհաննու  
Տէրն մեր Յիսուս Քրիստոս*

(աձ) (զձ)

Եկն դարձեալ ի Կանա գալիլիացոց, ուր արար զջուրն գինի: Եւ անդ էր թագաւորագն մի, որոյ որդի նորա հիւանդ կայր ի Կափառնատում: Նա իբրեւ լուսա, եթէ Յիսուս եկեալ է ի Հրէաստանէ ի Գալիլիա, եկն առ նա եւ աղաչէր, զի իջցէ եւ բժշկեսցէ զորդի նորա, քանզի մերձ էր ի մեռանել: Ասէ ցնա. ՍԵթէ ոչ նշանս ինչ եւ արուեստս տեսանէք, ոչ հաւատայք: Ասէ ցնա թագաւորագն. ՍԵ՛ր, էջ մինչչեւ մեռեալ իցէ մանուկն իմ: Ասէ ցնա Յիսուս. ՍԵ՛րթ, որդին քո կենդանի է: Եւ հաւատաց այրն բանին, զոր ասաց նմա Յիսուս, եւ զնաց: Եւ մինչդեռ իջանէր, ընդ առաջ եղեն նմա ծառայքն նորա, աւետիս ետուն եւ ասեն, թէ մանուկն նորա կենդանի է: Հարցանէր ցնոսա վասն ժամուն, յորում ապաքինեաց, եւ ասեն ցնա. ՍԵրէկ յեթներորդ ժամու եթող զնա ջերմն: Գիտաց հայրն նորա, թէ յայնմ ժամու, յորում ասացն ցնա Յիսուս, թէ՛ Ռորդին քո կենդանի է, եւ հաւատաց ինքն եւ ամենայն տուն իւր: Զայս դարձեալ երկրորդ նշան արար Յիսուս՝ եկեալ ի Հրէաստանէ ի Գալիլիա:

---

*Երգ առաջնոյ աւուր միաշարքաթին եւ ի խորհուրդ արարչութեան եւ յարութեանն  
Քրիստոսի*

Նորաստեղծեալ Բանն յանէից  
ի սկզբանէ գերկինս երկնից  
եւ գերկնային զօրս անմարմնոց  
իմանալեացն զուարթոց  
եւ զգալի տարերց քառից  
հակառակաց միաբանից,  
որով յաւէտ փառաբանի  
Երրորդութիւնն անճառելի:

Երեքսրբեան մի տէրութիւն,  
միով բնութեամբ Աստուածութիւն.  
լոյսն, որ անեղ, արարչական,  
ասաց լինել լոյս եղական,  
զոր եւ ծագեաց յօրն առաջին  
միաշաբաթ կիրակէին,  
որով յաւէտ փառա.

Բարունօրէն բացատրեսցուք,  
զճածկեալ խորհուրդն ծանիցուք,  
զի լոյսն անտես, իմանալի,  
մաքուր հոգւոց տեսանելի,  
ի սոյն ծագեաց միաշաբաթ  
մեզ յարութեան սուրբ ճառագայթ,  
եկա'յք, փրկեա'լք, ընդ զուարթնոյն,  
տուք օրհնութիւն Յարուցելոյն:

Սէրդ սիրով խոնարհեցար,  
ի փրկութիւն մեր մարմնացար,  
նովին մարմնովն խաչեցար,

ի գերեզման մահու եղար,  
այսօր յարեար աստուածաբար,  
ի հրեշտակաց քարոզեցար,  
եկա՛յք, փր.

Երեւեցար խնկաբերիցն  
յողջոյն կենացն ուրախալից  
եւ ի լերինն Գալիլիա  
առաքելոց մետասանից,  
արժանացո՛ր զմեզ ընդ նոսին  
զքեզ տեսանել յօրն վերջին,  
եկա՛յք, փր.

Սիոնի՛ որդիք, զարթի՛ք,  
հարսին լուսոյ տո՛ւք աւետիք,  
եթէ փեսայն քո յարուցեալ  
յաղթեաց մահու իշխանութեամբ,  
գայ պսակէ զքեզ փառօք,  
ել ընդ առաջ պճնեալ զարդուք.  
Երգեա՛ երգ նոր յարուցելոյն՝  
ննջեցելոց կենաց պտղոյն:

*Քարոզ կհիրակէից եւ այլոց տէրունական տօնից*

Խնդրեսցուք հաւատով միաբանութեամբ ի Տեառնէ, զի զողորմութեան զշնորհս իւր  
արասցէ ի վերայ մեր: Տէրն ամենակալ կեցուցէ եւ ողորմեսցի: Կեցո՛, Տէ՛ր:  
Տէ՛ր, ողորմեա՛, Տէ՛ր, ողոր, Տէ՛ր, ողոր.:

*Աղօթք*

Քում ամենագօր եւ հրաշալի *յարութեանդ*, Քրիստո՛ս Աստուած մեր, երկիր  
պագանեն գօրք հրեշտակաց, զի դու միայն ունիս զանմահութիւն, բնակեալդ ի լոյս

անմատոյց: Եւ մեք՝ հողեղէն արարածքս, խոնարհեալք երկիւղիւ երկիր պագանեմք, գտուրք եւ զիրաշալի եւ զյաղթող *զյարութիւնդ* քո օրհնեմք եւ փառաւորեմք: Եւ ընդ երկնային զօրսն մատուցանեմք զօրհնութիւն եւ զփառս ընդ չօր եւ ընդ Սրբոյ Հոգւոյդ այժմ եւ միշտ եւ յաւիտեանս յաւիտենից. ամէն:

Օրհնեալ Տէր մեր Յիսուս Քրիստոս. ամէն:

Հայր մեր, որ յերկինս:

-----

*Քարոզ յորժամ ի թափօր ելանեն*

(սրկ) Եւ եւս խաղաղութեան զՏէր աղաչեսցուք:

(դպ) Տէ՛ր, ողորմեա՛:

(սրկ) Վասն ի վերուստ խաղաղութեան եւ փրկութեան անձանց մերոց զՏէր աղաչեսցուք:

(դպ) Տէ՛ր, ողորմեա՛:

(սրկ) Ողորմեա՛ց մեզ, Տէ՛ր Աստուած մեր, ըստ մեծի ողորմութեան քում. ասասցուք ամենեքեան միաբանութեամբ՝

(դպ) Տէ՛ր, ողորմեա՛, Տէ՛ր, ողոր., Տէ՛ր, ողոր.:

(քհ) Օրհնութիւն եւ փառք չօր եւ Որդւոյ եւ Հոգւոյն Սրբոյ այժմ եւ միշտ եւ յաւիտեանս յաւիտենից:

(դպ) Ամէն. Ալէլուիա, ալէլուիա, ալէ:

(քհ) Օրհնեսցի եւ պահպանեսցի եւ նախախնամեալ պահեսցի արեւելեան կողմն աշխարհիս եւ հայրապետութիւն հայոց այս նշանաւ՝ սուրբ խաչիւս եւ սուրբ Աւետարանաւս եւ աւուրս շնորհիւ անուամբ չօր եւ Որդւոյ եւ Հոգւոյն Սրբոյ այժմ եւ միշտ եւ յաւի:

*Եւ դարձուցանեն զերեսս յարեւմուսս*

(դպ) Ամէն. Ալէլուիա. ալէլուիա. ալէ.

(քհ) Օրհնեսցի եւ պահպանեսցի եւ նախախնամեալ պահեսցի արեւմտեան կողմն աշխարհիս եւ թագաւորութիւն քրիստոնէից այս նշա:

*Եւ շրջելով դառնան ի հարաւ*

(դպ) Ամէն. Ալէլուիա, ալէլուիա, ալէ.

(քհ) Օրհնեսցի եւ պահպանեսցի եւ նախախնամեալ պահեսցի հարաւային կողմն աշխարհիս՝ երկիրս, անդաստանս եւ պտղաբերութիւն տարւոյս այս նշանաւ՝ սուրբ խա: *Եւ դառնան դէպ ի հիւսիս*

(դպ) Ամէն. Ալէլուիա, ալէլուիա, ալէ.

(քհ) Օրհնեսցի եւ պահպանեսցի եւ նախախնամեալ պահեսցի հիւսիսային կողմն աշխարհիս, վանքս, անապատս, քաղաքս եւ գիւղս եւ բնակեալ ժողովուրդս ի սմա այս նշանաւ:

Ամէն:

*Եւ դառնան ի բեմն եւ ասեն դարձեալ*

(քհ) Օրհնութիւն եւ փառք Հօր եւ Որդւոյ եւ Հոգ:

*Քարոզ թափօրի եւ Խաչի*

Սուրբ խաչիւս աղաչեսցուք զՏէր, զի սովաւ փրկեսցէ զմեզ ի մեղաց եւ կեցուցէ շնորհիւ ողորմութեան իւրոյ: Ամենակա՛լ Տէր Աստուած մեր, կեցո՛ եւ ողորմեա՛:

*Աղօթք*

Պահպանեա՛ զմեզ, Քրիստո՛ս Աստուած մեր, ընդ հովանեաւ սուրբ եւ պատուական խաչիւդ քով ի խաղաղութեան. փրկեա՛ յերեւելի եւ յաներեւոյթ թշնամւոյն,

արժանաւորեա՛ գոհութեամբ փառաւորել զքեզ ընդ Հօր եւ ընդ Սրբոյ Հոգւոյդ այժմ  
եւ միշտ եւ յաւի.

Օրհնեալ Տէր մեր Յիսուս Քրիստոս. ամէն:

Հայր մեր, որ յերկինս:

*Իսկ յայլ աւուրս յետ Սուրբ Աստուածին եւ քարոզին ասի սաղմոս ի թիւ:*

Օրհնեցէ՛ք, մանկո՛ւնք, զՏէր, եւ օրհնեցէ՛ք զանուն Տեառն:

Եղիցի անուն Տեառն օրհնեալ յայսմհետէ մինչեւ յաւիտեան:

Յարեւելից մինչեւ ի մուտս արեւու օրհնեալ է անուն Տեառն:

Բարձր է ի վերայ ամենայն ազգաց Տէր, եւ յերկինս են փառք նորա:

Ո՛վ է որպէս Տէր Աստուած մեր ի բարձունս բնակեալ

եւ զխոնարհս տեսանէ յերկինս եւ յերկրի:

Յարուցանէ զաղքատս յերկրէ եւ բարձր առնէ զտառապեալս յաղբեւաց:

Նստուցանէ զնոսա իշխանս ընդ իշխանս ժողովրդեան իւրոյ:

Բնակեցուցանէ զամուլն ի տան ուրախամիտ, որպէս մայր որդւովք բերկրեալ:

Փառք Հօր. այժմ եւ միշտ:

---

*Մանկունքի շարականք:*

(հրշ) (դկ)

Երկնաւոր հօ՛տ ընտրեալ, զոր հովին քաջ, թողեալ յերկինս եւ եկեալ ի խնդիր մեզ՝  
մոլորելոցս, որով լցեալ զթիւ հարիւրոցդ՝ արար ուրախութիւն ի երկինս  
երկնաւորացդ, աղաչե՛մք զձեզ, բարեխօ՛ս լերուք առ Տէր վասն քաւութեան մեղաց  
մերոց:

Տեսան՝ոք անտեսին, խորհրդածո՛ւք խորոցն Աստուծոյ, որք իջեալ ընդ Միածնին  
սպասաւորել տնօրէնութեանն. ի ծննդեանն աւետաւորք հովուացն եւ կանանցն  
իւղաբերից կենաց քարոզք զկենդանւոյն, աղաչեմք ըզձեզ բարե:

Պահապա՛նք աշխարհի, բանա՛կք Տեառն շուրջ զերկիւղածովք, բարեկա՛մք ազգի մարդկան, միջնո՛րդք մահու եւ յարութեան՝ Միքայել եւ Գաբրիէլ, մեծք, որ կայք միշտ առաջի Ամենասուրբ Երրորդութեանն. աղաչեմք ըզ:

(մրգ) (դկ)

Այսօր ցնձայ զուարճացեալ եկեղեցի հեթանոսաց՝ տօնելով զյիշատակ մեծի նահապետին եւ հօրն հաւատոյ Աբրահամու, օրհնեցէ՛ք, մանկո՛ւնք Սիոնի, զհայրն լուսոյ անլռելի:

Այսօր, նո՛ր Իսրայել, կոչեցեալ մարգարէիւքն առ Աստուած, տօնեա՛ ցնծութեամբ զտօն հովուացն Իսրայելին առաջնոյ՝ գովելով զգլուխ անկեան երկուց որմոց յարմարութեան:

Այսօր ի գլուխս լերանց տուն Աստուծոյ հաստատեալ, որ եւ յաւէտ ռոռգիս յամպոց Հոգւոյն աստուածաբուղիս առատահոս անձրեւօք, բարեբանեա՛ զաղբիրն կենաց զարբուցանողն ծարաւեաց:

(ապշ) (աձ)

Զառաւօտու զօրհներգութիւնս մարդասիրութեամբդ քո ընկալ, Թագաւո՛ր փառաց, եւ զմանկունս եկեղեցւոյ քո պահեա՛ ի խաղաղութեան:

Որ տեսողդ եւ խոնարհաց յերկնից ի յերկիր եւ տուող ողորմութեան ազգի մարդկան, զմանկունս եկե:

Ընդ սերովբէսն սրբասաց համաձայնեալ՝ քեզ երգեմք, երեքսրբեա՛ն տէրութիւն, իննայեա՛ քաղցրութեամբ յարարածս քո եւ զմանկունս եկեղեցւոյ քո պա:

(առք) (ակ)

Աշակէ՛րտք Քրիստոսի եւ առ ամենայն տիեզերս առաքեալք, բարեխօսեցէ՛ք առ Տէր վասն մեր:

Որք առիք զպատուէր քարոզել աներկիւղ զբանն կենաց յաշխարհի, բարե:

Որք արժանի եղէք տեսանել մարմնով զՈրդին Աստուծոյ յայտնապէս, բարե:

(մրտ) (աձ)

Զճգնութիւն սրբոց քոց, Քրիստոս'ս, տօնելով այսօր ընդ զօրս անմարմնոցն՝ քեզ երգեմք անլուելի զօրհնաբանութիւն: Մերկացեալք զմարդկային տկարութեան զգեստ, հաւատոյ վառեալ զգեստուք յաղթեալք հակառակամարտիցն ի պատերազմի, մկրտեալք ընդ Քրիստոսի հեղմամբ արեան ի մահ, Աստուածութեանն գոլով հրաշակերտք, շինեալք ի վայելչութիւն սուրբ արքայութեանն:

-----

### *Քարոզ զկնի Մանկունքին*

Վասն խաղաղութեան ամենայն աշխարհի եւ հաստատութեան սրբոյ եկեղեցոյ զՏէր աղաչեսցուք: Ասասցուք ամենեքեան միաբանութեամբ՝  
Տէ՛ր, ողորմեա՛, Տէ՛ր, ողոր., Տէ՛ր, ողոր.:

### *Աղօթք*

Սուրբ ես, Տէ՛ր Աստուած մեր, հզօր եւ փառաւորեալ, որ նստիս ի կառս քերովբեականս եւ լոյս ծագիս յարարածս քո, լուսաւորեա՛ զմեզ, Տէ՛ր, ի ժամ առաւօտուս, որպէս զի ի ծագել լուսոյ տուրնջեանս ծագեսցի առ մեզ գութ մարդասիրութեան քո: Հեռացո՛ ի մէնջ, Տէ՛ր, զխաբէութիւն սատանայի եւ զբռնութիւն նորա խորտակեա՛ աղօթիւք եւ բարեխօսութեամբ ամենայն սրբոց: Արա՛ եւ զերկիրս պտղաբեր ի սնունդս ծառայից քոց, յորոց հանապազ փառաւորեալ գովի Ամենասուրբ Երրորդութիւնդ այժմ եւ միշտ եւ յաւիտեանս յաւիտենից, ամէն:

-----

*Յաւուրս աղուհացից աստ ասի Տէր ամենակալ (երես 333), եւ յետ նորա՝ Բանից իմոց, եւ յայլ աւուրս պահոց՝ միայն Բանից իմոց, զոր զոցես յերեսն 339:*

*Իսկ ի տօնս Մրբոց ասի սաղմոս այս*

Միրեցի, զի լուիցէ Տէր զձայն աղօթից իմոց, զի խոնարհեցոյց զունկն իւր առ իս, եւ ես յաւուրս իմ կարդացի առ նա:

Շրջեցան զինեւ երկունք մահու, եւ վիշտք դժոխոց գտին զիս:

Զնեղութիւն եւ զանձկութիւն գտի եւ զանուն Տեառն կարդացի:

Ո՛ր Տէր, փրկեա՛ր զանձն իմ. ողորմած Աստուած մեր ողորմի եւ պահէ զտղայս Տէր: Ես խոնարհ եղէ, եւ Տէր կեցոյց զիս. դա՛րձ, ա՛նձն իմ, ի հանգիստ քո, զի Տէր օգնեաց ինձ:

Փրկեաց զանձն իմ ի մահուանէ, զաչս իմ յարտասուաց եւ զոտս իմ ի գայթակղութենէ. հաճոյ եղէց առաջի Տեառն յերկրին կենդանեաց:

Հաւատացի, զոր եւ խօսեցայ, եւ ես խոնարհ եղէ յոյժ:

Ես ասացի ի զարմանալ իմում, թէ ամենայն մարդ սուտ է:

Զի՞նչ տաց տրիտուր Տեառն ընդ ամենայնի, զոր եւ ես ինձ:

Զբաժակ փրկութեան ընկալայց եւ զանուն Տեառն կարդացից:

Զաղօթս իմ Տեառն տաց առաջի ամենայն ժողովրդեան նորա:

Պատուական է առաջի Տեառն մահ սրբոց իւրոց. ո՛ր Տէր, ես ծառայ քո եմ, ծառայ եւ որդի աղախնոյ քո:

Հատեր զկապանս իմ, քեզ մատուցից պատարագ օրհնութեան եւ զանուն Տեառն կարդացից:

Զաղօթս իմ Տեառն տաց առաջի ամենայն ժողովրդեան նորա, ի գաւիթս տան Տեառն եւ ի մէջ քո, Երուսաղէ՛մ:

Օրհնեցէ՛ք զՏէր, ամենա՛յն ազիւնք, զովեցէ՛ք զնա, ամենա՛յն ժողովուրդք:

Զօրացի ողորմութիւն նորա ի վերայ մեր, ճշմարտութիւն Տեառն մնացէ յաւիտեան:

Աստուա՛ծ, յանուան քում կեցո՛ր զիս, ի զօրութեան քում իրա՛ւ արա ինձ:

Աստուա՛ծ, լո՛ւր աղօթից իմոց, ո՛ւնկն դիր բանից բերանոյ իմոյ:

Օտարք յարեան ի վերայ իմ, եւ հզօրք ինդրեցին զանձն իմ եւ ոչ համարեցան զքեզ Աստուած առաջի իւրեանց:

Ահա Աստուած օգնական իմ, եւ Տէր ընդունելի հոգւոյ իմոյ:

Ի դարձուցանել զչարսն ի թշնամիս իմ ճշմարտութեամբ քով սատակեա՛ զնոսա:

Ես կամօք իմովք պատարագս մատուցից քեզ, խոստովան եղեց անուան քում, Տէ՛ր, զի բարի է:

Յամենայն նեղութենէ իմմէ փրկեցեր զիս, եւ ի թշնամիս իմ ետես ակն իմ:

Տո՛ւր զօրութիւն ծառայի քո, կեցո՛՛ զորդի աղախնոյ քո եւ արա՛ առ իս նշան բարութեան:

Տեսցեն ատելիք իմ եւ ամաչեսցեն, զի դու, Տէ՛ր, օգնեցեր ինձ եւ մխիթարեցեր զիս:

Փառք Հօր. այժմ եւ միշտ:

### *Մաղթանք ի տօնս Սրբոց*

Քրիստո՛ս Աստուած մեր, վասն սուրբ խաչի քո պատուականի զխաղաղութիւն քո տուր մեզ, Տէ՛ր:

Վասն սրբուհոյ Աստուածածնին եւ Յովհաննու կարապետին եւ սրբոյն Ստեփանոսի նախավկային զիս:

Վասն սրբոց քոց առաքելոց, մարգարէից, վարդապետաց, մարտիրոսաց, հայրապետաց, ճգնաւորաց, կուսանաց. միանձանց եւ երկնային զօրացն զխաղա.

Եւ վասն նախկին լուսաւորչացն մերոց Թադէոսի եւ Բարթոլոմէոսի եւ սրբոց Յակոբեանց երջանիկ առաքելոցն եւ սրբոյն Գրիգորի մերոյ Լուսաւորչին եւ սրբոցն Յակոբայ՝ Մծբնայ հայրապետին, Մարուգէի ճգնաւորին, Մելիտոսի եպիսկոպոսին եւ Գեորգայ զօրավարին: Բարեխօսութեամբ, յիշատակաւ եւ աղօթիւք սրբոցն (*այս անուն*), որոց այսօր է յիշատակ, զխաղաղութիւն եւ զմեծ զողորմութիւն քո պարգեւեա՛ մեզ, մարդասէ՛ր Տէր:

### *Քարոզ*

Սուրբ ճգնաւորօքն աղաչեսցուք զՏէր, որք զչարսն պարտեցին, նեղութեանցն համբերեցին, լուսեղէն եւ երկնային անթառամ պսակացն արժանի եղեն: Աղօթիւք

նոցա եւ բարեխօսութեամբ մեզ ողորմեսցի: Ամենակա՛լ Տէր Աստուած մեր, կեցո՛ւ եւ ողորմեա՛:

-----

*Աղօթք ի սոնի առաքելոց եւ մարգարեից եւ հայրապետաց եւ վարդապետաց*

Որ ընտրեցեր եւ ընկալար զերանելի զվկայսն քո (*այս անուն*), Քրիստո՛ս Աստուած մեր, եւ հաղորդս արարեր զնոսա կամաւոր չարչարանաց քոց, արդ բարեխօս առ քեզ ունիմք, որք աստ եւ ընդ ամենայն տիեզերս սուրբք իցեն, որպէս զի աղօթիւք նոցա եւ բարեխօսութեամբ խաղաղացուցես զկենցաղավարութիւնս մեր՝ փրկելով զմեզ յերեւելի եւ յաներեւոյթ թշնամոյն:

Շնորհեա՛ մեզ, Տէ՛ր, ըստ օրինակի նոցա կեալ, եւ զվախճանն մեր կնքեա՛ ուղղափառ խոստովանութեամբ ի յոյս կենացն յաւիտենից: Զի եւ մեք արժանի եղիցուք մտանել յերկնային խորանսն լուսոյ եւ ժառանգել զպատրաստեալն ի սկզբանէ աշխարհի սրբոց քոց զարքայութիւնդ: Եւ ընդ նոսին գոհանալով փառաւորեսցուք զքեզ ընդ Հօր եւ ընդ Սրբոյ Հոգւոյդ այժմ եւ միշտ եւ յաւի:

---

*Աղօթք մարտիրոսաց, ճգնաւորաց եւ կուսանաց*

Պսակի՛չ սրբոց Քրիստոս, որ պսակես զսուրբս քո եւ առնես զկամս երկիւղածաց քոց եւ նայիս սիրով եւ քաղցրութեամբ յարարածս քո, լո՛ւր մեզ յերկնից ի սրբութենէ քումմէ բարեխօսութեամբ սուրբ Աստուածածնին եւ աղաչանօր ամենայն սրբոց քոց եւ որոց այսօր է յիշատակ: Լո՛ւր մեզ, Տէ՛ր, եւ ողորմեա՛. ներեա՛, քաւեա՛ եւ թո՛ղ զմեղս մեր: Արժանաւորեա՛ գոհութեամբ փառաւորել զքեզ ընդ Հօր եւ ընդ Սուրբ Հոգւոյդ այժմ եւ միշտ եւ յաւիտեանս յաւիտենից. ամեն:

*Ի Սարկաւագ վարդապետէն ասացեալ*

Յիշեա՛, Տէ՛ր, զպաշտօնեայս քո, զծնողսն մեր, զվարդապետս, զեղբարս, զընկերս, զկերակրողս, զուխտաւորս, զճանապարհորդս, զհանգուցիչս, զվաստակաւորս, զխոստովանողս զապաշխարողս, զգերիս, զհիւանդս, զնեղեալս, զիշխանս, զչարարարս, զբարերարս, զթշնամիս, զատելիս եւ որք պատուիրեցին մեզ հաւատով: Յիշեա՛, Տէ՛ր, եւ ողորմեա՛: Բարերար եւ բազումողորմ Աստուած, քո անմոռաց գիտութեամբդ եւ անբաւ մարդասիրութեամբդ յիշեա՛ զամենայն հաւատացեալս ի քեզ եւ ողորմեա՛ ամենեցուն: Օգնեա՛ եւ փրկեա՛ յիրաքանչիւր վտանգից եւ ի փորձութեանց, արժանաւորեա՛ գոհութեամբ փառաւորել զչայր եւ զՈրդի եւ զՍուրբ Հոգիդ այժմ եւ միշտ եւ յաւիտեանս յաւիտենից. ամէն: Օրհնեալ Տէր մեր Յիսուս Քրիստոս. ամէն:

Հայր մեր, որ յերկինս ես:

---

### *Աղօթք Մանասէի թագաւորին*

Տէ՛ր ամենակալ, Աստուած Աբրահամու, Իսահակայ, Յակոբայ եւ զաւակի նոցա արդարոց, ամենակա՛լ Տէր, թո՛ղ զմեղս իմ:

Որ արարեր զերկինս եւ զերկիր եւ զամենայն զարդ նոցա, ամենա:

Որ կապեցեր զծով բանիւ հրամանի քո, փակեցեր զխորս, կնքեցեր ահաւոր եւ փառաւորեալ անուամբ քով սրբով, ամենա:

Որ ամենայն ինչ սարսի եւ դողայ յերեսաց ահի զօրութեան քո, ամենա:

Անբաւ է մեծ վայելչութիւն փառաց սրբութեան քո, սաստիկ է բարկութիւն սպառնելեաց քոց ի վերայ մեղաւորաց, անչափ եւ անքնին են ողորմութիւնք աւետեաց քոց, ամենա:

Դու, Տէ՛ր, բարձրեալ, զթած, երկայնամիտ, բազումողորմ, զղջանաս ի վերայ չարեաց մարդկան, ամենա:

Դու, Աստուա՛ծ, ոչ եղիր ապաշխարութիւն վասն արդարոցն Աբրահամու, Իսահակայ եւ Յակոբայ, որք ոչ մեղան քեզ, ամենա:

Այլ եղիր ապաշխարութիւն վասն իմ՝ մեղաւորիս, զի մեղայ աւելի, քան զաւագ ծովու, եւ բազմացան անօրէնութիւնք իմ, ամենա:

Չեմ արժանի հայիլ եւ տեսանել զբարձրութիւնս երկնից ի բազմութենէ անօրէնութեան իմոյ, ամենա:

Կորացեալ եմ ես ի բռնութենէ կապանաց երկաթից, եւ ոչ գոյ ինձ հանգիստ, ամենա: Բարկացուցի գտրտմութիւն եւ զչար առաջի քո արարի. կանգնեցի պատկեր եւ բազմացուցի զցասումն, ամենա:

Եւ արդ, Տէ՛ր, խոնարհեցուցանեմ զծունր սրտի իմոյ եւ հայցեմ ի քաղցրութենէ քումմէ, ամենա: Մեղայ, Տէ՛ր, մեղայ եւ զանօրէնութիւնս իմ ես ինձէն գիտեմ, ամենա:

Աղաչեմ եւ խնդրեմ ի քէն, թո՛ղ ինձ, Տէ՛ր, թո՛ղ ինձ եւ մի՛ կորուսաներ զիս ըստ անօրէնութեան իմոյ, ամենա:

Մի՛ յաւիտեան բարկանար ինձ, Տէ՛ր, եւ մի՛ յիշեր զչարիսն իմ եւ մի՛ պարտաւորեր զիս ընդ իջեալսն ի ներքոյ երկրի չարեօք, ամենա:

Ջի դու, Աստուա՛ծ, Աստուած ապաշխարողաց ես, եւ յիս ցոյց զբարերարութիւնս քո, որ անարժան եմ, ամե:

Կեցուցես զիս ըստ բազում ողորմութեան քում, եւ ես օրհնեցից զքեզ ամենայն աւուրս կենաց իմոց, ամե:

Ջքեզ, Տէ՛ր, օրհնեն ամենայն զուարթունք երկնից, եւ քո են փառք յաւիտեանս. ամէն: Փառք Հօր եւ Որդւոյ եւ Հոգւոյն Սրբոյ:

Այժմ եւ միշտ եւ յաւիտեանս յաւիտենից. ամէն:

Աղաչեմ եւ խնդրեմ ի քէն, Տէ՛ր, թո՛ղ ինձ զմեղս իմ:

Բազումողորմ Տէր, ողորմեա՛ ինձ:

Աստուա՛ծ, քաւեա՛ զիս՝ զմեղաւորս, ի մեղաց եւ կեցո՛:

Արարիչ իմ եւ յո՛յս Աստուած, զթա՛ յիս՝ ի մեղուցեալ ծառայս, եւ ողորմեա՛ ինձ՝ բազմամեղիս:

Ամենօրհնեալ սրբուհի եւ միշտ կոյս Աստուածածին Մարիամ, բարեխօսեա՛ առ Տէր վասն իմ՝ մեղաւորիս:

Ամենայն սո՛ւրբք Աստուծոյ, բարեխօսեցե՛ք առ Հայր ի յերկինս վասն մեր՝  
մեղաւորացս:

Քրիստո՛ս՝ Որդի Աստուծոյ, անոխակա՛լ, ընկա՛լ զաղաչանս մեր, զի ի քեզ են  
ապաւինեալ անձինք մեր:

Յաղթող զօրութեամբ սուրբ եւ կենդանարար եւ պատուական խաչիւ քո, Տէ՛ր,  
պահպանեա՛ զմեզ:

Առաքեա՛, Տէ՛ր, զիրեշտակ խաղաղութեան քո, որ եկեալ պահեսցէ զմեզ անխոռվս  
ի տուէ եւ ի գիշերի:

Եւ մարդասիրութեամբ քո յիշեա՛ զմեզ, Տէ՛ր, յիշեա՛ զմեզ, յորժամ զաս  
արքայութեամբ քո, եւ ողորմեա՛ մեզ:

### *Քարոզ*

Եկեալքս ի խոստովանութիւն ապաշխարութեան հաւատով զյոյս Միածնի  
Որդւոյն Աստուծոյ դիցուք ի սիրտս մեր՝ խնդրելով ի նմանէ զքաւութիւն եւ  
զթողութիւն յանցանաց մերոց: Վասն զի նա ինքն է նախախնամողն Աստուած  
յաւիտենական, որ եկն կամաւ Հօր ի փրկել զարարածս եւ ասաց զինքն լինել քաւիչ  
մեղաւորաց, յոյս ապաշխարողաց, շնորհելով զհանգիստ աշխատելոց, ընդունելով  
զծանրաբեռնեալքս եւ զտաժանեալքս մեղօք յապաշխարութիւն քաւութեան: Արդ,  
եկայք ամենեքեան, խոնարհեալ անձամբք, բեկեալ սրտիւք անկցուք եւ լացցուք  
առաջի Տեառն Արարչին մերոյ, զի անցուցէ ի մենջ զցասումն պատուհասի  
յանցանաց մերոց բարերարութեամբն իւրով: Ամենակա՛լ Տէր Աստուած մեր, կեցո՛  
եւ ողորմեա՛:

### *Աղօթք*

Տէ՛ր Աստուած փրկութեան մերոյ, որ ողորմածդ ես եւ գթած, երկայնամիտ  
բազումողորմ եւ զղջանասս ի վերայ չարեաց մարդկան, որ ոչ կամիս զմահ  
մեղաւորին, այլ զդառնալ նորա ի չար ճանապարհէն եւ զկեալն: Դու, Տէ՛ր, առաս  
ողորմութեամբ քով մխիթարեա՛ զճառայսս քո եւ տո՛ւր սոցա տեղի

ապաշխարութեան: Հաշտեա՛ մարդասիրութեամբ քով եւ արա՛ զոսսա անդամս եկեղեցոյ քում սրբոյ: Որպէս զի առողջացեալք հոգւով, խոստովանութեամբ եւ ապաշխարութեամբ մտցեն յեկեղեցի քո սուրբ եւ ընդ ժողովրդեան քում քեզ հանցեն զօրհնութիւն եւ զփառս Հօր եւ Որդւոյ եւ Հոգւոյդ Սրբոյ այժմ եւ միշտ եւ յաւի:

---

### *Մաղմոս Ե*

Բանից իմոց ո՛ւնկն դիր, Տէ՛ր, եւ ի միտ առ զաղաղակ իմ:

Նայեա՛ ի ձայն աղօթից իմոց, թագաւոր իմ եւ Աստուա՛ծ իմ:

Ես զքեզ աղաչեմ, Տէ՛ր, ընդ առաւօտս լուիցես ձայնի իմում.

ընդ առաւօտս պատրաստ եղէց յանդիման լինել առ քեզ:

Ոչ թէ դու, Աստուա՛ծ, կամիս զանօրէնութիւն, ոչ բնակին առ քեզ չարք,

մի՛ անօրէնք բնակեցեն առաջի աչաց քոց:

Ատեցեր զայնոսիկ, ոյք գործեն զանօրէնութիւն, կորուսանես զամենեսեան, ոյք խօսին զոտս:

Զայր արինսահեղ եւ զնենգաւոր պիղծ առնես դու, Տէ՛ր,

այլ ես ըստ բազում ողորմութեան քում մտից ի տուն քո,

երկիր պագից ի տաճար սուրբ քո երկիրդիւ քո:

Տէ՛ր, առաջնորդեա՛ ինձ յարդարութեան քում,

վասն թշնամեաց իմոց ուղի՛դ արա առաջի իմ զճանապարհս քո:

Զի ոչ գոյ ի բերանս նոցա ճշմարտութիւն, եւ սիրտք նոցա նանրեալք են:

Որպէս գերեզման բաց են կոկորդք նոցա, լեզուօք իւրեանց նենգաւորք եղեն:

Դատեա՛ զնոսս, Աստուա՛ծ, զի անկցին ի խորհրդոց սրտից իւրեանց,

ըստ բազում ամբարշտութեան նոցա մերժեա՛ զնոսս, զի դառնացուցին զքեզ:

Ուրախ լիցին ամենեքեան, ոյք յուսացեալ են ի քեզ,

յաւիտեան ցնծացեն, եւ բնակեցես դու ի նոսս:

Պարծեսցին ի քեզ սիրելիք անուան քո, զի օրհնեսցես դու զարդարն, Տէ՛ր,

որպէս զինու հաճութեամբ քով պսակեցեր զնոսս:

Լցաք առաւօտու ողորմութեամբ քո, ցնծացաք եւ ուրախ եղաք զամենայն աւուրս կենաց մերոց: Ուրախ եղաք փոխանակ աւուրցն, յորս խոնարհ արարեր զմեզ, եւ ամացն, յորս տեսաք զչարչարանս:

Հայեա՛, Տէ՛ր, ի ծառայս քո եւ ի գործս ձեռաց քոց եւ առաջնորդեա՛ որդւոց նոցա.

Եղիցի լոյս Տեառն Աստուծոյ ի վերայ մեր:

Զգործս ձեռաց մերոց ուղի՛ղ արա ի մեզ, Տէ՛ր, զգործս ձեռաց մերոց յաջողեա՛ մեզ:

Ի խորոց կարդացի առ քեզ, Տէ՛ր. Տէ՛ր, լուր ձայնի իմում:

Եղիցին ականջք քո ի լսել զձայն աղօթից իմոց:

Թէ զանօրէնութիւնս իմ քննես, Տէ՛ր. Տէ՛ր, իսկ ո՛ր կարէ կալ առաջի քո, զի ի քէն է քաւութիւն:

Վասն անուան քո համբերի, Տէ՛ր, համբեր անձն իմ բանի քում, յուսացաւ անձն իմ ի Տէր:

Ի պահէ առաւօտու մինչեւ յերեկոյ, ի պահէ առաւօտու յուսացաւ Իսրայէլ ի Տէր:

Ի Տեառնէ է ողորմութիւն բազում, ի նմանէ է փրկութիւն, եւ նա փրկեաց զԻսրայէլ յամենայն նեղութեանց նորա:

Լսելի՛ արա ինձ առաւօտու զողորմութիւնս քո, զի ես ի քեզ, Տէ՛ր, յուսացայ:

Յո՛յց ինձ ճանապարհ, յոր գնացից, զի առ քեզ, Տէ՛ր, համբարձի զանձն իմ:

Փրկեա՛ զիս ի թշնամեաց իմոց, Տէ՛ր, զի զքեզ ապաւեն ինձ արարի:

Ուսո՛ ինձ առնել զկամս քո, զի դու ես Աստուած իմ:

Հոգի քո բարի առաջնորդեսցէ ինձ յերկիր ուղիղ:

Վասն անուան քո, Տէ՛ր, կեցուցես զիս արդարութեամբ քով, հանցես ի նեղութենէ զանձն իմ:

Ողորմութեամբ քով սատակեա՛ զթշնամիս իմ եւ կորո՛ զամենայն նեղիչս անձին իմոյ, զի ես ծառայ քո եմ:

Աստուած, յանուան քում կեցո՛ զիս եւ ի զօրութեան քում իրա՛ւ արա ինձ: Աստուա՛ճ, լո՛ւր աղօթից իմոց, ո՛ւնկն դիր բանից բերանոյ իմոյ:

Օտարք յարեան ի վերայ իմ, եւ հօրք խնդրեցին զանձն իմ եւ ոչ համարեցան զքեզ Աստուած առաջի իւրեանց:

Ահա Աստուած օգնական իմ եւ Տէր ընդունելի հոգւոյ իմոյ: Ի դարձուցանել զչարն ի թշնամիս իմ ճշմարտութեամբ քով սատակեա՛ զնոսա:

Ես կամօք իմովք պատարագս մատուցից քեզ, խոստովան եղէց անուան քում, Տէ՛ր, զի բարի է: Յամենայն նեղութենէ իմմէ փրկեցեր զիս, եւ ի թշնամիս իմ ետես ակն իմ:

Փառք Հօր եւ. այժմ եւ միշտ:

---

*Երգ տեսան Ներսիսի վասն երկրորդի աւուր արարչութեանն եւ վասն երկնայնոց զօրացն*

ԵՐԿՈՒՇԱԲԹԻ

Արարչական բանին հրաման  
ի յերկրորդումն աւուր սկզբան  
զջուրսն ի ջուրցն բաժանեաց,  
հաստատութեամբ պարունակեաց,  
որով զաշխարհս հողեղինաց  
անջրպետեաց ի հրեղինաց.  
ընդ նոսին, որդի՛ք լուսոյ,  
սո՛ւք օրհնութիւն Երբեակ Լուսոյն:

Բազմաչեայ հո՛յք քրովբէից,  
երեքսրբեանդ սրովբէից,  
աթո՛ռք անեղ Աստուածութեանն՝  
համագոյ Երրորդութեանն,  
բարեխօ՛ս լերութ առ Տէր  
վասն մանկանց եկեղեցոյ.  
ընդ նո:

Գերագոյն իշխանութի'նք  
եւ անփոփոխ միշտ տէրութի'նք,  
անյաղթելի սուրբ զօրութի'նք,  
ի յԱրարչին փառաւորութիւն  
աղաչեցէ՛ք զՏէրն ողորմած՝  
անտես չառնել զգործս ձեռացն.  
ընդ նո:

Դա՛սք անմարմնոցն պետութեանց,  
հրեշտակապե՛տք բարձրութեանց,  
հոգի՛ք հրեղէնք եւ սպասաւորք՝  
հրեշտակաց զիւրութի'նք,  
մաղթեցէ՛ք զՏէրն տերանց  
վասն մարդկան երկրաւորաց.  
ընդ նո:

Երկնաւորաց դասուց վերնոց  
օրհնաբանից քոց զուարթոց  
քաղցրասցին առ քեզ, գթա՛ծ,  
որ վասն մեր ձայն մաղթանաց,  
զորս եւ տացես մեզ պահապան  
յայսմհետէ մինչ ի վախճան.  
ընդ նո:

Զօրութեանց եւ տէրութեանց,  
իշխանութեանց եւ պետութեանց  
եւ ամենայն անուանելոց,  
որ ի յերկինս պաղատանօք,  
ընկա՛լ, Քրիստո՛ս, ուրախութեամբ  
զմեզ յօր մահու եւ յարութեան.

ընդ նոսին օրհնել Հոգւով  
զքեզ ընդ Հօր փառատրելով:

---

*Երգ վասն երրորդի աւուր արարչութեանն եւ վասն երրորդի դարուն եւ ի  
Յովհաննէս Մկրտիչն*

ԵՐԵՔՇԱԲԹԻ

Էական Բանն, որ ընդ Հօր  
արարչակից եւ համագօր,  
յերրորդ աւուր զջուրսն զատոյց,  
զբոյսս եւ զտունկս բղխեցոյց,  
իսկ ի յերրորդ դարուն  
դարձեալ զջուրցն հեղեղ ցամաքեցոյց,  
զՆոյ տապանան իւր ապրեցոյց,  
զկենդանեաց սեռս աճեցոյց.  
տո՛ւք օրհնութիւն անճառ լուսոյն՝  
Հօր եւ Որդւոյ եւ Սուրբ Հոգւոյն:

Ընդ ծառոց երկրի զգալեաց  
տնկեաց եւ զտունկս իմանալեաց,  
զհեղեղ մեղացն ցածուցեալ,  
զդասս արդարոց բազմացուցեալ,  
յորոց եւ մեծն ի ծնունդս կանանց  
միջնորդ շնորհաց եւ օրինաց.  
տուք օրհ:

Թագաւորին երկնից զինուո՛ր  
արքայութեանն աւետաւոր,

Խնդրեա՛ դնել ելս ի սրտի  
առ ի հովտէս տրտմականէ  
յուխտեալ տեղին տէրունական  
ի խոստացեալն որդւոց մարդկան.  
տուք:

Ժառանգին Հօր սպասաւոր  
եւ յարգանդէ երկրպագող,  
կարապետ եւ մկրտիչ  
այնմ, որ մեղաց մերոց քաւիչ,  
լե՛ր բարեխօս առ նոյն գթած՝  
ջնջել զգիր մեր յանցանաց.  
տուք օրհ:

Ի Հօրէ լոյս ծագեցար  
մեռեալ բնութեանս կենդանարար,  
առաքեցեր յառաջընթաց  
սուրբ զՅովհաննէս քարոզ կենաց.  
սորին հայցմամբն, Ամենակա՛լ,  
զպաղատանս մեր ընկալ.  
տուք օրհ:

Լուսաշաւիղ յերկինս ելին  
հողանիւթեայ սուրբ հրեշտակին  
արժանացո՛ զմեզ նորին  
նեղ եւ անձուկ ճանապարհին,  
զի հետեւող գոլով նորին  
Հօր քո վերին օթեվանին  
եւ երգեսցուք ընդ երջանկացն

որդուց լուսոյ քեզ երգս փառաց:

*Երգ վասն չորրորդի ատուր արարչութեանն եւ վասն չորրորդի դարուն եւ վասն  
աւետեաց Աստուածածնին:*

ՉՈՐԵՔՇԱԲԹԻ

Խաւարն անգոյ եւ սկզբնածին  
հալածեցաւ յօրն առաջին,  
լոյսն այն պայծառ յօր չորրորդին  
յարեգական նիւթ հաւաքեալ,  
լուսինն ի տիպ լուսոյ ստեղծեալ  
եւ աստեղաց պարք յօրինեալ,  
որով օրինի Ստեղծողն էից  
ի բանաւոր պաշտօնէից:

Ծածկեալ խորհուրդն ծանուցաւ  
չորրորդ դարուն Իսահակաւ.  
ի չորրորդ օր դարձեալ հրեշտակն  
ետ զաւետիսն կուսական,  
թէ՛ լոյսն, որ ոչ բովանդակի,  
ի քէն մարմնով պարունակի,  
յոր օրինեցայք ազգ երկրածինք,  
տուք օրհնութիւն պտղոյ կուսին:

Կուսին նախնւոյ մօրն Եւայի,  
յորմէ Ադամն հին պարտի,  
բարձան անէծքն տրտմական  
քո սուրբ ճննդեամբ, կո'յս Մարիամ,  
աղաչեա՛ զքո Միածինն՝

թողուլ զմեղս որդւոց նոցին.

յոր օրի:

Հարսն ընծայեալ յերկրէ յերկինս,  
յոր համբառնամք առ քեզ զհոգիս,  
յոր լսելոյ քո զաւետիս  
ի նորեա՛ լինել մեզ լսելիս  
զձայն աւետեաց քո Միածնին,  
Եթէ՛ ՝ Եկա՛յք, օրհնեա՛լք Հօր իմ՝.  
յոր օրի:

Ձայնիւ առ քեզ, Տէ՛ր, պաղատիմք  
եւ առաջի քո անկանիմք,  
աղաչանօք Աստուածածնին  
շիջո՛ ի մէնջ զբոց հնոցին,  
սո՛ւր արտասուօք զմեղս ջնջել  
եւ վերստին զմեզ նորոգել.  
յոր օրի:

Ղեկավա՛ր ճարտարապետ,  
անցեր ընդ ծով կենցաղս անհետ,  
վերաբերեա՛ ընդ Պետրոսի զմեզ  
ի յալեաց մեղաց ծովէս  
պաղատանօք գերագունին  
անապական քում ծնողին.  
յոր օրհնեցայք ազգք երկրածինք,  
սուրք օրհնութիւն պտղոյ Կուսին:

*Երգ վասն հինգերորդի աւուր արարչութեանն եւ վասն հինգերորդի դարուն եւ ի սուրբ առաքեալսն Քրիստոսի*

ՀԻՆԳՇԱԲԹԻ

Ճառագայթեալ բանն ի Հօրէ  
յօր հինգերորդն հրամայէ  
բղիւել ի ջրոց սեռս կայտառաց  
եւ թեւաւորս օղականաց,  
իսկ ի դարուն հինգ մկրտին  
յամպն եւ ի ծովն Իսրայէլ հին.  
տացուք հրաշից ներգործողին  
պատիւ եւ փառս անեղ Բանին:

Մաքրապէս օրինակի  
առաքելոցն Քրիստոսի,  
որք ի ծովէն Տիբերական  
ի յերկնայինսն կոչեցան,  
անցին ընդ ծով աշխարհական  
եւ ի Հոգին մկրտեցան.  
տացուք հրաշից ներգոր:

Յուրախութիւնսն անգրաւական՝  
ի հարսանիսն անապական  
զձեզ առաքեաց Հայրն փառաց,  
հրաւիրատո՛ւք տրտմականաց,  
սուրբ հարսանեացն այն հայցեցէ՛ք  
ընդ ձեզ լինել մեզ պարակից.

տացուք հրաշից ներգոր:

Նորոգո՛ղք տիեզերաց,  
ի նախահորն յանցանաց  
նորափետուր զարդարեցիք  
զեկեղեցիս հեթանոսաց,  
պաղատեցէ՛ք առ նոյն գթած՝  
զմեզ նորոգել ի հնոյ մեղաց.  
տացուք հրա:

Շինող էիցս համայնից  
արարածոց ի յանգոյից,  
նոյն շինեցեր զեկեղեցի  
վեմոյ ի վերայ վիմին Բանի,  
ընդ եղեալ հիմունս ի նոր Սիոն  
զմեզ յօղեա՛ շինմամբ ի նոյն.  
տացուք հրա:

Ուրախացաւ զնացիւք զետոց  
քաղաք ի քէն շինեալ, Յիսուս,  
յորմէ վտակք շնորհաց հոսեն,  
զոգիս մարդկան ոռոգանեն,  
արբո՛ եւ մեզ ի ջրոյն կենաց  
հայցմամբ հոգւոյն մատռուակաց,  
զի բանաւոր երկիրս քո  
պտղաբերի ի փառս քո:

*Երգ վասն վեցերորդի աւուր արարչութեանն եւ վասն վեցերորդի դարուն եւ ի  
Խաչելութիւնն Քրիստոսի:*

ՈՒՐԲԱԹ

Չհանդուրժեալ բնութեամբ բարւոյն  
ունել միայն զանճառ բարին,  
այլ ստեղծեալ զմարդ յիւր պատկերին  
ի վեցերորդն առաւօտին  
եւ ի յերրորդ ժամ զկողածինն  
ի յօգնութիւն ետ հողածնին,  
զորս ի դրախտին եդ վայելել,  
բայց ի պտղոյն մահու արգել:

Պապանձեալ առ Դատողին  
յետ յանցանաց Ադամն հին  
զկինն պատճառ եղեալ խաբմանն,  
եւ կինն՝ զօձն դաւաճան,  
որով երկիրս այս անիծաւ,  
փուշ եւ տատասկ ի սմա բուսաւ,  
վճիռ մահու մարդոյն տուաւ՝  
դառնալ ի հող, ուստի ստեղծաւ:

Ջնջել փութայր Հայրն փառաց  
զգիր պարտեաց մեր յանցանաց,  
որով զգեցաւ Որդին գթած  
ի վեց դարուն զմարմին մեղաց,  
Հօր հաճութեամբ ի մահ խաչին  
եկն կամաւ ի յուրբաթին,

գառն զենաւ ի հին գատկին  
փոխան գառանցն օրինակին:

Ռահիւ լուսոյ պատուիրանին  
արդարութեան ճանապարհին  
բարձրանալով քո ի խաչին`  
բարձրացուցեր զմեզ ի յերկինս.  
քո անպատում խոնարհութեամբդ  
եւ կամաւոր խաչելութեամբդ  
հաշտեա՛ց ընդ մեզ, Տէ՛ր, գթութեամբ  
եւ թող զմեզս ողորմութեամբ:

Սոսկալիդ սերովբէից  
եւ ահաւորդ քրովբէից,  
խոնարհեցար ի չարչարանս  
չարչարելի բնութեամբ մարդկան,  
ի խաչին զմեզս սպաներ  
եւ գդատակնիք մահու լուծեր,  
հաշտեա՛ց ընդ մեզ, Տէ՛ր, գթութեամբ  
եւ թո՛ղ զմեզս ողորմութեամբ:

Վեհագոյն բնութեանց էից  
եւ Արարիչդ բոլորից,  
յորժամ ծագես զխաչիդ նշան  
ի գալստեան քո միւս անգամ,  
զերկրպագուս այժմ հաւատով  
լուսաւորեա՛ նորին լուսով,  
զի համաձայն խաչազգեցիցն  
զքեզ օրինեմք յաւիտենից:

-----

*Երգ վասն եօթներորդի աւուր արարչութեանն եւ վասն եօթներորդի դարուն եւ ի  
խորհուրդ հանգստեանն*

ՇԱԲԱԹ

Տէրն յետ ստեղծման արարածոց  
հանգեաւ յեօթն օրն ի գործոց.  
այն, որ հանգիստ աշխատելոց,  
եւ կամքն գործ է եղելոց,  
ուստի եւ մեզ յոյս հաստատուն  
ետ հանգստեամբն շաբաթուն,  
թէ աստ գործել զգործս Աստուծոյ,  
անդ է հանգչիլ ընդ Աստուծոյ:

Բարունաբար վարդապետիմք,  
յօրինակէ Տեառն իրատիմք,  
որ ի յերկրորդ արարչութեանն՝  
յետ կատարման տնօրէնութեանն,  
յեօթներորդ օր հանգստեան  
իջեալ մարմնով ի գերեզման,  
զկապեալ հոգիսն վերածեաց,  
զանանց հանգիստն պատրաստեաց:

Տօղոյ, որ ի քոյդ կողէ ցօղեալ,  
բժշկեցէ զհանգուցեալսն,  
իջցէ ի հող մահու նոցիւ  
եւ բուսուցէ յօրն վերջին.  
կենդանաբար ձայնիւդ քո  
կոչեա՛ զնոսա ի կեանս քո

Էւ դասեցո ընդ արդարոցն՝  
Էրգել քեզ փառս ընդ գուարթնոցն:

Ի իծեալ զքնութիւնս կենաց ունող  
դարձոյց յանցանքն ի մահու հող,  
Իսկ անմահիդ մեռելութիւն  
շնորհեաց դարձեալ զանմահութիւն,  
գորս են ընդ քեզ թաղեալ մահուամբ  
աւագանին մկրտութեամբ,  
յարո՛ւ ընդ քեզ քոյին փառօք  
արեգական նման լուսով:

Փայլին արդարքն յարքայութեան,  
Էւ ճգնաւորքն ի հանգստեան,  
մարտիրոսքն պսակին,  
Էւ կուսանաց լապտերք վառին,  
դասեցո՛, Տէ՛ր, ընդ նոսին,  
որք զքեզ Աստուած խոստովանին.  
արդարութեամբ մի՛ դատեսցին,  
այլ գթութեամբ քո քաւեսցին:

Քո անպատում խոնարհութեամբդ  
որ թաղեցար մեռելութեամբ  
Էւ յարուցեր յորդոց մարդկան,  
որք հաւատով ի քեզ անկան,  
յարո՛ւ Էւ զմեզ արդարութեամբ  
Էւ զննջեցեալսն ողորմութեամբ,  
զի կենդանեացս բերանով  
տացին քեզ փառք ընդ Հօր Հոգւով:

-----

*Մաղթանք պահոց յետ Արարչականին*

Խաչ քո եղիցի մեզ ապաւեն, Տէ՛ր Յիսուս, յորժամ երեւիս փառօք Հօր ընդ ամպս լուսաւորս: Յայնժամ մեք մի՛ ամաչեսցուք յուսացեալքս ի քեզ, այլ զօրութեամբ քով մեծաւ բերկրեսցուք ընդ աջմէ քումմէ, որպէս զորդիս լուսոյ եւ որդիս տուրնջեան:

*Քարոզ*

Աղաչեսցուք զամենակալն Աստուած, զի պահպանեսցէ զժողովուրդս իւր ընդ հովանեաւ սուրբ եւ պատուական խաչին իւրով ի խաղաղութեան: Ամենակա՛լ Տէր Աստուած մեր, կեցո՛ւ եւ ողորմեա՛:

*Աղօթք պահոց*

Օգնեա՛ մեզ, Տէ՛ր, օգնեա՛ մեզ, Աստուած Փրկի՛չ մեր, վասն մեծի փառաց անուանդ քո: Տէ՛ր, փրկեա՛ զմեզ եւ քաւեա՛ զմեղս մեր վասն անուան քոյ սրբոյ: Պարսպեալ պահեա՛ զճառ ի քեզ զապաւինեալ եւ զյուսացեալ ժողովուրդս քո ընդ հովանեաւ սուրբ եւ պատուական խաչիդ քով ի խաղաղութեան: Փրկեա՛ յերեւելի եւ յաներեւոյթ թշնամւոյն, արժանաւորեա՛ զոհութեամբ փառաւորել զքեզ ընդ Հօր եւ ընդ Սրբոյ Հոգւոյդ այժմ եւ միշտ եւ յաւի:

Յիշեա՛, Տէ՛ր, զպաշտօնեայս քո:

*Տես երես 332:*

Բարերար եւ բազումողորմ Աստ:

Օրհնեալ Տէր մեր Յիսուս Քրիստոս. ամէն:

Հայր մեր, որ յերկինս ես:

*Կարգաւորութիւն հասարակաց աղօթից Արեւագալի ժամուն, որ կատարի ի դէմս Հոգւոյն Սրբոյ, այլ եւ ի դէմս Յարութեանն Քրիստոսի, որ երեւեցաւ աշակերտացն*

Եղիցի անուն Տեառն օրհնեալ յաւիտեան, զի յառաջ քան զարեւ է անուն նորա:

Ի նա օրհնեսցին ամենայն ազգք երկրի, եւ ամենայն ազինք երանիցեն նմա:

Օրհնեալ Տէր Աստուած Իսրայելի, որ առնէ սքանչելիս միայն, եւ օրհնեալ է անուն սուրբ փառաց նորա յաւիտեան. լցցի փառօք նորա ամենայն երկիր. եղիցի եղիցի:

Փառք Հօր եւ Որդւոյ եւ:

Այժմ եւ միշտ. Եւ եւս խաղաղու:

Օրհնութիւն եւ փառք Հօր եւ:

### *Երգ Արեւագային*

(դկ)

Յարեւելից մինչ ի մուտս, ի հիւսիսոյ եւ ի հարաւոյ ամենայն ազգ եւ ազինք, յօրհնութիւն նոր օրհնեցէ՛ք զԱրարիչն արարածոց, որ ծագեաց զլոյս արեգականն այսօր յաշխարհս:

Եկեղեցի՛ք արդարոց, փառաբանի՛չք Ամենասուրբ Երրորդութեանն, յառաւօտս լուսոյ զառաւօտ խաղաղութեան Քրիստոս գովեցէք ընդ Հօր եւ Հոգւոյն, որ ծագեաց զլոյս գիտութեանն իւրոյ ի մեզ:

### *Յորդորակ*

Յարեւելից յարեւմուտս, մանկո՛ւնք Սիոնի, օրհնեցէ՛ք միշտ անդադար զծագողն լուսոյ:

Եկեղեցի՛ք արդարոց եւ փառաբանի՛չք, բարեբանեցէ՛ք, որ ետ զիմաստս լուսոյ:

### *Քարոզ*

Յարեւելից մինչեւ ի մուտս արեւու ընդ ամենայն տեղիս քրիստոնէութեան, ուր կարդան զանուն Տեառն սրբութեամբ, Տէր աղօթիւք նոցա եւ բարեխօսութեամբն մեզ ողորմեսցի:

Ուխտիք զԱստուած աղաչեսցուք, զի նա փրկեսցէ զմեզ ի մեղաց եւ ի ցանկութենէ աշխարհի: Ընկալցի զուխտս եւ զխնդրուածս սրտից մերոց եւ արժանի արասցէ զմեզ հաւատոց եւ պատուիրանաց իւրոց ընդ ամենայն սուրբս իւր: Ամենակա՛լ Տէր Աստուած մեր, կեցո՛ր եւ ողորմեա՛: Զառաւօտս լուսոյ եւ զառաջիկայ օրս խաղաղութեամբ անցուցանել հաւատով ի Տեառնէ խնդրեսցուք:

Զհրեշտակ խաղաղութեան պահա:

Զքաւութիւն եւ զթողութիւն յան:

Զսրբոյ խաչին մեծ եւ կարող զօրու:

Եւ եւս՝ միաբան վասն ճշմարիտ եւ:

Զանձինս մեր եւ զմիմեանս Տեառն:

Ողորմեաց մեզ, Տէ՛ր Աստուած մեր:

### *Աղօթք*

Յարեւելից մինչեւ ի մուտս արեւու օրհնեալ եւ, Տէ՛ր, վասնզի թագաւոր քաղցր եւ, եւ անուն քո ահեղ է ընդ ամենայն տիեզերս: Քաղցրասցին սաղմոսերգութիւնք մեր առաջի քոյ, ելցեն իրաւունք յարդարութենէ քումմէ ի տկարութիւնս մեր, եւ փառաւորեսցի ամենասուրբ անուն քո: Եւ մեք արժանի եղիցուք կալ ի պատուիրանի քում եւ քեզ երգել զօրհնութիւն եւ զփառս Հօր եւ Որդոյ եւ Հոգւոյդ Սրբոյ. այժմ եւ միշտ եւ յաւի:

Խաղաղութիւն ամենեցուն:

Աստուծոյ երկիրպագեսցուք:

Աստուած մշտնջենաւոր, Աստուած յաւիտենական, որ ի ստորին աշխարհս լոյս ծագեցար եւ լուսաւորեցեր զմեզ ի խաւարային մեղաց մերոց: Որ վասն մեր ի չափաւորութիւն եկիր, անչա՛փոյ Աստուած, եւ հեղեալ ծաւալեցեր զշնորհս Հոգւոյդ Սրբոյ յարարածս քո: Այժմ եւ յաւիտեանս ժամանակաց բարեբանեալ եւ,

ամենամեծի Աստուած, ընդ Հօր եւ Ամենասուրբ Հոգւոյդ այժմ եւ միշտ եւ  
յաւիտեանս յաւիտենից. ամէն:

*Մաղմոս ՂԹ*

Աղաղակեցէ՛ք առ Տէր, ամենայն երկիր, ծառայեցէ՛ք Տեառն ուրախութեամբ:

Մտէ՛ք առաջի նորա ցնծութեամբ, ծաներուք, զի նա է Տէր Աստուած մեր:

Նա արար զմեզ, եւ ո՛չ մէք էաք, մէք ժողովուրդք եւ խաշն արօտի նորա:

Մտէք ընդ դրունս նորա խոստովանութեամբ եւ օրհնութեամբ ի յարկս նորա:

Խոստովան եղերուք Տեառն եւ օրհնեցէք զանուն նորա:

Քաղցր է Տէր, յաւիտեան է ողորմութիւն նորա. ազգէ մինչեւ յազգ է ճշմարտութիւն  
նորա:

Փառք Հօր եւ. այժմ եւ միշտ եւ:

-----  
*Երգ*

(դկ)

Ճգնաւորք Աստուծոյ եւ ժառանգորդք երկնից արքայութեանն, որք  
փոխանակեալք զանցաւորս՝ առիք զանանցն բարութիւնսն, բարեխօսեցէք առ Տէր  
վասն մանկանց եկեղեցւոյ:

Նահատա՛կք պանծալիք եւ սիրեցեա՛լք ի յերկնաւոր Հօրէն, որք մկրտեցայք ընդ  
Քրիստոսի արեամբ ձերով ի մահ խաչին, բարե:

Մարտիրո՛սք ցանկալիք եւ օթեա՛նք Հոգւոյն ճշմարտութեանն, որք յաղթեցիք  
հոգւով կարեաց եւ ցանկութեան, բարե:

Գովելի՛ք աշխարհի եւ բաղձալի՛ք վերնոցն պետութեանց, որք երանութեան մասին  
հասիք քան զամենայն որդիս մարդկան, բարե:

Կամաւոր պատարա՛գք, մանկո՛ւնք տիօք եւ կատարեա՛լք իմաստութեամբ, որք  
փոխանակ կաթին արբիք զգինին զմայլեցուցիչ, բարե:

*Յորդորակ*

Ճգնաւորք ճշմարիտք վկայք Քրիստոսի, բարեխօսեցէ՛ք առ Տէր վասն անձանց մերոց:

Նահատակք կենդանիք սիրողք Քրիստոսի, որք չարչարեցայք մարմնով վասն անուանն Տեառն:

Մարիտրոսք ցանկալիք մարդկան ըղձալիք, հայցեցէ՛ք ի Սուրբ Հոգւոյն տալ մեզ զբարիս:

Գովելիք վերնոց դասուց, պարծանք աշխարհի, ինդրեցէ՛ք զխաղաղութիւն տալ եկեղեցւոյ:

Կամաւոր սուրբ պատարագք հասակաւ մանկութ, հայցեցէ՛ք լինիլ եւ մեզ ձեզ պսակակից:

### *Մաղթանք*

Աղաչեմք՝ ողորմեա՛ց, Տէ՛ր բարերար, աղաչեմք՝ ողորմեա՛ց. վասն աղօթից սրբոց ճգնաւորացն, աղաչեմք, ողորմեա՛ց:

### *Քարոզ*

Սուրբ ճգնաւորօքն աղաչեսցուք զՏէր, որք զչարսն պարտեցին, նեղութեանցն համբերեցին, լուսեղէն եւ երկնային անթառամ պսակացն արժանի եղեն, աղօթիւք նոցա եւ բարեխօսութեամբ մեզ ողորմեսցի: Ամենակա՛լ Տէր Աստուած մեր, կեցո՛ւ եւ ողորմեա՛:

### *Աղօթք*

Սուրբ ես, Տէ՛ր, եւ ի սուրբս հանգուցեալ. եւ մէք սուրբ վկայիւքս աղաչեմք զքեզ՝ բարեխօսութեամբ սուրբ Աստուածածնին եւ աղաչանօք ամենայն սրբոց քոց մի՛

մերժեր զմեզ յողորմութենէ քումմէ, այլ կեցո՛ր զմեզ աղօթիւք սոցին, զի դու եւ  
բազումողորմ Աստուած, եւ քեզ վայել է փառք, իշխանութիւն եւ պատիւ այժմ եւ  
միշտ եւ յաւիտեանս յաւիտենից. ամէն:

Յիշեա՛, Տէ՛ր, զպաշտօնեայս քո. (*Երեւ 332*):

Յիշեա՛, Տէ՛ր, եւ ողորմեա՛:

Բարերար եւ բազումողորմ Աստ:

-----

### *Մաղմու ԿԲ*

Աստուա՛ծ, Աստուա՛ծ իմ, եւ առ քեզ առաւօտ առնեմ. ծարաւեաց առ քեզ հոգի իմ,  
քանիպատիկ եւս եւ մարմին իմ:

Որպէս երկիր անապատ եւ անջուր, ուր ոչ գոյ ի նմա ճանապարհ,

Այսպէս ի սուրբս երեւեցայց քեզ՝ տեսանել ինձ զգօրութիւն քո եւ զփառս քո:

Վասն զի լաւ է ինձ ողորմութիւն քո, քան զկեանս իմ. եւ շրթունք իմ գովեսցեն զքեզ:

Այսպէս օրհնեցից զքեզ ի կեանս իմ եւ յանուն քո համբարձից զձեռս իմ:

Որպէս ի ճարպոյ պարարտութենէ լցցի անձն իմ, շրթամբք ցնծութեան օրհնեսցէ  
զքեզ բերան իմ:

Ձի թէ յիշէի զքեզ յանկողնի իմում, ընդ առաւօտս կանխեալ խօսէի ընդ քեզ:

Ձի եղեր իմ օգնական, ի հովանի թելոց քոց ցնծացայց:

Եկն զկնի քո անձն իմ, եւ զիս ընկալաւ աջ քո. եւ նոքա ի նանիր խնդրեցին զանձն  
իմ:

Մտցեն ի ներքոյ անդնոց երկրի, մատնեսցին ի ձեռս սրոյ եւ բաժինք աղուիսուց  
եղիցին:

Թագաւոր յուսացաւ ի Տէր. գովեսցին ամենեքեան, որ երդնուն նովաւ, խցցին  
բերանք այնոցիկ, ոյք խօսէին զանիրաւութիւն:

Լո՛ւր, Աստուա՛ծ, աղօթից իմոց յաղաչել ինձ առ քեզ, յերկիւղէ թշնամոյն փրկեա՛  
զանձն իմ:

Ծածկեսցես զիս ի ժողովոց չարաց, ի բազմութենէ, ոյք գործեն զանօրէնութիւն:

Ոյք սրեցին որպէս սուսեր զլեզուս իւրեանց, լարեցին զաղեղունս իւրեանց յիրս դառնութեան՝

Ձգել ի գաղտնիս այնոցիկ, ոյք ուղիղ են սրտիւք. յանկարծակի ձգեսցեն ի նոսա եւ մի՛ երկիցեն:

Ոյք զօրացուցին յանձինս իւրեանց զբանս չարութեան, խորհեցան թաքուցանել ինձ որոզայթ եւ ասացին՝ ոչ տեսանէ զայս Տէր:

Քննեցին զանօրէնութիւն, պարտասեցան ի քննել զքննութիւն:

Մատիցէ այր ի խորութիւն սրտի իւրոյ, եւ բարձր եղիցի Աստուած:

Նետք տղայոց եղեն վերք նոցա, տկարացան ի նոսա լեզուք իւրեանց, եւ խոովեսցին ամենեքեան, ոյք հայէին ընդ նոսա:

Երկեաւ ամենայն մարդ ի պատմել զգործս Աստուծոյ, եւ զարարածս նորա ի միտ առին:

Ուրախ եղիցի արդար ի Տէր եւ յուսացի ի նա. նովաւ գովեսցին ամենեքեան, ոյք ուղիղ են սրտիւք:

Փառք Հօր եւ. այժմ եւ միշտ:

### *Երգ*

(դձ)

Լոյս, Արարիչ լուսոյ, առաջին լոյս՝ բնակեալդ ի լոյս յանմատոյց, Հայր երկնաւոր, ի դասուց լուսեղինացն օրհնեալ, ի ծագել լուսոյ առաւօտուս ծագեա՛ ի հոգիս մեր զլոյս քո իմանալի:

Լոյս, ի լուսոյ ծագումն, արեգա՛կն արդար, անճառ ծնունդ՝ Հօր Որդի՛, յառաջ քան զարեւ անուն քո գովեալ ընդ Հօր, ի ծա:

Լոյս, ի Հօրէ բղխումն, աղբի՛ւր բարութեան, Հոգիդ Սուրբ Աստուծոյ, մանկունք եկեղեցոյ ընդ հրեշտակս զքեզ բարեբանեն, ի ծա:

Լոյս, Երբեակ եւ Մի անբաժանելի Սո՛ւրբ Երրորդութիւն, զքեզ ընդ երկնայնոցն երկրածինքս միշտ փառաւորեմք, ի ծագել:

### *Յորդորակ*

Անեղանելի՞դ Աստուած, Հա՛յր ամենակալ, ընկա՛լ զաղաչանս մեր՝ քոց պաշտօնէից:

Ի Հօրէ ծագո՛ւմն անճառ, արեգա՛կն արդար, ծագեա՛ ի յանձինս մեր զլոյսդ ողորմութեան:

Ի Հօրէ բղխեալ Հոգի՛, աղբի՛ւր բարութեան, լուսով քով լցո՛ զմեզ յայսմ առաւօտուս: Երեք անձինք եւ մի բնութիւն, մի Աստուածութի՛ւն, զքեզ խոստովանիմք յաւետ Սուրբ Երրորդութիւն:

### *Մաղթանք*

Լուսովդ քո, Քրիստո՛ս, ամենեքեան լուսաւորեցաք, եւ ի սուրբ խաչ քո, Փրկի՛չ, հաւատացեալքս ապաւինեցաք: Լո՛ւր մեզ, Աստուած Փրկի՛չ մեր. տո՛ւր մեզ զխաղաղութիւն քո եւ արա՛ առ մեզ զողորմութիւն քո, մարդասէ՛ր Տէր:

### *Քարոզ*

Եւ եւս խաղաղութեան:

Փառաւորեցուք զամենակալն Աստուած, որ ծագեաց զլոյս առաւօտու յարարածս իւր, ծագեցէ եւ այժմ զառատ ողորմութիւն իւր ի վերայ փառաբանչաց անուան իւրոյ: Ամենակալ Տէր Աստուած մեր, կեցո՛ եւ ողորմեա՛:

### *Աղօթք*

Ձառաւօտու աղօթս եւ զբանաւոր պաշտօնս ընկալ, ամենակալ, ամենամե՛ծդ Աստուած, ի քո անապական եւ յերկնային խորանսդ: Ծագեա՛ առ մեզ զարդարութեան եւ զիմաստութեան զլոյս քո, արա՛ մեզ որդիս լուսոյ եւ որդիս տուրնջեան, որպէս զի ի գալ աւուրս երկիւղածութեամբ վարեցուք զկեանս մեր եւ առանց գայթակղութեան կատարեցուք: Զի դու ես օգնական եւ փրկիչ մեր, եւ քեզ վայել է փառք իշխանութիւն եւ պատիւ այժմ եւ միշտ եւ յաւիտեանս յաւիտենից. ամէն:

*Մաղնու ԻԲ*

Տէր հովուեսցէ զիս, եւ ինձ ինչ ոչ պակասեսցի:

Ի վայրի դալարուոջ անդ բնակեցոյց զիս եւ առ ջուրս հանգստեան սնոյց զիս:

Դարձոյց զանձն իմ առ իս, առաջնորդեաց ինձ ի ճանապարհս արդարութեան վասն անուան իւրոյ:

Թէպէտ եւ գնացից ես ի մէջ ստուերաց մահու, ոչ երկեայց ի չարէ, զի դու, Տէ'ր, ընդ իս ես:

Ցուպ քո եւ գաւազան, նոքա մխիթարեսցեն զիս:

Պատրաստ արարեր առաջի իմ գսեղան ակն յանդիման նեղչաց իմոց:

Օծեր իւղով զգլուիս իմ, բաժակ քո որպէս անապակ արբեցոյց զիս:

Ողորմութիւն քո, Տէ'ր, զհետ իմ եկեսցէ զամենայն աւուրս կենաց իմոց՝ բնակիլ ինձ ի տան Տեառն ընդ երկայն աւուրս:

Յո'յց ինձ ճանապարհ, յոր եւ գնացից, զի առ քեզ, Տէ'ր, համբարձի զանձն իմ:

Փրկեա' զիս ի թշնամեաց իմոց, Տէ'ր, զի զքեզ ապաւեն ինձ արարի:

Ուստ' ինձ առնել զկամս քո, զի դու ես Աստուած իմ:

Հոգի քո բարի առաջնորդեսցէ ինձ ի յերկիր ուղիղ:

Վասն անուան քո, Տէ'ր, կեցուցես զիս, արդարութեամբ քով հանցես ի նեղութենէ զանձն իմ:

Ողորմութեամբ քով սատակեա' զթշնամիս իմ եւ կորո' զամենայն նեղիչս անձին իմոյ, զի ես ծառայ քո եմ: Աստուած մեր ապաւեն եւ զօրութիւն, օգնական ի վերայ նեղութեանց, որք գտին զմեզ յոյժ:

Վասն այտորիկ ոչ երկիցուք մեք ի խռովիլ երկրի, ի փոփոխիլ լերանց ի սիրտս ծովու:

Գոչեցին եւ խռվեցան ջուրք նոցա, խռվեցան լերինք ի զօրութենէ նորա:

Գնացք զետոց ուրախ առնեն զքաղաքն Աստուծոյ, եւ սուրբ արար զյարկս իւր Բարձրեալն:

Աստուած ի մէջ նոցա, եւ նոքա մի' սասանեսցին, օգնեսցէ նոցա Աստուած ի վաղորդենէ մինչեւ ի վաղորդեան:

Խոռվեցան հեթանոսք, եւ խոնարհեցան թագաւորութիւնք. ետ գձայն իւր  
Բարձրեալն, եւ խոռվեցաւ երկիր:

Տէր զօրութեանց ընդ մեզ, ընդունելի է մեր Աստուած Յակոբայ:

Եկայք եւ տեսէ՛ք զգործս Աստուծոյ, որ արար զնշանս եւ զարուեստս ի վերայ  
երկրի:

Եհար զպատերազմ ի ծագաց մինչեւ ի ծագս երկրի, զաղեղունս փշրեաց, զգէնս  
խորտակեաց եւ զասպարս այրեաց հրով:

Կանխեցէք եւ ծաներո՛ւք, զի ես եմ Աստուած. բարձր եղէց ի հեթանոսս եւ  
բարձրացայց ի վերայ երկրի:

Տէր զօրութեանց ընդ մեզ, ընդունելի է մեր Աստուած Յակոբայ:

Աստուա՛ծ, յօգնել ինձ նայեաց եւ, Տէ՛ր, յընկերել ինձ փութա՛:

Ամաչեսցեն եւ յամօթ լիցին, ոյք խնդրէին զանձն իմ, դարձցին յետս եւ ամաչեսցեն,  
ոյք խորհէին ինձ չար: Դարձցին առժամայն ամաչեցեալք, որ ասէին ինձ վաշ վաշ:

Ցնծասցեն եւ ուրախ լիցին ի քեզ ամենեքեան, ոյք խնդրեն զքեզ, Տէ՛ր:

Ասասցեն յամենայն ժամ՝ մեծ է Աստուած, ոյք սիրեն զփրկութիւնս քո:

Ես աղքատ եւ տնանկ եմ, Աստուա՛ծ, օգնեա՛ ինձ. օգնական եւ փրկիչ իմ ես, եւ դու,  
Տէ՛ր իմ, մի՛ յամենար:

Տո՛ւր զօրութիւն ծառայի քո, կեցո՛ր զորդի աղախնոյ քո եւ արա՛ առ իս նշան  
բարութեան:

Տեսցեն ատելիք իմ եւ ամաչեսցեն, զի դու, Տէ՛ր, օգնեցեր ինձ եւ մխիթարեցեր զիս:

Փառք Հօր. այժմ եւ միշտ:

*Երգ*

(դկ) Ճանապարհ եւ ճշմարտութիւն եւ կեանք Քրիստոս, առաջնորդեա՛ հոգւոց  
մերոց յերկրէ ելանել յերկինս:

Դուռն կենաց մտից Յիսուս, մո՛յժ եւ զմեզ առ Հայր քո եւ Հոգի՛՝ երգել միշտ զփառս:

*Յորդորակ*

Ճանապարհի բարի Քրիստոս եւ ճշմարտութիւն, առաջնորդ հոգւոց մերոց յերկրէ ի յերկինս:

Դուռն կենաց մտից Յիսուս, Աստուած ճշմարիտ, մո'յծ եւ զմեզ առ Հայրդ քո Հոգւովդ Սրբով:

-----

### *Մաղթանք*

Տէ՛ր, ուղղեա՛ զգնացս մեր ի ճանապարհս խաղաղութեան. Տէ՛ր, ուղղեա՛ եւ առաջնորդեա՛ հոգւոց մերոց եւ ամենայն հաւատացելոց՝ գնալ յարդարութեան ճանապարհս եւ ի կեանս յաւիտենից:

### *Քարոզ*

Աղաչեսցուք զամենակալն Աստուած, զի յաջողեալ ուղղեսցէ զճանապարհս ծառայից իւրոց ի բարի եւ խաղաղութիւն: Ամենակա՛լ Տէր Աստուած մեր, կեցո՛ եւ ողորմեա՛:

### *Աղօթք*

Առաջնորդ կենաց եւ պարգեւիչ խաղաղութեան Քրիստոս Աստուած մեր, առաջնորդեա՛ մեզ գնալ ի ճանապարհս քո արդարութեան եւ խաղաղութեամբ ժամանել ի նաւահանգիստն կենաց եւ փրկութեան շնորհօք ողորմութեան քոյ, զի դու ես օգնական եւ փրկիչ մեր, եւ քեզ վայել է փառք, իշխանութիւն եւ պատիւ այժմ եւ միշտ եւ յաւիտեան յաւիտենից. ամէն:

*Աղօթք աւուրց պահոց, յորս տօն ոչ լինի*

Օրհնեալ ես, Տէ՛ր Աստուած Փրկիչ մեր, որ յամենայն ժամ ընդ մեզ ես եւ ոչ երբեք թողուս ի ձեռանէ քումմէ զայնոսիկ, որք հաւատով եւ ճշմարտութեամբ կարդան առ քեզ: Աղաչեմք եւ խնդրեմք ի քէն, Տէ՛ր, ճանապարհորդակի՛ց լեր ծառայից քոց՝ քոյին վերակացութեամբ պահելով ի խաղաղութեան, եւ առաջնորդեա՛ մեզ միւսանգամ խաղաղութեամբ եւ խնդութեամբ հասանիլ յիրաքանչիւր ի բնակութիւնս ի Քրիստոս Յիսուս ի Տէր մեր, որում վայել է փառք, իշխանութիւն եւ պատիւ այժմ եւ միշտ եւ յաւիտեանս յաւիտենից. ամէն:

Օրհնեալ Տէր մեր Յիսուս Քրիստոս. ամէն:

Հայր մեր, որ յերկինս:

-----

*Կարգաւորութիւն հասարակաց աղօթից երրորդ ժամուն, որ կատարի ի դէմս  
իջման Հոգւոյն Սրբոյ, այլ եւ ի դէմս նախամօրն ճաշակման եւ ազատութեանն  
Քրիստոսի*

-----

Օրհնեալ Հոգիդ Սուրբ Աստուած ճշմարիտ. ամէն:

*Սաղմոս Ծ*

Ողորմեա՛ ինձ, Աստուա՛ծ, ըստ մեծի ողորմութեան քում, ըստ բազում գթութեան քում քաւեա՛ զանօրէնութիւնս իմ:

Առաւել լուս՛ զիս յանօրէնութենէ իմմէ եւ ի մեղաց իմոց սուրբ արա զիս:

Զանօրէնութիւնս իմ ես ինձէն զիտեմ, եւ մեղք իմ առաջի իմ են յամենայն ժամ:

Քեզ միայն մեղայ, Տէ՛ր, եւ չար առաջի քո արարի:

Որպէս արդար եղիցիս ի բանս քո եւ յաղթող ի դատել քեզ:

Անօրէնութեամբ յղացաւ եւ ի մեղս ծնաւ զիս մայր իմ:

Դու, Տէ՛ր, ճշմարտութիւն սիրեցեր, զանյայտս եւ զճաճկեալս իմաստութեամբ քով  
յայտնեցեր ինձ:

Յօղեա՛ յիս մշտկաւ, եւ սուրբ եղէց, լուա՛, եւ քան զձիւն սպիտակ եղէց:

Լսելի՛ արա ինձ, Տէ՛ր, զցնծութիւն եւ զուրախութիւն, եւ ցնծասցեն ոսկերք իմ  
տառապեալք:

Դարձո՛ զերեսս քո ի մեղաց իմոց եւ զամենայն անօրէնութիւնս իմ քաւեա՛ յինէն:

Միրտ սուրբ հաստատեա յիս Աստուած եւ հոգի ուղիղ նորոգեա ի փորի իմում:

Մի՛ ընկենուր զիս, Տէ՛ր, յերեսաց քոց եւ զՀոգի քո Սուրբ մի՛ հաներ յինէն:

Տո՛ւր ինձ ցնծութիւն փրկութեան քոյ եւ Հոգով պետութեան քոյ հաստատեա զիս:

Ուսուցից անօրինաց զճանապարհս քո, եւ ամպարիշտք առ քեզ դարձցին:

Փրկեա՛ զիս յարենէ, Աստուա՛ճ, Աստուած փրկութեան իմոյ, ցնծասցէ լեզու իմ  
յարդարութեան քում:

Տէ՛ր, եթէ զշրթոնս իմ բանաս, բերան իմ երգեսցէ զօրհնութիւնս քո:

Թէ կամեցեալ էիր, պատարագս մատուցանեաք, բայց դու ընդ ողջակէզս իսկ ոչ  
հաճեցար:

Պատարագ Աստուծոյ հոգի խոնարհ. զսիրտ սուրբ եւ զհոգի խոնարհ Աստուած ոչ  
արհամարհէ:

Բարի՛ արա, Տէ՛ր, կամօք քովք Սիոնի, եւ շինեսցին պարիսպքն Երուսաղեմի:

Յայնժամ հաճեսցիս ընդ պատարագս արդարութեան, յորժամ ուխտից պատարագս  
հանցեն ի սեղան քո զուարակս:

Փառք Հօր. այժմ եւ միշտ:

*Երգ երրորդի ժամու աւուրն զկնի Ողորմեաին*

(դկ) Օրհնեմք զքեզ, Հա՛յր անսկիզբն,

Էից էակ ի յանգոյից,

բարձեր ձեռօք նիւթ ի հողոյ

եւ ստեղծեր մարդ ի պատկեր քո,

զլուխն ոտից խոնարհեցաւ,

զի զպատուիրան քո մոռացաւ.

դարձեալ ասեմք ըստ անառակին,  
թէ՛ Հա՛յր, մեղայ քեզ ի յերկինս:

Երկնաւորացն անքննելի  
եղեր մարդկան տեսանելի,  
զգեցար պատկեր հողեղինի  
պատկերդ Հօր անփոխելի,  
ելեր յերրորդ ժամ ի խաչին  
վասն Ադամայ նախաստեղծին,  
ընդ աւագակին քում խաչակցին  
արժանացո՛ զմեզ դրախտին:

Թագաւոր թագաւորաց,  
առատաբուղիս Հոգի՛ շնորհաց.  
Ժողովելոցն ի վերնատան  
առաքելոցն երկոտասան  
ի հրոյ լեզուս երեւեցար,  
յոգիս նոցա վերանստար,  
լո՛ւր յանուն քո ժողովելոցս,  
է՛ջ եւ առ մեզ յերրորդ ժամուս:

### *Մաղթանք*

Յամենայն ժամու աղաչանք իմ այս են՝ ի մեղաց իմոց սո՛ւրբ արա զիս, Տէ՛ր, եւ  
յօտարէն պահեա՛ զձառայս քո, մարդասէ՛ր Տէր:

Եւ եւս իսաղաղութեան զՏէր աղա:

Օրհնութիւն եւ փառք Հօր եւ Որդւոյ եւ Հոգւոյն Սրբոյ այժմ եւ միշտ եւ յաւի:

*Քարոզ Մեծ Պահոցն ի Յովհաննու*

*Մանդակունւոյն ասացեալ*

Միաբան ամենեքեան գոհացարուք զմարդասիրէն Աստուծոյ եւ Փրկչէն մերմէ Յիսուսէ Քրիստոսէ, որ ազատեաց զագգս մարդկան ի դատապարտութենէ անիծիցն եւ եբարց զմեղս աշխարհի ի ժամուս յայսմիկ խաչին իւրով եւ շնորհեաց առատապէս զպարգէս Հոգւոյն Սրբոյ երանելի առաքելոցն: Խնդրեսցուք հաւատով, զի զմեզ զամենեսեան արասցէ հաղորդս մեծամեծաց եւ աստուածային բարեացն այնոցիկ աղօթիւք եւ բարեխօսութեամբ ամենայն սրբոց, որք աստ եւ ընդ ամենայն տիեզերս: Որպէս զի անարատ վարուք եւ ճշմարիտ առաքինութեամբ կացեալք ըստ կամաց նորա յայսմ աշխարհիս, զմասն եւ զվիճակ ժառանգութեան ընկալցուք ընդ ամենայն սուրբս նորա՝ զբնակութիւն յաւիտենական եւ երկնային խորանացն, զոր խոստացաւ սիրելեաց իւրոց ճշմարիտն Աստուած Յիսուս Քրիստոս. Տէ՛ր մեր, կեցո՛ւ եւ ողորմեա՛: Զժամս եւ զառաջակայ օրս խաղաղութեամբ անցուցանել հաւատով ի Տեառնէ խնդրեսցուք:

Զհրեշտակ խաղաղութեան պահա:

Զբաւութիւն եւ զթողութիւն յան:

Զսրբոյ խաչին մեծ եւ կարող զօրու:

Եւ եւս՝ միաբան վասն ճշմարիտ եւ:

Զանձինս մեր եւ զմիմեանս Տեառն:

Ողորմեա՛ց մեզ, Տէ՛ր Աստուած մեր:

### *Աղօթք*

Որ ի քրովբեական եւ յանպատում հանգուցեալ եւ յաթոռ եւ այցելու եւ միշտ արարածոց քոց, որ եւ ի ժամուս յայսմիկ հեղեր յերանելի առաքեալսն զշնորհս Հոգւոյն Սրբոյ, դու, Տէ՛ր, յառաջակայ ժամուս եւ յաւէտ մինչեւ ի կենցաղոյս աւարտումն տպաւորեալ միացո՛ւ զմեզ ընդ ամենայն բարեգործութեան յորդորմունս եւ խոստացելոց բարեացդ հաղորդս լինել զմեզ արժանի՛ արա, Տէ՛ր մեր եւ Փրկի՛չ Յիսուս Քրիստոս: Որ եւ օրհնեալ ընդ Հօր եւ ընդ Սրբոյ Հոգւոյն այժմ եւ միշտ եւ յաւիտեանս յաւիտենից: ամէն:

Խաղաղութիւն ամենեցուն:

Աստուծոյ երկիրպագեցուք:

Որ էիր յառաջ, քան զյաւիտեանս, Բա՛նդ Աստուած, էակից Հօր եւ արարչակից Սուրբ Հոգւոյդ: Որ եւ զնախաստեղծին պատուիրանազանցութիւն պտղոյն ճաշակմամբ նշանաւ ամենայաղթ խաչիւ քով ի ժամուս յայսմիկ ենթադրեալ՝ ի կենդանութիւն փոխեցեր եւ, զանօրէնութիւնս մեր ի նմա բեւեռեալ, կեանք անապական եւ նորոգումն կենաց յուսացելոց ի քեզ խոստացար: Որոց մասնաւորիլ եւ զմեզ արժանի արա, Տէ՛ր մեր Յիսուս Քրիստոս, որ ես օրհնեալ ընդ Հօր եւ ընդ Սրբոյ Հոգւոյդ այժմ եւ միշտ եւ յաւիտեանս յաւիտենից. ամէն:

### *Սաղմոս*

Տէր Աստուած օրհնեալ, օրհնեալ է Տէր զօրհանապագ:

Աստուած մեր Աստուած կենարար, եւ նա փրկեցէ զմեզ:

Տէր Աստուած օրհնեալ, օրհնեալ Տէր զօրհանապագ, առաջնորդեցէ մեզ Աստուած Փրկիչ մեր:

Խնդրեցուք հաւատով ի Տեառնէ վասն ճանապարհորդաց հարց եւ եղբարց մերոց, որք ընդ ծով եւ ընդ ցամաք զնասցեն. որպէս զի առաջնորդեցէ նոցա, խաղաղութեամբ պահեցէ եւ տարեալ հասուցէ յիրաքանչիւր տեղիս Տէր Աստուած մեր: Վասն զի նա ինքն է առաջնորդ կենաց եւ յոյս փրկութեան, որ յաջողէ ծառայից իւրոց խաղաղութեամբ հասանիլ ի նաւահանգիստն կենաց եւ փրկութեան:

Ամենակա՛լ Տէր Աստուած մեր, կեցո՛ւ եւ ողորմեա՛:

### *Աղօթք*

Առաջնորդեա՛ մեզ, Տէ՛ր Աստուած մեր, եւ ուսո՛ւ մեզ զնալ ի ճանապարհս քո արդարութեամբ. պահեա՛ ի խաղաղութեան զկեանս մեր եւ զզնացս ի հաճոյս քո:

Ժամանեցո՛ր՝ զհոգեւոր եւ զմարմնաւոր ընթացս ծառայից քոց անարատ ճանապարհաւոյ յաւիտենական ի կեանսոյ շնորհօք Միածնի քոյ՝ Տեառն մերոյ եւ Փրկչին Յիսուսի Քրիստոսի, որ եղև մեզ առաջնորդ կենաց եւ յոյս փրկութեան: Ընդ որում օրհնեալ ես, Հա՛յր ամենակալ, հանդերձ կենդանարար եւ ազատիչ Սուրբ Հոգւովդ այժմ եւ միշտ եւ յաւիտեանս յաւիտենից. ամէն:

Յիշեա՛, Տէ՛ր, զպաշտօնեայս քո:

Բարերար եւ բազումողորմ Աստ:

*եւ այլն: տես երես 332-333:*

### *Սաղմոս ԻԲ*

Տէր հովուեսցէ զիս, եւ ինձ ինչ ոչ պակասեսցի:

Ի վայրի դալարւոջ անդ բնակեցոյց զիս եւ առ ջուրս հանգստեան սնոյց զիս:

Դարձոյց զանձն իմ առ իս, առաջնորդեաց ինձ ի ճանապարհս արդարութեան վասն անուան իւրոյ:

Թեպէտ եւ գնացից ես ի մէջ ստուերաց մահու, ոչ երկեայց ի չարէ, զի դու, Տէ՛ր, ընդ իս ես:

Յուպ քո եւ զաւազան, նոքա մխիթարեսցեն զիս:

Պատրաստ արարեր առաջի իմ զսեղան ակն յանդիման նեղչաց իմոց:

Օծեր իւղով զզլուիս իմ, բաժակ քո որպէս անապակ արբեցոյց զիս:

Ողորմութիւն քո, Տէ՛ր, զհետ իմ եկեսցէ զամենայն աւուրս կենաց իմոց՝ բնակիլ ինձ ի տան Տեառն ընդ երկայն աւուրս:

Յո՛յց ինձ ճանապարհ, յոր եւ գնացից, զի առ քեզ, Տէ՛ր համբարձի զանձն իմ:

Փրկեա՛ զիս ի թշնամեաց իմոց, Տէ՛ր, զի զքեզ ապաւեն ինձ արարի:

Ուսո՛ ինձ առնել զկամս քո, զի դու ես Աստուած իմ:

Հոգի քո բարի առաջնորդեսցէ ինձ ի յերկիր ուղիդ:

Վասն անուան քո, Տէ՛ր, կեցուսցես զիս, արդարութեամբ քով հանցես ի նեղութենէ զանձն իմ:

Ողորմութեամբ քով սատակեա՛ զթշնամիս իմ եւ կորո՛ր զամենայն նեղիչս անձին իմոյ, զի ես ծառայ քո եմ:

Փառք Հօր եւ. այժմ եւ միշտ եւ:

### *Քարոզ*

Եւ եւս խաղաղութեան զՏէր աղա.

Գոհաբանելով աղաչեսցուք զբարերար Հոգին Աստուած եւ խնդրեսցուք զողորմութիւն ի նմանէ, զի անցուցէ ի մէնջ զցասումն պատուհասի յանցանաց մերոց բարերարութեամբ իւրով: Ամենակա՛լ Տէր Աստուած մեր, կեցո՛ր եւ ողորմեա՛:

### *Աղօթք*

Խաղաղութեամբ քով, Հոգի՛դ Սուրբ Աստուած ճշմարիտ, որ ի վեր է, քան զամենայն միտս եւ զխորհուրդս, մխիթարեա՛ զանձինս ծառայից քոց՝ ընդունելով զաղաչանս մեր, անցո՛ր ի մէնջ զցասումն պատուհասի յանցանաց մերոց բարերարութեամբ քով: Ներեա՛ եւ լո՛ւր մեզ, քաւեա՛ եւ թո՛ղ զմեզս մեր, արժանաւորեա՛ զոհութեամբ փառաւորել զքեզ ընդ Հօր եւ ընդ Որդւոյն Միածնի այժմ եւ միշտ եւ յաւիտեանս յաւիտենից. ամէն:

Օրհնեալ Տէր մեր Յիսուս Քրիստոս. ամէն:

Հայր մեր, որ յերկինս:

*Կարգաւորութիւն հասարակաց աղօթից վեցերորդի ժամուն: Որ կատարի ի դէմս  
Հօր Աստուծոյ, այլ եւ ի դէմս չարչարանաց եւ խաչելութեան Որդւոյն Աստուծոյ*

Օրհնեալ Հայր Սուրբ Աստուած ճշմարիտ. ամէն:

### *Սաղմոս Ծ*

Ողորմեա՛ ինձ, Աստուա՛ծ, ըստ մեծի ողորմութեան քում, ըստ բազում գթութեան քում քաւեա՛ զանօրէնութիւնս իմ:

Առաւել լուս' զիս յանօրէնութենէ.

եւ այլն: Տես երես 383:

-----  
*Երգ վեցերորդի ժամուն*

Խաւարեցաւ լոյս արեւուն  
ի վեցերորդ ժամ ուրբաթուն,  
ծանոյց, թէ լոյսն արարչական  
նսեմացոյց զլոյս եղական,  
կախեալ զքեզ մերկ ի խաչին`  
քողով ստուերան ծածկէին,  
հերքեա' ի մենջ զծանրութիւն  
շրջող դիւին միջօրէի:

Ձանձրութիւն մարտ այսոյն չարի,  
որ յայս ժամուս պատերազմի,  
դողեալ հոգւոց մեր հերքեացի  
քո նշանաւ սրբոյ խաչի,  
ճշմարտութեան քո ճառագայթ  
զառ ի յերկնից անկեալ փայլակն  
մերժեալ ի մենջ հալածեացէ  
եւ զմեզ լուսով քո վառեացէ:

Յայս միջօրեայ տուրնջեան ժամուս  
վայելչական աչաց մարմնոյս  
նետիւք գաղտնեաց մի' խոցեցուք  
ի խաւարէն, որ ի ծածուկ.  
շուրջանակի բանակեցեն  
զմեօք բանակք հրեշտակաց,

որք պարակից մեզ լինելով՝  
զքեզ ընդ Հօր փառատրելով:

*Մաղթանք*

Յամենայն ժամու աղաչանք իմ այս են՝ ի մեղաց իմոց սո՛ւրբ արա զիս, Տէ՛ր, եւ  
յօտարէն պահեա՛ զծառայս քո, մարդասէ՛ր Տէր:

Եւ եւս խաղաղութեան զՏէր աղա:

Օրհնութիւն եւ փառք Հօր եւ Որդւոյ եւ Հոգւոյն Սրբոյ այժմ եւ միշտ եւ յաւիտեանս  
յաւիտենից. ամէն:

-----

*Քարոզ Մեծի Պահոցն*

Արթուն մտօք եւ անզբօս խորհրդով կացցուք միաբան յաղօթս առաջի Տեառն մերոյ  
եւ Փրկչին Յիսուսի Քրիստոսի: Հաւատով խնդրեցուք ի նմանէ՛ զհրեշտակս  
խաղաղութեան պահապան անձանց մերոց, որ եկեալ բանակեցէ շուրջ զմեօք եւ  
աներկիւղ պահեցէ զմեզ յամենայն հրեղէն նետից սատանայի, որ թռչի ի տուէ,  
յիրաց խաւարային գնացից, ի գայթակղութենէ դիւին ի հասարակ աւուր: Յորմէ  
զգուշութեամբ պահելով աղօթիւք եւ բարեխօսութեամբ ամենայն սրբոց՝ շնորհեցէ  
մեզ մարդասէրն Աստուած կեալ առաքինութեամբ ի փրկութիւն անձանց մերոց, ի  
պատիւ եւ ի փառս կենդանացուցիչ անուան իւրոյ: Յոյս հաղորդութեան ընկալցուք  
ի յայտնութեան Միածնի Որդւոյն Աստուծոյ՝ կերպարանակից առնել զմարմին  
խոնարհութեան մերոյ ըստ նմանութեան մարմնոյ փառաց իւրոց, վասն զի զայս  
խոստացաւ սիրելեաց իւրոց ճշմարիտն Աստուած Յիսուս Քրիստոս. Տէ՛ր մեր,  
կեցո՛՛ եւ ողորմեա՛:

Զժամս եւ զառաջակայ օրս խաղաղութեամբ անցուցանել հաւատով ի Տեառնէ՛  
խնդրեցուք:

Զհրեշտակ խաղաղութեան պահա:

Զբաւութիւն եւ զթողութիւն յան:

Զարբոյ խաչին մեծ եւ կարող զօրու:  
Եւ եւս՝ միաբան վասն ճշմարիտ եւ:  
Զանձինս մեր եւ զմիմեանս Տեառն:  
Ողորմեա՛ց մեզ, Տէ՛ր Աստուած մեր:

### *Աղօթք*

Զգեցո՛ւ մեզ, Տէ՛ր Աստուած մեր, զէն արդարութեան՝ զօրաւոր եւ յաղթող լինիլ ընդդէմ սատանայական պատերազմաց եւ զամենայն հրեղէն նետս նորա շիջուցանելով՝ անկասկած լիցուք յիրաց խաւարային գնացից, ի գայթակղութենէ դիւին ի հասարակ աւուր: Եւ զգաստացեալք վայելչական տուրնջեամբս առաքինութեամբ կացցուք ի փրկութիւն անձանց մերոց, ի պատիւ եւ ի փառս Սրբոյ Երրորդութեանդ այժմ եւ միշտ եւ յաւիտեանս յաւիտենից. ամէն:

Խաղաղութիւն ամենեցուն:

Աստուծոյ երկիրպագեցուք:

Երկնաւոր խաղաղութեամբ քով պարսպեալ պահեա՛ զանձինս մեր, Տէ՛ր զօրութեանց: Վասն զի դու ես Աստուած խաղաղութեան, եւ բաց ի քէն զայլ ոք ոչ զհտեմք եւ զանուն քո ամենագօր կարդամք յօգնականութիւն անձանց մերոց: Նայեա՛ յերկրպագութիւնս մեր եւ ուսո՛ւ մեզ առնել զարդարութիւն ճշմարտութեան: Եւ զոհութեամբ փառաւորեցուք զՀայր եւ զՈրդի եւ զՍուրբ Հոգիդ այժմ եւ միշտ:

### *Մաղմոս*

Տէ՛ր, մի՛ յիշեր զմեղս մեր զառաջինս, վաղվաղեցել առ մեզ ողորմութիւն քո, Տէ՛ր, զի աղքատացաք յոյժ:

Օգնեա՛ մեզ, Աստուած Փրկի՛չ մեր, վասն փառաց անուան քոյ:

Տէ՛ր, փրկեա՛ զմեզ եւ քաւեա՛ զմեղս մեր վասն անուան քոյ:

*Քարոզ*

Վասն հիւանդաց եւ ամենայն վշտացելոց աղաչեսցուք զՓրկիչն մեր Քրիստոս, զի ողորմեսցի ըստ մեծի ողորմութեան իւրում եւ բժշկեսցէ զախոս եւ զհիւանդութիւնս հոգւոց եւ մարմնոց ծառայից իւրոց, եւ կատարեալ առողջութեամբ հասուցէ զամենեսեան ի մշտնջենաւոր եւ յանախտ կեանս, որ առաքեցաւ ի Հօրէ ի բժշկութիւն ազգի մարդկան Միածին Որդին Աստուծոյ. Տէր մեր եւ Փրկի՛չ Յիսուս Քրիստոս, կեցո՛ւ եւ ողորմեա՛:

*Աղօթք*

Փարատեա՛ զցաւս եւ բժշկեա՛ զհիւանդութիւնս ի ժողովրդենէ քումմէ, Տէ՛ր Աստուած մեր, եւ շնորհեա՛ ամենեցուն զկատարեալ առողջութիւն նշանաւ ամենայաղթ իսաչիւ քով, որով բարձեր զտկարութիւն ազգի մարդկան եւ դատապարտեցեր զթշնամին կենաց եւ փրկութեան մերոյ:

Դու ես կեանք մեր եւ փրկութիւն, բարերար եւ բազումողորմ Աստուած, որ միայն կարող ես թողուլ զմեղս եւ մերժել զախոս եւ զհիւանդութիւնս ի մենջ, որում յայտնի են պէտք կարեաց մերոց: Պարգեւի՛չդ բարեաց, պարգեւեա՛ զառատ ողորմութիւն քո ի վերայ արարածոց քոց ըստ իւրաքանչիւր պիտոյից, յորոց հանապազ փառաւորեալ գովի Ամենասուրբ Երրորդութիւնդ այժմ եւ միշտ եւ յաւիտեանս յաւիտենից. ամէն:

Յիշեա՛, Տէ՛ր, զպաշտօնեայս քո.

Բարերար եւ բազումողորմ Աստ:

*Տես երես 332-333:*

-----

*Մաղմոս Խ*

Երանի, որ խորհի զաղքատն եւ զտնանկ, յաւուր չարի փրկէ զնա Տէր:

Տէր փրկէ զնա եւ կեցուցանէ, երանելի առնէ զնա ի վերայ երկրի եւ ոչ մատնէ զնա ի ձեռք թշնամեաց իւրոց:

Տէր օգնական է նմա ի մահիճս ցաւոց իւրոց. զամենայն անկողինս նորա դարձուցանէ ի հիւանդութենէ նորա:

Ես ասացի՝ Տէ՛ր, ողորմեա՛ ինձ, բժշկեա՛ զանձն իմ. ես մեղայ քեզ:

Որ բնակեալն է յօգնութիւն Բարձրելոյն, ընդ հովանեաւ Աստուծոյ յերկինս հանգիցէ:

Ասացէ Տեառն՝ ընդունող իմ ես դու, ապաւե՛ն իմ Աստուած, եւ ես յուսամ ի նա:

Նա փրկեցէ զիս յորոգայթէ որսողին եւ ի բանից խռովութենէ:

Ի թիկնամէջս իւր ընկալցի զքեզ, ի հովանի թեւոց նորա յուսացիս:

Որպէս զէն՝ շուրջ եղիցի զքեւ ճշմարտութիւն նորա:

Ոչ երկիցես դու յերկիւղէ գիշերի եւ ոչ ի նետէ, որ թռչի ի տուէ,

Յիրէ, որ շրջի ի խաւարի, ի գայթակղութենէ դիւին ի հասարակ աւուր:

Անկցին ի կողմանէ քումմէ հազարք, եւ բիրք ընդ աջմէ քումմէ, որ առ քեզ ինչ ոչ մերձեցին:

Բայց միայն աչօք քովք հայեցիս դու եւ զհատուցումն մեղաւորաց տեսցես, զի դու, Տէ՛ր, յոյս իմ ես:

Զբարձրեալն արարեր քեզ ապաւեն. ոչ հասցեն առ քեզ չարք, եւ տանջանք մի՛ մերձեցին ի յարկս քո:

Հրեշտակաց իւրոց պատուիրեալ է վասն քո ի պահել զքեզ յամենայն ճանապարհս քո:

Ի բազուկս իւրեանց ընկալցին զքեզ, զի մի՛ երբեք հարցես զքարի գոտն քո:

Ի վերայ իժից եւ քարբից գնացես դու եւ առ ոտն կոխեսցես զառիւծն եւ զվիշապն:

Քանզի յիս յուսացաւ, եւ փրկեցից զնա, հովանի եղէց նմա, զի ծանեաւ զանուն իմ:

Կարդասցէ առ իս, եւ ես լուայց նմա եւ առ նմա եղէց ի նեղութեան:

Փրկեցից եւ փառաւոր արարից զնա, երկայն աւուրքք լցուցից եւ ցուցից նմա զփրկութիւն իմ:

Փառք Հօր. այժմ եւ միշտ:

*Քարոզ*

Եւ եւս իսաղաղութեան զՏէր աղա:

Խնդրեսցուք հաւատով ի Հօրէ վասն քաւութեան մեղաց եւ թողութեան յանցանաց, փրկելոյ զմեզ ի վշտաց եւ ի նեղութեանց, իջանելոյ ի վերայ մեր ողորմութեան եւ գթութեան Տեառն Աստուծոյ ամենակալին. կեցո՛ր եւ ողորմեա՛:

*Աղօթք*

Հա՛յր գթութեանց եւ Աստուա՛ծ ամենայն մխիթարութեանց, որ մխիթարես զմեզ յամենայն նեղութեան մերում, լո՛ւր եւ այժմ ձայնի պաղատանաց ծառայից քոց՝ ընդունելով զաղաչանս մեր, անցո՛ր ի մէնջ զցասումն պատուհասի յանցանաց մերոց բարերարութեամբ քով: Ներեա՛ր եւ լո՛ւր մեզ, քաւեա՛ր եւ թո՛ղ զմեղս մեր, արժանաւորեա՛ր գոհութեամբ փառաւորել զքեզ ընդ Որդւոյ եւ ընդ Սրբոյ Հոգւոյդ այժմ եւ միշտ եւ յաւիտեանս յաւիտենից. ամէն:

Օրհնեալ Տէր մեր Յիսուս Քրիստոս. ամէն:

Հայր մեր, որ երկինս:

*Կարգաւորութիւն հասարակաց աղօթից իններորդի ժամուն, որ կատարի ի դէմս Որդւոյն Աստուծոյ, այլ եւ մահուանն եւ բանական հոգւոյն աւանդմանն:*

-----

Օրհնեալ Որդիդ Սուրբ Աստուած ճշմարիտ. ամէն:

*Մաղմու Ծ*

Ողորմեա՛ր ինձ, Աստուա՛ծ, ըստ մեծի ողորմութեան քում, ըստ բազում գթութեան քում քաւեա՛ր զանօրէնութիւնս իմ:

Առաւել լուա՛ր զիս յանօրէնութենէ.

*եւ այլն: Տես երես 383:*

Փառք Հօր եւ. այժմ եւ միշտ եւ:

-----

*Երգ իններորդի ժամուն*

Չարչարակցեալ քեզ տիւ լուսոյ  
երեք ժամու խաւարելոյ,  
պայծառացեալ յիններորդին  
ի տիպ լրման մահու ստուերին,  
ջահոյ լուսոյ մեծապայծառ  
աւանդեցեր զհոգիդ առ Հայր,  
ռահիւ կցորդ քեզ ի յերկինս  
զմեզ ուղղեա՛ Հոգւով քոյին:

Սանդարամետք սարսեցին  
զկապեալ հոգիսն արձակեցին,  
վեմք ի վիմեդ պատառեցան,  
ի տապանաց մեռեալք յարեան,  
տարերք երկրի տատանէին,  
եւ աշխարհի սիւնք դողային.  
րամեալքս առ քեզ պաղատեսցուք,  
զի ընդ արդարսն դասեսցուք:

Տուցեր յայնժամ սքանչելիս  
եւ այժմ մեզ ողորմեսցիս,  
լիծեալ բնութիւնս քեւ ողջացաւ,  
շնորհեա եւ մեզ լինել անցաւ.  
փոխան մահու քո կենարար  
կեցո՛ զմեզ, Տէ՛ր բարերար,  
քեզ պաղատիմք ըստ աւագակին՝

յիշեա՛ զմեզ յօրն ահագին:

*Մաղթանք*

Յամենայն ժամու աղաչանք իմ այս են՝ ի մեղաց իմոց սո՛ւրբ արա զիս, Տէ՛ր, եւ յօտարէն պահեա՛ զձառայս քո, մարդասէ՛ր Տէր:

Եւ եւս խաղաղութեան զՏէր աղա:

Օրհնութիւն եւ փառք Հօր եւ Որդոյ եւ Հոգւոյն Սրբոյ այժմ եւ միշտ եւ յաւի:

-----

*Քարոզ Մեծի Պահոց*

Սուրբ սրտիւ եւ հաստատուն հաւատով կացցուք միաբան յաղօթս առաջի Տեառն մերոյ եւ Փրկչին Յիսուսի Քրիստոսի՝ յիշելով զմեծամեծս նորա զանչափ շնորհս, զհամբերութիւն կենսատու խաչին եւ զհեղումն ազատեցուցիչ արեան նորա, եւ զսոցին նմանս, որ յայսմ ժամու վասն մեր մեղաւորացս կրեաց նա: Եւ մեք, զայս ամենայն զմտաւ ածելով, սրբեցուք ի մեղաց զխորհուրդս, զբանս եւ զգործս մեր, կատարեցուք զսրբութիւն անձանց մերոց ահիւն Աստուծոյ: Մի՛ յապաղիցուք խոստովան լինիլ նմա զմեղս մեր եւ խնդրել զթողութիւն մեղաց մերոց, զի մի՛ կորիցիմք անապաշխար զյաւիտենական կորուստն: Այլ մինչդեռ ժամանակս ի ձեռս է, գործեցուք զբարիս ի կեանս յայտոսիկ՝ օրինակ վարուց մերոց ունելով զամենայն սուրբս եւ զյաղթող նահատակսն, որք միանգամ ի սկզբանէ հաճոյ եղեն Տեառն եւ Փրկչին բոլորեցունց: Որոց աղօթիւք եւ բարեխօսութեամբն շնորհեցէ մեզ մարդասէրն Աստուած զհաճոյսն իւր եւ զօգուտն մեր խորհիլ միշտ եւ առնել եւ անպատում պարգեւացն հաղորդս գտանիլ: Ջոր խոստացաւ սիրելեաց իւրոց ճշմարիտն Աստուած Յիսուս Քրիստոս, Տէ՛ր մեր, կեցո՛ եւ ողորմեա՛: Ջժամս եւ զառաջակայ օրս խաղաղութեամբ անցուցանել հաւատով ի Տեառնէ խնդրեցուք:

Ջիրեշտակ խաղաղութեան պահա:

Ջքաւութիւն եւ զթողութիւն յան:

Զարբոյ խաչին մեծ եւ կարող զօրու:  
Եւ եւս՝ միաբան վասն ճշմարիտ եւ:  
Զանձինս մեր եւ զմիմեանս Տեառն:  
Ողորմեա՛ց մեզ, Տէ՛ր Աստուած մեր:

### *Աղօթք*

Տէ՛ր զօրութեանց, որ կամաւոր մահուամբ քով ի ժամուս յայսմիկ կենդանացուցեր զմեզ ի մեռելութենէ մեղաց մերոց եւ բեւեռեցեր զկնիք դատապարտութեան մերոյ ի խաչին, եւ շնորհեցեր ազատութիւն ազգի մարդկան ի ծառայութենէ ապականութեան յազատութիւն փառաց հեղմամբ արեան քոյ սրբոյ: Ընկա՛լ եւ այժմ զաղաչանս մեր եւ յաջողեա՛ մեզ ուղիղ հաւատով եւ առաքինասէր վարուք կեալ յայսմ աշխարհիս եւ արժանաւոր լինել յաւիտենական եւ երկնային ուրախութեանցն ընդ ամենայն սուրբս քո եւ գոհանալով փառաւորել զքեզ ընդ Հօր եւ Սրբոյ Հոգւոյդ այժմ եւ միշտ եւ յաւիտեանս:

Խաղաղութիւն ամենեցուն:

Աստուծոյ երկիրպագեսցուք:

Բազումողո՛րմ Աստուած եւ հաստի՛չ խաղաղութեան, հաստատեա՛ զանձինս մեր քոյով խաղաղութեամբդ, որով ունիս յիւրաքանչիւր կարգի զամենայն արարածս քո ուղիղ հրամանաւդ մատակարարելով, վասն զի այդ իսկ է կամք քո՝ խաղաղական եւ հոգեւոր սիրով կալ մեզ առ միմեանս եւ սպասել արթուն մտօք յայտնութեան Միածնիդ Աստուծոյ եւ Փրկչիդ մերոյ Յիսուսի Քրիստոսի, որում արժանաւորք եղիցուք հանդիպել ամպովք ընդ առաջ Տեառն յօդս: Զուարթերես կացցուք յաջմէ քումմէ ընդ սուրբս եւ ընդ սիրելիս անուանդ քո սրբոյ եւ ժառանգեսցուք զպատրաստեալն ի սկզբանէ աշխարհի սրբոց քոց զարքայութիւնդ: Եւ ընդ նոսին գոհանալով փառաւորեսցուք զքեզ ընդ Հօր եւ Ամենասրբոյ Հոգւոյդ այժմ եւ միշտ եւ յաւի:

## *Մաղմոս*

Տէ՛ր, մի՛ մատներ զմեզ իսպառ վասն անուանդ քում սրբոյ, մի՛ ցրեր զուխտս քո եւ մի՛ ի բացեայ առներ զողորմութիւնս քո ի մէնջ:

Վասն Աբրահամու սիրելւոյ քո, Իսահակայ ծառայի քո, եւ Իսրայելի սրբոյ քո, Տէ՛ր, մի՛ մատներ զմեզ իսպառ վասն անուանդ քում սրբոյ, մի՛ ցրեր զուխտս քո եւ մի՛ ի բացեայ առներ զողորմութիւնս քո ի մէնջ:

## *Երգ տեառն Ներսիսի*

(բձ)

Նահապետին Աբրահամու հայցմամբ

ընկա՛լ, Տէ՛ր, զաղաչանս.

Եւ ծառային քում Սահակայ

խնդրուածովք ի մեզ գրթա՛:

Բենատեսին Իսրայելի

Սիրով սրբոյն ի մեզ խնայեա՛:

Երեքսրբեան երիւք սոցին

Սրբեա՛ զհոգի, զմիտս եւ զմարմին:

## *Քարոզ*

Աղաչեսցուք զկենսատու Փրկիչն մեր Քրիստոս, որ կամաւոր խաչելութեամբն իւրով զարարածս փրկեաց եւ հեղմամբ արեան իւրոյ զթողութիւն շնորհեաց յուսացելոց իւրոց: Ամենակա՛լ Տէր Աստուած մեր, կեցո՛ եւ ողորմեա՛:

## *Աղօթք*

Անկեալ առաջի քոյ, բարերար եւ բազումողորմ Աստուած, աղաչեմք ամենայն սրտիւք մերովք եւ խնդրեմք զգթութիւն ի քէն. որպէս խոստացար ծառայից քոց եւ ասացեր՝ զամենայն, զոր ինչ խնդրիցէք հաւատով յանուն Որդւոյ ի Հօրէ, տացի ձեզ: Շնորհեա՛ եւ այժմ հաւատացելոցս ի քեզ եւ կատարեա՛ ի բարի զխնդրուածս

մեր, զի ի քեզ եմք ապաւինեալ: Եւ քո առատ ողորմութեամբ մխիթարեա՛ զմեզ ի կեանս յայտոսիկ եւ առաջնորդեալ հասո՛ յանճառ երկնից արքայութիւնդ՝ ի փառաբանութիւն եւ ի պատիւ Ամենասուրբ Երրորդութեանդ այժմ եւ միշտ եւ յաւիտեանս յաւիտենից. ամէն:

Յիշեա՛, Տէ՛ր, զպաշտօնեայս քո:

Յիշեա՛, Տէ՛ր, եւ ողորմեա՛:

Բարերար եւ բազումողորմ Աստ:

*եւ այլն: Տես երես 332-33:*

### *Մաղմոս ՃԺԴ*

Միրեցի, զի լուիցէ Տէր զձայն աղօթից իմոց, զի խոնարհեցոյց զունկն իւր առ իս, եւ եւ յաւուրս իմ կարդացի առ նա:

Շրջեցան զինեւ երկունք մահու, եւ վիշտք դժոխսոց գտին զիս:

Զնեղութիւն եւ զանձկութիւն գտի եւ զանուն Տեառն կարդացի:

Ո՛ Տէր, փրկեա՛ զանձն իմ. ողորմած Աստուած մեր ողորմի՛ եւ պահէ զողայս Տէր:

Ես խոնարհ եղէ, եւ Տէր կեցոյց զիս. դա՛րձ, ա՛նձն իմ, ի հանգիստ քո, զի Տէր օգնեաց ինձ:

Փրկեաց զանձն իմ ի մահուանէ, զաչս իմ յարտասուաց եւ զոտս իմ ի գայթակղութենէ. հաճոյ եղէց առաջի Տեառն յերկրին կենդանեաց:

Հաւատացի, զոր եւ իօսեցայ, եւ ես խոնարհ եղէ յոյժ: Ես ասացի ի զարմանալ իմում, թէ՛ ամենայն մարդ սուտ է:

Զի՞նչ տաց տրիտուր Տեառն ընդ ամենայնի, զոր եւ ետ ինձ:

Զբաժակ փրկութեան ընկալայց եւ զանուն Տեառն կարդացից:

Զաղօթս իմ Տեառն տաց առաջի ամենայն ժողովրդեան նորա:

Պատուական է առաջի Տեառն մահ սրբոց իւրոց. ո՛ Տէր, եւ ծառայ քո եմ, ծառայ եւ որդի աղախնոյ քո:

Հատեր զկապանս իմ, քեզ մատուցից պատարագ օրհնութեան եւ զանուն Տեառն կարդացից:

Զաղօթս իմ Տեառն տաց առաջի ամենայն ժողովրդեան նորա, ի գաւիթս տան Տեառն եւ ի մէջ քո, Երուսաղէ'մ:

Օրհնեցէ՛ք զՏէր, ամենա'յն ազինք, գովեցէ՛ք զնա, ամենա'յն ժողովուրդք: Զօրասցի ողորմութիւն նորա ի վերայ մեր, եւ ճշմարտութիւն Տեառն մնասցէ յաւիտեան: Փառք Հօր. այժմ եւ միշտ:

-----

*Շարական տէրունեաց եւ մարտիրոսաց*

(աձ) Որ ստեղծմամբ ըստ պատկերի քո, Տէ'ր, պատուեցեր զմեզ, ընկա'լ եւ այժմ զննջեցեալսն ի քեզ ուղիղ հաւատով ըստ մեծի քում ողորմութեան:

Որ շնորհօք Սուրբ Հոգւոյն լուսաւորեցեր, յիշատակի իւրեանց զհոգիս նոցա ընկա'լ, մարդասէ'ր, ըստ մեծի:

Որք հաղորդեցան մարմնոյ եւ արեան քո, Տէ'ր, հանգո' զհոգիս նոցա ընդ սուրբս քո, Քրիստո'ս Աստուած, քանզի զինք սուրբ արեան քոյ են:

Միայն օրհնեալդ ի կանայս, մայր եւ միշտ կոյս եւ իմանալի լոյս, ծնող Արարչին մերոյ, անդադար բարեբանեսցուք:

(ակ)

Արարի'չ Աստուած եւ Ստեղծի'չ ազգի մարդկան, մի' անտես առնէր զննջեցեալսն մեր, այլ հանգո' զհոգիս նոցա ընդ սուրբս քո:

Որդի'դ Միածին, յարութի'ն տիեզերաց, մի' ան:

Հոգի'դ ճշմարիտ, մխիթարի'չ սգաւորաց, մի' ան:

Հոգւոյն զքեւ հովանացեալ միա'յն սրբուհի, ծնար զԲանն Աստուած զանճառելոյ Հօր ծնունդ, եւ յայտնեցաւ միութիւն Երրորդութեանն:

(բձ)

Որ կոչեցեր առ քեզ, Տէ՛ր, գոհեզերս ամենայն, ընկա՛լ զմեր զննջեցեալսն ի գոգ նահապետին Աբրահամու, ողորմա՛ծ Տէր, Փրկիչ եւ բարերա՛ր:

Որ թողութեանց ես տուող, Աստուա՛ծ, թո՛ղ զմեղս մեր ննջեցելոցն, կարո՛ղ յամենայնի եւ հօօ՛ր, ողոր.:

Որ լուսատու ես տիեզերաց, Քրիստո՛ս Աստուած, լուսաւորեա՛ եւ զմեր զննջեցեալսն լուսով երանաւէտ զուարթնոցն, ողոր.:

Յո՛յս մեր եւ ապաւէն, մա՛յր Տեառն եւ կո՛յս սուրբ, որ հուր Աստուածութեանն ոչ բոցակիզեաց զքո սուրբ գորովայն, բարեխօսեա՛ առ Տէր վասն մերոյ փրկութեան:

(բկ)

Որ Որդիդ ես եւ Բանդ Աստուած, հաւասարակից ընդ Հօր յէութեան, առ քեզ կարդամք, Մարդասէ՛ր, հանգո՛ զհոգիս ննջեցելոց մեր ընդ սուրբս քո:

Որ իջեր յերկնից վասն մեր, զառաջինն առեր զյանցանսն Ադամայ, մերով բնութեամբ բարձեր ի վերայ խաչին անարատ ձեռօք, հանգո՛ զհո:

Որ լուծեր զիշխանութիւն մահու կամաւորական մահուամբ քո, Քրիստո՛ս, բանաւորաց զաղաչանս առաջի քո հեղեալ մաղթեմք, հանգո՛:

Տիրուհի՛ անարատ, մա՛յր Տեառն եւ կո՛յս Մարիամ, քրովբէական աթոռ զքեզ տեսաք ի յերկրի, բարեխօսեա՛ առ Տէր վասն մերոյ փրկութեան:

(գձ)

Հա՛յր բարեզուրթ, որ գթացար ի յազգս որդւոց մարդկան, առաքեցեր զՄիածինդ ի փրկութիւն, յիշեա՛ զհոգիս ննջեցելոց մերոց եւ հանգո՛ ընդ սուրբս քո: Որդի՛դ Միածին, որ յարեարդ ի մեռելոց, ի միւսանգամ գալստեանն քո յարութիւն մեզ խոստացար, յիշեա՛ զհո:

Հոգի՛դ ճշմարիտ, մխիթարի՛չ սգաւորաց, աղաչանօք սուրբ Աստուածածնին եւ ամենայն քոց սրբոց յիշեա՛ զհոգիս:

Ի բարեխօսութիւն փութացիր մեզ, սո՛ւրբ Աստուածածին, առ ի փրկել զժողովուրդս ի մեղաց եւ յապականութենէ:

(գկ)

Յանսկզբնական ծոցոյ Հօր խոնարհեալ Բանդ մարմնացար ի Կուսէն վասն փրկութեան մերոյ, աղաչե'մք զքեզ, զննջեցեալսն մեր ի քեզ ուղիղ հաւատով յիշեա', Տէ'ր, յորժամ գաս թագաւորութեամբդ քո:

Անոխակալ քաղցրութեամբ, Որդի' Աստուծոյ, հաճեցար բառնալ զմեղս աշխարհի քո խաչելութեամբն, աղա:

Կամաւորական մահուամբ քո լուծեր զերկունս մահու եւ արժանի արարեր թողութեան յանցանաց քաւիչ քո արեամբ, աղա:

Որ փոխանակ մեղաւորաց զմեռանիլ յանձն առեր, իջանելով ի դժոխս՝ փրկեցեր ի մեղսաւեր բանտէն զգերեալսն, աղա:

Բարեբանեմք զանչափ քո զմարդասիրութիւնդ, որ երեքօրեայ յարուցեալ՝ զկենդանութիւն պարգեւեցեր աշխարհի, աղա:

Մաքուր եւ անբիծ կոյս յետ ծննդեան, որ մարմնով ծնար զԱրձակողն ի կապից մահու, բարեխօս'ս լեր վասն անձանց մերոց՝ փրկել ի սպառնալեաց գեհեոյն:

(դձ)

Յորժամ հարկանի փող գալստեան քո, Տէ'ր, յայնժամ զարհուրեալ դողան արարածք ի յահէ քումմէ, աղաչե'մք զքեզ, Փրկի'չ, հանգո' եւ զմեր զննջեցեալսն ընդ սուրբս քո, որ միայնդ ես բազումողորմ:

Յահաբեկ լուսոյ ծագման քո, Տէ'ր, ցնծան դասք առաքինեացն ի վերայ լուսեղէն ամպոյն, աղա:

Անոխակա'լ, բազմագո'ւթ, ողորմա'ծ Տէր, մի' անտես առներ զմեղուցեալքս յահագին աւուրն, որ միայնդ:

Որ իջեր ի յերկնից եւ մարմնացար ի սուրբ Կուսէն անճառելի քոյին ծննդեամբդ, եւ զիս մի' անտես առներ, այլ պահեա' պատուական եւ սուրբ խաչի քո:

(դկ) Որ թագաւորդ ես յաւիտենից, Քրիստոս'ս Աստուած, ընկա'լ զճառայս քո ի բարի եւ շնորհեա' ի յաջակողմեան քում դասիլ:

Որ ունիս իշխանութիւն մահու եւ կենաց, հանգո' զհոգիս քոց ծառայից եւ շնոր:

Յորժամ կարգի աթոռ տէրութեանդ քո, եւ հաստատի ատեան դատաստանին, յայնժամ ինայեա' ի ծառայս քո եւ շնոր:

Ամենօրինեալ Աստուածամայր Մարիամ, քերովբեական աթո՛ն Արարչին մերոյ տնօրէնութեան, զոր երանեն ամենայն ազի՛նք հանապազ:

(մաղ) Հոգւոցն հանգուցելոց, Քրիստոս'ս Աստուած, արա՛ հանգիստ եւ ողորմութիւն եւ մեզ՝ մեղաւորացս, շնորհեա՛ զթողութիւն յանցանաց:

Եւ եւս խաղաղութեան զՏէր աղա:

(քրգ) Վասն հանգուցեալ հոգւոցն աղաչեսցուք զՓրկիչն մեր Քրիստոս, զի գնոսա ընդ արդարսն դասեսցէ եւ զմեզ կեցուցէ շնորհիւ ողորմութեան իւրոյ: Ամենակա՛լ Տէր Աստուած մեր, կեցո՛ եւ ողորմեա՛:

Տէ՛ր, ողորմեա՛, Տէ՛ր, ողոր., Տէ՛ր, ողոր.:

### *Աղօթք*

Քրիստոս'ս, Որդի Աստուծոյ՝ անոխակալ եւ բարեգութ, գթա՛ քո արարչական սիրովդ ի հոգիս հանգուցեալ ծառայից քոց: Յիշեա՛ յաւուր մեծի գալստեան արքայութեան քոյ: Արա՛ արժանի ողորմութեան, քաւութեան եւ թողութեան մեղաց: Դասաւորեալ պայծառացո՛ ընդ սուրբս քո յաջակողման դասուն: Ջի դու եւ Տէր եւ Արարիչ ամենեցուն, դատաւոր կենդանեաց եւ մեռելոց, եւ քեզ վայել է փառք, իշխանութիւն եւ պատիւ այժմ եւ միշտ:

Օրհնեալ Տէր մեր Յիսուս Քրիստոս. ամէն:

Հայր մեր որ յերկինս:

### *Մաղթանք*

Զսաղմոսերգութիւնս եւ զաղաչանս ընկալցի մարդասէրն Աստուած ի հաճոյս բարերար կամաց իւրոց, մեր մեղացն եւ մեր բազում յանցանացն թողութիւն շնորհեսցէ, ի չարեաց փրկեսցէ, ի մեղաց պահեսցէ. եւ նմա փառք յաւիտեանս. ամէն:

Օրհնեալ թագաւորութիւնն Հօր եւ Որդւոյ եւ Հոգւոյն Սրբոյ այժմ եւ միշտ եւ յաւիտեանս յաւիտենից. ամէն:

*Եւ ասի ժամամուտ ըստ կարգի աւուրց պահոց եւ սօնից տէրունականաց եւ  
ամենայն սրբոց*

Պահոց ԲՉ, ԳՉ, ԵՉ

Որ ի Հօրէ առաքեցար, Փրկի՛չ, եւ մարմնացար ի սրբոյ Կուսէն, որ վասն մեր ի  
յերկնից իջեր եւ լուսաւորեցեր զտիեզերս: Զխաղաղութիւն քո տուր մեզ, Տէ՛ր, որ  
խաղաղութեանց եւ թագաւոր, զխաղաղութիւն եւ զողորմութիւն, որ յամենայնի եւ  
դու կարող, Մարդասէ՛ր:

ԴՉ, Ուր.

Որ ըստ ամենայն միտս անցանես, զխաղաղութիւն քո, Աստուած, տո՛ւր մեզ  
հանապազ, զքեզ աղաչեմք:

Կիրակի

Միածի՛ն Որդի եւ Բա՛նդ Աստուած եւ անմահ էութիւն, որ յանձն առեր  
մարմնանալ ի սրբուհոյ Աստուածածնէն եւ ի միշտ Կուսէն, անփոփոխելի մարդ  
եղեալ խաչեցար, Քրիստո՛ս Աստուած մեր, մահուամբ զմահ կոխեցեր, Մինդ ի  
Սրբոյ Երրորդութենէն, փառաւորակից ընդ Հօր եւ Սրբոյ Հոգւոյն, կեցո՛՛ զմեզ:

Ծննդեան

Աստուածածի՛ն անհարսնացեալ, զԲանն անսկիզբն յղացար եւ զԱստուածն  
անիմանալի ծնար, զանպարագրելին ի զիրկս քո բարձեր, նմա անդադար  
բարեխօսեա՛ վասն անձանց մերոց:

Ծննդեան

Աստուածածի՛ն, զքեզ խոստովանեալ երկրպագէ Եկեղեցի ուղղափառաց, քանզի  
ուր քերովբէքն բազմաչեայք եւ աթոռք հրանիւթք եւ վեցթեւեան սերովբէքն նայիլ ոչ  
իշխեին, կրեցեր անսերմնապէս զանապականումն ի յարգանդի քում, որպէս  
աղախին զՏէր, եւ ծնար որպէս զմարդ զԱստուածն բոլորից՝ զմարմնացեալն առ ի  
քէն զանճառ զԲանն, ի փրկութիւն աշխարհի եւ կեանք անձանց մերոց:

Ծննդեան

Աղաչե՛մք զքեզ, սո՛ւրբ կոյս Մարիամ Աստուածածին, Բարձրելոյն զօրութեամբն հովանաւորեալ եւ Սուրբ Հոգւոյն եկաւորութեամբն լուսաւորեալ, որ զամենայն գոյութեանց Ստեղծիչն յղացեալ ծնար անճառապէս, մարմնացելոյն առ ի քէն բարեխօսեա՛ կեցուցանել զանձինս մեր:

Տեառնընդառաջի

Ծերունին այսօր Սիմէոն Հոգւովն գայր ի տաճարն՝ երեւելով քերովբէիցն վեհագոյն. զի որոց թելօքն սաւառնեալ ոչ իշխեին հայել ի յահեղ փառացն, սա ի գիրկս իւր բարձեալ համբուրէր համարձակապէս եւ զգուէր որպէս զմանուկ եւ աղերսելով հայցէր արձակիլ ի խաղաղութիւն:

Տեառնընդառաջի

Անսկզբնական Բա՛նդ Աստուած, ի վերջին աւուրս յանձն առեր լինիլ մարդ ի Կուսէն, եւ Արարիչդ յաւիտենից փակեցար ընդ ժամանակաւ. սուրբ, Տէր սրբութեանց եւ անկարօտ մաքրութեանց, եկիր ի տաճարն քառասնօրեայ, զօրինացն կատարեցեր զարդարութիւն: Զոր բարձեալ Սիմէոնի զանպարագրելիդ ի գիրկս իւր՝ հայցէր. □Որ արձակիչդ եւ կապելոց, արձակեա՛ զիս ի խաղաղութիւն□: Վասն որոյ ընդ ծերունւոյն Սիմէոնի վերագոչեմք առ քեզ, Տէ՛ր՝ սուրբ, սուրբ, սուրբ, Տէ՛ր զօրութեանց, լի են երկինք եւ երկիր փառօք քովք ի փրկութիւն մեզ. Քրիստո՛ս Աստուած, փառք քեզ:

Ղազարու յարութեան

ԶՂազարու ննջումն որպէս կանխագէտ յառաջ ասէիր, որ եւ ի Բեթանիա յառաջէիր, զի յարուցես զսիրելին քո: Արդ եւ մեք գոչելով ասեմք՝ օրհնեալ, որ զաս ի չարչարանս կամաւ Հօր ի փրկութիւն անձանց մերոց:

Ղազարու յարութեան

Յորժամ եկեալ Կենարարդ ի գերեզմանն Ղազարու, յորժամ եկեալ կենարարդ ի գերեզմանն Ղազարու, աւետաւոր ձայնիդ աղաղակէիր՝ ասելով. «Ղազարէ՛, արի ե՛կ արտաքս»: Իսկ մեռեալն ի գերեզմանէն յարեաւ, եւ նոյն ինքդ զանմահութեան պարգեւսդ ետուր սիրելւոյդ եւ աստուածային ձայնիդ ի գերեզմանէն կոչեցեր: Վասն որոյ եւ մանկունք եբրայեցոց ոստովք օրհնէին զանմահ թագաւորութիւն քո: Ընդ նոսին եւ մեք ասեմք՝ ո՛վսաննա, օրհնեա՛լ է գալուստ քո. օրհնութի՛նն ի բարձունս, օրհնեալ, որ գալոց ես անուամբ Տեառն:

Ծաղկազարդի

Յնձա՛, Երուսաղէ՛մ, եւ զարդարեա՛ զառագաստ քո, Սիո՛ն, քանզի ահա թագաւոր քո Քրիստոս նստեալ ի յաւանակի նորոյ, հեզութիւն ցուցանելով, գայ մտանէ յառագաստ քո: Եւ մեք աղաղակեմք՝ ո՛վսաննա, օրհնեալ, եկեալ ի յանուն Տեառն, որ ունի զմե՛ծ զողորմութիւն:

Զատկի

Քրիստոս յարեաւ ի մեռելոց, մահուամբ զմահ կոխեաց եւ յարութեամբն իւրով մեզ զկեանս պարգեւեաց. նմա փառք յաւիտեանս. ամէն:

Յինանց

Ահաւոր եւ սքանչելի է խորհուրդ փրկութեան մերոյ, որ անսկիզբն ի Հօրէ անճառաբար մարմնացաւ ի Կուսէն, իսաչի համբերելով եւ կամաւոր մահուամբն իւրով զկենդանութեան մեզ պարգեւեաց շնորհս:

Յինանց

Քանզի յարեաւ ի մեռելոց Քրիստոս Աստուած յաւիտենից, Արարիչ եւ յարութիւն ազգի մարդկան. զոր օրհնեն անդադար զինուորութիւնք հրեշտակաց եւ ամենայն զուարթունք երկնից, ընդ որս գոչելով՝ ասեմք՝ փա՛ռք սոսկալի յարութեան քո, Տէ՛ր:

Համբարձման

Հիացան վերնական բազմութիւնքն. տեսանելով զքեզ ի հրեղէն կառս բազմեալ՝ սարսեալ ասէին. թող է սա, որ դիմեալ գայ յԵղովմայ. եւ եկեալ մտանէ փառօք ի փառս. Տէ՛ր, փա՛ռք քեզ:

#### Համբարձման

Որ յանպատում աթոռ նստիս եւ յանմարմնոցն վերօրհնիս, անհասանելի Բա՛նդ Աստուած, ի յերկրի երեւեցար ճշմարիտ մարդ զտնօրէնութեանն կատարեալ զխորհուրդ, խաչի եւ մահու համբերեցեր եւ զհրաշալի զյարութիւնդ քո ցուցեր հզօր զօրութեամբ, այսօր համբարձար փառօք ի յերկինս եւ զկուսածին մարմինդ քո հրաշափառապէս լուսազարդեցեր, զոր տեսեալ Եսայիաս՝ նախաձայնեալ ասէր. թող է սա, որ դիմեալ գայ յերկրէ: Հիացեալ պետութեանց երկնից գոչէին առ միմեանս. թհամբարձէ՛ք, իշխա՛նք, զդրունս ձեր ի վեր, եւ մտցէ թագաւոր փառաց: Արդ, որ յամենայնի կարողդ ես եւ հզօր, շնորհեա՛ եւ մեզ հանդիպիլ քեզ ամպովք ի միւսանգամ քո գալստեանդ, որ միայնդ ես մարդասէր:

#### Հոգւոյ գալստեան

Աստուած զքեզ խոստովանիմք՝ զՍուրբ Հոգիդ, եւ երկիր պագանեմք, որ ես պատճառ կենդանութեան եղելոցս եւ խաղաղարար աշխարհի, որ զտգիտութիւն աշակերտացն բազում զիտութեամբ լցեր եւ ի հրեղէն լեզուս բաժանեալ անճառելեօք ցուցար նոցա, աղաղակեմք՝ Տէ՛ր, խնայեա՛ եւ կեցո՛ զմեզ:

#### Բ2

Այսօր ի հրեղէն լեզուս բաժանեալ հանգեար յառաքեալսն՝ լուսաւորելով զնոսա, եւ այժմ աղաչեմք զքեզ, Սուրբ Հոգիդ Աստուած, որ ես պատճառ կենդանութեան եղելոց եւ խաղաղարար աշխարհի, խնայեա՛ եւ կեցո՛ զմեզ:

#### Գ2

Վասն որոյ եւ մեք զՀոգիդ Սուրբ Աստուած ընդ Հօր եւ ընդ Որդւոյ միասնական խոստովանիմք եւ հայցեմք մեզ ի Վերնաստուողէդ զհոգեւորական խաղաղութիւնդ. Տէ՛ր, փառք քեզ:

## Վարդավառի

Երեւի Տէրդ այսօր աշակերտացն ի Թաբորական լերինն, եւ աշակերտացո զարհուրեալք աղաղակէին՝ ասելով. □Արասցուք երիս տաղաւարս. մի՛ Տեառնդ, եւ մի՛ Մովսիսի, եւ մի՛ Եղիայի□: Արդ եւ մեք՝ բանաւոր հօտ քոյ, երգեմք ընդ քո ճշմարիտ վկայիցդ՝ առաքեա՛ ի մեզ զլոյս քո շնորհացդ ի քոյ միւսանգամ գալստեանդ եւ կեցո՛:

## Խաչի

Առաջի պատուական ամենայաղթ խաչի քոյ անկանիմք երկրպագելով եւ խնդրեմք զթողութիւն յանցանաց մերոց, քանզի սովաւ բարձեր զդատապարտութիւն ազգի մարդկան: Եւ այժմ վասն սրբոյ աստուածային քոյ նշանի շնորհեա՛ զերկնային զխաղաղութիւնդ ամենայն աշխարհի:

## Էջմիածնի

Տէր մեր եւ Փրկիչ Յիսուս Քրիստոս, որ աղօթիւք եւ միջնորդութեամբ բազմաչարչար վկային քո եւ հօրն մերոյ սրբոյն Գրիգորի Լուսաւորչին եւ մեծաւ փառօք եւ բազմութեամբ զօրացոյ լուսեղինաց իջեր յերկնից ի դաշտն Արարատեան՝ ի յայցելութիւն փոքու հօտիդ քոյ ազգիս հայոց եւ ի ցուցումն յատկականի սիրոյդ եւ մեծի ողորմութեանդ. եւ ոսկէ ուռամբ բաղխեցեր զխորս անդնդոց եւ հալածեցեր զգունդս սանդարամետականաց, ուր եւ լուսաձեւ յօրինմամբ հրաշագործեցեր զՄայր Աթոռն մեր զՍուրբ Էջմիածին, եւ արարեր զնա շտեմարան անսպառելի շնորհացոյ աստուածայնոց՝ ի լինել ծնող, դաստիարակ եւ կատարելագործիչ ամենայն եկեղեցեացս Հայաստանեայց: Արդ, պահեա՛ զնա անարատ, հաստատուն եւ անաղօտ ի պայծառագարդութիւն եկեղեցեացս մերոց եւ մանկանս սոցին մինչեւ ի կատարած աշխարհի, յորոց միշտ փառաւորի ամենասուրբ անուն քո յաւիտեանս յաւիտենից. ամէն:

## Եկեղեցւոյ

Ջիսաղաղութիւն շնորհեա եկեղեցոյ քում սրբոյ, զիսաղաղութիւն եւ զանշարժութիւն  
ի թշնամեաց պատերազմէ, եւ հաստատեա՛ ի մի հաւատ զկաթողիկէ եկեղեցի,  
զքեզ խոստովանիմք Տէր եւ Աստուած, կեցո՛ զմեզ:

### Յովհաննու Մկրտչին

Ջյառաջընթացութիւն քո եւ զկարապետութիւն Աստուծոյ Բանին խափանել  
կարծելով, որ ի ձեռն կնոջն զնախաստեղծն ի դրախտէն արտաքս ընկէց, նա եւ  
այժմ զՀերովդիադա անօրէնութեամբ բորբոքեալ եւ բազմելոցն Հերովդեայ՝  
զկաքաւս ոտից աղջկանն հաճոյացոյց, զի զքոյդ հասցէ զգլուխ, որ զամենեցուն  
ձեռնադրեցեր զգլուխն Քրիստոս: Այլ դու, որ յանապատէ բարբառոյ ձայն, գոչեա՛  
որում ձեռնադրեցեր՝ պարզելել զիսաղաղութիւն եւ զմեծ գողորմութիւն:

### Ստեփանոսի

Տնծա՛ այսօր, ցնծա՛ եւ զուարճացի՛ր, կաթողիկէ՛ եկեղեցի սուրբ, յիշատակաւ  
սրբոյն Ստեփանոսի նախավկային Քրիստոսի վկայելոյ Հօր: Որ աղօթիւք բանայր  
զերկինս, զոր փակեաց Ադամ, եւ հրեշտակակերպ տեսլեամբ տեսանէր  
զկերպարանն Հօր ի կերպի Ադամայ նստեալ ի յաթոռ փառաց: Որ զբազմութիւն  
քարանցն որպէս զծաղիկս հաւաքելով՝ բոլորէր պսակս փոխանակ փշոցն եւ  
եղեգան եւ զմարտիրոսական արիւնն խառնէր ընդ փրկական արեանն Քրիստոսի  
հոսեցելոյն ի կողէն: Վասն որոյ գերազանցեալ ի փառս առաւել, քան զամենայն  
սուրբս, հայցէր եւ վասն մեր ի Վերնատուողէն զպարգեւս կենաց անվախճանից եւ  
զմեծ գողորմութիւն:

### Ստեփանոսի

Յորովայնէ ընտրեալ սուրբն Ստեփանոս, վկայ ճշմարիտ առաքելական  
քարոզութեանցն, որ ի վերայ անօրէն քարաձգողացն աղօթէր առ Քրիստոս  
Աստուածո՞ւ ասելով. □Մի՛ համարիր սոցա զայս մեղս□: Արդ, ի ձեռն սորին  
բարեխօսութեան շնորհեա՛ մեզ, Տէ՛ր, զմեծ քո գողորմութիւնդ:

### Լուսաւորչի

Ցնծայ այսօր, ցնծայ եւ զուրաճանայ եկեղեցի սուրբ՝ տօնելով մեծաւ հանդիսիւ զհանրատենչ յիշատակս քո, ո՛վ գերազանցեալդ ի հարս սուրբ հայրապետ եւ լուսաւորիչ տանս Թորգոմայ սուրբդ Գրիգոր: Որ քոյով անտանելի չարչարանօքդ զաշխարհս ամենայն հիացուցեր, անօրինակ ճգնութեամբդ զհրեղէնսն զարմացուցեր, որք եւ զունդ յերկնից ի յերկիր խոնարհեալ ի տես հանդիսի նահատակութեանդ փութային: Եւ անհամեմատ համբերութեամբ զգոռոզացեալ արքայն իրական զօրօքն ընդ ոտիւքդ նուաճեցեր: Եւ աստուածահաճոյ աղօթիւքդ զկուրացեալ միտս նոցին լուսաւորեցեր եւ աւետարանին Քրիստոսի պաշտօնեայս արարեր: Ընդ նմին եւ զազգս հայոց նորոգ հոգեւոր ծննդեամբ ի լոյս աստուածգիտութեան ածեր: Վասն որոյ եւ յատկապէս

լուսափայլեցար ի մէջ ամենայն սրբոց եւ զառաքելականն ընկալար աթոռ եւ զպատիւ եւ ընդ նոսին պսակեցար ի Քրիստոսէ Աստուծոյ: Արդ, ո՛վ հայր մեր եւ լուսաւորիչ հոգւոց մերոց, աղաչե՛մք զքեզ միաբան ուխտիւք եկեղեցւոյ քոյ, զի յաւուրս հրաշալւոյ տօնի քոյ յատկապէս բարեխօսիցես առ Քրիստոս Աստուածն մեր, զի զեկեղեցիս եւ զմնացորդս ժողովրդեան քոյ պահեսցէ ի խաղաղութեան՝ փրկելով ի հոգեւոր եւ մարմնաւոր թշնամեաց, զի եւ մեք միշտ զյիշատակս քո կատարելով՝ փառաւորեսցուք զՀայր եւ զՈրդի եւ զՍուրբ Հոգին յաւիտեանս. ամէն:

#### Լուսաւորչի

Գրիգոր սո՛ւրբ քահանայապետ, որ զհաւատս ուսուցեր եւ զբանակս դիւացն հալածեցեր, մարդկան ուսուցեր քարոզել զԵրրորդութիւնն, պսակեցար յարքայութեանն, արդ բարեխօ՛ւ լեր առ Տէր վասն մեր:

#### Առաքելոց

Առաքեալք եւ վկայք Քրիստոսի Աստուծոյ, ամենակալ Հոգւոյն զօրութեամբ զամենեսեան ընդհանուր յորդեգրութիւն կենաց կոչելով, միասնական Սուրբ Երրորդութեան յորդորեցին երգել զփառս ի յաւիտեանս. ամէն:

#### Որդւոց Որոտման

Այսօր ահաւոր ձայնք որոտման հնչեցին յերկնից ի յերկիր՝ կոչելով յորդեգրութիւն զմեզ վերնոյն Սիոնի, հաստատութիւնք հաւատոյ եւ պարծանք եկեղեցւոյ, որք ցօղով արեան իւրեանց մաքրեցին զտիեզերս յանօրէն կռապաշտութեանց եւ միշտ հայցեն ի Քրիստոսուէ զքաւութիւն տօնողացս անուանց իւրեանց: Արդ, մաղթանօք սոցա, Տէ՛ր, խնայեա՛ ի փրկեալ քո ժողովուրդս, որ միա՛յնդ եւ մարդասէր:

Մարգարէից

Տէ՛ր, որ հիմնեցուցեր զեկեղեցի քո ի վերայ վիմի հաւատոյ եւ կարգեցեր ի սմա առաքեալս եւ մարգարէս, հովիւս եւ վարդապետս առ ի հաստատութիւն սրբոց, եւ ճգնութեամբ վկայից զթշնամին սորա վանեցեր, ի խաղաղութեան զսա պահեա՛, Աստուա՛ծ, որպէս մարդասէր:

Հայրապետաց

Զհայրապետականն զարդարեցեր աթոռ ի յերկրի, առաքելական առեր զպատիւ յերկնուստ, ծառայ՝ Քրիստոսի, ո՛վ երանելիդ ի հարս սուրբ հայրապետ: Քանզի քո վարդապետութեանդ սերմունք բարեպաշտութեան բուսուցին հասկս՝ ուրախութեան պտուղ հատուցանելով եւ հաւատացելոցս փրկութիւն շնորհելով, վասն որոյ բարեխօսեա՛ առ Տէր վասն անձանց մերոց:

Թագաւորաց Կոստանդիանոսի եւ Թէոդոսի

Որպէս յետ աստուածասէր թագաւորին Իսրայելի Եզեկիայ յարոյց Աստուած զՅովսիա, որ զամենայն կռապաշտութիւնսն ի բաց ընկեց, որպէս եւ զբարեպաշտն Կոստանդիանոս, որ զԱրիոսի զմոլումն խափանեաց, եւ զմեծն Թէոդոս յարոյց աստուածային նախանձուն վառեալ ընդդէմ այնոցիկ, որք զՍուրբ Հոգին հայհոյէին: Արդ, ո՛վ աստուածարեալ եւ ուղղափառ սուրբ թագաւոր, աղաչեա՛ զՏէր ի փրկել զմեզ ի մարդապաշտ հայհոյութենէ, զի եւ մեք տօնեսցուք զիշատակս քո՝ խնդրելով ի Քրիստոսուէ զհաշտութիւն եւ զմեծ զողորմութիւն:

Թագաւորաց Աբգարու եւ Տրդատայ

Որպէս յետ աստուածասէր թագաւորին Իսրայէլի Եզեկիայ յարոյց Աստուած զՅովսիա, որ զամենայն կռապաշտութիւնսն հնոյ ժողովրդեանն ի բաց ընկեց, որպէս եւ ի նորումս յարոյց զանդրանիկն թագաւորաց զբարեպաշտն Աբգար, որ ի հեռաստանէ ծանեաւ զերկնաւոր թագաւորն զՔրիստոս եւ եղև քարոզ Աստուածութեան նորա ընդ ծագս տիեզերաց: Յետ նորին եւ զմեծն Տրդատ, որ իսպառ հալածեաց զդիւսմով կռապաշտութիւնսն յաշխարհէս Հայաստանեայց եւ զարդարեաց ճշմարիտ եւ ուղղափառ հաւատով: Արդ, ո՛վ աստուածարեալ եւ բարեպաշտ սուրբ թագաւոր, աղաչեա՛ զՏէր ի փրկել զմեզ յանօրէն բռնաւորաց, զի եւ մեք, տօնելով զյիշատակս քո, խնդրեսցուք ի Քրիստոսէ զխաղաղութիւն եւ զմեծ զողորմութիւն:

#### Մարտիրոսաց

Ի տաճարի սրբոց եւ յիշատակի սրբոց մարտիրոսաց զձեռս համբառնալով աղաչեմք՝ բարեխօսութեամբ սոցա եւ աղօթիւք զկենդանութիւնս մեր խաղաղացո՛, Աստուա՛ծ, որպէս մարդասէր:

#### Ճգնաւորաց

Ճգնաւորք Քրիստոսի, որք տանջանաց անօրինացն համբերեցիք եւ զմոլութիւն կոոցն խափանեցիք, դասաւորեալք ընդ հրեշտակս ի յերկինս՝ ունիք զհամարձակութիւն ի Քրիստոսէ, բարեխօսեցե՛ք կեցուցանել զանձինս մեր, զձեզ աղաչեմք:

#### Հոփսիսմեանց

Որք ծագեցան մեզ յարեւմտից որպէս զարեգակն եւ լուսաւորեցին համանգամայն զաշխարհս Հայաստանեայց, փարատեցին զխաւարն անգիտութեան կռապաշտութեան եւ լուսաւորեցին զամենայն հոգի հաւատով աստուածգիտութեան, սոցա բարեխօսութեամբն, Քրիստո՛ս Աստուած, պարգեւեա՛ աշխարհիս քում զխաղաղութիւն եւ անձանց մերոց զմեղաց թողութիւն, որպէս մարդասէր Տէր:

### Գայիանեանց

Չյաղթական ձեր զհանդէս զուարճացեալ տօնէ եկեղեցի սուրբ, քանզի սրբութեամբ ստացայք զկուսութիւն եւ ի մարմնի զանմարմնոցն ցուցիք զհանդէս:

### Կուսանաց

Հարսնացեալք Քրիստոսի երկնաւոր փեսային, դասե՛րք վերին Սիոնի, խնդրեցէ՛ք ի Քրիստոսէ զհաշտութիւն եւ զմեծ զողորմութիւն:

### Վարդանանց

Յաշխարհական ի ճակատամարտին, յաշխարհական ի ճակատամարտին եւ ի մեծ պատերազմին ընդդիմամարտեալ լինէր անօրինացն պատերազմ: Իսկ երանելի նահատակքն զմոլութիւն անօրինացն խափանեցին եւ յաղթող գտան, քանզի որոց ստացեալ էր զաստուածային զօրութիւն, ոչ ժուժկալէր նոցա մարմնաւորական պատերազմ: Արդ, Քրիստոս'ս Աստուած, սոցա բարեխօսութեամբն խնայեա՛ ի մեզ եւ ողորմեա՛:

### Զինուորաց

Զօրակա՛ն եւ վկայ՛ ճշմարիտ, քաջ նահատակդ Քրիստոսի սուրբդ *Թէոդորոս'ս*, որ փոխանակեցեր զմարմինդ ընդ հոգւոյդ քում փրկանսս եւ ոչ ածեր զմտաւ զսպառնալիսն անօրէն բռնաւորացն, այլ վերին ազդեցութեամբն զիտելով զայրեցումն հոգւոցն նոցա, վասն այնորիկ լուցեր զտաճար կոռցն եւ անարգեցեր զպաշտամունսս նոցա: Արդ, ի յաղթող պատերազմի տօնողացս զօր նահատակութեան քոյ բարեխօսեա՛ առ Տէր վասն անձանց մերոց:

### Քառասուն մանկանց

Գնալով փառաց քոց ի փառս կաթողիկէ եկեղեցի քո, Քրիստոս'ս, մեծապէս պայծառանայ, քանզի թագաւորեալքն ի քէն, դիմեալք ի յերկինս, ի Սեբաստիա նահատակին ի յամօթ եւ ի քարընկէց յերեսս բանսարկուին: Որք եւ քաջալերէին զմիմեանս, զի մի՛ լուծեալ ոք բաղանօք անցաւորիս՝ պակասեսցի, այլ դողալով առաքինաբար՝ զինքն զերծեալ ի յանիւս աստուածային զանձուցն՝ հոլովիցի

աղաղակելով առ Քրիստոս: Արդ, սոցա բարեխօսութեամբն ընկա՛լ եւ զորդեգրութիւն ժողովոյս մերոյ ի յոյս սիրողաց քոց, Տէ՛ր, փառք քեզ:

Երից մանկանց

Որ ի վերայ քերովբէիցն հանգչիս եւ ի զօրացն հրեղինաց օրհնաբանիս, իջեր ի Բաբիլոն եւ փրկեցեր զերիս մանկունսն ի հրոյն բռնութենէ, որք աղաղակելով՝ գոչէին երգ նոր. □Ամենա՛յն գործք, օրհնեցէ՛ք եւ բա՛րձր արարէք□:

Թագաւո՛ր փառաց եւ Արարի՛չ բոլորից, որ մարդասիրապէս գթացար ի սուրբ մանկունսն եւ փրկեցեր ի բորբոքեալ բոցոյն, որք անարգեցին զբռնութիւն թագաւորին եւ շիջուցին զգօրութիւն հրոյն, ընդ նոսին եւ մեք քեզ վերագոչեմք՝ փրկեա՛ զմեզ ի հրոյն յաւիտենից, զի դու միայն ես բազմագութ Տէր, քեզ փառք յաւիտեանս. ամէն:

Հրեշտակապետաց

Ձոր օրհնեն անլռելի ձայնիւ իմանալի զօրութիւնք, երկնաւոր նահապետութիւնք, հրեշտակք եւ հրեշտակապետք, աթոռք եւ տէրութիւնք, իշխանութիւնք եւ պետութիւնք, սերովբէք եւ քերովբէք, եւ մեք օրհնեսցուք զնոյն Ամենասուրբ Երրորդութիւն եւ զՄի Աստուածութիւն:

Հրեշտակապետաց

Այսօր երկրաւորս եկեղեցւոյ քահանայապետութիւն ցնծայ հրաշափառապէս՝ զերկնաւոր քահանայապետութեանցդ կատարելով զտօնախմբութեան տօնս: Եւ ընդ անմարմնականաց եւ հոգեղինաց դասուցդ եւ մեք մարմնականքս եւ հողեղէնքս համաձայնեալ՝ փառաւորեմք զփառաւորեալսն ի ձէնջ: Արդ, ո՛վ սուրբ Գաբրիէլ եւ Միքայէլ՝ մեճ հրեշտակապետք Բարձրելոյն, եւ ամենայն զինուորութիւնք երկնից, որք կայք միշտ առաջի աթոռոյ Աստուածութեանն, անդադար բարեխօս՝ լերուք վասն մեր առ Տէր՝ վերաբերեալ զմեզ զամենեսեան ընդ ձեզ յերկնից արքայութիւնն եւ միաձայն բարբառով երգել զփառս:

Ամենայն սրբոց

Բարեխօսութեամբ սրբուհոյ Աստուածածնին, սրբոյն Յովհաննու կարապետին, սրբոյն Ստեփանոսի նախավկային եւ սրբոյն Գրիգորի մերոյ Լուսաւորչին եւ սրբոց առաքելոց եւ մարգարէից, հայրապետաց եւ վարդապետաց, մարտիրոսաց եւ թագաւորաց, ճգնաւորաց եւ կուսանաց, նահապետաց եւ միանձանց եւ ամենայն սրբոց քոց հնոց եւ նորոց, յայտից եւ անյայտից, որոց այսօր է յիշատակ, զխաղաղութիւն եւ զերկնային ողորմութիւն քո պարգեւեա՛ մեզ, մարդասէ՛ր Տէր:

(քրզ) Եւ եւս խաղաղութեան զՏէր աղաչեսցուք. ընկա՛լ, կեցո՛ւ եւ ողորմեա՛:

(քհ) Օրհնութիւն եւ փառք եւ Հօր եւ Որդոյ եւ Հոգւոյն Սրբոյ այժմ եւ միշտ եւ յաւիտեանս յաւիտենից. ամէն:

Խաղաղութիւն ամենեցուն:

Ճ Ա Շ Ո Ի Փ Ո Խ Ք

ԽՐԱՏՔ

*Աւետեաց, Ծննդեան, Տեառնընդառաջին, Վարդափառին, Վերափոխման եւ  
ամենայն տօնից Աստուածածնին ճաշու փոխն այս է*

Մեծացուցէ անձն իմ զՏէր, եւ.

*Տե՛ս էրես 235:*

*Աղուհացից, Ծաղկազարդի, Հոգւոյ գալստեան, Խաչի, Եկեղեցւոյ եւ ամենայն  
կիրակէից ճաշու փոխն այս է՝*

Տէր թագաւորեաց, զվայելչութիւն զգեցաւ, զգեցաւ Տէր զօրութիւն ընդ մէջ իւր էած:

Հաստատեաց զաշխարհ, զի մի՛ սասանեսցի. պատրաստ է աթոռ քո, ի սկզբանէ  
յաւիտեանս դու ես:

Ամբարձան գետք, Տէ՛ր, եւ ամբարձին՝ գետք զձայնս իւրեանց, եւ յարիցեն գետք ի  
զնացս իւրեանց:

Ի ձայնէ ջուրց բազմաց սքանչելի եղեն զբօսանք ծովու: Սքանչելի ես դու, Տէ՛ր, ի բարձունս. վկայութեանց քոց մէք յոյժ հաւատացաք:

Տան քում վայել է սրբութիւն, Տէ՛ր, ընդ երկայն աւուրս:

Փառք Հօր եւ. այժմ եւ միշտ եւ:

*Ձատկին եւ մինչեւ ի Հոգւոյ գալուստն այս է ճաշու փոխն*

Գովեա՛, Երուսաղէ՛մ, զՏէր:

Եւ օրհնեա՛ զԱստուած քո, Սիո՛ն:

Զի զօրացոյց զնիզս դրանց քոց եւ օրհնեաց զորդիս քո ի մեզ:

Ո եղ զսահմանս քո ի խաղաղութիւն, պարարտութեամբ ցորենոյ լցոյց զքեզ:

Առաքէ զբան իւր յերկիր, վաղվաղ ընթանան պատգամք նորա:

Դնէ զձինն որպէս զասր եւ զմեզ որպէս փոշի ցանեաց:

Արկանէ զսառն որպէս պատառս. առաջի ցրտոյ նորա ո՞ կարէ կեալ:

Առաքէ զբան իւր եւ հալէ զնոսա, շնչեսցեն հողմք, եւ գնասցեն ջուրք:

Պատմէ զբան իւր Յակոբայ, զարդարութիւն եւ զիրաւունս Իսրայելի:

Ոչ այսպէս արար ամենայն ազգաց Տէր եւ զդատաստանս իւր ոչ յայտնեաց նոցա:

Փառք Հօր եւ. այժմ եւ միշտ եւ:

*Ամենայն Սրբոց տօնից ճաշու փոխն այս է*

Սիրեցի, զի լուիցէ Տէր զձայն աղօթից իմոց. զի խոնարհեցոյց զուն.

*Տեւ երեւ 325:*

*Շաբաթապահոց, յորս տօն ոչ տօնի, եւ ամենայն չորեքշաբաթի եւ ուրբաթի, յորս պահք լինի, ճաշու փոխն այս է*

Օրհնեցէ՛ք զՏէր, ամենա՛յն ազինք, գովեցէ՛ք զնա, ամենա՛յն ժողովուրդք: Զօրացի ողորմութիւն նորա ի վերայ մեր, եւ ճշմարտութիւն Տեառն մնասցէ յաւիտեան:

Փառք Հօր եւ. այժմ եւ միշտ եւ:

Ճ Ա Շ Ո Ւ Ի Շ Ա Ր Ա Կ Ա Ն Ք

*Եւ ապա ասի ճաշու շարական ըստ պատշաճի տօնից*

*Կիրակէից Յարութեան*

(աձ)

Զթագաւորն փառաց Քրիստոս, որ վասն մեր մարմնացաւ ի սրբոյ Կուսէն եւ խաչի համբերելով, միաբանութեամբ երգով բարեբանեցուք:

Որ զթաղումն երեքօրեայ յանձն էառ յարուցեալ ի մեռելոց իշխանութեամբ, միաբանու:

Կարողապէս զդրունս դժոխոց խորտակեաց, եկեղեցոյ իւրում զգեցոյց զմեծ վայելչութիւն, միաբանութեամբ երգով բարե:

*Հրեշտակապետաց*

(դկ)

Այսօր ուրախացեալ սուրբ եկեղեցի Քրիստոսի տօնէ խրնդութեամբ զտօն Վերինն Երուսաղեմի, սրբասաց ձայնիւ փառաւորելով զՔրիստոս:

Այսօր համաձայնեալ որդիք Սիոնի երկրայնոյ, տօնիւ զուարճանան որդոց անդրանկաց վերին Սիոնի, սրբա:

Այսօր դասք անմարմնոցն երգս առեալ պարեն ընդ մարդկան, զերգս հոգեւորս յանմահ Փեսային յառագաստ, սրբա:

*Մարգարէից*

(աձ)

Ճառագայթ անճառ լուսոյ անքննելի տէրութիւն, յառաջագոյն հրաշացուցեր զտեսողութիւն մարգարէիցն՝ իջանելով ի ստորինս աստուածային տնօրէնութեամբ:

Որք զտաճար հաւատոյ հիմնեցուցին շնորհօք Սուրբ Հոգւոյն, յոր եմուտ Բանն Աստուած եօթնարփեան ճառագայթիւք, իջա:

Երեւեցաւ յաշխարհի ճշմարիտ մարդեղութեամբ, զոր քարոզեցին մեզ հրաւիրողքն համագոյ չօր եւ շոգւոյն, լուսաւորելով զտիեզերս աստուածային տնօրէնութեամբ:

### *Ամենայն չորեքշաբաթի պահոց*

(դկ) Փառաբանութիւն առաքեմք քեզ, Հա'յր երկնաւոր, յիշեա՛ զննջեցեալսն մեր եւ հանգո՛ ընդ սուրբս քո:

Որ էակիցդ եւ չօր եւ շոգւոյ, Որդի՛դ Միածին, յիշ:

Որ փառակիցդ եւ չօր եւ Որդւոյ, շոգի՛դ ճշմարիտ, յիշ:

### *Առաքելոց*

(ակ) Որ սիրողդ էք Արարչին արարածոց, Քրիստոսի սո՛ւրբ առաքեալք. բարեխօսեցէք առ Տէր վասն մեր:

Որ քարոզդ էք ընդհանուր տիեզերաց, Քրիստոսի սո՛ւրբ առաքեալք. բարե:

Որ պսակդ էք ամենայն եկեղեցեաց, Քրիստոսի սո՛ւրբ առաքեալք, բարեխօսեցէ՛ք առ:

### *Ուրբաթի պահոց*

(դկ) Որ անսկիզբն յեութեան եկիր յաշխարհ, մարմնացար ի Կուսէն յաղագս մերոց պարտեաց, հանգո՛ զննջեցեալսն մեր:

Որ ի չօրէ լուսոյ լոյս ծագեցար մեզ եւ կեանք, Միածի՛ն Որդի չօր համագոյակից, հանգո:

Որ ի վերդ եւ քան զմիտս եւ զխորհուրդս եւ խաչի համբերեալ փրկեցեր զտիեզերս, հանգո՛:

*Շաբաթապահոց, յորս սուրբք ոչ տօնեցին. երկուշաբաթի, երեքշաբաթի, հինգշաբաթի, զայս սաս:*

(գձ) Քրիստոս'ս Աստուած, յիշեա՛ զննջեցեալսն ի սուրբ անունդ քո: Զգինս արեան քո, Տէ՛ր, յիշեա՛ եւ հանգո՛ ընդ սուրբս քո:

Եւ ի միսսանգամ քո գալստեանն զննջեցեալսն մեր յիշ:

### *Ուրբայթի շաբաթապահոց*

(բկ) Որ յանէից ստեղծող գոյից, արարչակից Հօր

Բա՛նդ Աստուած, թողութիւն շնորհեա՛ ննջեցելոց քոց ծառայից, յորժամ գաս դատել, զոր անարատ ձեռօք ստեղծեր:

Որ ի Հօրէ առաքեցար եւ մարմնացար ի սուրբ Կուսէն, թողու:

Որ ի խաչին անշնչացար, զմահու լուծեր զիշխանութիւն, թողու:

Որ պսակիչդ ես քոց սրբոց եւ անվախճան բարեաց բաշխող, թողու:

### *Մարտիրոսաց*

(գկ) Ճգնաւորք ճշմարիտք եւ վկայք Քրիստոսի, որք զչարչարանս եւ զմահ յանձն առիք վասն Տեառն, զձեզ ունիմք բարեխօս առ Քրիստոս վասն անձանց մերոց:

Քանզի հեղմամբ արեան ձերոյ պայծառացան սուրբ եկեղեցիք եւ զստուերամած խաւար կռապաշտութեանն բարձիք, զձեզ:

Երկնային զօրքն իջեալ ի պատիւ պատարագի մահուան ձերոյ եւ զպսակս անապականս առբերելով ի Հօրէ լուսոյ, զձեզ ունիմք:

### *Աւետեաց*

(գկ) Աստուածածի՛ն, իտրան լուսոյ անվայրափակ արփւոյն կենաց, որ եղեր արեւելք արեգականն արդարութեան եւ նստելոցս ի խաւարի լոյս ծագեցար, վասն որոյ ամենեքեան զքեզ միշտ մեծացուցանեմք:

Անապական տաճա՛ր եւ մորենի՛ անկիզբելի, որ զանշէջ հուր Աստուածութեանն ի քեզ տարեալ կրեցեր, որով բնութեանս կիզեալ շիջաւ կրից բոց, վասն:

Կենդանի տապանա՛կ կտակարանաց Նորոյ Ուխտիս, որով ելք յերկիր աւետեաց հորդեալ Հոգւով ի քեզ տպաւորեալ Բանին, վասն որոյ ամե:

### *Ծննդեան*

(գձ) Սուրբ զԱստուածածինն օրհնութեամբ մեծացուցանեմք:

Աւետաւոր հրեշտակն աւետարանէր զճնեալ Փրկիչն ի սրբոյ Կուսէն:

Ասէ՛ ուրա՛խ լեր, բերկրեա՛լդ, քանզի Տէր տերանց է ընդ քեզ:

### *Տեանընդառաջին*

(դկ) Անսկիզբն Բանն յանսկզբնական ի Հօրէ եւ սկզբնաւորեալ ի Կուսէն մարմնոյ զգեցմամբ, բովանդակելով յորովայնի եւ ընդ Հօր գոլով եւ սահմանեալ ժամանակաւ ճնեալ լինի Աստուած եւ մարդ:

Մտեալ ընդ օրինօք անհիւթականն հողանիւթ գոլով, զի զհողածնեալքս Հօրն ընծայեցէ Աստուածորդի նոր ի ծոց Հօր, տղայ քառասնօրեայ բառնի ի գիրկս ծերունւոյն եւ յայտնապէս ծանուցանի՝ Աստուած եւ մարդ:

Վասն որոյ եւ Սիմէոն ցնծայր հոգւովն, աղաղակէր ի տաճարին՝ արդ արձակես զճառայս քո, Տէ՛ր, ըստ բանի քում ի խաղաղութիւն, զի ընդհանուր տեսի զՓրկողդ Աստուած եւ մարդ:

### *Ծաղկագարդին*

(դկ) Անսկիզբն Բանն Հօր, որ ի վերայ քերովբէիցն հանգչի, այսօր ի վերայ յաւանակի նորոյ նստեալ. օրհնեալ արքայ եկեալ անյաղթելի թագաւոր:

Յառաջ քան զյաւիտեանս Որդին, որ ի վերայ քառակերպիցն բազմի, այսօր ի ծերոց եւ ի տղայոց փառաւորեցաւ. օրհ:

Եկա՛յք, նո՛ր ժողովուրդք, ընդ անմարմնոցն դասս բազմութեան զսա հնչմամբ երգով քաղցր ձայնիւ փառաւորեցուրք. օրհ.:

### *Ջատկին*

(աձ) Յարեաւ Քրիստոս ի մեռելոց. ալէլուիա:

Եկա՛յք, ժողովո՛ւրդք, երգեցե՛ք Տեառն ալէ:

Յարուցելոյն ի մեռելոց ալէլուիա, որ զաշխարհս լուսաւորեաց. ալէլուիա:

### *Համբարձման*

(աձ) Որ համբարձան այսօր աստուածային իշխանութեամբ ի հայրական ի կառս, սպասաւորելով ի հրեշտակական դասուցն, որք նուագէին՝ ասելով՝ համբարձե՛ք, իշխա՛նք, գորունս ձեր ի վեր, եւ մտցէ թագաւոր փառաց:

Հիացան վերնական իշխանութիւնքն եւ սոսկալի ձայնիւ աղաղակէին առ միմեանս՝ ո՞վ է սա թագաւոր փառաց, եկեալ մարմնով եւ սքանչելի զօրութեամբ. համբար:

Եղանակէին վերնական պետութիւնքն հրաշալի ձայնիւ, երգէին երգ նոր՝ ասելով՝ սա ինքն է թագաւոր փառաց, փրկիչ աշխարհի եւ ազատիչ ազգի մարդկան. համբար:

### *Հոգւոյ Գալստեանն*

(բձ) Որ ի հարաշարժ ի յաղբերէն յառաջ բղխեալ անհատաբար ի յՈրդւոյ տիրապէս Սուրբ Հոգին, այսօր ի յերկնից սաստիկ հեղեալ ի դասս առաքելոցն լցուցիչ բոլորից, զնա օրհնեսցուք երկրպագելով:

Որ յանսկիզբն եւ ի միշտ ի յէէն նոյնագոյ բնութեամբ անորիշ բաժանմամբ ի յՈրդւոյ արարչակից Սուրբ Հոգին, այսօր հրով բաժանեալ լեզուս քարոզիցն, ի լոյս ածեալ զազգս մարդկան բաժանմամբ պէս-պէս շնորհաց. զնա:

Որ ի վերայ ջուրցն գոլով գոյացոյց զարարածս, անանջրպետն ի Հօրէ եւ յՈրդւոյ իշխանակից Սուրբ Հոգին այսօր վերածնեաց զազգս ամենայն ջրոյ կենդանւոյ բղխեալ յԵրուսաղէմ. զնա:

### *Վարդավառին*

(դկ) Ուրախացի՛ր, պսա՛կ կուսից Տիրամայր, այսօր Որդին քո զհայրենին փայլեաց զփառս. նմա յաւէժ յա՛նձն արա զանձինս մեր:

Նմա Մովսէս եւ Հեղիաս սպասեն, յանուն նորա ցնծան Թաբոր եւ Հերմոն. նմա յա:  
Եսայիաս զքեզ թեթեւ ամպ ետես, եւ Հայր յամպոյն զքո զՈրդին իւր դաւանեաց.  
նմա յաւեժ:

### *Փոխման Աստուածածինն*

(բձ) Անթառամ ծաղիկ, անդատապարտ շառաւիղ վերաբուսեալ յարմատոյն  
Յեսսեայ, զքեզ Եսայիաս կանխաւ վերագոչեաց եօթնարփեան շնորհաց Հոգւոյն  
ընդունարան գոլ, Աստուածածի'ն եւ կո'յս, զքեզ մեծացուցանեմք:

Համեղաճաշակ պտղոյն բանաւոր բարունա'կ, յորմէ կթեցաւ մեզ ողկոյզն անսպառ  
յուրախութիւն տրտմեցելոցն ի ճաշակմանէ ծառոյն գիտութեան, սրբուհի'  
անարատ, ամենեքեան զքեզ մեծացու:

Քաղաքավարեալ ի մարմնի անարատ վարուք, այսօր յառաքելոցն ամփոփեալ՝  
վերին ակնարկութեամբն վերափոխեցար յարքայութիւն Որդւոյ քո եւ Աստուծոյ  
մերոյ, բարեխօս'ս խոստովանողացս, զքեզ մեծա:

### *Խաչի*

(գկ) Յաղթող եւ զնոր օրհնութիւն միշտ ի բարձունս երգեսցուք թագաւորին  
Քրիստոսի, հաւատացեալ ժողովուրդք:

Որ եկն ի լուսաւորել զընտրեալ սուրբ զեկեղեցի եւ պսակեաց սուրբ խաչին, նմա  
զփառս երգեսցուք:

Այսօր եւ մեք տօնեսցուք զնաւկատիս Սուրբ Խաչին եւ Փրկողին մատուցուք  
փառք եւ պատիւ յաւիտեան:

### *Տապանակին*

(ակ) Որ ի սկզբանէ իմաստութեամբ հաստատեցեր զեկեղեցի, Հօ'ր իմաստութիւն,  
գոր նախանկար տեսութեամբ նշանակեալ Մովսէս խորանաւ երկնահանգոյն ի  
Սինա լերինն, լուսաւորելով փառօքն Աստուծոյ:

Որ զխորհուրդ անապական տնօրէնութեանդ քո ի սրբոյ Կուսէն տպաւորելով տապանակն աստուածային ուխտի կտակարանաց Բանիդ Աստուծոյ, փառաց անեղիդ տեղի հանգրստեան:

Որ ի կեանս վերադարձի բնութեանս դարձմամբն Յորդանանու օրինակեցեր եւ զբռնութիւն մահու եւ դժոխոց կործանմամբն Երիքովի տապանակաւ խաչին հրաշագործեալ նոր Իսրայելի, օրհնութիւն քեզ, Տէ՛ր, երգեսցեն մանկունք:

-----  
-----

### *Եկեղեցւոյ*

(դձ) Որ հաստատեցեր Բանիւ զեկեղեցի քո, Քրիստո՛ս, ի վերայ առաքելական վիմի՝ երգել ի սմա զերգս հոգեւորս:

Կանգնեալ ի սմա սեղան սրբութեան՝ բաշխէ զմարմին իւր եւ զարին եւ տայ ի սմանէ մեզ նորոգութիւն, ի թողութիւն մեղաց մերոց:

Իջեալ Հոգւոյն Սրբոյ աղանակերպ երեւմամբ ի վերայ մարմնոյ եւ արեանն Տեառն ի բժշկութիւն հոգւոց մերոց:

### *Հայրապետաց*

(դձ) Այսօր երկնայնոցն ընդ մեզ տօնախմբելով զյիշատակ սուրբ վարդապետացն, որք լուսաւորեցին զհաւատոյ մանկունս եւ ընդ հրեշտակացն դասս վերակարգեցան:

Այսօր առաքելոց եւ մարգարէիցն դասք, տօնակից գոլով դասեր Վերին Սիոնի ի յիշատակի սուրբ վարդապետացն, որք զիմաստից նոցին զխորոց յայտնեցին զխորհուրդ:

Այսօր քահանայք եւ պաշտօնեայք սուրբ եկեղեցւոյ վերապատուեն զյիշատակ սուրբ վարդապետացն, որովք զարդարեցան երկնային շնորհօքն, երգեն ընդ նոսին զփառս յաւիտեան:

Սուրբ Աստուած, սուրբ եւ հօր, սուրբ եւ անմահ.

*եւ այլն ըստ պատշաճի տե՛ս երես 305 (ճշտել):*

*Երիցս կրկնեա*

Եւ եւս խաղաղութեան զՏէր աղա.

(քրգ) Վասն խաղաղութեան ամենայն աշխարհի եւ հաստատութեան սրբոյ եկեղեցոյ զՏէր աղաչեցոյք:

Վասն ամենայն սուրբ եւ ուղղափառ եպիսկոպոսաց զՏէր աղա:

Վասն հայրապետին մերոյ տեառն (*այս անուն*) կենաց եւ փրկութեան հոգւոյ նորին զՏէր աղա:

Վասն վարդապետաց, քահանայից, սարկաւազաց, դպրաց եւ ամենայն ուխտի մանկանց եկեղեցոյ զՏէր աղ:

Վասն բարեպաշտ թագաւորաց եւ աստուածասէր իշխանաց, զօրավարաց եւ զօրաց նոցին զՏէր աղա:

Վասն հոգւոցն հանգուցելոց, որք:

Եւ եւս միաբան վասն ճշմարիտ եւ:

Զանձինս մեր եւ զմիմեանս Տեառն:

Ողորմեաց մեզ, Տէ՛ր Աստուած մեր:

*Մաղթանք*

Զի ողորմած եւ մարդասէր եւ Աստուած գոլով, եւ քեզ վայել է փառք իշխանութիւն եւ պատիւ այժմ եւ:

\_\_\_\_\_

**ՃԱՇՈՒ ՍԱՂՄՈՍՔ**

*Ի միջոցի Յինանց յաւուրն երեք փոխ, զի մինչեւ ի Հոգւոյ գալուստն ՃԾ փոխ ստղմոսն Դաւթի վճարեցի: Եւ ամէն փոխի վերջն երեք այլելուիա ասա:*

Երանեալ է այր, որ ոչ գնաց ի խոր.

ալէլուիա, ալէլուիա, ալէլուիա:

Ընդէ՞ր խռովեցան հեթանոսք. ալէ.

Տէ՛ր, զի բազում եղեն նեղիչք. ալէ.

### *Համբարձման Մաղմոս ԽԶ*

Համբարձաւ Աստուած օրհնութեամբ, եւ Տէր մեր ձայնիւ փողոյ:

Ծա՛փս հարէք, ամենա՛յն հեթանոսք, աղաղակեցէ՛ք առ Աստուած ի ձայն  
ցնծութեան. *եւ այլն:*

### *Ընթերցուածս ի Գործոց առաքելոց*

Այնպէս պաշտեմ զհայրենի Աստուածն՝ հաւատացեալ ամենայնի, որ ինչ յօրէնս եւ  
ի մարգարէս գրեալ է: Ունիմ յոյս առ Աստուած, որում եւ դոքա իսկ ակն ունին, թէ  
յարութիւն լինելոց է արդարոց եւ մեղաւորաց: Յորում եւ ես իսկ ճգնիմ անխիղճ  
միտս ունել առ Աստուած եւ առ մարդիկ յամենայն ժամ:

Բազում ամաց ողորմութիւնս եկի առնել յազգոյ իմ եւ ետու պատարագիս, որովք  
գտին զիս սրբեալ ի տաճարին:

-----

### *Հոգւոյ գալստեան՝ Մաղմոս ԸԽԲ*

Հոգի քո բարի առաջնողեցել ինձ ի յերկիր ուղիղ:

Տէ՛ր, լո՛ւր աղօթից իմոց, ունկն. եւ այլն:

### *Տապանակին՝ Մաղմոս ԸԼԱ*

Արի՛, Տէ՛ր, ի հանգիստ քո, դու եւ տապանակ կտակի սրբութեան քո:

Յիշեա՛, Տէ՛ր զԴաւիթ եւ զամենայն հեգութիւն նորա, եւ այլն:

*Վարդավառին՝ Սաղմոս ԺԴ*

Տէ՛ր, ո՞վ կացցէ ի խորանի քում, կամ ո՞վ բնակեցէ ի լեռն սուրբ քո:

Որ գնայ անբիծ, գործէ զարդարութիւն, խօսի զճշմարտութիւն ի սրտի իւրում:

Որ ոչ նենգաւորեաց լեզուաւ իւրով եւ չար ընկերի իւրում ոչ արար:

Նախատինս ի մերձաւորաց նա ոչ առնու, արհամարհեալ է առաջի նորա չարագործն:

Զերկիւղածս Տեառն փառաւոր առնէ, որ երդնու ի ընկերի իւրում եւ ոչ ստէ:

Զարծաթ իւր ի վարձու ոչ տայ եւ կաշառս ի վերայ իրաւանց ոչ առնու. որ զայս արասցէ, նա մի՛ սասանեցի յաւիտեան:

*Վերափոխման Աստուածածնին՝ Սաղմոս ԸԼԱ*

Արի՛, Տէ՛ր, ի հանգիստ քո, դու եւ տապանակ կտակի սրբութեան քո:

Յիշեա՛, Տէ՛ր, զԴաւիթ եւ զամե. *եւ այլն:*

*Սուրբ Խաչին՝ Սաղմոս Դ*

Նշանեցաւ առ մեզ լոյս երեսաց քոց եւ ետուր ուրախութիւն սրտից մերոց: Ի կարդալ իմում լուար ինձ. *եւ այլն:*

*Շողակաթին եւ այլոց եկեղեցեաց տօնից*

*Սաղմոս ԽԷ*

Աստուած հիմունս էարկ նմա յաւիտեան. ընկալաք, Աստուա՛ծ, զողորմութիւն քո ի մէջ ժողովրդեան քոյ:

Մեծ է Տէր, եւ օրհնեալ է յոյժ ի քաղաք Աստուծոյ մերոյ, ի լեառն սուրբ նորա. *եւ այլն:*

*Աւետեաց Աստուածածնին՝ Սաղմոս ԿԷ*

Տէր տացէ զբան, ոյք աւետարանեն զօրութեամբ բազմաւ:  
Յարիցէ Աստուած, եւ ցրուեսցին ամենայն թշնամիք նորա, փախիցեն ատելիք նորա  
յերեսաց նորա. *եւ այլն:*

*Ծննդեանն Քրիստոսի՝ Սաղմոս Բ*

Տէր ասաց ցիս՝ Որդի իմ ես դու, եւ ես այսօր ծնայ զքեզ: Ընդէ՞ր խռովեցան  
հերանոսք, եւ ժողովուրդք խորհեցան ի սնոտիս. *եւ այլն:*

*Քառասնօրեայ զալստեանն Քրիստոսի*

*Սաղմոս ՂԷ*

Տեսին ամենայն ծագք երկրի զփրկութիւն Աստուծոյ մերոյ:  
Օրհնեցէ՛ք զՏէր յօրհնութիւն նոր, զի սքանչելիս արար. *եւ այլն:*

*Մեծի ողորմեանն, որ է Ծաղկազարդին*

*Սաղմոս ՂԷ*

Լերինք ցնծասցեն առաջի Տեառն, զի գայ, զի հասեալ է Տէր ի դատել զերկիր:  
Օրհնեցէ՛ք զՏէր յօրհնութիւն նոր. *եւ այլն:*

*Հասարակ կիրակեկից՝ ճաշու Սաղմոս ԿԴ*

Քեզ վայել է օրհնութիւն, Աստուած, ի Սիոն, եւ քեզ տացին աղօթք յԵրուսաղէմ:  
Լո՛ւր աղօթից իմոց, զի առ քեզ ամենայն մարմին եկեցէ:

Բանք անօրինաց զօրացան ի վերայ մեր,  
Եւ զամպարշտութիւնս մեր դու քաւեսցես:  
Երանի, զոր ընտրեցեր եւ ընկալար, եւ բնակեցին ի գաւիթս քո:  
Լցցուք մեք ի բարութենէ տան քո, սուրբ է տաճար քո սքանչելի արդարութեամբ:  
Լո՛ւր մեզ, Աստուած փրկի՛չ մեր, յոյս ամենայն ծագաց երկրի, եւ որ ի ծով հեռի:  
Ո պատրաստէ զլերինս զօրութեամբ իւրով եւ զգեցեալ է զօրութիւն:  
Ո խոռվեցուցանէ զմեծութիւն ծովու եւ զձայն ալեաց նորա ցածուցանէ:  
Խոռվեցին հեթանոսք, եւ երկիցեն բնակիչք երկրի ի նշանաց քոց:  
Յելս առաւօտու ընդ երեկոյս զուարճացին, հայեցար յերկիր, արբեցուցեր զնա եւ  
բազում արարեր զմեծութիւն նորա:  
Գետն Աստուծոյ լի եղեւ ջուրք. պատրաստ արարեր զկերակուր նորա, զի այսպէս է  
պատրաստութիւն:  
Զակօս նորա արբեցուցեր եւ բազում արարեր զարմտիս նորա:  
Ի ցօղել նորա զուարթ եղիցի բոյս նորա, օրհնեցի պսակ տարւոյ քաղցրութեան  
քոյ:  
Դաշտք քո լցցին պարարտութեամբ, պարարտացին գեղեցկութիւնք անապատի:  
Բլուրք զցնծութիւն զգեցցին, եւ զգեցցին խոյք մաքեաց:  
Հովիտք բազում արասցեն զցորեան, աղաղակեցեն եւ օրհնեցեն:

*Հրեշտակապետաց՝ ճաշու Սաղմոս ԸԳ*

Կց. Ո արար զհրեշտակս իւր յոգիս եւ զպաշտօնեայս իւր ի հուր կիզելոյ:  
Օրհնեա՛, ա՛նձն իմ, զՏէր. Տէ՛ր Աստուած իմ, մեծ եղեր յոյժ. *եւ այլն՝*

*Առաքելոց եւ մարգարէից՝ ճաշու Սաղմոս ԺԸ*

Կց. Ընդ ամենայն երկիր ել բարբառ նոցա, եւ մինչեւ ի ծագս աշխարհի են խօսք  
նոցա:  
Երկինք պատմեն զգործս Աստուծոյ, եւ զարարածս ձեռաց նորա պատմէ  
հաստատութիւն. *եւ այլն՝*

*Հայրապետաց եւ վարդապետաց՝*

*ճաշու Սաղմոս ՃԼԱ*

Կց. Քահանայք քո զգեցցին զարդարութիւն, եւ սուրբք քո ցնծալով ցնծասցեն:

Յիշեա՛, Տէ՛ր, զԴաւիթ եւ զամենայն հեգութիւն նորա.

Որպէս երդուաւ Տեառն եւ ուխտս եղ Աստուծոյ Յակոբայ. *եւ այլն:*

*Համօրէն մարտիրոսաց՝ ճաշու Սաղմոս ՃԺԵ*

Կց. Պատուական է առաջի Տեառն մահ սրբոց իւրոց, ո՛ր Տէր, եւ ծառայ քո եմ, ծառայ  
եւ Որդի աղախնոյ քո:

Հաւատացի, զոր եւ խօսեցայ. *եւ այլն:*

-----

*Յովհաննու առաքելոյն ի Կաթողիկէայց առաջին թղթոյն է ընթերցուածս (Դ 7):*

Միրելի՛ք, սիրեցոյք զմիմեանս, զի սէր յԱստուծոյ է. եւ ամենայն, որ սիրէ,  
յԱստուծոյ է ծնեալ եւ ճանաչէ զԱստուած, եւ որ ոչն սիրէ, ոչ ճանաչէ զԱստուած, զի  
Աստուած սէր է: Եւ զի յայսմ երեւեցաւ սէրն Աստուծոյ ի մեզ, զի զՈրդին իւր  
Միածին առաքեաց Աստուած յաշխարհ, զի եղիցոյք նովաւ կենդանիք: Յայսմ է  
սէրն. ոչ զի մեք սիրեցաք զԱստուած, այլ զի նա սիրեաց զմեզ եւ առաքեաց զՈրդին  
իւր ի քաւութիւն մեղաց մերոց: Միրելի՛ք, եթէ Աստուած այնպէս սիրեաց զմեզ,  
ապա եւ մեք պարտիմք զմիմեանս սիրել: ԶԱստուած ուրոյք երբեք չիք տեսեալ.  
Եթէ սիրեցոյք զմիմեանս, Աստուած ի մեզ կատարեալ է: Այսուիկ զիտեմք, եթէ  
մեք ի նմա բնակեալ եմք, եւ նա՝ ի մեզ, զի ի Հոգոյն իւրմէ ետ մեզ: Եւ մեք տեսաք  
եւ վկայեմք, զի Հայր առաքեաց զՈրդի իւր փրկիչ աշխարհի: Որ որ  
խոստովանեսցի, եթէ Յիսուս է Որդի Աստուծոյ, Աստուած ի նմա բնակէ, եւ նա՝  
յԱստուած. եւ մեք հաւատացաք եւ ծանեաք զսէրն Աստուծոյ, զոր ունի առ մեզ:  
Աստուած սէր է, եւ որ կայ ի սէրն, բնակեալ է յԱստուած, եւ Աստուած ի նմա բնակէ:

Յայսմիկ կատարեալ է սերն նորա ի մեզ, զի համարձակութիւն ունիմք յաւուրն դատաստանի. զի որպէս եւ նայն է, նոյնպէս եւ մեք եմք յաշխարհի յայսմիկ: Երկիւղ ոչ գոյ ի սեր, այլ սերն կատարեալ ի բաց մերժէ զերկիւղն, զի երկիւղ ընդ տանջանօք է. իսկ որ երկնչին, չէ կատարեալ ի սերն: Մեք սիրեսցուք զԱստուած, վասն զի նա նախ սիրեաց զմեզ: Եթէ ոք ասիցէ, եթէ՝ սիրեմ զԱստուած, եւ զեղբայր իւր ասիցէ, սուտ է. որ ոչ սիրէ զեղբայր իւր, զոր տեսանէ, զԱստուած, զոր ոչն ետես, զիա՞րդ կարիցէ սիրել. եւ զայս պատուէր ունիմք առ ի նմանէ, զի որ սիրէ զԱստուած, սիրէ նա եւ զեղբայր իւր:

-----  
*Մեսեղիք ճաշու Յինանցն զկնի Գործոցն ի չորեքշաբաթէն սկսեալ*

(դշ) Գովեա՛, Երուսաղէ՛մ, զՏէր,

Եւ օրհնեա՛ զԱստուած. *եւ այլն (Մղ. ՃԽԷ)*

(եշ) Բա՛րձր արարէք զՏէր Աստուած մեր, երկի՛ր պագէք պատուանդանի ոտից նորա, զի սուրբ է:

Տէր թագաւորեաց, բարկացան ժողովուրդք, որ նստիս ի քրովբէս, սասանեցաւ երկիր. *եւ այլն (Մղ. ՂԸ):*

(ուր) Տեսին ամենայն ծագք երկրի զփր.

Օրհնեցէք զՏէր. *եւ այլն (Մղ. ՂԷ):*

(շք) Աստուա՛ծ, ողորմեա՛ մեզ եւ օրհնեա՛ զմեզ, երեւեցո՛ զերեսս քո ի մեզ եւ ողորմեա՛ մեզ:

Ճանաչել յերկրի զճանապարհս քո, յազինս ամենայն զփրկ *եւ այլն (Մղ. ԿԶ):*

(կիր) Քեզ վայել է օրհնութիւն, Աստուա՛ծ. *եւ այլն: (Մղ. ԿԴ):*

(բշ) Քեզ վայել է օրհնութիւն, Աստուա՛ծ.

*եւ այլն (Մղ. ԿԴ):*

(գ2) Տէ՛ր, որպէս զինու հաճութեամբ քով պսակեցեր զմեզ:

Բանից իմոց ունկն դիր, Տէ՛ր, եւ ի:

եւ այլն (Մղ. Ե):

-----

*Յերկրորդ Ծաղկագարդի ընթերցեալ լինի:*

*Ընթերցուածս յԵսայեայ մարգարէէ (ԿԴ 1):*

Իսկ այս ո՞վ է, որ դիմեալ գայ յԵդովմայ, կարմրութիւն ձորձոց իւրոց ի բոսորայ, գեղեցիկ պատմուճանսաւ եւ բուռն զօրութեամբ: Ես խօսիմ զարդարութիւն եւ իրաւունս փրկութեան:

Վասն է՞ր կարմիր են ձորձք քո, եւ հանդերձք քո իբրեւ հնձանահարի լիոյ հնձանի կոխելոյ: Հնձան հարի միայն, եւ ի հեթանոսաց ոչ ոք էր ընդ իս:

Կոխեցի զնոսա սրտմտութեամբ եւ ճմլեցի զնոսա բարկութեամբ եւ իջուցի յերկիր եւ զամենայն հանդերձս իմ թաթաւեցի, զի հասեալ էր ի վերայ նոցա օր հատուցման, եւ ամ փրկութեան եկեալ հասեալ: Հայեցայ, եւ ոչ ոք էր, որ օգնէր զմտաւ ածի, եւ ոչ ոք էր, որ ի թիկունս հասանէր. փրկեաց զնոսա բազուկ իմ, եւ սրտմտութիւն իմ միայն զղեմ կալաւ. կոխեցի զնոսա բարկութեամբ իմով եւ զենի զնոսա սրտմտութեամբ իմով եւ իջուցի զնոսա յերկիր:

Մեսեղիք ճաշու շաբաթապահոց,

նախ քան զգիրքն:

(բ2) Արքայութիւն քո արքայութիւն ամենայն յաւիտենից, եւ տէրութիւն քո ազգէ մինչեւ յազգ:

(փ) Հաւատարիմ է Տէր յամենայն բանս իւր, եւ արդար է յամենայն գործս իւր:

(գ2) Երկիր պագից ի տաճար սուրբ քո երկիւղիւ քո:

(փ) Պարծեսցին ի քեզ սիրելիք անուան քո, զի օրհնեսցես դու զարդարան, Տէ՛ր. որպէս զինու հաճութեամբ քով պսակեցեր զնոսա:

(դ2) Կեցո զծառայս քո, Աստուա՛ծ իմ, որ ի քեզ յուսացայ:

(փ) Ողորմեա՛ ինձ, Տէ՛ր, զի առ քեզ աղաղակեցի զօրհանապագ:

(ե2) Բա՛րձր արարէք զՏէր Աստուած մեր,

երկի՛ր պագէք պատուանդանի ոտից նորա, զի սուրբ է:

(փ) Տէր թագաւորեաց, բարկացան ժողովուրդք,

որ նստիս ի քրովբէս, սասանեցաւ երկիր:

(ուր) Տեսին ամենայն ծագք երկրի զփրկութիւն Աստուծոյ մերոյ:

(փ) Օրհնեցէ՛ք զՏէր յօրհնութիւն նոր, զի սքանչելիս արար:

-----

### Մեսեղիք ճաշու Աղցից

(բ2) Դարձո զիս, Տէ՛ր, ի մեղաց իմոց եւ զամենայն անօրէնութիւնս իմ քաւեա՛ յինէն:

(փ) Ողորմեա՛ ինձ, Աստուա՛ծ, ըստ մեծի ողորմութեան քում, ըստ բազում գթութեան քում քաւեա՛ զանօրէնութիւնս իմ:

(գ2) Երանի ամենեցուն, ոյք երկնչին ի Տեառնէ եւ գնան ի ճանապարհս նորա:

(փ) Զվաստակս ձեռաց քոց կերիցես, երանի է քեզ, եւ բարի եղիցի:

(դ2) Մի՛ թողուր զիս, Տէ՛ր Աստուած իմ, եւ մի՛ ի բացեայ առնիր յինէն. հայեա՛ց յօգնել ինձ, Տէ՛ր փրկութեան իմոյ:

(փ) Տէ՛ր, առաջի քո է ամենայն ցանկութիւն իմ, եւ հեծութիւն իմ ի քէն ոչ ծածկեցաւ:

(ե2) Մի՛ ընկենուր զիս, Տէ՛ր, ի ժամանակի ծերութեան, ի պակասիլ զօրութեան իմոյ մի՛ թողուր զիս:

(փ) Ի քեզ, Տէ՛ր, յուսացայ, մի՛ ամաչեցից յաւիտեան. յարդարութեան քում փրկեա՛ եւ ապրեցո՛ զիս:

(ուր) Մերձեսցին ինդրուածք իմ առաջի քո, Տէ՛ր, ըստ բանի քում իմաստո՛ւն արա զիս:

(փ) Զայնի իմում լո՛ւր, Տէ՛ր, ըստ ողորմութեան քում. եւ յիրաւունս քո կեցո՛ զիս:

### Մեսեղիք ճաշու Յարութեան

(աձ) Ամենայն երկիր երկիրպագցեն քեզ

եւ սաղմոս սասացեն քեզ:

(փ) Աղաղակեցէ՛ք առ Աստուած, ամենայն երկիր, սաղմո՛ս սասցէք անուան նորա եւ տո՛ւք զփառս օրհնութեան նորա:

(ակ) Մե՛ծ արարէք զՏէր Աստուած մեր եւ բա՛րձր արասցուք զանուն նորա ի միասին:

(փ) Օրհնեցից զՏէր յամենայն ժամ, յամենայն ժամ օրհնութիւն նորա ի բերան իմ:

(բձ) Օրհնեցէ՛ք զՏէր յօրհնութիւն նոր, օրհնեցէ՛ք զՏէր, ամենայն երկիր:

(փ) Օրհնեցէ՛ք զՏէր, ամենայն երկիր, օրհնեցէ՛ք զՏէր եւ օրհնեցէ՛ք զանուն նորա:

(բկ) Օրհնեցէ՛ք զԱստուած մեր, օրհնեցէ՛ք եւ սաղմո՛ս սասցէք Տեառն Աստուծոյ:

(փ) Տէր Աստուած օրհնեալ, օրհնեալ է Տէր զօրհանապագ:

(գձ) Մե՛ծ է Տէր, եւ մե՛ծ է զօրութիւն նորա. իմաստութեան նորա ոչ գոյ բաւ:

(փ) Օրհնեցէք զՏէր, զի բարի է սաղմոս, Աստուծոյ մերում քաղցր եղիցի օրհնութիւն:

(գկ) Սաղմո՛ս սասցէք Աստուծոյ մերում, սաղմո՛ս սասցէք թագաւորին մերում, սաղմո՛ս սասցէք: (փ) Ծա՛փս հարէք, ամենայն հեթանոսք, աղաղակեցէ՛ք առ Աստուած ի ձայն ցնծութեան:

(դձ) Սուրբ է տաճար քո սքանչելի արդարութեամբ:

(փ) Քեզ վայել է օրհնութիւն, Աստուած՛, ի Սիոն, եւ քեզ տացին աղօթք յԵրուսաղէմ:

(դկ) Այսօր է, գոր արար Տէր, եկայք ցնծասցուք եւ ուրա՛խ եղիցուք ի սմա:

(փ) Խոստովան եղերուք Տեառն, զի բարի է, զի յաւիտեան է ողորմութիւն նորա:

Մեսեղիք Աղցից կիրակէից

Ուխտս դիք եւ կատարեցէք Տեառն Աստուծոյ մերոյ:

Յայտնի է ի հրէաստանի Աստուած, եւ յԻսրայէլ մե՛ծ է անուն նորա:

Ստողոզիք մեծի Ուրբաթու ճաշուն

Առաջին

Սաղմոս ԼԴ

Յարեան ի վերայ իմ վկայք չարաց, եւ գոր ինչ ոչ գիտէի, հարցանէին ցիս:  
Դատեա՛, Տէ՛ր, զայնոսիկ, ոյք դատեն զիս, մարտիր ընդ այնոսիկ, որք մարտնչին  
ընդ իս:

Երկրորդ

Սաղմոս ԼԷ

Ես ի տանջանս պատրաստ եմ, եւ ցաւք իմ առաջի իմ են յամենայն ժամ:  
Տէ՛ր, մի՛ սրտմտութեամբ քով յանդիմաներ զիս եւ մի՛ բարկութեամբ քով խրատեր  
զիս:

Երրորդ

Սաղմոս Խ

Մտանէր տեսանել զնանրութիւն, խօսէր ի սրտի իւրում եւ ժողովէր  
զանօրէնութիւն յանձն իւր: Երանի, որ խորհի զաղքատն եւ զտնանկն. յաւուր չարի  
փրկէ զնա Տէր:

Չորրորդ

Սաղմոս ԻԱ

Բաժանեցին զհանդերձս իմ ի մէջ իւրեանց եւ ի վերայ պատմուճանի իմոյ վիճակս  
արկանէին:

Աստուա՛ծ, Աստուա՛ծ իմ, նայեա՛ց առ իս. ընդէ՞ր թողեր զիս, հեռի եղէ ի  
փրկութենէ իմմէ վասն բանից յանցանաց իմոց:

Հինգերորդ

Սաղմոս Լ

Ի ձեռս քո յանձն առնեմ զհոգի իմ:

Ի քեզ, Տէ՛ր, յուսացայ, մի՛ ամաչեցից յաւիտեան. յարդարութեան քում փրկեա՛ եւ  
ապրեցո՛ զիս:

Վեցերորդ  
Սաղմոս ԿԸ

Ետուն ի կերակուր ինձ լեղի եւ ի ծարաւ իմ արբուցին ինձ քացախ:  
Կեցո՛ր զիս, Աստուած, զի հասին ջուրք անձն իմ, ընկլայ եւ ի խորս անդնդոց, ուր ոչ  
գոյ ինձ հանգիստ:

Եօթներորդ Սաղմոս ԶԷ

Եղէ եւ որպէս մարդ առանց օգնականի եւ ի մեռեալս ազատ:  
Տէ՛ր Աստուած փրկութեան իմոյ, ի տուէ կարդացի եւ գիշերի առաջի քո:

Ութերորդ  
Սաղմոս ԺԱ

Կցեցաւ ոսկր իմ ի մարմին իմ, նմանեցայ եւ հաւալսան անապատի:  
Տէ՛ր, լո՛ւր աղօթից իմոց. աղաղակ իմ առ քեզ եկեացէ, եւ մի՛ դարձուցանէր զերեսս  
քո յինէն:

Պօղոսի առաքելոյն ի Տիմոթէոսի առաջին թղթոյն է ընթերցուածս

Պօղոս առաքեալ Յիսուսի Քրիստոսի՝ ըստ հրամանի Փրկչին մերոյ Աստուծոյ եւ  
Քրիստոսի Յիսուսի յուսոյն մերոյ, Տիմոթէայ որդոյ սիրելւոյ հաւատովք: Շնորհք,  
ողորմութիւն, խաղաղութիւն յԱստուծոյ Հօրէ եւ ի Տեառնէ մերմէ Յիսուսէ  
Քրիստոսէ:

Որպէս աղաչեցի զքեզ կալ յԵփեսոս մինչ երթայի ի Մակեդոնիա, զի պատուեր  
տացես ոմանց չլինել օտարուամունս եւ չհայել յառասպելս եւ ի տոհմաթիւս  
անչափս, որ մանաւանդ ինդիրս յուզեն եւ ոչ զտնտեսութիւն Աստուծոյ  
հաւատովք: Քանզի զլուիս պատուիրանին սէր է՝ ի սուրբ սրտէ եւ ի մտաց բարեաց

Եւ յանկեղծաւոր հաւատոց, յորոց ոմանք վրիպեցան՝ խոտորեալք յունայնութիւն բանից. կամին լինել վարդապետք օրինաց, ինքեանք ոչ իմանան՝ զինչ խօսին, եւ ոչ վասն որոց պնդեալն են: Գիտենք, եթէ բարւոք են օրէնք, եթէ ոք գնոսա օրինօքն կրեսցէ, բայց զայս գիտասցէ, զի ի վերայ անօրինաց եւ անհնազանդից, ամպարշտաց եւ մեղաւորաց, անսրբոց եւ պղծոց, զհայր եւ զմայր անարգողաց, մարդասպանաց, պոռնկաց, արուագիտաց, մարդելուզաց, ստոց, ստերդմանց եւ եթէ այլ ինչ իցէ հակառակ ողջամիտ վարդապետութեանս, որ ըստ աւետարանի փառաց երանելւոյն Աստուծոյ է, որում եղէ ես հաւատարիմ:

Ալէլուիայք ճաշու աւուրց պահոց, որք ասին ըստ ձայնից

(աձ) Հոգի քո բարի առաջնորդեսցէ ինձ ի յերկիր ուղիղ:

(կամ) Վասն անուան քո, Տէ՛ր, կեցուսցես զիս, արդարութեամբ քով հանցես ի նեղութենէ զանձն իմ:

(ակ) Տէ՛ր, մի՛ սրտմտութեամբ քով յանդիմաներ զիս եւ մի՛ բարկութեամբ քո խրատեր զիս:

(կամ) Զգնացս իմ ուղի՛ղ արա ինձ ըստ բանի քում, եւ մի՛ տիրեսցեն ինձ ամենայն մեղք:

(բձ) Միրտ իմ խռովեցաւ յիս, եւ երկիրդ մահու անկաւ ի վերայ իմ:

(բկ) Դա՛րձ, Տէ՛ր, եւ փրկեա՛ զանձն իմ. կեցո՛ զիս, Տէ՛ր, ըստ ողորմութեան քում:

(գձ) Վասն անուան քոյ, Տէ՛ր, քաւեա՛ զմեղս իմ, զի բազում եղեն յոյժ:

(գկ) Ողորմեա՛ ինձ, Տէ՛ր, զի հիւանդ եմ ես, բժշկեա՛ զանձն իմ, զի խռովեցան ոսկերք իմ:

(դձ) Յիշեա՛, Տէ՛ր, զգթութիւնս քո, եւ զողորմութիւնս քո, որք են յաւիտենից:

(կամ) Զմեղս մանկութեան իմոյ եւ զանգիտութեան իմոյ մի՛ յիշեր, այլ յիշեա զիս, Տէ՛ր, ըստ ողորմութեան քում վասն քաղցրութեան քոյ, զի քաղցր եւ ուղիղ ես:

(դկ) Տէ՛ր, ողորմութիւն քո յաւիտեան, զգործս ձեռաց քոց մի՛ անտես առներ:

(կամ) Զմեղս մանկութեան իմոյ եւ զանգիտութեան իմոյ մի՛ յիշեր, այլ յիշեա՛ զիս, Տէ՛ր, ըստ ողորմութեան քում վասն քաղցրութեան քոյ, զի քաղցր եւ ուղիղ ես:

(կամ) Աղաղակեցի առ քեզ, Տէ՛ր, եւ ասացի՝ դու ես յոյս եւ բաժին իմ յերկրին կենդանեաց:

-----

*Ալեկուիայք շաբաթապահոց*

*Երկուշաբթի, երեքշաբթի եւ հինգշաբթի եթէ աձ եւ ղկ լինի, գայտսիկ ասա, իսկ եթէ յայլ ձայնից, զհւրեանցն ասա:*

(Բշ) Եկայք ցնծացուք ի Տէր, աղաղակեցուք առ Աստուած փրկիչ մեր:

(Գշ) Երգեցէք Տեառն երգ նոր, երգեցէք Տեառն, ամենա՛յն երկիր,

երգեցէք Տեառն եւ բարձր արարէք զանուն նորա:

Բարձր արարից զընտրեալն ի ժողովրդենէ իմմէ. գտի զԴաւիթ ծառայ իմ եւ իւղով սրբով իմով օծի զնա:

*Ալեկուիա Աղցից կիրակեից*

Աղաղակեցէ՛ք առ Տէր, ամենա՛յն երկիր, ծառայեցէ՛ք Տեառն ուրախութեամբ:

Մտէ՛ք առաջի նորա ցնծութեամբ.

Զփոխն լման ասա (Սղ. ԴԹ)

*Ալեկուիայք ճաշու Յարութեան ըստ ձայնին*

(աձ) Դու յարուցեալ գթասցիս ի վերայ Սիոնի. ժամանակ գթալոյ նորա հասեալ է ժամ:

(կամ) Թագաւոր մեծ ի վերայ ամենայն երկրի Աստուած է. սաղմոս ասացէք նմա իմաստութեամբ:

(ակ) Օրհնեցէ՛ք զՏէր յօրհնութիւն ի նոր, օրհնութիւն նմա յեկեղեցիս սրբոց:

(բձ) Ծա'փս հարէք ամենայն հեթանոսք, աղաղակեցէ՛ք առ Աստուած ի ձայն  
ցնծութեան:

(կամ) Աստուած, դու դարձեալ կեցուցես զմեզ, եւ ժողովուրդ քո ուրախ եղիցի ի  
քեզ:

(բկ) Արի', Տէ'ր Աստուած իմ, ի հրամանս քո, զոր պատուիրեցեր. եւ ժողովք  
ժողովրդոց շուրջ եղիցին զքեւ, վասն այսորիկ ի բարձունս դարձ, Տէ'ր, եւ Տէր դասի  
զժողովուրդս իւր:

(գձ) Ուրախ եղեւ Իսրայէլ յԱրարիչ իւր, որդիք Սիոնի ցնծասցեն ի թագաւորն  
իւրեանց:

(գկ) Եկայք եւ տեսէք զգործս Աստուծոյ, որպէս զի ահեղ են խորհրդով, քան  
զամենայն որդոց մարդկան:

(դձ) Հաճեցար, Տէ'ր, ընդ երկիր քո, եւ դարձուցեր զգերութիւն Յակոբայ:

(դկ) Յարեաւ Աստուած, եւ ցրուեցան ամենայն թշնամիք նորա, փախեան ասելիք  
նորա յերեսաց նորա:

### *Ձատկին*

Հասեալ կային ոտք մեր առ դրունս քո, Երուսաղէ'մ:

### *Ալէլուիայք Ձատկի, Յարութեան եւ Յինանց ճաշու աւետարանի*

(կիր) Գովեա', Երուսաղէ'մ, զՏէր. եւ օրհ.

Զփոխն լման ասա. տե'ս երես 454:

(բշ) Գովեա', Երուսաղէ'մ զՏէր եւ օրհ.

եւ այլն, որպէս ի վերոյ:

(գշ) Տէ'ր, ի զօրութեան քում ուրախ եղիցի թագաւորն, ի փրկութեան քում ցնծասցէ  
յոյժ:

Զփոխն լման ասա (Սղ. Ի):

(դշ) Քեզ վայել է օրհնութիւն, Աստուած,

եւ այլն տե'ս երես 477:

(եշ) Տէ'ր, ո՞վ կացցէ ի խորանի քում.

եւ այլն. տե'ս երես 474:

(ուր) Տէր թագաւորեաց, զվայելչութիւն.

եւ այլն. տե'ս երես 235:

(շք) Յնձացէ՛ք առ Աստուած, օգնական է մեր, աղաղակեցէ՛ք առ Աստուած Յակոբայ:

Առէք սաղմոս եւ տուք օրհնութիւն. սաղմոս ասացէք նմա ի ձայն քաղցրութեան:

Փող հարէք ի գլուխս ամսոց, յաւուր նշանաւորի տարեկանաց մերոց:

Հրաման է այս Իսրայելի, եւ իրաւունք են Աստուծոյ Յակոբայ:

Վկայութիւնն Յովսէփու, զոր եղ ընդ նմա. որպէս ելանէր նա յերկրէն Եգիպտացոց, լեզու, զոր ոչ գիտէր, լուաւ:

Ի բաց արար ի բեռանց զթիկունս նորա եւ զձեռս նորա յորթ եւ ի թի ծառայելոյ:

Ի նեղութեան կարդացեր առ իս, եւ փրկեցի զքեզ. լուայ քեզ ի գաղտնութենէ մրրկին եւ փորձեցի զքեզ ի վերայ ջուրցն հակառակութեան:

Լո'ւր, ժողովո'ւրդ իմ, եւ վկայեմ քեզ եւ, Իսրայել'լ, թէ լուիցես ինձ, մի' եւս եղիցին քեզ աստուածք առժամայնք, եւ մի' երկիր պագանիցես դու Աստուծոյ օտարի:

Ես եմ Տէր Աստուած քո, որ հանի զքեզ յերկրէն Եգիպտացոց. բաց զբերան քո, եւ լցից գոա:

Ժողովուրդ իմ ոչ լուաւ ձայնի իմում, եւ Իսրայել յիս ինչ ոչ նայեցաւ:

Բարձի թողի զնոսա՝ երթալ զհետ կամաց սրտից իւրեանց, զի գնացին նոքա ըստ կամս անձանց իւրեանց:

Ձի թէ ժողվրդեան իմոյ լուալ էր ինձ, կամ Իսրայելի ճանապարհս իմ գնացեալ էր:

Որպէս զոչինչ խոնարհ արարեալ էր իմ զթշնամիս նորա, եւ ի վերայ նեղչաց նորա արկեալ էր զձեռն իմ: Թշնամիք Տեառն ստեցին նմա, եւ եղիցին ժամանակք նոցա յաշխարհի:

Կերակրեաց զնոսա ի պարարտութենէ ցորենոյ, եւ ի վիմէ մեղր յագեցոյց նոցա:

*Նոր կիրակեփն եւ ցՀամբարձումն եղեալ ամենայն կիրակեփց*

Գովեա՛, Երուսաղէ՛մ, զՏէր եւ օրհ.

Զփոխն լման ասա. տե՛ս երես 454:

-----  
*Ալէլուիա Համբարձմանն Քրիստոսի, մինչեւ ի*

*Գալուստ Հոգւոյն Սրբոյ*

Համբարձե՛ք, իշխա՛նք, զդրունս ձեր ի վեր. համբարձցին դրունք յաւիտենից, եւ մտցէ թագաւոր փառաց:

*Ալէլուիայք ճաշու*

*Հոգւոյն Սրբոյ Գալստեան*

(կիր) Ողորմութեամբ Տեառն լի եղեւ երկիր, եւ բանիւ Տեառն երկինք հաստատեցան, եւ հոգւով բերանոյ նորա՝ ամենայն զօրութիւնք նոցա:

(Բշ) Եկայք ցնծասցուք ի Տէր, աղաղակեցուք առ Աստուած Փրկիչ մեր:

(Գշ) Երգեցէ՛ք Տեառն երգ նոր, ծառայեցէ՛ք Տեառն ուրախութեամբ:

(Դշ) Վասն անուան քո, Տէ՛ր, կեցուցես զիս, արդարութեամբ քով հանցես ի նեղութենէ զանձն իմ:

(Եշ) Ողորմեա՛ ինձ, Տէ՛ր, զի հիւանդ եմ ես, բժշկեա՛ զանձն իմ, զի խռովեցան ոսկերք իմ:

(ուր) Յիշեա՛, Տէ՛ր, զԴաւիթ եւ զամենայն հեգութիւն նորա:

(շք) Յեկեղեցիս օրհնեցէ՛ք զԱստուած եւ զՏէր յաղբերացն Իսրայելի:

*Ալէլուիա Տապանակին*

Արի՛, Տէ՛ր, ի հանգիստ քո, դու եւ տապանակ կտակի սրբութեան քո:

*Ալէլուիայք ճաշու Այլակերպութեան Քրիստոսի,*

*որ կոչի Վարդավառ*

(կիր) Ամպ լուսաւոր հովանի լինէր նոցա, ձայն եղև յամպոյն, որ ասէ. □Դա՛ է Որդի իմ սիրելի, ընդ որ հաճեցայ□:

(Բշ) Բարձրութիւնք լերանց նորա են, նորա է ծով, եւ նա արար գնա, եւ զցամաք ձեռք նորա ստեղծին: Եկայք երկի՛ր պագցուք նմա, անկցուք եւ լացցուք առաջի Տեառն Արարչին մերոյ:

(Գշ) Քո են երկինք, եւ քո է երկիր. զաշխարհս լրիւ իւրով դու հաստատեցեր, զհիւսիս եւ զհարաւ դու արարեր, Թաբոր եւ Հերմոն յանուն քո ցնծացեն:

*Ալէլուիայք ճաշու Նաւակատեաց,*

*Խաչի եւ Եկեղեցւոյ*

(շք) Սիրեաց Տէր զՍիոն եւ ընտրեաց բնակիլ ի նմա. ասէ. □Այս է հանգիստ իմ յաւիտեանս յաւիտենից. ի սմա բնակեցայց, զի հաճեցայ ընդ սա□:

(կիր) Տո՛ւր զօրութիւն ծառայի քո, կեցո՛՛ գորդի աղախնոյ քո եւ արա՛՛ առ իս նշան բարութեան:

(Բշ) Ետուր երկիւղածաց քոց նշան, զի ապրեցին յերեսաց աղեղան:

(Գշ) Սիրեաց Տէր զՍիոն եւ (որպէս ի վերոյ):

(դշ) Տէ՛ր, սիրեցի զվայելչութիւն տան քո եւ զտեղի յարկի փառաց քոց:

(Եշ) Որպէս սիրելիք են յարկք քո, Տէ՛ր զօրութեանց, ցանկայ եւ փափաքի անձն իմ ի գաւիթս քո: Սիրտ իմ եւ մարմին իմ ցնծացեն առ Աստուած կենդանի:

(ուր) Ետուր երկիւղածաց քոց (որպէս ի վերոյ):

(շք) Որպէս փրկեցան սիրելիք քո, կեցո՛՛ աջով քո եւ լո՛ւր մեզ:

(եկդ) Հիմունք նորա լեառն սուրբ նորա, սիրէ Տէր զդրունս Սիոնի առաւել, քան զամենայն յարկսն Յակոբայ:

(եկդ) Փառաւորեալն խօսեցաւ վասն քո, ահաւաղիկ քաղաքդ Աստուծոյ:

(եկդ) Տէ՛ր, ո՞վ կացցէ ի խորանի քում, կամ ո՞վ բնակեցէ ի լեառն սուրբ քո: Որ գնայ անբիծ, գործէ զարդարութիւն, խօսի ի ճշմարտութիւն ի սրտի իւրում:

(խաչ) Նշանեցաւ առ մեզ լոյս երեսաց քոց եւ ետուր ուրախութիւն սրտից մերոց:

*Ալէլուիայք ճաշու Վերափոխման Աստուածածնին  
ինն աւուրց*

(կիր) Այսօր ծնաւ որ ի Հօրէ յառաջ քան զյաւիտեանս Որդին, որ է օծեալ Տէր ի քաղաքի Դաւթի: Ի վայելչութիւն սրբոց քոց յարգանդէ յառաջ քան զարուսեակ ծնայ զքեզ:

(բշ) Ուրա'իս լեր, բերկրեա'լդ, Տէր ընդ քեզ. օրհնեալ ես դու ի կանայս, եւ օրհնեալ է պտուղ որովայնի քո:

(գշ) Արի', Տէ'ր, ի հանգիստ քո, դու եւ տապանակ կտակի սրբութեան քո:

*Ալէլուիա ճաշու Աւետեաց  
Աստուածածնին*

Ուրա'իս լեր, բերկրեա'լդ (*որպէս ի վերոյ*):

*Ալէլուիայք ճաշու Ծննդեան  
ըստ աւուրց*

(ճրգ) Հոգին Սուրբ եկեցէ ի քեզ, եւ զօրութիւն Բարձրելոյն հովանի լիցի ի վերայ քո:

ա. Այսօր ծնաւ որ ի Հօրէ յառաջ քան.

*եւ այլն, որպէս ի վերոյ.*

բ. Հոգւով Սրբով զօրացեալ սուրբն Ստեփանոս եւ ընտրեալ յորովայնէ, ճշմարիտ վկայ, սիրող եւ առաքեալ Առաքողին, ի Քրիստոսէ ընկալար զուարթոնցն զպսակ:

գ. Կարապետն Յովհաննէս զարհուրեալ՝ յորովայնէ յորովայն երկրպագէր. սապասաւոր եղէ Բանին Աստուծոյ եւ լուեալ զահաւոր զձայնն՝ աղաղակէր՝ ասելով. □Ահա Գառն Աստուծոյ, որ բառնայ զմեզս աշխարհի□:

դ. Ուրա'իս լեր, բերկրեա'լդ, Տէր ընդ քեզ.

*եւ այլն, որպէս ի վերոյ:*

ե. Դու, մանուկ, մարգարէ Բարձրելոյն կոչեսցիր. գնասցես առաջի Տեառն՝  
պատրաստել զճանապարհս նորա:

զ. Եհան զիս ի գբոյ տառապանաց, ի կաւոյ եւ ի տղմոյ:

Հաստատեաց ի վերայ վիմի զոտս իմ եւ ուղղեաց զգնացս իմ:

Դու ես քահանայ յաւիտեան ըստ կարգին Մելքիսեդեկի, եւ Տէր ընդ աջմէ քումմէ:

է. Երդուաւ Տէր Դաւթի ճշմարտութեամբ եւ ոչ ստեաց նմա՝ ի պտղոյ որովայնի  
նորա նստուցանել յաթոռ նորա:

ը. Ուրա՛խ լեր, բերկրեա՛լո, Տէր ընդ քեզ.

*եւ այլն, որպէս ի վերոյ:*

*Ալէլուիա ճաշու Քառասնօրեայ Գալստեան*

*Քրիստոսի ի տաճարն*

Տէր ի տաճար սուրբ իւրում, Տէր յերկինս յաթոռ իւրում:

*Մեծի ողորդմեան*

*ճաշուն*

Տէր Աստուած մեր երեւեցաւ մեզ. արարէք տօնս ուրախութեան կանխաւ, մինչեւ  
յանկինս սեղանոյ:

*Ալէլուիա ճաշու*

*Հրեշտակապետաց*

Ողորմութեամբ Տեառն լի եղեւ երկիր, եւ բանիւ Տեառն երկինք հաստատեցաւ, եւ  
հոգւով բերանոյ նորա՝ ամենայն զօրութիւնք նոցա:

*Յովհաննու Կարապետին*

Դու, մանուկ, մարգարե. *որպէս ի վերոյ:*

*Յովհաննու գլխատման*

Կարապետն Յովհաննէս. *որպէս ի վերոյ:*

*Համօրէն մարգարէից*

Յեկեղեցիս օրհնեցէք զԱստուած եւ զՏէր յաղբերացն Իսրայելի:

*Ամենայն առաքելոց*

Կացուսցես զնոսա իշխանս ընդ ամենայն երկիր, եւ յիշեսցի անուն քո ընդ ամենայն ազգս ազգաց:

Ընդ ամենայն երկիր ել բարբառ նոցա, եւ մինչեւ ի ծագս աշխարհի եւ իօսք նոցա:

*Դաւթի եւ Յակոբայ*

Յիշեա՛, Տէ՛ր, զԴաւիթ եւ զամենայն հեզութիւն նորա:

*Նախահարցն*

Պատմէ զբան իւր Յակոբայ, զարդարութիւն եւ զիրաւունս Իսրայելի:

*Գրիգորի Լուսաւորչին*

Համբերելով համբերի Տեառն, եւ նայեցաւ առ իս եւ լուաւ աղօթից իմոց:

*Հայրապետաց եւ վարդապետաց*

Քահանայք քո զգեցցին զարդարութիւն, եւ սուրբք քո ցնծալով ցնծացեն:

*Ճգնաւորաց*

Երանելի են, որք բնակեալ են ի տան Տեառն. յաւիտեանս յաւիտենից օրհնեսցեն զքեզ:

*Կուսանաց*

Կացցէ դշխոյ ընդ աջմէ քումմէ՝ ի հանդերձս ոսկեհուռս զարդարեալ եւ պաճուճեալ:

Տարցին թագաւորի կուսանք զհետ նորա եւ զընկերս նորա տարցին նմա:

*Թագաւորաց*

Տէ՛ր, ի զօրութեան քում ուրախ եղիցի թագաւորն, ի փրկութեան քում ցնծացէ յոյժ:

*Քառասնից եւ Երկուց բիրուցն*

Անցաք մեք ընդ հուր եւ ընդ ջուր, եւ հաներ զմեզ ի հանգիստ:

*Մեծի հինգշաբթի*

Պատրաստ արարեր առաջի իմ զսեղան ակն յանդիման նեղչաց իմոց:

*Այգուց*

-----

Ընդ երեկոյս հանգիցեն լալիք, առաւօտու եղիցի ուրախութիւն:

*Ալէլուիայք ճաշու մարտիրոսաց*

(աձ) Տէր սիրէ զիրաւունս եւ ոչ ընդ վայր հարկանէ զսուրբս իւր, այլ յաւիտեան պահէ զնոսա:

(կամ) Փրկութիւն արդարոց ի Տեառնէ է, վերակացու է նոցա ի ժամանակս նեղութեան:

(ակ) Պարծեսցին սուրբքն փառօք եւ ցնծացեն ի հանգիստ իւրեանց եւ բարձր արասցեն զԱստուած բերանովք իւրեանց:

(կամ) Լոյս ծագեաց արդարոց, ուղղոց սրտից եղև ուրախութիւն:

(բձ) Պարծեսցին սուրբքն փա. (*որպէս ի վերոյ*):

(բկ) Կարդացին արդարքն առ Տէր, եւ Տէր լուաւ նոցա. յամենայն նեղութենէ նոցա փրկեաց զնոսա:

(գձ) Վասն քո մեռանիմք զօրհանապագ, համարեցաք որպէս զոչխար ի զենումն:

(գկ) Ուրախ լիցին ամենեքեան, ոյք յուսացեալ են ի քեզ. յաւիտեան ցնծացեն, եւ բնակեսցիս դու ի նոսա:

Արդարքն որպէս զարմաւենիս ծաղկեսցին, որպէս զմայրսն Լիբանանու բազումք եղիցին:

(դկ) Բազում նեղութիւնք են արդարոց, յամենայնէ փրկէ զնոսա Տէր եւ պահէ զամենայն ոսկերս նոցա, եւ մի ի նոցանէ ոչ կորիցէ:

-----

*Աստ ընթերցեալ լինի աւետարան ըստ պատշաճի եւ յետոյ ասի Հանգանակն Նիկիական:*

*Մբբոյ աւետարանիս Յիսուսի Քրիստոսի որ ըստ Մատթէոսի (Ե. 1):*

*Տեառն մերոյ Յիսուսի Քրիստոսի*

Եւ տեսեալ զժողովուրդն՝ ել ի լեառն. եւ իբրև նստաւ անդ, մատեան առ նա աշակերտքն նորա. եւ բացեալ զբերան իւր ուսուցանէր զնոսա եւ ասէր. □Երանի

աղքատաց հոգով, զի նոցա է արքայութիւն երկնից: Երանի սգաւորաց, զի նոքա միխթարեացին: Երանի հեզոց, զի նոքա ժառանգեացեն զերկիր: Երանի, որ քաղցեալ եւ ծարաւի իցեն արդարութեան, զի նոքա յազեացին: Երանի ողորմածաց, զի նոքա ողորմութիւն գտցեն: Երանի այնոցիկ, որ սուրբ են սրտիւք, զի նոքա զԱստուած տեսցեն: Երանի խաղաղարարաց, զի նոքա որդիք Աստուծոյ կոչեացին: Երանի, որ հալածեալ իցեն վասն արդարութեան, զի նոցա է արքայութիւն երկնից: Երանի է ձեզ, յորժամ նախաստիցեն զձեզ եւ հալածեացեն, եւ ասիցեն զամենայն բան չար զձէնջ սուտ վասն իմ: Յնծացէք եւ ուրախ լերուք, զի վարձք ձեր բազում են յերկինս, զի այսպէս հալածեցին զմարգարէան, որ յառաջ քան զձեզ էին:

-----

*Սրբոյ աւետարանիս Յիսուսի Քրիստոսի որ ըստ Մարկոսի (Գ. 13):*

*Տէրն մեր Յիսուս Քրիստոս*

Ելանէ ի լեառն եւ կոչէ առ ինքն, զորս ինքն կամեցաւ, եւ չորան առ նա: Եւ արար երկոտասանս, զի իցեն զնովաւ, եւ զի առաքեացէ զնոսա քարոզել եւ ունել իշխանութիւն բժշկելոյ զցաւս եւ հանելոյ զդէւս: Եւ եղ անուն Սիմոնի Պետրոս, եւ Յակոբոս Զեբեդեայ եւ Յովհաննոս եղբօրն Յակոբայ եղ նոցա անուանս Բաներեզէս, որ է որդիք որոտման, եւ զԱնդրէաս եւ զՓիլիպպոս եւ զԲարթոլոմէոս եւ զՄատթէոս զմաքսաւորն եւ զԹովմաս եւ զՅակոբոս Ալփեայ եւ զԹադէոս եւ զՍիմոն Կանանացի եւ զՅուդա Իսկարիովտացի, որ եւ մատնեացն զնա:

-----

*Սրբոյ աւետարանիս Յիսուսի Քրիստոսի որ ըստ Ղուկասոսի (ԺԴ. 12):*

*Տէրն մեր Յիսուս Քրիստոս*

Ասէ եւ ցկոչնատերն. □Յորժամ առնիցես ճաշ կամ ընթրիս, մի' կոչեր զբարեկամս քո եւ մի' զեղբարս քո եւ մի' զազգականս քո եւ մի' զղրացիս քո եւ մի' զմեծամեծս, զի մի' եւ նոքա փոխարէն կոչեացեն զքեզ, եւ լինիցի քեզ հատուցումն: Այլ յորժամ

առնիցես ընդունելութիւն, կոչեա՛ զաղքատս եւ զխեղս եւ զկաղս եւ զկոյրս, եւ երանելի լինիցիս, զի ոչ ունին փոխարէն հատուցանելոյ քեզ, եւ հատուցի քեզ փոխարէն ի յարութեան արդարոց: Իբրեւ լուսւ զայս ոմն ի բազմականացն, ասէ ցնա. □Երանի՛, որ կերիցէ ճաշ յարքայութեանն Աստուծոյ□:

-----

*Սրբոյ աւետարանիս Յիսուսի Քրիստոսի որ ըստ Ղուկասու (Ժ. 11):*

*Տէրն մեր Յիսուս Քրիստոս ասէ*

Ես եմ հովիւն քաջ. հովիւ քաջ զանձն իւր դնէ ի վերայ ոչխարաց: Իսկ վարձկանն, որ ոչ է հովիւ, որոյ ոչ իւր են ոչխարքն, իբրեւ տեսանէ զգայլն, զի գայ, թողու զոչխարսն եւ փախչի, եւ գայլն յափշտակէ զնոսա եւ ցրուէ. քանզի վարձկան է, եւ չէ փոյթ նմա վասն ոչխարացն: Ես եմ հովիւն քաջ եւ ճանաչեմ զիմսն, եւ ճանաչիմ յիմոցն: Որպէս զիտէ զիս Հայր, զիտեմ եւ ես զՀայրն. եւ զանձն իմ դնեմ ի վերայ ոչխարաց: Նա եւ այլ եւս ոչխարք են իմ, որք ոչ են յայսմ գաւթէ, եւ զայն եւս ոչ պարտ է ինձ ածել այսր. եւ ձայնի իմում լուիցեն, եւ եղիցին մի հօտ եւ մի հովիւ:

Փառք քեզ, Տէ՛ր Աստուած մեր:

*Հանգանակ Նիկիական*

Հաւատամք ի մի Աստուած՝ ի Հայրն ամենակալ, յԱրարիչն երկնի եւ երկրի, երեւելեաց եւ աներեւութից: Եւ ի մի Տէր Յիսուս Քրիստոս՝ Որդին Աստուծոյ, ծնեալն յԱստուծոյ Հօրէ միածին, այսինքն՝ յեութենէ Հօր: Աստուած յԱստուծոյ, լոյս ի լուսոյ, Աստուած ճշմարիտ յԱստուծոյ ճշմարտէ, ծնունդ եւ ոչ արարած: Նոյն ինքն ի բնութենէ Հօր, որով ամենայն ինչ եղեւ յերկինս եւ ի վերայ երկրի՝ երեւելիք եւ աներեւոյթք: Որ յաղագս մեր մարդկան եւ վասն մերոյ փրկութեան իջեալ ի յերկնից՝ մարմնացաւ, մարդացաւ, ծնաւ կատարեալապէս ի Մարիամայ սրբոյ կուսէն Հոգւովն Սրբով: Որով էառ զմարմին, զհոգի եւ զմիտ եւ զամենայն, որ ինչ է ի

մարդ, ճշմարտապետ է ոչ կարծեօք: Չարչարեալ, խաչեալ, թաղեալ, յերրորդ ատուր յարուցեալ, ելեալ ի յերկինս նովին մարմնովն՝ նստաւ ընդ աջմէ Հօր: Գալոց է նովին մարմնովն եւ փառօք Հօր՝ ի դատել զկենդանիս եւ զմեռեալս, որոյ թագաւորութեանն ոչ գոյ վախճան:

Հաւատամք եւ ի Սուրբ Հոգին՝ յանեղն եւ ի կատարեալն, որ խօսեցաւ յՕրէնս եւ ի Մարգարէս եւ յԱւետարանս: Որ էջն ի Յորդանան, քարոզեաց յառաքեալսն եւ բնակեցաւ ի սուրբսն: Հաւատամք եւ ի մի միայն ընդհանրական եւ յառաքելական Սուրբ Եկեղեցի, ի մի մկրտութիւն, յապաշխարութիւն, ի քաւութիւն եւ ի թողութիւն մեղաց, ի յարութիւնն մեռելոց, ի դատաստանն յաւիտենից հոգւոց եւ մարմնոց, յարքայութիւնն երկնից եւ ի կեանսն յաւիտենականս:

### *Մինչեւ ցատտ են հաւատոյ բանք*

Իսկ որք ասեն՝ էր երբեմն, յորժամ ոչ էր Որդի, կամ էր երբեմն, յորժամ ոչ էր Սուրբ Հոգի, կամ թէ՛ յոչէից եղեն, կամ յայլմէ էութենէ ասեն լինել զՈրդին Աստուծոյ եւ կամ զՍուրբ Հոգին, եւ թէ՛ փոփոխելիք են կամ այլայլելիք, զայնպիսիսն նգովէ կաթողիկէ եւ առաքելական եկեղեցի:

### *Ի սրբոյ Լուսաւորչէն մերմէ ասացեալ*

Իսկ մեք փառաւորեցուք, որ յառաջ քան զյաւիտեանս՝ երկիր պագանելով Սրբոյ Երրորդութեանն եւ Միոյ Աստուածութեանն՝ Հօր եւ Որդւոյ եւ Հոգւոյն Սրբոյ այժմ եւ միշտ եւ յաւիտեանս յաւիտենից. ամէն:

### *Քարոզ*

Եւ եւս խաղաղութեան զՏէր աղա:

Եւ եւս հաւատով աղաչեցուք եւ խնդրեցուք ի Տեառնէ Աստուծոյ եւ ի Փրկչէն մերմէ Յիսուսէ Քրիստոսէ ի ժամուս պաշտաման եւ աղօթից, զի արժանի ընդունելութեան արասցէ, լուիցէ Տէր ձայնի աղաչանաց մերոց, ընկալցի

զինդրուածս սրտից մերոց, թողցէ զյանցանս մեր, ողորմեսցի ի վերայ մեր: Աղօթք մեր եւ խնդրուածք յամենայն ժամ մտցեն առաջի մեծի Տէրութեան նորա, եւ նա տացէ մեզ միաբան միով հաւատով եւ արդարութեամբ վաստակիլ ի գործս բարեաց, զի գողորմութեան զշնորհն իւր արասցէ ի վերայ մեր Տէրն ամենակալ, կեցուցէ եւ ողորմեսցի:

Զժամս եւ զառաջակայ օրս խաղաղութեամբ անցուցանել՝ հաւատով ի Տեառնէ խնդրեսցուք:

Զհրեշտակ խաղաղութեան պահա:

Զքաւութիւն եւ զթողութիւն յան:

Զսբրոյ խաչին մեծ եւ կարող զօրու:

Եւ եւս՝ միաբան վասն ճշմարիտ եւ:

Զանձինս մեր եւ զմիմեանս Տեառն:

Ողորմեա՛ց մեզ, Տէ՛ր Աստուած մեր:

### *Աղօթք*

Տէր մեր եւ փրկիչ Յիսուս Քրիստոս, որ մեծոյ եւ ողորմութեամբ եւ առատ պարգևօք բարերարութեան քո: Որ դու քոյին կամաւոյ ի ժամուս յայսմիկ համբերեցեր չարչարանաց խաչի եւ մահու յաղագս մեղաց մերոց եւ պարգևեցեր առատապէս զպարգևս Հոգւոյդ Սրբոյ երանելի առաքելոցն, հաղո՛րդս արա եւ զմեզ, Տէ՛ր, աղաչե՛մք զքեզ, աստուածային պարգևացոյ, թողութեան մեղաց եւ ընդունելութեան Հոգւոյդ Սրբոյ: Որպէս զի արժանաւորք եղիցուք գոհութեամբ փառաւորել զքեզ ընդ Հօր եւ ընդ Սրբոյ Հոգւոյդ այժմ եւ միշտ եւ յաւիտեանս յաւիտենից. ամէն:

Խաղաղութիւն ամենեցուն:

Աստուծոյ երկիրպագեսցուք:

Խաղաղութեամբ քով, Քրիստոս'ս Փրկիչ մեր, որ ի վեր է քան զամենայն միտս եւ զբանս, ամրացո՛ւ զմեզ եւ աներկի՛ւղ պահեա յամենայն չարէ: Հաւասարեա՛ զմեզ

ընդ ճշմարիտ երկրպագուս քո, որք հոգւով եւ ճշմարտութեամբ քեզ երկիր պագանեն: Վասն զի Ամենասուրբ Երրորդութեանդ վայել են փառք, իշխանութիւն եւ պատիւ այժմ եւ միշտ եւ յաւիտեանս յաւի:

Օրհնեալ Տէր մեր Յիսուս Քրիստոս:

Տէր Աստուած օրհնեցէ զամենեսեանդ. ամէն:

Հայր մեր, որ յերկինս:

(դպ) Միայն սուրբ, միայն Տէր՝ Յիսուս Քրիստոս ի փառս Աստուծոյ Հօր. ամէն:

(քհ) Օրհնեալ Հայր սուրբ Աստուած ճշմարիտ:

(դպ) Ամէն:

(քհ) Օրհնեալ Որդիդ սուրբ Աստուած ճշմարիտ:

(դպ) Ամէն:

(քհ) Օրհնեալ Հոգիդ Աստուած ճշմարիտ:

(դպ) Ամէն:

(քհ) Օրհնութիւն եւ փառք Հօր եւ Որդւոյ եւ Հոգւոյն Սրբոյ այժմ եւ:

(դպ) Հայր սուրբ, Որդիդ սուրբ, Հոգիդ սուրբ:

(քհ) Օրհնութիւն Հօր եւ Որդւոյ եւ Հոգւոյն Սրբոյ այժմ եւ միշտ եւ յաւի:

(դպ) Եղիցի անուն Տեառն օրհնեալ յայսմ հետէ մինչեւ յաւիտեան:

*(Երիցս կրկնեա)*

(քհ) Կատարումն Օրինաց եւ Մարգարէից դու եւ, Քրիստոս Աստուած փրկի՛չ մեր, որ լցեր զամենայն հայրական տնօրէնութիւնս քո, լից եւ զմեզ Հոգւովդ քով Սրբով:

(սրկ) Օրհնեցից զՏէր յամենայն ժամ, յամենայն ժամ օրհնութիւն նորա ի բերան իմ:

(քհ) Օրհնեալք եղերուք ի շնորհաց Սրբոյ Հոգւոյն. երթա՛յք խաղաղութեամբ, եւ Տէր եղիցի ընդ ձեզ ընդ ամենեսեանդ. ամէն:

*Օրհնութիւն սեղանոյ վասն մասնաւոր կերակրոց եւ ըմպելեաց*

*Պատրաստեն զտեղանն հացիւ եւ զարդարեն կերակրօք, եւ կանգնին իւրաքանչիւր  
նք ի տեղիս իւրեանց: Եւ զայ իշխանաւորն, կամ քահանայն, եւ ասէ սաղմոս:*

Կց. Աչք ամենեցուն ի քեզ յուսան, եւ դու տաս կերակուր նոցա ի ժամու:

(դպ) Բարձր առնեմ զքեզ, Աստուած իմ եւ թագաւոր իմ, եւ օրհնեմ զանուն քո  
յաւիտեան եւ յաւիտեանս յաւիտենից:

Զօրհանապազ օրհնեցից զքեզ եւ զովեցից զանուն քո յաւիտեան եւ յաւիտեանս  
յաւիտենից:

Մեծ է Տէր եւ օրհնեալ է յոյժ, եւ մեծութեան նորա ոչ գոյ չափ:

Ազգք եւ ազգք զովեցեն զգործս քո եւ զգօրութիւնս քո պատմեցեն:

Զմեծվայելչութիւն փառաց սրբութեան քո խօսեցին եւ զսքանչելիս քո  
պատմեցեն:

Զգօրութիւն ահի քո ասասցեն եւ զմեծութիւնս քո պատմեցեն:

Զյիշատակ բազում քաղցրութեան քո բղիսեցեն եւ արդարութեամբ քով ցնծասցեն:

Գթած, ողորմած է Տէր, երկայնամիտ եւ բազումողորմ:

Քաղցր է Տէր առ ամենեսեան, եւ գթութիւն նորա ի վերայ ամենայն արարածոց  
իւրոց:

Խոստովան եղիցին առ քեզ, Տէ՛ր, ամենայն գործք քո, եւ սուրբք քո օրհնեցեն զքեզ:

Զփառս արքայութեան քո ասասցեն եւ զգօրութիւնս քո պատմեցեն:

Ճանաչել որդւոց մարդկան զգօրութիւնս քո եւ զփառս մեծվայելչութեան  
արքայութեան քո:

Արքայութիւն քո արքայութիւն ամենայն յաւիտենից, եւ տէրութիւն քո ազգէ մինչեւ  
յազգ:

Հաւատարիմ է Տէր յամենայն բանս իւր եւ արդար է յամենայն գործս իւր:

Հաստատէ Տէր զամենայն գայթակղեալս եւ կանգնէ զամենայն գլորեալս:

Աչք ամենեցուն ի քեզ յուսան, եւ դու տաս կերակուր նոցա ի ժամու:

Տաս դու նոցա, եւ կերակրին, բանաս զձեռն քո եւ լցուցանես զամենեսեան  
քաղցրութեամբ կամօք քովք:

Արդար է Տէր յամենայն ճանապարհս իւր եւ սուրբ է յամենայն գործս իւր:

Մերձ է Տէր առ ամենեսեան, ոյք կարդան առ նա, առ ամենեսեան, ոյք կարդան առ նա ճշմարտութեամբ:

Զկամս երկիւղածաց իւրոց առնէ Տէր, աղօթից նոցա լսէ եւ կեցուցանէ զնոսա:

Պահէ Տէր զամենեսեան, ոյք սիրեն զնա, եւ զամենայն մեղաւորս սատակէ Տէր:

Զօրհնութիւնս Տեառն խօսեցի բերան իմ, օրհնեցէ ամենայն կենդանի զանուն սուրբ նորա յաւիտեան եւ յաւիտեանս յաւիտենից:

Փառք Հօր: Այժմ եւ միշտ:

(քի) Ողորմած զթած է Տէր, կերակուր տայ երկիւղածաց իւրոց:

(սրկ) Եւ եւս խաղաղութեան զՏէր աղա:

Աղաչեցուք զամենակալն Աստուած, զի պարգեւեցէ մեզ կերակուր ուրախութեան եւ լցուցէ զսիրտս մեր ի լիութենէ արարածոց իւրոց:

Ամենակալ՛ Տէր Աստուած մեր, կեցո՛ւ եւ ողորմեա՛:

(քի) Օրհնեա՛, Քրիստո՛ս Աստուած մեր, հոգեւոր օրհնութեամբ զկերակուրս եւ զըմպելիս ծառայից քոց եւ շնորհեա առողջութիւն հոգւոյ եւ մարմնոյ: Որպէս զի կրօնաւորական պարկեշտութեամբ վայելելով ի մարմնաւոր պիտոյիցս՝ անանց բարեացոյ եւ երկնից արքայութեանդ հաղորդս լիցուք ընդ ամենայն սուրբս քո, եւ զոհութեամբ փառաւորեցուք զբեզ ընդ Հօր եւ Ամենասուրբ Հոգւոյդ այժմ եւ միշտ եւ յաւիտեանս յաւիտենից. ամէն:

Հայր մեր, որ յերկինս:

*Եւ օրհնող սեղանոյն, կալով կանգուն եւ առեալ զհացն, բեկանէ ընդ պատուաւորացն, որք առընթեր կան, կամ ընդ այնցիկ, որ պատրաստող են ճաշոյն, եւ նորա առ ամենեսեան, եւ ասէ. ԸՃաշակեցէ՛ք խաղաղութեամբ, եւ նստին ի ճաշն: Իսկ եթէ վանականք իցեն կամ անապատաւորք, նստցի մինն յեղբարց ի բարձրագոյն տեղւոջ եւ առեալ ընթերնուցու զգիրս աստուածային, եւ ամենեքեան ունկն դիցեն ընթերցմանն անմոռնչ ճաշակմամբ: Եւ եթէ որ խնդրեցէ զլուծումն ինչ տարակուսանաց, լուծցեն, որք կարողքն իցեն, եւ դարձեալ ճաշեցեն լռելեայն եւ ոչ աղաղակաւ: Եւ յետ յառնելոյ ի սեղանոյն դարձեալ կացցեն ի տեղիս իւրեանց:*

*Եւ ասացէլ քահանայն.*

(քհ) Տէ՛ր Յիսուս, լցաք ի բարութեանց քոց:

(դպ) Տացուք գոհութիւն Տեառն աստուծոյ մերոյ:

Աչք Տեառն ի վերայ երկիւղածաց իւրոց, եւ ոչք յուսան յողորմութիւն նորա:

Փրկել ի մահուանէ զանձինս նոցա եւ կերակրել զնոսա ի սովու:

Անձինք մեր համբերեցեն Տեառն, զի օգնական եւ պաշտպան մեր է:

Ի նա ուրախ եղիցին սիրտք մեր, եւ յանուն սուրբ նորա յուսացուք:

Եղիցի ողորմութիւն քո, Տէ՛ր, ի վերայ մեր, որպէս յուսացաք ի քեզ:

Փառք Հօր: Այժմ եւ միշտ:

(քհ) Կերակրիչ եւ ուրախարա՛ր Տէր, փառք քեզ. լցուցան՝ղ Քրիստոս, գոհանամք զքէն:

(սրկ) Եւ եւս խաղաղութեան:

Գոհացարուք ի վերայ լիութեանց պարգեւաց Տեառն Աստուծոյ մերոյ:

Որ կերակրէ զմեզ օր ըստ օրէ առատապէս քաղցրութեամբ կամօք իւրովք: Զի հոգեւոր բարութեանն եւ երկնից արքայութեանն հաղորդս արասցէ զձառայս իւր ըստ ակնկալութեան յուսոյն մերոյ:

Ամենակա՛լ Տէր Աստուած մեր, կեցո՛ր եւ ողորմեա՛:

### *Աղօթք*

Օրհնեալ ես, Տէ՛ր Աստուած մեր, որ կերակրես զմեզ ի մանկութենէ եւ տաս կերակուր ամենայն մսեղեաց, լցո՛ւ ուրախութեամբ եւ բերկրութեամբ զսիրտս մեր, որպէս զի զամենայն բաւականութիւն ունիցիմք առաւելեալք ի գործս բարութեան ի Քրիստոս Յիսուս ի Տէր մեր, որում վայել է փառք, իշխանութիւն եւ պատիւ այժմ եւ միշտ եւ յաւիտեանս յաւիտենից. ամէն:

Խաղաղութիւն ամենեցուն:

Աստուծոյ երկիրպագեցուք:

Փառք քեզ, Տէ՛ր, փառք քեզ, թագաւո՛ր փառաց, որ ետուր մեզ կերակուր ուրախութեան եւ լցուցեր զսիրտս մեր ի լիութենէ ամենաբաւական ողորմութեան քոյ, լցո՛ւ եւ այժմ զմեզ Հոգւովդ քով Սրբով. որպէս զի գտցուք առաջի քոյ հաճոյք եւ մի՛ ամաչեցեալք, զի դու գաս եւ հատուցանես իւրաքանչիւր ըստ գործս իւր, եւ քեզ վայել է փառք, իշխանութիւն եւ պատիւ այժմ եւ միշտ եւ յաւիտեանս յաւիտենից. ամէն:

Օրհնեալ Տէր մեր Յիսուս Քրիստոս. ամէն:

Հայր մեր, որ յերկինս:

Զկերողքս Աստուած օրհնեցէ, սպասաւորաց եւ երախտաւորացն վարձս բարեաց պարգեւեցէ եւ օրհնեցէ զամենեսեան Քրիստոսս Աստուած, որ զմեզ կերակրեաց եւ լիացոյց, նմա փառք յաւիտեանս. ամէն:

## ԵՐԵԿՈՅԻ ԺԱՄ

*Կարգաւորութիւն հասարակաց աղօթից երեկոյի ժամուն, որ կատարի ի դէմս  
Որդոյն Աստուծոյ, որ էջ ի խաչէն եւ պատեալ պաստառակալաւ՝ եղաւ ի  
գերեզմանի:*

Ես առ Աստուած կարդացի, եւ նա լուաւ ինձ յերեկոյս, ի վաղորդայն եւ ի հասարակ անուր:

Սպասէի Աստուծոյ իմոյ եւ ակն ունէի կենարարին, որ փրկէ զճառայս իւր եւ կեցուցանէ:

Փառք Հօր եւ: Այժմ եւ միշտ եւ:

Եւ եւս խաղաղութեան զՏէր աղա:

Օրհնութիւն եւ փառք Հօր եւ:

Խաղաղութիւն ամենեցուն:

-----

*Մաղնու 2Ե*

Խոնարհեցո՛, Տէ՛ր, զունկն քո եւ լո՛ւր ինձ, զի աղքատ եւ տնանկ եմ ես:

Պահեա՛ զանձն իմ սուրբ, Տէ՛ր, եւ փրկեա՛ զծառայս քո, Աստուա՛ծ իմ, որ ի քեզ յուսացայ:

Ողորմեա՛ ինձ, Տէ՛ր, զի առ քեզ աղաղակեցի զօրհանապագ, ո՛ւրախ արա զանձն ծառայի քո, զի առ քեզ, Տէ՛ր, համբարձի զանձն իմ:

Զի դու, Տէ՛ր, քաղցր եւ ուղիղ ես, բազումողորմ առ ամենեւեան, որ կարդան առ քեզ:

Ո՛ւնկն դիր, Տէ՛ր, աղօթից իմոց եւ նայեա՛ ի ձայն խնդրուածաց իմոց:

Յաւուր նեղութեան իմոյ կարդացի առ քեզ, եւ լուար ինձ:

Ոչ ոք է նման քեզ յաստուածս, Տէ՛ր, եւ ոչ ոք է, որպէս զգործս քո:

Զամենայն ազգս, զոր արարեր, եկեացեն եւ երկիր պագցեն առաջի քո եւ փառաւոր արասցեն զանուն քո յաւիտեան:

Մեծ ես դու, Տէ՛ր, եւ առնես սքանչելիս, եւ դու միայն ես Աստուած:

Առաջնորդեա՛ ինձ ի ճանապարհի քում, եւ գնացից ի ճշմարտութեան քում, եւ ուրախ եղիցի սիրտ իմ երկնչել յանուանէ քումմէ:

Խոստովան եղեց առ քեզ, Տէ՛ր Աստուած իմ, բոլորով սրտիւ իմով, փառաւոր արարից զանուն քո յաւիտեան:

Մեծ եղեւ ի վերայ իմ ողորմութիւն քո, Տէ՛ր, եւ փրկեցեր զանձն իմ դժոխց ներքնոց:

Աստուա՛ծ, անօրէնք յարեան ի վերայ իմ, եւ ժողովք հզօրաց խնդրեցին զանձն իմ եւ ոչ համարեցան զքեզ Աստուած առաջի իւրեանց:

Այլ դու, Տէ՛ր Աստուած իմ, զթած ես եւ ողորմած, երկայնամիտ, բազումողորմ եւ ճշմարիտ, նայեա՛ առ իս եւ ողորմեա՛ ինձ:

Տո՛ւր զօրութիւն ծառայի քո, կեցո՛ զորդի աղախնոյ քո եւ արա՛ առ իս նշան բարութեան:

Տեսցեն ասելիք իմ եւ ամաչեսցեն, զի դու, Տէ՛ր, օգնեցեր ինձ եւ մխիթարեցեր զիս:

Փառք Հօր եւ: Այժմ եւ միշտ եւ:

*Մաղթանք*

Փառք քեզ, Աստուած, փառք քեզ, յաղագս ամենայնի, Տէ՛ր, փառք քեզ:

Եւ եւս խաղաղութեան զՏէր աղա:

Օրհնութիւն եւ փառք Հօր եւ:

Խաղաղութիւն ամենեցուն:

*Մաղմոս ՃԼԹ*

Ապրեցո՛ղիս, Տէ՛ր, ի մարդոյ չարէ, յառնէ անիրաւէ փրկեա՛ղիս:

Խորհեցան զանօրէնութիւն ի սիրտս իւրեանց, զօր ամենայն պատրաստեցան ի պատերազմ:

Սրեցին զլեզուս իւրեանց, որպէս զօձի, եւ թոյնք իժից ի ներքոյ շրթանց նոցա:

Պահեա՛ղիս, Տէ՛ր, ի ձեռաց մաղաւորի, եւ ի մարդոյ չարէ փրկեա՛ղիս:

Խորհեցան խափանել զգնացս իմ, թաքուցին ամբարտաւանք որոգայթ ինձ:

Լարս ձգեցին որոգայթ ոտից իմոց, շուրջ զշաւոթք իմովք եղին ինձ գայթակղութիւն:

Ասացի՝ Տէր Աստուած իմ ես դու, ո՛ւնկն դիր, Տէ՛ր, ձայնի աղօթից իմոց:

Տէ՛ր, Տէ՛ր, զօրութի՛ւն փրկութեան իմոյ, հովանի՛ գլխոյ իմոյ յաւուր պատերազմի:

Մի՛ մատներ զիս, Տէ՛ր, ի ցանկութիւն մեղաւորաց, ոյք խորհեցան վասն իմ, մի՛ ընդ վայր հարկաներ զիս:

Զի մի՛ երբեք բարձրացին, եւ խորհուրդք նոցա մի՛ կատարեցին. վախճան կատարածի նոցա՝ վաստակ շրթանց իւրեանց ծածկեցէ գնուս:

Արկցես ի վերայ նոցա զկայծակունս հրոյ եւ կործանեցես գնուս. ի տառապանաց մի՛ կարացեն կեալ:

Մարդոյ լեզուանոյ մի՛ յաջողեցի ի վերայ երկրի, զայր մեղաւոր չարիք իւր որսացեն ի կորուստ:

Ծանեայ, զի առնես, Տէ՛ր, դատաստան աղքատի եւ իրաւունս տնանկի:

Արդարք գոհացին զանուանէ քումմէ, բնակեցեն ուղիղք առաջի երեսաց քոց:

Տէ՛ր, կարդացի առ քեզ, եւ լո՛ւր ինձ, նայեա՛ ի ձայն աղօթից իմոց ի կարդալ իմում առ քեզ:

Ուղիղ եղիցին աղօթք իմ որպէս խունկ առաջի քո, Տէ՛ր, համբարձումն ձեռաց իմոց պատարագ երեկոյի:

Դիր, Տէ՛ր, պահապան բերանոյ իմոյ, եւ դուռն ամուր շրթանց իմոց, զի մի՛ խոտորեացի սիրտ իմ բանիւ չարութեան:

Ի պատճառել զպատճառս մեղաց ընդ մարդս, որ գործեն զանօրէնութիւն, եւ ոչ եղեց կցորդ ընտրելոց նոցա:

Խրատեսցէ զիս արդարն ողորմութեամբ եւ յանդիման արասցէ. իւղ մեղաւորի մի՛ օժցէ զգլուխ իմ, եւ աղօթք իմ ի կամս նորա:

Արգելան մերձ առ վիմին դատաւորք նոցա, լուիցեն բանից իմոց եւ քաղցրասցին:

Որպէս թանձրութիւն հողոյ, զի սփռեալ է ի վերայ երկրի, ցրուեսցին ոսկերք նորա մերձ ի դժոխս:

Առ քեզ, Տէ՛ր, Տէ՛ր, են աչք իմ, ի քեզ յուսացայ, Տէ՛ր, մի՛ հաներ զհոգի յինէն:

Պահեա՛ զիս յորոգայթէ, որ թաքուցաւ ինձ, ի գայթակցութենէ գործողին զանօրէնութիւն:

Անկցին ի ցանցս նորա մեղաւորք, միայն եմ ես, մինչեւ անցից:

Ձայնիւ իմով ես առ Տէր կարդացի, ձայնիւ իմով զՏէր աղաչեցի:

Սփռեցից առաջի Տեառն զաղօթս իմ, եւ զնեղութիւնս իմ առաջի նորա պատմեցից:

Ի նուաղել յինէն հոգւոյ իմոյ, դու, Տէ՛ր, ծանեար զշաւիղս իմ, ի ճանապարհ յոր եւ գնացի, թաքուցաւ ինձ որոգայթ:

Հայէի յաջմէ եւ տեսանէի, եւ ոչ ոք էր, որ ճանաչէր զիս. կորեաւ յինէն փախուստ իմ եւ ոչ գտաւ ինդրող անձին իմոյ:

Աղաղակեցի առ քեզ, Տէ՛ր, եւ ասացի՝ դու ես յոյս եւ բաժին իմ յերկրին կենդանեաց:

Նայեա՛, Տէ՛ր, յաղօթս իմ, զի ես խոնարհ եղէ յոյժ, ապրեցո՛ զիս հալածչաց իմոց, զի հզօր եղեն քան զիս:

Տէ՛ր, հան ի բանտէ զանձն իմ, զոհանամ զանուանէ քումմէ:

Եւ քեզ սպասեն արդարք, մինչեւ հատուցես:

Փառք Հօր եւ: Այժմ եւ միշտ:

-----

## *Երգ կիրակամտից*

Ալէլուիա, ալէլուիա:

Լոյս զուարթ սուրբ փառաց անմահի, Հօր երկնաւորի սրբոյ կենարարի՝ Յիսուս Քրիստոս:

Եկեալքս ի մտանել արեգականն տեսաք զլոյս երեկոյիս: Օրհնեմք զՀայր եւ զՈրդի եւ զՍուրբ Հոգիդ Աստուծոյ, եւ ամենեքեան ասեմք՝ ամէն:

Արժանաւորեա՛ զմեզ յամենայն ժամ օրհնել ձայնիւ երգով զանուն փառաց Ամենասուրբ Երրորդութեանդ, որ տայ զկենդանութիւն, վասն որոյ եւ աշխարհս զքեզ փառաւորէ:

## *Մաղթանք*

Օրհնեալ Տէր, որ բնակեալդ ես ի բարձունս, եւ օրհնեալ են փառք մեծութեան քոյ. որ հաստատեցեր զլուսաւորս ի բարձունս. ի յերկնից լոյս ծագեցեր ընդ ամենայն տիեզերս: Արարեր զարեգակն լուսատու տուրնջեան, զլուսինն եւ զաստեղս՝ լուսատու գիշերոյ, եւ զլոյս ճրագի. դու ես լոյս գովելի, սուրբ եւ առաջին լոյսն, ի քէն փախնու իսաւարն. եւ զլոյս քո կենդանի, Տէ՛ր, ծագեա՛ ի սիրտս մեր:

Եւ մեք միաբան ասացուք՝ օրհնեալ է անուն սուրբ փառաց քոց. եւ քեզ երգեմք զօրհնութիւն եւ զփառս Հօր եւ Որդոյ եւ Հոգւոյդ Սրբոյ այժմ եւ միշտ եւ յաւիտեանս յաւիտենից. ամէն:

## *Քարոզ*

Հասեալքս ի ժամ երեկոյիս ամենեքեան համբառնալով զձեռս մեր փառաւորեմք զքեզ, Տէ՛ր Աստուած մեր, որ շնորհեցեր մեզ զտիւս իսաղաղութեամբ անցուցանել եւ հասանիլ ի ժամ երեկոյիս: Արժանաւորեա՛ զմեզ, Տէ՛ր, սուրբ սրտիւ, հրեշտակային երգով գոհաբանութիւն մատուցանել Տեառն Աստուծոյ ամենակալիդ. կեցո՛ եւ ողորմեա՛: Ողորմեա՛ց մեզ, Տէ՛ր Աստուած մեր, ըստ մեծի ողորմութեան քում. ասացուք ամենեքեան միաբանութեամբ:

Տէ՛ր, ողոր․, Տէ՛ր, ողոր․, Տէ՛ր, ողոր:

*Մաղթանք*

Հասեալքս ի ժամ երեկոյիս ամենեքեան անդադար փառաւորեմք զՀայր եւ զՈրդի եւ զՍուրբ Հոգիդ այժմ եւ միշտ եւ յաւիտեանս յաւիտենից. ամէն:

Մ Ե Ս Ե Դ Ի Ք

*Ծննդեանն Քրիստոսի եւ Աւետեաց եւ Վերափոխմանն եւ այլոց տօնից  
Աստուածածնի*

ա. Տէր ասաց ցիս՝ որդի իմ ես դու, եւ ես այսօր ծնայ

զքեզ:

Ընդէ՞ր խոովեցան հեթանոսք, եւ ժողովուրդք խորհեցան ի սնոտիս:

բ. Մեծացուցէ անձն իմ զՏէր, եւ ցնծացէ հոգի իմ Աստուծով Փրկչաւ իմով:

Զի հայեցաւ ի խոնարհութիւն աղախնոյ իւրոյ. ահա յայսմհետէ երանիցեն ինձ ամենայն ազգք:

գ. Իջցէ որպէս զանձրեւ ի վերայ գեղման, որպէս

ցօղ, զի ցօղէ յերկիր:

Աստուած, զիրաւունս քո արքայի տուր, եւ զարդարութիւնս քո որդւոյ թագաւորի:

*Յարութեան*

(աձ) Տէր կարող եւ հզօր, Տէր կարող ի պատերազմի:

Տեառն է երկիր լրիւ իւրով, աշխարհ եւ ամենայն բնակիչք նորա:

(ակ) Աթոռ քո, Աստուա՛ծ, յաւիտեանս յաւիտենից, զաւազան ուղղութեան զաւազան արքայութեան քո:

Բղխեաց սիրտ իմ զբան բարի, եւ ասեմ զգործս իմ թագաւորի:

(բձ) Տէր թագաւորեաց, ցնծասցէ երկիր, ուրախ եղիցին կղզիք բագումբ:

Երեւեցան փայլատակունք նորա տիեզերաց, ետես եւ սասանեցաւ երկիր:

(բկ) Երգեցէք Տեառն երգ նոր, ամենա'յն երկիր, ծառայեցէք Տեառն ուրախութեամբ:

Մտէք առաջի նորա ցնծութեամբ, ծաներուք, զի նա է Տէր Աստուած մեր:

(գձ) Եկայք եւ տեսէք զգործս Աստուծոյ, որ արար զնշանս եւ զարուեստս ի վերայ երկրի:

Աստուած մեր ապաւեն եւ զօրութիւն, օգնական ի վերայ նեղութեանց, որք գտին զմեզ յոյժ:

(գկ) Աստուած մեր յերկինս եւ յերկրի, զամենայն, զոր ինչ կամեցաւ, եւ արար:

Յելանելն Իսրայելի յԵգիպտոսէ՝ տանն Յակոբայ ի ժողովրդենէ այլազգեաց:

(դձ) Եղիցի ձեռն քո ի վերայ առն, աջ քո ի վերայ որդոյ մարդոյ, զոր զօրացուցեր զնա ի քեզ:

Որ հովուեսդ Իսրայելի, նայեա'ց, որ առաջնորդես որպէս խաշին Յովսեփու:

(դկ) Աստուած աստուծոց Տէր խօսեցաւ եւ կոչեաց զերկիր:

Յելիցն արեգական մինչեւ ի մուտս արեւու:

### *Գալստեան*

Օրհնեալ, որ գաս յանուն Տեառն, օրհնեալ, որ գալոց ես:

Տէր Աստուած մեր երեւեցաւ մեզ, արարէք տօնս ուրախութեան կանխաւ, մինչեւ յանկինս սեղանոյ:

### *Եկեղեցւոյ*

Աստ օրհնեցէ՛ք, ամենա'յն ծառայք Տեառն, զՏէր:

Ո կայք ի տան Տեառն եւ ի գաւիթս Աստուծոյ մերոյ:

### *Իսաչի*

Ետուր երկիւղածաց քոց նշան, զի ապրեցին յերեսաց աղեղան:  
Որպէս փրկեցան սիրելիք քո, կեցո՛ւ աջով քո եւ լո՛ւր մեզ:

### *Կիրակամտի*

Սիրեցի, զի լուիցէ Տէր զձայն աղօթից իմոց.  
Զի խոնարհեցոյց զունկն իւր առ իս, եւ ես յաւուրս իմ կարդացի առ նա:

### *Մարտիրոսաց*

(աձ) Եղիցի ողորմութիւն քո, Տէ՛ր, ի վերայ մեր, որպէս յուսացաք ի քեզ:  
Ցնծացէ՛ք, արդա՛րք, ի Տէր. ուղղոց վայել է օրհնութիւն:  
(ակ) Տէր սիրէ զիրաւունս եւ ոչ ընդ վայր հարկանէ զսուրբս իւր:  
Փրկութիւն արդարոց ի Տեառնէ է, վերակացու է նոցա ի ժամանակս նեղութեան:  
(բձ) Սքանչելի է Աստուած ի վերայ սրբոց իւրոց, Աստուած Իսրայելի:  
Տէր Աստուած օրհնեալ, օրհնեալ է Տէր զօրհանապագ:  
(բկ) Օգնութիւն ինձ ի Տեառնէ եկեացէ, որ արար զերկինս եւ զերկիր:  
Համբարձի զաչս իմ ի լերինս, ուստի եկեացէ ինձ օգնութիւն:  
(գձ) Աստուած փառաւորեալ է ի խորհուրդս սրբոց իւրոց, մե՞ծ եւ ահաւոր ի վերայ  
այնոցիկ, որք շուրջ են գնովա:  
Խոստովան եղիցին երկինք սքանչելեաց քոց, Տէ՛ր, եւ ճշմարտութիւն քո յեկեղեցիս  
սրբոց:  
(գկ) Սիրեցից զքեզ, Տէ՛ր, զօրութիւն իմ, Տէ՛ր, հաստատիչ իմ, ապաւեն իմ եւ փրկիչ  
իմ:  
Աստուած օգնական իմ, եւ ես յուսամ ի նա. ապաւեն իմ, եղջիր փրկութեան իմոյ,  
ընդունելի իմ է:  
(դձ) Մերձ է Տէր առ ամենեսեան, ոյք կարդան առ նա, առ ամենեսեան, ոյք  
կարդան առ նա ճշմարտութեամբ:  
Զկամս երկիւղածաց իւրոց առնէ Տէր, աղօթից նոցա լսէ եւ կեցուցանէ զնոսա:

(դկ) Արդարքն որպէս զարմաւենիս ծաղկեացին, որպէս զմայրսն Լիբանանու բագումք եղիցին:

Տնկեալք եղիցին ի տան Տեառն եւ ի գաւիթս Աստուծոյ մերոյ ծաղկեացին:

### *Ապաշխարութեան*

(աձ) Տէր լուիցէ ինձ ի կարդալ իմում առ նա:

Ի կարդալ իմում լուար ինձ, Աստուա՛ծ, ըստ արդարութեան իմոյ:

(ակ) Մի՛ սասացէ թշնամին իմ, թէ յաղթեցի նմա, կամ նեղիչք իմ ցնծասցեն, թէ ես սասանեցայց:

Մինչեւ յե՞րբ դարձուցանես զերեսս քո յինէն, մինչեւ յե՞րբ բարձրանայ թշնամին ի վերայ իմ. նայեա՛ եւ լո՛ւր ինձ, Տէ՛ր Աստուած իմ:

(բձ) Բերան արդարոյ պատմէ զիմաստութիւն, եւ լեզու նորա խօսեցցի զիրաւունս:

Մի՛ նախանձիր ընդ չարս, եւ մի՛ ընդ այնոսիկ, ոյք գործեն զանօրէնութիւնս:

(բկ) Քաղցրութիւն արարեր ընդ ծառայի քում, Տէ՛ր, ըստ բանի քում:

Քաղցր ես դու, Տէ՛ր, եւ քաղցրութեամբ քով խրատեա՛ զիս:

(գձ) Նայեա՛ եւ լո՛ւր ինձ, Տէ՛ր Աստուած իմ:

Մինչեւ յե՞րբ, Տէ՛ր, մոռանաս զիս իսպառ, մինչեւ յե՞րբ դարձուցանես զերեսս քո յինէն:

(գկ) Գթութիւնք քո բագում են, Տէ՛ր, ըստ իրաւանց քոց կեցո՛ զիս:

Տե՛ս զխոնարհութիւն իմ եւ փրկեա՛ զիս, զի զօրէնս քո ես ոչ մոռացայ:

(դձ) Աստուա՛ծ, յօգնել ինձ նայեաց եւ, Տէ՛ր, յընկերել ինձ փութա:

Ամաչեացեն եւ յամօթ լիցին, ոյք խնդրէին զանձն իմ:

(դկ) Լո՛ւր, Աստուա՛ծ, աղօթից իմոց՝ յաղաչել ինձ առ քեզ, յերկիւղէ թշնամոյն փրկեա՛ զանձն իմ:

Ծածկեացես ի ժողովոց չարաց, ի բազմութենէ, ոյք գործեն զանօրէնութիւն:

### *Աղուհացից*

(բշ) Դարձո՛ զիս, Տէ՛ր, ի մեղաց իմոց, եւ զամենայն անօրէնութիւնս իմ քաւեա՛ յինէն:

Ողորմեա՛ ինձ, Աստուա՛ծ, ըստ մեծի ողորմութեան քում, ըստ բազում գթութեան քում քաւեա՛ զանօրէնութիւնս իմ:

(գշ) Երանի ամենեցուն, ոյք երկնչին ի Տեառնէ եւ գնան ի ճանապարհս նորա:

Զվաստակս ձեռաց քոց կերիցես. երանի է քեզ, եւ բարի եղիցի:

(դշ) Մի՛ թողուր զիս, Տէ՛ր Աստուած իմ, եւ մի՛ ի բացեայ առնէր յինէն. նայեաց յօգնել ինձ, Տէ՛ր փրկութեան իմոյ:

Տէ՛ր, առաջի քո է ամենայն ցանկութիւն իմ, եւ հեծութիւն իմ ի քէն ոչ ծածկեցաւ:

(եշ) Մի՛ ընկենուր զիս, Տէ՛ր, ի ժամանակս ծերութեան, ի պակասել զօրութեան իմոյ մի՛ թողուր զիս:

Ի քեզ, Տէ՛ր, յուսացայ. մի՛ ամաչեցից յաւիտեան, յարդարութեան քում փրկեա՛ եւ ապրեցո՛ զիս:

(ուր) Մերձեցին խնդրուածք իմ առաջի քո, Տէ՛ր, ըստ բանի քում իմաստուն արա զիս:

Զայնի իմում լո՛ւր, Տէ՛ր, ըստ ողորմութեան քում, եւ յիրաւունս քո կեցո՛ զիս:

### *Ի մեծի Հինգշաբաթի*

Լուացից սրբութեամբ զձեռս իմ եւ շուրջ եղեց զսեղանով քո, Տէ՛ր:

Տէ՛ր, սիրեցի զվայելչութիւն տան քո եւ զսեղի յարկի փառաց քոց:

### *Ուղղեցի*

Ուղիղ եղիցին աղօթք իմ որպէս խունկ առաջի քո, Տէ՛ր:

Զերեկոյի աղօթս մեր ընկալ, Տէ՛ր, եւ զտարածումն ձեռաց մերոց:

### *Ի մեծի Ուրբաթու*

Ետուն ի կերակուր ինձ լեղի եւ ի ծարաւ իմ արբուցին ինձ քացախ:

Եղիցին սեղանք նոցա առաջի նոցա յորոգայթ, ի հատուցումն եւ ի գայթակղութիւն:

## *Ուղղեցի*

Ուղիղ եղիցին աղաչանք մեր որպէս խունկ առաջի քո, Տէ՛ր:  
Համբարձումն ձեռաց մերոց պատարագ երեկոյի:

-----

## *Կարգ Ուղիղ եղիցեաց*

Ուղիղ եղիցին աղօթք իմ  
Որպէս խունկ առաջի քո, Տէ՛ր,  
Համբարձումն ձեռաց իմոց՝  
Պատարագ երեկոյի:

## *Յատուկ առ աջակողմանն*

Ուղիղ եղիցին աղօթք իմ որպէս խունկ առաջի քո, Տէ՛ր, համբարձումն ձեռաց իմոց՝  
պատարագ երեկոյի:  
Տէ՛ր, աղաղակեցի առ քեզ, եւ լո՛ւր ինձ: Նայեա՛ ի ձայն խնդրուածաց իմոց  
յաղաղակել իմում առ քեզ:

## *Քարոզ*

### *Կիրակամտից եւ ամենայն աւուրց տէրունեաց*

Ասասցուք ամենեքեան միաբանութեամբ՝ Տէ՛ր, ողորմեա՛:

Տէ՛ր, ողորմեա՛:

Վասն խաղաղութեան ամենայն աշխարհի եւ հաստատութեան սրբոյ եկեղեցւոյ  
զՏէր աղաչեսցուք: Վասն ամենայն սուրբ եւ ուղղափառ եպիսկոպոսաց զՏէր աղա:  
Վասն հայրապետին մերոյ տեառն (*այս անուն*) կենաց եւ փրկութեան հոգւոյ նորին  
զՏէր աղա:

Վասն վարդապետաց, քահանայից, սարկաւազաց, դպրաց եւ ամենայն ուխտի մանկանց եկեղեցւոյ զՏէր աղա:

Վասն բարեպաշտ թագաւորաց եւ աստուածասէր իշխանաց, զօրավարաց եւ զօրաց նոցին զՏէր աղա:

Վասն զի Տէրն ամենակալ հնազանդեցուցէ առաջի նոցա զամենայն պատերազմունս թշնամեաց զՏէր աղա:

Յաղագս հարց եւ եղբարցն մերոց, որք ի գերութեան են եւ ի չար ծառայութեան, զՏէր աղաչեսցուք:

Յաղագս ճանապարհորդաց եւ նաւորդաց խաղաղութեամբ հասանիլ ի նաւահանգիտն բարութեան զՏէր աղա:

Յաղագս հիւանդաց եւ ամենայն վշտացելոց փութապէս առողջութեան զՏէր աղա:

Յաղագս բարեխառնութեան օրոց, անձրեւաց քաղցրութեան եւ պտղոց առատութեան զՏէր աղա:

Յաղագս ուխտաւորաց եւ պտղաբերից ի սուրբ Եկեղեցի Աստուծոյ զՏէր աղ:

Եւ յաղագս այնոցիկ, որք մատնեալք են ի ձեռս անօրինաց վասն անուանն Քրիստոսի, զՏէր աղա:

Յաղագս հոգւոցն հանգուցելոց, որք ճշմարիտ եւ ուղիղ հաւատով ի Քրիստոս ննջեցին, զՏէր աղա:

Յաղագս փրկելոյ զմեզ *Տէառն* Աստուծոյ յերեւելի եւ յաներեւոյթ թշնամոյն զՏէր աղա:

### *Մաղթանք*

Բարեխօս ունիմք սուրբ զՄարիամ զԱստուածածինն՝ զփառաւորեալ եւ օրհնեալ միշտ սուրբ Կոյսն, սուրբ զՅովհաննէս Մկրտիչն, սուրբ զՍտեփանոս նախավկայն, սուրբ զառաքեալսն եւ զմարգարէսն, զարի եւ զյաղթող սուրբ վկայսն եւ զմեծ խոստովանողն Քրիստոսի զհայրապետն մեր զսուրբն Գրիգոր Լուսաւորիչն Հայաստանեայցս աշխարհի:

Յիշեսջիք եւ զամենայն սուրբս եւ նոքք զՏէր աղաչեսցուք:

Ձերեկս մերձեալ եւ զառաջակայ գիշերս խաղաղութեամբ անցուցանել հաւատով ի  
*Տէառնէ* խնդրեցուք:

Ձիրեշտակ խաղաղութեան պահա:

Ջքաւութիւն եւ զթողութիւն յան:

Չարբոյ խաչին մեծ եւ կարող զօրու:

Եւ եւս՝ միաբան վասն ճշմարիտ եւ:

Չանձինս մեր եւ զմիմեանս *Տէառնէ*:

Ողորմեա՛ց մեզ, Տէ՛ր Աստուած մեր:

-----  
*Քարոզ*

*Ի տօնս սրբոց եւ յաւուրս պահոց*

Եւ եւս խաղաղութեան զՏէր աղա:

Աղաչեցուք զամենակալն Աստուած՝ զՀայր *Տէառն* մերոյ Յիսուսի Քրիստոսի, զԹագաւորն խաղաղութեան յաղագս խաղաղութեան եւ վասն միայնոյ սուրբ կաթողիկէ եւ առաքելական Եկեղեցոյ, զի բազում ամս խաղաղութեամբ տացէ մեզ Տէր Աստուած մեր եւ զթագաւորս խաղաղարարս առաքեցէ առ մեզ վասն մեծի սուրբ եւ ահաւոր անուան իւրոյ. զպէտս զաւառաց, զգօրավարս, զգօրագլուխս, զժողովուրդս, զմուտս եւ զելս մեր խաղաղութեամբ պահեցէ եւ զամենայն պատերազմունս թշնամոյն խորտակեցէ ի մէնջ. Տէրն ամենակալ կեցուցէ եւ ողորմեցի:

Ձերեկս մերձեալ եւ զառաջակայ գիշերս խաղաղութեամբ անցուցանել հաւատով ի  
*Տէառնէ* խնդրեցուք:

Ձիրեշտակ խաղաղութեան պահա:

Ջքաւութիւն եւ զթողութիւն յան:

Չարբոյ խաչին մեծ եւ կարող զօրու:

Եւ եւս՝ միաբան վասն ճշմարիտ եւ:

Չանձինս մեր եւ զմիմեանս *Տէառնէ*:

Ողորմեա՛ց մեզ, Տէ՛ր Աստուած մեր:

## *Աղօթք*

Լո՛ւր ձայնից մերոց, Տէ՛ր Աստուած մեր, ընկա՛լ զաղաչանս մեր, զհամբարձումն ձեռաց մերոց եւ զբանս աղօթից՝ սրբելով զերեկոյի պատարագս մեր ի հոտ անուշից ի հաճոյս քեզ պատրաստել: Յաւել ի մեզ, Տէ՛ր ամենակալ, զհաւատ, զյոյս, զսէր եւ զամենայն գործս առաքինութեան, որպէս զի ըստ կամաց քոց բարեսիրաց միշտ կրօնաւորեալք բարեպաշտութեամբ ի տուէ եւ ի գիշերի՝ արժանաւորք եղիցուք յաղագս անձանց մերոց փրկութեան եւ վասն հոգեւոր կենացդ աղաչել զքեզ, Տէ՛ր, եւ գտանել ի քէն զշնորհս եւ զողորմութիւն. եւ գոհանալով փառաւորեսցուք զՀայր եւ զՈրդի եւ զՍուրբ Հոգիդ այժմ եւ միշտ եւ յաւիտեանս յաւիտենից. ամէն:

Խաղաղութիւն ամենեցուն:

Աստուծոյ երկիրպագեսցուք:

Քեզ երկիր պագանելով, Տէ՛ր Աստուած մեր, գոհանամք զքէն յաղագս խաղաղութեամբ անցուցանելոյ ի մէնջ զերկարութիւն տուրնջեանս: Տո՛ւր մեզ, Տէ՛ր, աղաչեմք զքեզ՝ զերեկս եւ զառաջիկայ զիշերս առանց մեղաց եւ առանց գայթակղութեան անցուցանել, հաստատուն կալ եւ մնալ ի հաւատ, ի յոյս, ի սէր, եւ ի պատուիրանապահութեան քոյ: Խնդրելով զխաղաղութիւն ամենայն աշխարհի եւ եկեղեցոյ քում սրբոյ զհաստատութիւն եւ անձանց մերոց զփրկութիւն: Որպէս զի ընդունելով ի քէն զհայցուածս մեր՝ եւ զմեծ վայելչական փառաբանութիւն միշտ ի բարձունս առաքեսցուք՝ ամենագոր տէրութեանդ, Քրիստո՛ս Աստուած մեր, այժմ եւ միշտ եւ յաւիտեանս յաւիտենից. ամէն:

Եւ ասի *Սուրբ Աստուած՝* ըստ պատշաճի

*Տես երես 305*

Սուրբ Աստուած, սուրբ եւ հզօր, սուրբ եւ անմահ, որ խաչեցար վասն մեր, ողորմեա մեզ: *Երիցս կրկնեա:*

Փառաւորեալ եւ օրհնեալ միշտ սուրբ կոյս Աստուածածին Մարիամ՝ մայր Քրիստոսի, մատո՛ղ զաղաչանս մեր Որդւոյ քոյ եւ Աստուծոյ մերոյ:

*Մաղթանք*

Փրկել զմեզ ի փորձութենէ եւ յամենայն վտանգից մերոց:

*Քարոզ*

Եւ եւս խաղաղութեան զՏէր աղա:

Վասն լսելի լինելոյ *Տեառն* Աստուծոյ ձայնի աղաչանաց մերոց բարեխօսութեամբ սուրբ Աստուածածնին եւ իջանելոյ ի վերայ մեր ողորմութեան եւ զթութեան Տեառն Աստուծոյ:

Ամենակա՛լ Տէր Աստուած մեր, կեցո՛ր եւ ողորմեա՛:

Օրհնութիւն եւ փառք Հօր եւ Որդւոյ եւ Հոգւոյն Սրբոյ այժմ եւ միշտ եւ յաւիտեանս յաւիտենից. ամէն:

Խաղաղութիւն ամենեցուն:

-----  
*Մաղմոս ՃԻ*

Համբարձի զաչս իմ ի լերինս, ուստի եկեցցէ ինձ օգնութիւն:

Օգնութիւն ինձ ի Տեառնէ եկեցցէ, որ արար զերկինս եւ զերկիր:

Մի՛ տար ի սասանութիւն զոտն քո, եւ մի՛ ննջեցցէ պահապան քո:

Որպէս ոչ ննջէ եւ ոչ ի քուն երթայ պահապանն Իսրայելի:

Տէր պահեցցէ զքեզ եւ Տէր ընկալցի աջոյ ձեռամբն իւրով:

Արեգակն ի տուէ զքեզ մի՛ մեղիցէ, եւ մի՛ լուսինն ի գիշերի:

Տէր պահեցցէ զքեզ յամենայն չարէ, պահեցցէ Տէր զանձն քո:

Տէր պահեցէ՛ղ զմուտ եւ զել քո յայսմհետէ մինչեւ յաւիտեան:

Փառք Հօր եւ: Այժմ եւ միշտ եւ:

-----

*Աստ ասի Համբարձի շարական ըստ պատշաճի.*

*Կիրակամտի զայս ասա*

(աձ) Սուրբ ես, Տէ՛ր զօրութեանց, որ բնակեալդ ես ի յերկինս եւ բարեբանիս ի սրբոց քոց: Երկնային զօրութիւնք՝ սերովբէք եւ քերովբէք, անդադար օրինեն սուրբ զանուանդ քո:

Քահանայք, ընդ նոսին պաշտօնեայք եւ ժողովուրդք երկիրպագեսցուք տէրութեանդ քո:

Լոյսդ, որ յառաջ քան զյաւիտեանս ի Հօրէ առաքեցար եւ լուսով իմանալեալ լցեր զարարածս, օրինեալ ես, Թագաւո՛ր յաւիտենից:

Որ զլոյսն ի սկզբանէ հաստատեցեր վերստին եւ զխաւարն անգիտութեան յարութեամբդ քո հալածեցեր, օրհ:

Ուստի եւ մեք՝ լուսաւորեալքս ընդ լուսեղէն զուարթնոցն, երգեսցուք ցնծութեամբ ի յարութեան երեկոյիս, օրհ:

Երկնաքաղաքացին Յովհաննէս՝ մեծն ի ծնունդս կանանց, քարոզէր յանապատի ազդարարող բարբառովն զձագումն լուսոյ արեգականն արդարութեան:

Ճշմարիտ մարգարէ եւ ձեռնադրող Որդոյն Աստուծոյ, յառաջընթաց կարապետ եւ պատմող աստուածային օրինացն հորդէր ճանապարհս թագաւորին յաւիտենից:

Յանօրէն գինարբուսն մոլեգնեալ Հերովդիիադայ ի պարգելի մասին խնդրէր զգլուխ մարգարէին՝ շիջուցանել զարուսեակն եւ զանաղօտ լապտերն:

Փառք Հօր եւ:

Սրբուհոյ Աստուածածնին բարեխօսութեամբ պարգելեա՛ երկրպագուացս Ամենասուրբ Երրորդութեանդ զյարութիւն յուսոյ կենացն յաւիտենից այժմ եւ:

Զհաւատացեալ ժողովուրդս Սուրբ Երրորդութեանդ եւ զապաւինեալս ի խորան փառաց քոց պահեա՛ անխռով ի խաղաղութեան:

*Յորժամ ւաւոր տօնն առաքելոց լինի,*

ԳԻ քէն հայցեմքն *ասա զկնի* Ուստի եւ մերքին

(աձ) Ի քէն հայցեմք, բազումողո՛րմ, ի ձեռն սրբոց քոց առաքելոցն, խնայեա՛, Տէ՛ր, ի յանձինս մեր:

Ձորս ընտրեցեր յառաջ գիտութեամբն զարժանացելոցն անձինս, տպաւորեալ ի նոսա զձոզի շնորհաց քոց, որով վանեալ հերքեցին զապստամբ զթշնամին, բարեխօսութեամբ սոցա խնայ:

Որք զխաւարն անգիտութեան մերկացին յամենայն ազանց, զգեստաւորեալ զհեթանոսս առաքելական կոչմամբ ի յոյս կենացն յաւիտենից. բարե:

Վասն որոյ եւ մեր՝ հաւատացեալքս, կատարեսցուք զիշատակ սրբոց առաքելոցն. աղաչե՛մք զքեզ, որ միայն զթածդ ես, առատաձեռնեա՛ ի մեզ զմեծ քո ողորմութիւնդ, Տէ՛ր, որ կեցուցանես զամենայն արարածս: Փառք Հօր:

Արդ, աղաչեա՛, մա՛յր Աստուծոյ, զձնեալն ի քէն վասն մեր, զի ընդ նմին պահելով՝ սուրբ յարութեամբ նորա նորոգեսցուք, առ նա միշտ բարեխօսեա՛՝ կեցուցանել զմեզ: Այժմ եւ: Եւ համբարձեալ զձայնն Յուդայի խնդրելով ի Տեառնէ զտենչալին ամենեցուն սուրբ զիսաչն. եւ հաւատով գոչեր՝ եկայք, երկրպագեսցուք աստուածային սուրբ նշանիս՝ մեծացուցանելով զձնեալն Կուսէն:

-----

(գկ) Ձքո յարութիւնդ օրհնեմք, մարդասէ՛ր, աղաղակելով՝ Տէ՛ր, փառք քեզ:

Ձոր օրհնեն սերովբէքն եւ գովեն քերովբէքն, աղաղա:

Անդադար բերանով, անհանգիստ բարբառով աղաղակելով՝ Տէ՛ր, փառք քեզ:

(գկ) Առեալ եւ մեր զօրհնութիւնս հրեշտակացն՝ երգեմք եւ ասեմք՝ փա՛ռք յարութեան քո, Տէ՛ր:

Որ խաչեցար վասն մեր, թաղեցար եւ յարեար, ազատեցեր ի մեղաց, սուրբ Աստուած, սուրբ եւ հօօր, սուրբ, անմահ թագաւոր:

(գկ) Այսօր մարտիրոսաց դասքն ցնծացեալ բերկրին ընդ առաջ Տեառն Քրիստոսի Որդւոյն Աստուծոյ: Ձայն ի յերկնից վկայեալ՝ ասէ. □Եկա՛յք, օրհնեա՛լք Հօր իմոյ, ժառանգորդք երկնից խորանացն: Լցէք զտեղի անկելոցն ապստամբողական թշնամւոյն, որ ի յերկնից վայր անկեալ□:

(դկ) Մտցեն աղօթք իմ, Տէ՛ր, ի տաճար սուրբ քո, եւ առաքեա՛ ի մեզ, Տէ՛ր, զօգնութիւն ի լեռնէ սրբոյ քումմէ: Հովանասցի աջ քո, Տէ՛ր, ի վերայ ստեղծուածոց քոց, եւ առաքեա ի:

Զերեկոյի աղօթս մեր ընկալ, Տէ՛ր, բարեխօսութեամբ ծնողի քո, եւ առաքեա ի:

-----

(քրզ)

Վասն խաղաղութեան ամենայն աշխարհի եւ հաստատութեան սրբոյ եկեղեցոյ զՏէր աղաչեսցուք: Ասասցուք ամենեքեան միաբանութեամբ՝

Տէ՛ր, ողորմեա՛, Տէ՛ր, ողոր., Տէ՛ր, ողոր.

### *Աղօթք*

Հա՛յր գթած, բարեխնամող, արարիչ ամենայն արարածոց, ընկա՛լ զպաղատանս ծառայից քոց ի ժամ երեկոյիս, որ առատդ եւ առ ամենեսեան պարգևօք բարերարութեան քո: Ողորմեա՛, Տէ՛ր, ամենայն աշխարհի եւ եկեղեցոյ քում սրբոյ. հիւանդաց, վշտացելոց, ճանապարհորդաց, նաւորդաց, խոստովանողաց, ապաշխարողաց եւ հոգւոցն հանգուցելոց: Զի դու, Տէ՛ր ամենակալ, գիտես զպէտս մեր եւ զկարիս առաւել, քան զոր խնդրեմք եւ իմանամք, եւ քեզ ընդ Որդւոյ եւ Ամենասրբոյ Հոգւոյդ վայել է փառք, իշխանութիւն եւ պատիւ այժմ եւ միշտ եւ յաւիտեանս յաւիտենից. ամէն:

-----

*Յաւուրս աղուհացից աստ ասի Տէր ամենակալն եւ իւր Քարոզն եւ Աղօթքն. տես*

*յերես 333. եւ յետ նորա՝ Որ բնակեալն:*

*Իսկ յայլ աւուրս պահոց եւ ի տօնս մարտիրոսաց ասի միայն Որ բնակեալն: Եւ ի*

*կիրակամուտս՝ Աստ օրհնեցէքն:*

Արձակման փոխ: *Մաղնու Ղ*

Որ բնակեալն է յօգնութիւն Բարձրելոյն, ընդ հովանեաւ Աստուծոյ յերկինս  
հանգիցէ:

Ասասցէ Տեառն՝ ընդունող իմ ես դու, ապաւէ՛ն իմ Աստուած, եւ ես յուսամ ի նա:

Նա փրկեցէ զիս յորոգայթէ որսողին եւ ի բանից խռովութենէ:

Ի թիկնամէջս իւր ընկալցի զքեզ, ի հովանի թելոց նորա յուսասցիս:

Որպէս զէն՝ շուրջ եղիցի զքեւ ճշմարտութիւն նորա:

Ոչ երկիցես դու յերկիւղէ գիշերի եւ ոչ ի նետէ, որ թռչի ի տուէ,

Յիրէ, որ շրջի ի խաւարի, ի գայթակղութենէ դիւին ի հասարակ աւուր:

Անկցին ի կողմանէ քումմէ հազարք, եւ ի բիրք՝ ընդ աջմէ քումմէ, եւ առ քեզ ինչ ոչ  
մերձեցին:

Բայց միայն աչօք քովք հայեցցիս դու եւ զհատուցումն մեղաւորաց տեսցես, զի դու,  
Տէ՛ր, յոյս իմ ես:

ԶԲարձրեալն արարեր քեզ ապաւէն. ոչ հասցեն առ քեզ չարք, եւ տանջանք մի՛  
մերձեցին ի յարկս քո:

Հրէշտակաց իւրոց պատուիրեալ է վասն քո՝ պահել զքեզ յամենայն ճանապարհս  
քո:

Ի բազուկս իւրեանց ընկալցին զքեզ, զի մի՛ երբէք հարցես զքարի գոտն քո:

Ի վերայ իժից եւ քարբից գնասցես դու եւ առ ոտն կոխեսցես զառիւծն եւ զվիշապն:

Քանզի յիս յուսացաւ, եւ փրկեցից զնա, հովանի եղէց նմա, զի ծանեաւ զանուն իմ:

Կարդասցէ առ իս, եւ ես լուայց նմա եւ առ նմա եղէց ի նեղութեան:

Փրկեցից եւ փառաւոր արարից զնա, երկայն աւուրբք լցուցից եւ ցուցից նմա  
զփրկութիւն իմ:

Առ քեզ, Տէ՛ր, համբարձի զաչս իմ, որ բնակեալդ ես ի յերկինս:

Որպէս աչք ծառայի ի ձեռն Տեառն իւրոյ եւ որպէս աչք աղախնոյ ի ձեռն տիկնոջ  
իւրոյ:

Այնպէս են աչք մեր առ քեզ, Տէ՛ր Աստուած մեր, մինչեւ ողորմեսցիս ի վերայ մեր:

Ողորմեա՛ մեզ, Տէ՛ր, ողորմեա՛ մեզ, զի բազում լցաք արհամարհանօք:

Եւս առաւել լցան անձինք մեր նախատանօք, որ նախատէին զմեզ, եւ արհամարհանօք ամբարտաւանից:

Աստուա՛ծ, յանուան քում կեցո՛ր զիս եւ ի զօրութեան քում իրա՛ւ արա ինձ:

Աստուա՛ծ, լո՛ւր աղօթից իմոց, ո՛րնկն դիր բանից բերանոյ իմոյ:

Օտարք յարեան ի վերայ իմ, եւ հօրք խնդրեցին զանձն իմ, եւ ոչ համարեցան զքեզ

Աստուած առաջի իրեանց:

Ահա Աստուած օգնական իմ, եւ Տէր ընդունելի հոգւոյ իմոյ:

Ի դարձուցանել զչարն ի թշնամիս իմ ճշմարտութեամբ քով սաստկեա՛ զնոսա:

Ես կամօք իմովք պատարագս մատուցից քեզ, խոստովան եղէց անուան քում, Տէ՛ր, զի բարի է:

Յամենայն նեղութենէ իմմէ փրկեցեր զիս, եւ ի թշնամիս իմ ետես ակն իմ:

Փառք Հօր եւ: Այժմ եւ միշտ եւ:

### *Մաղթանք*

Զբարձրեալն զՔրիստոս արասցուք մեզ ապաւեն, զի ոչ հասցեն առ մեզ չարք, եւ տանջանք մի՛ մերձեցին ի յարկս մեր:

### *Քարոզ*

Եւ մեք միաբան զողորմութիւն ի *Տեանէ* խնդրելով՝ ասասցուք ամենեքեան միաբանութեամբ:

### *Աղօթք*

Տէ՛ր, ողորմեա՛, Տէ՛ր, ողոր., Տէ՛ր, ողոր.:

Յոյս կենաց, ընդունող աղօթից, քաւիչ մեղաց եւ կատարիչ խնդրուածաց Քրիստոս

Աստուած մեր, ընկա՛լ զպաղատանս մեր ի ժամ երեկոյիս բարեխօսութեամբ սուրբ

Աստուածածնին եւ աղաչանօք ամենայն սրբոց քոց: Լո՛ւր մեզ, Տէ՛ր, եւ ողորմեա՛,

ներեա', քաւեա' եւ թո'ղ զմեղս մեր, արժանաւորեա' գոհութեամբ փառաւորել զքեզ ընդ չօր եւ ընդ Սրբոյ Հոգւոյն այժմ եւ միշտ եւ յաւիտեանս յաւիտենից. ամէն:

Յիշեա', Տէ'ր, զպաշտօն:

Բարերար եւ բազումողորմ Աստ:

Հայր մեր, որ յերկինս:

-----  
*Փոխ Կիրակմտից:*

Սաղմոս ՃԼԳ

Աստ օրհնեցէք, ամենայն ծառայք Տեառն, զՏէր, ո կայք ի տուն Տեառն եւ ի գաւիթս Աստուծոյ մերոյ:

Ի զհշերի համբարձէք զձեռս ձեր ի սրբութիւն եւ օրհնեցէք զՏէր:

Օրհնեսցէ զմեզ Տէր ի Սիոնէ, որ արար զերկինս եւ զերկիր:

Խոստովան եղէք քեզ, Տէ'ր, բոլորով սրտիւ իմով, առաջի հրեշտակաց սաղմոս ասացից քեզ:

Զի լուար զբանս բերանոյ իմոյ, երկիր պագից ի տաճար սուրբ քո եւ խոստովան եղէք անուան քում վասն ողորմութեան եւ ճշմարտութեան քոյ:

Մեծ արարեր յամենայնի զանուն սուրբ քո. յորում ասուր կարդամ առ քեզ, վաղվաղակի լուր ինձ, եւ բազում արասցես զօրութիւնս յանձն իմ:

Խոստովան եղիցին առ քեզ ամենայն թագաւորք երկրի, զի լուան զբանս բերանոյ քո, եւ օրհնեսցեն զճանապարհս քո:

Մեծ են փառք Տեառն, բարձր է Տէր, զխոնարհս տեսանէ եւ զբարձունս ի հեռաստանէ ճանաչէ:

Թէ գնացից ես ի մէջ նեղութեանց, կեցուցես զիս ի բարկութենէ թշնամւոյն:

Զգեցեր զձեռն քո, եւ փրկեաց զիս աջ քո, եւ Տէր հատուցէ ընդ իմ:

Տէ'ր, ողորմութիւն քո յաւիտեան, զգործս ձեռաց քոց մի' անտես առներ:

Աստուա'ծ, յանուան քում կեցո զիս եւ ի զօրութեան քում իրաւ արա ինձ:

Աստուա'ծ, լո'ւր աղօթից իմոց, ո'ւնկն դիր բանից բերանոյ իմոյ:

Օտարք յարեան ի վերայ իմ, եւ հօրք խնդրեցին զանձն իմ, եւ ոչ համարեցան զքեզ Աստուած առաջի իւրեանց:

Ահա Աստուած օգնական իմ, եւ Տէր ընդունելի հոգւոյ իմոյ:

Ի դարձուցանել զչարն ի թշնամիս իմ ճշմարտութեամբ քով սատակեա՛ զնոսա:

Ես կամօք իմովք պատարագս մատուցից քեզ, խոստովան եղեց անուան քում, Տէ՛ր, զի բարի է:

Յամենայն նեղութենէ իմմէ փրկեցեր զիս, եւ ի թշնամիս իմ ետես ակն իմ:

Փառք Հօր եւ: Այժմ եւ միշտ եւ:

### *Քարոզ*

Խնդրեսցուք հաւատով միաբանութեամբ ի Տեառնէ, զի զողորմութեան զշնորհս իւր արասցէ ի վերայ մեր:

Տէրն ամենակալ կեցուցէ եւ ողորմեսցի:

Կեցո՛ Տէ՛ր: Տէ՛ր, ող., Տէ՛ր, ող., Տէ՛ր, ող.

### *Աղօթք*

Թագաւոր խաղաղութեան, օգնական եւ փրկիչ անձանց մերոց Քրիստոս Աստուած մեր, պարսպեալ պահեա՛ զժողովուրդս քո ընդ հովանեաւ սուրբ եւ պատուական խաչիւդ քով ի խաղաղութեան: Փրկեա՛ յերեւելի եւ յաներեւոյթ թշնամւոյն, արժանաւորեա՛ գոհութեամբ փառաւորել զքեզ ընդ Հօր եւ ընդ Սրբոյ Հոգւոյդ այժմ եւ միշտ եւ:

### *Քարոզ Խաչի*

Սուրբ խաչիւս աղաչեսցուք զՏէր, զի սովաւ փրկեսցէ զմեզ ի մեղաց եւ կեցուցէ շնորհիւ ողորմութեան իւրոյ: Ամենակա՛լ Տէր Աստուած մեր, կեցո՛ եւ ողոր:

*Աղօթք*

Պահպանեա՛ զմեզ, Քրիստո՛ս Աստուած մեր, ընդ հովանեաւ սուրբ եւ պատուական խաչիւդ քով ի խաղաղութեան, փրկեա՛ յերեւելի եւ յաներեւոյթ թշնամոյն: Արժանաւորեա՛ գոհութեամբ փառաւորել զքեզ ընդ Հօր եւ ընդ Սրբոյ Հոգւոյդ այժմ եւ միշտ եւ:

-----

*Խրատք վասն երկրպագութեան Եկեղեցւոյ*

Ուրախ եղէ ես, ոյք ասէին ցիս՝ ի տուն Տեառն երթիցուք մեք:

Հասեալ կային ոտք մեր առ դրունս քո, Երուսաղէ՛մ:

ԶԵրուսաղէմ շինեալ որպէս քաղաք, եւ բնակութիւն իւր շուրջ զնովաւ:

Անդ ելանէին ազգք, ազգք Տեառն, ի վկայութիւն Իսրայելի խոստովան լինիլ անուան Տեառն:

Անդ արկեալ աթոռք դատաստանի, աթոռս արկեալ են ի տան Դաւթի:

Հարցէք զողջունէ Երուսաղէմի եւ զշինութենէ, ոյք սիրէք զՏէր:

Եղիցի խաղաղութիւն ի զօրութեան քում եւ շինութիւն յաշտարակս յամուրս քո:

Վասն եղբարց եւ ընկերաց իմոց խօսեցայ զխաղաղութիւն, վասն քոյ եւ վասն տան Տեառն Աստուծոյ մերոյ ինդրեցաք զբարութիւն ի քէն:

Տո՛ւր զօրութիւն ծառայի քո, կեցո՛ կորդի աղախնոյ քո եւ արա՛ առ իս նշան բարութեան:

Տեցեն ատելիք իմ եւ ամաչեցեն, զի դու, Տէ՛ր օգնեցեր ինձ եւ մխիթարեցեր զիս:

Փառք Հօր եւ: Այժմ եւ միշտ եւ:

*Քարոզ Եկեղեցւոյ*

*Սուրբ Եկեղեցեաւս աղաչեցուք զՏէր, զի սովաւ փրկեցէ զմեզ ի մեղաց եւ կեցուցէ շնորհիւ ողորմութեան իւրոյ: Ամենակա՛լ Տէր Աստուած մեր, կեցո՛ եւ ողորմեա՛:*

### Աղօթք

Առ դրան սրբոյ եկեղեցւոյս եւ առաջի աստուածընկալ եւ պայծառացեալ սուրբ նշանացս խոնարհեալ երկիւղիւ երկիր պագանեմք, գսուրբ եւ զհրաշալի եւ զյաղթող տէրութիւնդ քո օրհնեմք եւ փառաւորեմք. եւ քեզ մատուցանեմք զօրհնութիւն եւ զփառս Հօր եւ Որդոյ եւ Հոգւոյդ Սրբոյ այժմ եւ միշտ եւ յաւիտեանս յաւի:

### Փռիս

Աղաղակեցէ՛ք առ Տէր, ամենա՛յն երկիր, ծառայեցէ՛ք Տեառն ուրախութեամբ:  
(Մղ. ԴԹ) Զփռիսն լման ասա եւ փառք տուր.

### Քարոզ

Օրհնեսցուք զամենակալն Աստուած՝ զհայր Տեառն մերոյ Յիսուսի Քրիստոսի, որ արժանի արար զմեզ կալ ի տեղոջն փառաբանութեան եւ երգել զերգս հոգեւորս: Ամենակալ՝ Տէր Աստուած մեր, կեցո՛ւ եւ ողորմեա՛:

### Աղօթք

Ի մէջ տաճարիս եւ առաջի աստուածընկալ եւ պայծառացեալ սուրբ նշանացս եւ սուրբ սեղանոյս խոնարհեալ երկիւղիւ երկիր պագանեմք, գսուրբ եւ զհրաշալի եւ զյաղթող *զյարութիւնդ* քո օրհնեմք եւ փառաւորեմք. եւ քեզ մատուցանեմք զօրհնութիւն եւ զփառս ընդ Հօր եւ ընդ Սրբոյ Հոգւոյդ այժմ եւ միշտ եւ յաւիտեանս յաւիտենից. ամէն:

### Աղօթք

Ի յարկի սրբութեան եւ ի տեղոջս փառաբանութեան, հրեշտակաց բնակարանիս եւ մարդկան քաւարանիս, առաջի աստուածընկալ եւ պայծառացեալ սուրբ նշանացս եւ սրբոյ սեղանոյս խոնարհեալ երկիւղիւ երկիր պագանեմք, զսուրբ եւ զհրաշալի եւ զյաղթող *զյարութիւնդ* քո օրհնեմք եւ փառաւորեմք եւ ընդ երկնային զօրսն մատուցանեմք զօրհնութիւն եւ զփառս ընդ Հօր եւ ընդ Սրբոյ Հոգւոյդ այժմ եւ միշտ եւ յաւիտեանս յաւիտենից. ամէն:

*Կարգաւորութիւն հասարակաց աղօթից Խաղաղականի ժամուն, որ կատարի ի դէմս Հոգւոյն Աստուծոյ, այլ եւ ի դէմս Բանին Աստուծոյ, որ եղաւ ի գերեզմանի եւ էջ ի դժոխս եւ խաղաղութիւն արար հոգւոցն:*

Օրհնեցից զՏէր յամենայն ժամ, յամենայն ժամ օրհնութիւն նորա ի բերան իմ:

Ի Տէր պարծեսցի անձն իմ, լուիցեն հեզք եւ ուրախ եղիցին:

Մեծ արարէք զՏէր ինեւ, եւ բարձր արասցուք զանուն նորա ի միասին:

Խնդրեցի ի Տեառնէ, եւ լուաւ ինձ, յամենայն նեղութենէ իմմէ փրկեաց զիս:

Մատիք առ Տէր եւ առէք զլոյս, եւ երեսք ձեր մի' ամաչեացեն:

Այս աղբատ կարգաց առ Տէր, եւ Տէր լուաւ սմա. յամենայն նեղութենէ սորա փրկեաց զսա:

Բանակ հրեշտակաց Տեառն շուրջ է զերկիւղածովք իւրովք եւ պահէ զնոսա.

Փառք Հօր եւ: Այժմ եւ միշտ եւ:

Եւ եւս խաղաղութեան զՏէր աղա:

Օրհնութիւն եւ փառք Հօր եւ:

### *Երգ աստիճանաց*

Ի նեղութեան իմում ես առ Տէր կարդացի, եւ լուաւ ինձ Տէր. փրկեաց զանձն իմ ի շրթանց նենգաւորաց եւ ի լեզուէ չարէ:

Զի՞ տացի քեզ կամ զի՞նչ յաւելցի, լեզո՛ւ նենգաւոր:

### *Զկանոնն բովանդակ ասա*

*Բայց ոմանք ալէլու չասեն, զի երգ աստիճանաց է*

*Մաղմու ԶԷ.*

Տէ՛ր Աստուած փրկութեան իմոյ, ի տուէ կարդացի եւ ի գիշերի առաջի քո:  
Մտցեն աղօթք իմ առաջի քո, Տէ՛ր, խոնարհեցի ունկն քո ի խնդրուածս իմ:  
Փառք Հօր: Այժմ եւ միշտ:  
Եւ եւս խաղաղութեան զՏէր աղա:  
Օրհնութիւն եւ փառք Հօր եւ Որդ:  
Խաղաղութիւն ամենեցուն:

-----

*Մաղմու Դ*

Ի կարդալ իմում լուար ինձ, Աստուա՛ծ, ըստ արդարութեան. ի նեղութենէ ինձ  
անդորր արարեր, ողորմեա՛ ինձ եւ լո՛ւր աղօթից իմոց:  
Որդի՛ք մարդկան, մինչեւ յե՛րբ էք խստասիրտք, ընդէ՛ր սիրէք զնանրութիւն եւ  
խնդրէք զստութիւն:  
Ծաներուք, զի սքանչելիս արար Տէր սրբոյ իւրում, եւ Տէր լուիցէ ինձ ի կարդալ  
իմում առ նա:  
Բարկանայք եւ մի՛ մեղանչէք, զոր ինչ ասէք ի սիրտս ձեր, յանկողինս ձեր  
զղջացարուք:  
Մատուցէք պատարագս արդարութեան եւ յուսացարուք ի Տէր:  
Բազումք ասէին, թէ՛ ո՞ ցուցցէ մեզ զբարութիւն Տեառն. նշանեցաւ առ մեզ լոյս  
երեսաց քոց, եւ ետուր ուրախութիւն սրտից մերոց:  
Ի պտղոյ ցորենոյ, զինոյ եւ ձիթոյ իւրեանց լցուցեր զնոսս:  
Խաղաղութեամբ յայս եւ ի սոյն ննջեսցուք եւ զարթիցուք, զի դու, Տէ՛ր, միայն  
առանձին յուսով քով բնակեցուցեր զմեզ:  
Տէ՛ր, մի՛ սրտմտութեամբ քով յանդիմաներ զիս եւ մի՛ բարկութեամբ քով խրատեր  
զիս:  
Ողորմեա՛ ինձ, Տէ՛ր, զի հիւանդ եմ ես. բժշկեա զանձն իմ, զի խռովեցան ոսկերք իմ:

Անձն իմ յոյժ խոռովեցաւ, եւ դու, Տէ՛ր, մինչեւ յե՞րբ:

Դա՛րձ, Տէ՛ր, եւ փրկեա՛ զանձն իմ, կեցո՛ զիս, Տէ՛ր, ըստ ողորմութեան քում:

Զի ոչ ոք է, որ ի մահու յիշէ զքեզ կամ ի դժոխս խոստովան առնիցի առ քեզ:

Վաստակեցայ ես ի հեծութեան իմում, լուացի զամենայն զիշեր զմահիճս իմ եւ արտասուօք իմովք զանկողինս իմ թացի:

Խոռովեցաւ ի սրտմտութենէ ակն իմ, մաշեցայ ես ի վերայ ամենայն թշնամեաց իմոց:

Ի բա՛ց կացէք յինէն ամենեքեան, ոյք գործէք զանօրէնութիւն:

Լուաւ Տէր ձայնի լալոյ իմոյ, լուաւ Տէր աղօթից իմոց եւ Տէր զինդրուածս իմ ընկալաւ:

Ամաչեացեն եւ խոռվեցին յոյժ ամենայն թշնամիք իմ, դարձցին յետս եւ ամաչեացեն յոյժ վաղվաղակի եւ խոռվեցին:

Մինչեւ յե՞րբ, Տէ՛ր, մոռանաս զիս իսպառ, մինչեւ յե՞րբ դարձուցանես զերեսս քո յինէն:

Մինչեւ յե՞րբ դնեմ զխորհուրդս յանձն իմ, եւ ցաւք սրտի իմոյ զաւուրս:

Մինչեւ յե՞րբ բարձրանայ թշնամին ի վերայ իմ. նայեա՛ եւ լո՛ւր ինձ, Տէ՛ր Աստուած իմ:

Լո՛յս տուր, Տէ՛ր աչաց իմոց, զի մի՛ երբէք ննջեցից ի մահ:

Մի՛ ասասցէ թշնամին, թէ՛ յաղթեցի նմա, կամ նեղիչք իմ ցնծասցեն, թէ՛ ես սասանեցայց:

Ես յողորմութիւն քո, Տէ՛ր, յուսացայ, ցնծացաւ սիրտ իմ ի փրկութեան քում. օրհնեցից զՏէր զբարերարդ իմ:

Պահեա՛ զիս, Աստուա՛ծ, զի ես ի քեզ յուսացայ. ասացի Տեառն՝ Տէր իմ եւ դու, եւ բարիք իմ ինձ ի քէն են:

Սրբոց քոց, որ են յերկրի քում, սքանչելի արարեր զամենայն կամս իմ ի նոսա:

Յաճախեցին հիւանդութիւնք նոցա, յետ այսորիկ ապա վաղվաղեցին:

Ոչ ժողովեցայց ի ժողովս նոցա յարեանց եւ ոչ յիշեցից զանուանս նոցա ի շրթունս իմ:

Տէ՛ր, բաժին ժառանգութեան իմոյ եւ բաժակի իմոյ դու ես, որ այսրէն դարձուցանես զժառանգութիւն իմ յիս:

Վիճակք ելին ինձ ընդ ընտիրս, եւ ժառանգութիւն իմ հաճոյ եղեւ ինձ:

Օրհնեցից զՏէր, որ իմաստուն արար զիս, մինչ ի գիշերի եւս խրատեցին զիս երիկամունք իմ:

Յառաջագոյն տեսանէի զՏէր առաջի իմ յամենայն ժամ, զի է ընդ աջմէ իմմէ, զի մի՛ սասանեցայց:

Վասն այսորիկ ուրախ եղեւ սիրտ իմ, եւ ցնձացաւ լեզու իմ, եւս եւ մարմին իմ բնակեցի յուսով:

Զի ոչ թողցես զանձն իմ ի դժոխս, ոչ տացես սրբոյ քում տեսանել զապականութիւն:

Ցուցեր ինձ զճանապարհս քո կենաց, լցուցեր զիս ուրախութեամբ երեսաց քոց՝ ի քաղցրութենէ վայելչութեան աջոյ քո մինչ իսպառ:

Լո՛ւր, Տէ՛ր, արդարութեան եւ նայեա՛ ի խնդրուածս իմ. ունկն դիր աղօթից իմոց, զի ոչ շրթամբք նենգաւորօք:

Յերեսաց քոց իրաւունք ինձ ելցեն, եւ աչք իմ տեսցեն զուղղութիւն:

Փորձեցեր զսիրտ իմ եւ քննեցեր ի գիշերի, փորձեցեր զիս, եւ ոչ գտաւ յիս անիրաւութիւն:

Մի՛ խօսեցի բերան իմ զգործս որդւոյ մարդկան. վասն բանից շրթանց քոց եւ պահեցից զճանապարհս խիստս:

Հաստատեա զշաւիղս իմ ի ճանապարհի քում, զի մի՛ գայթակղեցին գնացք իմ:

Ես առ քեզ, Տէ՛ր, կարդացի, զի լուար ինձ. Աստուա՛ծ, խոնարհեցո՛ւ առ իս զունկն քո եւ լո՛ւր բանից իմոց:

Սքանչելի արարեր զողորմութիւնս քո, ո փրկեա՛ զայնոսիկ, որ յուսացեալ են ի քեզ, յայնցանէ, որ հակառակ կան աջոյ քո:

Պահեա՛ զիս որպէս բիբ ական, ի հովանի թելոց քոց ծածկեցես զիս յերասաց ամպարշտաց, ոյք տառապեցուցին զիս:

Թշնամիք զանձն իմ պաշարեցին, ի ճարպս իւրեանց արգելան, եւ բերանք նոցա խօսեցան զամբարտաւանութիւն:

Մերժեցին զիս եւ այժմ դարձեալ պատեցան զինեւ, ուշ եղին խոնարհեցուցանել զիս յերկիր:

Համարեցան ինձ որպէս առիծ, զի պատրաստ է յորս, որպէս կորիւն առիծու, զի նստի դարանեալ:

Արի՛, Տէ՛ր, ժամանեա՛ նոցա եւ խափանեա՛ զնոսա, փրկեա՛ զանձն իմ յամպարշտաց ի սրոյ եւ ի ձեռանէ թշնամւոյն:

Տէ՛ր, կորո՛ զնոսա յերկրէ, բաժանեա՛ եւ խափանեա՛ զնոսա ի կեանս իւրեանց:

Գաղտնեօք քովք լցան որովայնք նոցա, յագեցան կերակրովք եւ թողին զմնացուածս տղայոց իւրեանց:

Ես արդարութեամբ երեւեցայց երեսաց քոց, յագեցայց յերեւիլ փառաց քոց:

Դա՛տ արա ինձ, Աստուա՛ծ, եւ իրա՛ւ արա ինձ ի դատաստանի իմում:

Յազգէ, որ ոչ է սուրբ, ի մարդոյ մեղաւորէ նենգաւորէ փրկեա՛ զիս:

Դու, Աստուա՛ծ, հզօրիչ իմ ես. ընդէ՞ր մոռացար զիս, ընդէ՞ր տրտում զնամ ես ի նեղել թշնամւոյ իմոյ:

Առաքեա՛, Տէ՛ր, զլոյս քո եւ զճշմարտութիւն քո, զի առաջնորդեցեն ինձ եւ հանցեն զիս ի լեառն սուրբ եւ ի յարկս քո:

Մտից առաջի սեղանոյ Աստուծոյ առ Աստուած, որ ուրախ առնէ զմանկութիւն իմ:

Խոստովան եղէց քեզ օրհնութեամբ, Աստուա՛ծ, Աստուա՛ծ իմ:

Արդ, ընդէ՞ր տրտում ես անձն իմ կամ ընդէ՞ր խռովես զիս. յուսա՛ առ Աստուած, խոստովանեա՛ նմա, փրկիչ երեսաց իմոց Աստուած է:

Աստուա՛ծ, յօգնել ինձ նայեաց եւ, Տէ՛ր, յընկերել ինձ փութա՛:

Ամաչեցեն եւ յամօթ լիցին, ոյք խնդրէին զանձն իմ, դարձին յետս եւ ամաչեցեն, ոյք խորհէին ինձ չար:

Դարձցին առժամայն ամաչեցեալք, որ ասէին ինձ վաշ վաշ:

Ցնծացեն եւ ուրախ լիցին ի քեզ ամենեքեան, որ խնդրեն զքեզ, Տէ՛ր:

Ասացեն յամենայն ժամ՝ մեծ է Աստուած, ոյք սիրեն զփրկութիւնս քո:

Ես աղբատ եւ տնանկ եմ, Աստուա՛ծ, օգնեա՛ ինձ, օգնական եւ փրկիչ իմ ես, եւ դու, Տէ՛ր իմ, մի՛ յամենար:

Տո՛ւր զօրութիւն ծառայի քո, կեցո՛ գորդի աղախնոյ քո եւ արա՛ առ իս նշան  
բարութեան:

Տեսցեն ատելիք իմ եւ ամաչեսցեն, զի դու, Տէ՛ր, օգնեցեր ինձ եւ մխիթարեցեր զիս:

Փառք Հօր: Այժմ եւ միշտ:

ԵՐԳ

Շնորհեա՛ մեզ, Տէ՛ր, ի գիշերի զերկնային զխաղաղութիւն քո եւ պահեա՛ զմեզ ի  
պատրանաց թշնամոյն ամենայաղթ զօրութեամբ սուրբ խաչի քոյ:

Տէ՛ր Աստուած փրկութեան իմոյ, ի տուէ կարդացի եւ գիշերի առաջի քոյ:

Մտցեն աղօթք իմ առաջի քոյ, Տէ՛ր, խոնարհեսցի ունկն քո ի խնդրուածս իմ:

Եկեսցէ առ մեզ, Տէ՛ր, պահապան ի քէն եւ պահեսցէ զմեզ յամենայն ժամ:

Առաքեա՛ ի մեզ, Տէ՛ր, զզօրութիւն սրբոյ խաչին, որ պահեսցէ զմեզ յամենայն ժամ:

Արժանի՛ արա, Տէ՛ր, զերեկս զայս խաղաղութեամբ եւ առանց փորձութեան անցո՛  
զմեօք:

Արժանաւորեա՛, Տէ՛ր, զգիշերս զայս խաղաղութեամբ եւ առանց մեղաց պահելով  
զմեզ:

Ընդ մեզ Տէր Աստուած, զիտասջի՛ք, հեթանո՛սք, եւ պարտեցարոյք, զի Աստուած  
ընդ մեզ է:

Եւ լուարո՛ւք զայս ի ծագաց մինչեւ ի ծագս երկրի, զի:

Եւ հզօրացեալքդ պարտեցարոյք, զի:

Եւ զի թէպէտեւ դարձեալ զօրանայք, դարձեալ ի պարտութիւն մատնեսջիք, զի:

Եւ զխորհուրդն, զոր խորհիք, խափանէ Տէր, զի:

Եւ զբանն, զոր խօսիք, մի՛ մնասցէ առ ձեզ, զի:

Եւ քանզի յերկիւղէ ձերմէ մեք ո՛չ երկիցոյք եւ ո՛չ խռովիցոյք, զի:

Եւ զՏէր Աստուած մեր փառաւոր արասցոյք, եւ նա եղիցի մեզ յերկիւղ, զի:

Եւ յուսացեալ եղիցոյք մեք ի նա, եւ նա եղիցի մեզ ի սրբութիւն, զի:

Եւ յուսացեալ եղիցոյք մեք ի նա, եւ նա եղիցի մեզ ի փրկութիւն, զի:

Եւ ահաւասիկ ես եւ մանկունք իմ, զոր ետ ինձ Աստուած, զի:

Եւ ժողովուրդ, որ նստէր ի խաւարի, ետես զլոյս մեծ զի:

Եւ որ բնակեալդ էք ի խաւարի եւ ի ստուերս մահու, լոյս ծագեսցի առ ձեզ, զի:

Եւ քանզի մանուկ ծնաւ, Որդի եւ տուաւ մեզ, զի:

Եւ որոյ իշխանութիւն իւր ի վերայ ուսոց իւրոց, զի:

Եւ որ կոչի անուն նորա մեծի խորհրդոյ հրեշտակ, զի:

Եւ սքանչելի խորհրդակից, զի:

Եւ Աստուած հօր իշխան, զի:

Եւ իշխան խաղաղութեան, Հայր հանդերձելոյ յաւիտենին Տէր Աստուած ընդ մեզ է:

Եւ փառք Հօր եւ Որդոյ եւ Հոգւոյն Սրբոյ այժմ եւ միշտ եւ յաւիտեանս յաւիտենից.  
ամէն:

### Մաղթանք

Ի մերձենալ երեկոյիս համբառնամք զձեռս մեր ի սրբութիւն, զոր ինչ մեղաք այսօր խորհրդով, բանիւ կամ գործով ի յանկողինս մեր զղջանալով, խոստովան լինելով զգաղտնիս սրտից մերոց ծածկագիտիդ Աստուծոյ, յուսալով յողորմութիւն քո: Եւ մեք միաբան գոչեսցուք. □Յիշեա՛ զմեզ, Տէ՛ր, յորժամ գաս արքայութեամբ քով, եւ ողորմեա՛ մեզ□:

### Քարոզ

Եւ եւս խաղաղութեան զՏէր աղա:

Գոհացարուք զՏեառնէ, որ իւրով ողորմութեամբն առաջնորդեաց մեզ ի գործս տուրնջեան եւ շնորհեաց մեզ միաբան գալ հասանիլ ի հանգիստ գիշերիս: Եւ մեք յամենայն ժամ աղաչեսցուք զմարդասէրն Աստուած՝ լինել պահապան անձանց մերոց, եւ նա իւրով ողորմութեամբն պահեսցէ զմեզ եւ առաջնորդեալ հասուցէ յիւր բարութեան հանգիստն, զոր խոստացաւ սիրելեաց իւրոց ճշմարիտն Աստուած Յիսուս Քրիստոս. Տէրն ամենակալ կեցուցէ եւ ողորմեսցի:

Ձեռնագրիս գիշերիս խաղաղութեամբ անցուցանել հաւատով ի Տեառնէ  
խնդրեցուք:

Ձերեշտակ խաղաղութեան պահա:

Ջրաւութիւն եւ զթողութիւն յան:

Չարքոյ խաչին մեծ եւ կարող զօրու:

Եւ եւս՝ միաբան վասն ճշմարիտ եւ:

Ձանձինս մեր եւ զմիմեանս Տեառն:

Ողորմեա՛ց մեզ, Տէ՛ր Աստուած մեր:

### Աղօթք

Տէ՛ր բարերար, որ մեծաւ գթութեամբ քով պատրաստեցեր զյաւիտենական  
հանգիստն առաքինութեամբ աշխատելոցն եւ կոչեցեր առ քեզ քաղցր ձայնիւ  
զճանրաբեռնեալսն եւ զտաժանեալսն մեղօք՝ հանգիստ նոցա խոստանալով:  
Շնորհեա՛ եւ մեզ, Տէ՛ր, անխռով խաղաղութեամբ զգիշերս անցուցանել. եւ ի  
ծանրութենէ մեղաց զաշխատեալքս ապահովեա՛ ողորմութեամբ քով եւ  
արժանաւորեա՛ մշտնջենաւոր հանգստեանն ընդ ամենայն սուրբս քո: Եւ  
գոհանալով փառաւորեցուք զքեզ ընդ Հօր եւ Ամենասուրբ Հոգւոյդ այժմ եւ միշտ  
եւ յաւիտեանս յաւիտենից. ամէն:

Խաղաղութիւն ամենեցուն:

Աստուծոյ երկիրպագեցուք:

Պարգեւատու բարեաց եւ աղբիւր խաղաղութեան Տէր Աստուած մեր, յամենայն  
սատանայական խռովութեանց խաղաղացո՛ զմիտս մեր եւ զխորհուրդս ի գիշերիս  
յայսմիկ եւ յամենայն ժամանակի: Որպէս զի առաջնորդեալք յանցաւոր կենցաղոյս  
ժամանեցուք յաւիտենական երկնից արքայութեան քո, զոր պատրաստեցեր ի  
սկզբանէ աշխարհի սրբոց քոց: Եւ ընդ նոսին գոհանալով փառաւորեցուք զՀայր  
եւ զՈրդի եւ զՍուրբ Հոգիդ այժմ եւ միշտ եւ յաւիտեանս յաւիտենից. ամէն:

### Սաղմոս ԻԶ

Տէր լոյս իմ եւ կեանք իմ, եւ յումմէ՞ երկեայց,

Տէր ապաւեն կենաց իմոց, եւ յումմէ՞ դողացայց:

Ի մերձենալ առ իս չարաց՝ ուտել զմարմին իմ, նեղիչք իմ եւ թշնամիք իմ նոքա տկարացան եւ անկան:

Թէ պատրաստեսցի ի վերայ իմ պատերազմ, ոչ երկիցէ սիրտ իմ. թէ յարիցէ ի վերայ իմ ճակատամարտ, սակայն եւ այսուիկ ի քեզ, Տէ՛ր, յուսացայ:

Զմի խնդրեցի ի Տեառնէ եւ զտոյն աղաչեմ՝ բնակել ինձ ի տան Տեառն զամենայն աւուրս կենաց իմոց:

Տեսանել ինձ զվայելչութիւն Տեառն եւ հրաման տալ ի տաճարի նորա:

Ծածկեաց զիս ի խորանի իւրում յաւուր չարի, ընդ յարկաւ արար զիս ի ծածկոյթ խորանի իւրում:

Ի վիմէ բարձր արարեր զիս եւ այժմ բա՛րձր արա զգլուխ իմ ի վերայ թշնամեաց իւրոց:

Շուրջ եղէց եւ մատուցից ի խորանի նորա պատարագ օրհնութեան, օրհնեցից եւ սաղմոս ասացից Տեառն:

Լո՛ւր, Տէ՛ր, ձայնի իմում, զի կարդացի առ քեզ. ողորմեա՛ ինձ եւ լո՛ւր ինձ, զի քեզ անսաց սիրտ իմ, եւ խնդրեցին երեսք իմ զերեսս քո, Տէ՛ր, խնդրեցին:

Մի՛ դարձուցաներ զերեսս քո յինէն եւ մի՛ խոտորիր բարկութեամբ ի ծառայէ քումմէ:

Օգնական իմ լեր, Տէ՛ր, մի՛ անարգեր զիս եւ մի՛ թողուր զիս, Աստուած փրկի՛չ իմ:

Հայր իմ եւ մայր իմ թողին զիս, եւ Տէր ընկալաւ զիս:

Օրէնսգէտ արա՛ զիս, Տէ՛ր, ի ճանապարհի քում, առաջնորդեա՛ ինձ ի շաւիղս քո ուղիղս:

Վասն թշնամեաց իմոց մի՛ մատներ զիս ի ձեռս նեղչաց իմոց:

Յարեան ի վերայ իմ վկայք մեղաց եւ ստեցին ինձ յանօրէնութեան իւրեանց:

Հաւատացի տեսանել զբարութիւն Տեառն յերկրին կենդանեաց. համբե՛ր Տեառն եւ քաջալերեա՛ց, զօրացի սիրտ քո, եւ համբե՛ր Տեառն:

Փառք Հօր եւ: Այժմ եւ միշտ եւ:

## Երգ տեառն՝ Ներսիսի

(բձ)

Նայեաց սիրով, Հա՛յրդ գթած,  
ի քո ստեղծեալ գործս ձեռաց  
եւ զբանակս հրեշտակաց  
սո՛ւր պահապան մեզ տկարաց.  
Վիրկեա՛ զանձինս ի փորձանաց,  
ի խաւարի շրջող դիւաց.  
զի ի տուրնջեան եւ զիշերի  
տացուք քեզ փառս անլռելի:

Էին անեղ, անսկզբան  
ծնունդ անճառ Որդի եւ Բան,  
որ արարեր զտիւ գործոյ  
եւ զգիշեր ի հանգիստ քնոյ,  
սո՛ւր ի ննջել աչաց մարմնոյ,  
արթուն լինել մեզ ըստ հոգւոյ.  
զի ի:

Բարուն հոգւոց բանաւորաց,  
աղբիւր լուսոյ, բաշխող շնորհաց,  
ի փակել դրանց բնութեանց մարմնոց  
լոյս սուր աչաց սրտից մերոց՝  
ի գիշերաց առ քեզ կանխել,  
ընդ հրեղինացն օրհնաբանել.  
զի ի:

Սուրբդ Սրբոց Երրորդութիւն,  
զմեզ մաքրեա՛ քեզ բնակութիւն.

շնորհեա ընդ մանկանցն առագաստի  
հանգչել ընդ քեզ ի յանկողնի.  
տո՛ւր զհայցուած բարեկամին՝  
զփոխ երից նկանակին.  
զի ի:

Երեւելի լոյս ըստեղծեր,  
զտիւ եւ զգիշեր բաժանեցեր,  
ծագեա՛ մեզ, Տէ՛ր, ի գիշերի  
զճառագայթս իմանալի.  
տո՛ւր յամենայն ժամանակի  
զպահպանող աջ քո հովանի.  
զի ի:

Սիրոյ քո հուր արկեալ յերկիր  
բորբոքեցի ի հոգիս մեր,  
զխորհուրդ սրտից մեր մաքրեցէ,  
զլոյս գիտութեան քո փայլեցէ,  
ի քնոյ մահու զմեզ զարթուցէ,  
զմիտս բոցով քո վառեցէ.  
զի ի:

Ի քեզ նայիմք, լո՛յսդ անմատոյց,  
ի զգայական ծածկեալ լուսոյ,  
որ վասն մեր եղար ի գբի  
եւ ննջեցեր ի տապանի,  
առ մեզ ննջեա, արթո՛ւն բնութիւն,  
հերքեա՛ զչարին ներգործութիւն.  
զի ի:

Էիդ լուսոյ անստուերի  
պաղատանօք կամք առաջի,  
որ փակեալ դրամբք յերեկոյին  
երեւեցար մետասանին,  
ընդ Թովմայի առ քեզ գոչեմք,  
Տէր եւ Աստուած զքեզ դաւանեմք,  
Է՛ջ եւ առ մեզ յերեկոյիս  
եւ տո՛ւր գողջոյն քո ի հոգիս:

Բամեալքս զքեզ, Տէ՛ր, աղաչեմք՝  
մեզ յօգնութիւն նայեա՛, հայցե՛մք,  
պահապա՛նդ Իսրայելի,  
անձանց մերոց լէ՛ր հովանի.  
օթեա՛ առ մեզ, իսաղաղարա՛ր,  
եւ ննջեցուք անխռովաբար.  
զի ընդ առաւօտս կանխեցուք՝  
օրինել զքեզ ընդ Հօր Հոգւով:

Գոչման փողոյն Գաբրիելի,  
որ ի վերջնումն գիշերի,  
լսել արա զմեզ արժանի  
եւ աջակողմն օղեաց դասի.  
անշէջ վառեալ լոյս լապտերաց  
ըստ իմաստուն հինգ կուսանաց.  
զի ընդ փեսայիդ ի յառագաստ  
հարսունք հոգւով մտցուք ի փառս:

Հալածեա՛ ի մէնջ, Տէ՛ր, նշանաւ  
իսաչի քո զընդդիմամարտ  
եւ զաներեւոյթ գազանն,

Էւ մի՛ տար յապականութիւն  
զքո ժառանգութիւնս:

Բարեխօսեա՛ վասն մեր,  
Աստուածածի՛ն Մարիամ,  
որ ծնար զՏէր Աստուած,  
որ հովուէրն զԻսրայէլ  
ամենագոր եւ սքանչելի  
վառօքն իւրովք:

### Մաղթանք

Տէ՛ր, մի՛ դարձուցաներ զերեսս քո յինէն. Տէ՛ր բարերար, աղաչեմ զքեզ՝ օգնական  
իմ լեր: Տէ՛ր, մի՛ անարգեր զիս եւ մի՛ թողուր զիս, Աստուած փրկի՛չ իմ:

### Քարոզ

Աղաչեցուք զամենակալն Աստուած եւ խնդրեցուք ի նմանէ, զի առաքեցէ  
զհրեշտակ խաղաղութեան, որ եկեալ պահեցէ զմեզ յերկիւղական գիշերիս ի  
դիւական խռովութենէ՝ ամբողջ պահելով զհոգի եւ զմարմին մեր մինչեւ ի  
կատարումն ժամանակի ամաց մերոց: Ամենակալ Տէր Աստուած մեր կեցուցէ եւ  
ողորմեցի:

### Աղօթք

Շնորհատո՛ւ բարեաց, յամենայնի առատ անմա՛հ Տէր, աղաչեմք զքեզ՝ փարատեա՛  
յանձանց մերոց զաղջամղջին եւ զխաւարային խորհուրդս, ի պատրանաց  
բանասարկուին պահեա՛ զմեզ եւ շնորհեա՛ մեզ հաւատով ապաւինիլ յԱմենասուրբ  
Երրորդութիւնդ՝ ի Հայր եւ յՈրդի եւ ի Սուրբ Հոգիդ այժմ եւ միշտ եւ յաւիտեանս  
յաւիտենից. ամէն:

Յաւուրս աղուհացից աստ ասի Ամբիծքն, իսկ յայլ աւուրս՝ Հայր մեր, որ յերկինս:

-----  
Սաղմոս ՃԺԸ

Երանեալ են ամբիծք ի ճանապարհի եւ ոյք գնան յօրէնս Տեառն:

Երանի՛, ոյք քննեն զվկայութիւն նորա, բոլորով սրտիւ իւրեանց խնդրեսցեն գնա:

Ոչ թէ ոյք գործեն զանօրէնութիւն, ի ճանապարհս նորա գնասցեն:

Դու պատուիրեցեր զպատուիրանս քո ի պահել ինձ յոյժ:

Երանի՛ թէ յաջողեալ էին ինձ ճանապարհք իմ՝ պահել ինձ զարդարութիւնս քո:

Յայնժամ ես ոչ ամաչէի ի զգուշանալ ինձ ի պատուիրանս քո:

Խոստովան եղեց քեզ, Տէ՛ր, յուղղութիւն սրտի իմոյ, որպէս ուսայց զիրաւունս արդարութեան քո:

Զիրաւունս քո պահեցի, մի՛ թողուր զիս մինչ ի սպառ:

Ի՞նչ ուղղեսցէ երիտասարդ զճանապարհս իւր, այլ ի պահել զբանս քո:

Բոլորով սրտիւ իմով խնդրեցի զքեզ, մի՛ մերժեր զիս ի պատուիրանաց քոց:

Ի սրտի իմում թաքուցի զբանս քո, որպէս զի մի՛ մեղայց քեզ:

Օրհնեալ ես դու, Տէ՛ր, ուսո՛ ինձ զարդարութիւնս քո:

Շրթամբք իմովք պատմեցից զամենայն իրաւունս բերանոյ քո:

Ի ճանապարհս վկայութեանց քոց զուարճացայ, որպէս յամենայն ի մեծութեան:

Ի պատուիրանս քո հոգացայ եւ զգուշացայ ի ճանապարհս քո:

Զիրաւունս քո խօսեցայ եւ ոչ մոռացայ զբանս քո:

Հատո՛ ծառայի քում, զի կեցից եւ պահեցից զբանս քո:

Զարթո՛ զաչս իմ, եւ նայեցայց ի սքանչելիս օրինաց քոց:

Պանդուխտ եմ ես երկրի, մի՛ թաքուցաներ յինէն զպատուիրանս քո:

Փափաքեաց անձն իմ ի ցանկալ ինձ յիրաւունս քո յամենայն ժամ:

Սաստեցեր ամբարտաւանից, անիծեալ, ոյք խոտորեցան ի պատուիրանաց քոց:

Ի բա՛ց արա յինէն զնախատինս եւ զարհամարհանս, զի զվկայութիւնս քո խնդրեցի:

Քանզի նստան իշխանք եւ չարախօսէին զինէն, այլ ծառայ քո խորհէր յիրաւունս քո:

Ձի վկայութիւնք քո խօսք իմ էին, եւ խորհուրդք իմ արդարութիւն քո:  
Մերձեցաւ անձն իմ ի հող, Տէ՛ր, կեցո՛ր զիս ըստ բանի քում:  
Զճանապարհս իմ պատմեցի քեզ, եւ լուար ինձ, ուսո՛ր զարդարութիւնս քո:  
Ի ճանապարհս արդարութեանց քոց իմաստո՛ւն արա զիս, եւ քննեցից զսքանչելիս  
քո:  
Տքնեցաւ անձն իմ առ ի ձանձրանալ, հաստատեա՛ր զիս ի բանս քո:  
Զճանապարհս մեղաց ի բա՛ց արա յինէն եւ յօրէնս քո ողորմեա՛ ինձ:  
Զճանապարհս ճշմարտութեան քո ընտրեցի եւ զիրաւունս քո ես ոչ մոռացայ:  
Մերձեցայ ես ի վկայութիւնս քո, Տէ՛ր, մի՛ յամօթ առնէր զիս:  
Ի ճանապարհս պատուիրանաց քոց ընթացայ, զի անդորր արարէր զիս:  
Օրէնսգէտ արա զիս, Տէ՛ր, ի ճանապարհս իրաւանց քոց, եւ խնդրեցից զնա  
յամենայն ժամ:  
Իմաստուն արա զիս, եւ քննեցից զօրէնս քո եւ պահեցից զնա բռլորով սրտիւ իմով:  
Առաջնորդեա՛ ինձ ի շաւիղս պատուիրանաց քոց, զի ընդ նոսա հաճեցայ:  
Խոնարհեցո՛ր զսիրտ իմ ի վկայութիւնս քո եւ մի՛ յագահութիւն:  
Դարձո՛ր զաչս իմ, զի մի՛ տեսից զնանրութիւն, ի ճանապարհս քո կեցո՛ր զիս:  
Հաստատեա՛ ծառայի քում զբան քո յերկիւղ քո:  
Հա՛ն յինէն զնախատինս, զոր եւ կարծեցի, զի դատաստանք քո քաղցր են:  
Ահա ցանկացայ պատուիրանաց քոց, յարդարութեան քում կեցո՛ր զիս:  
Եկեցէ ի վերայ իմ ողորմութիւն քո, Տէ՛ր, եւ փրկութիւն քո ըստ բանի քում:  
Տաց պատասխանի, ոյք նախատեն զիս բանիւք, զի ես ի բանս քո յուսացայ:  
Մի՛ ի բացեայ առնէր ի բերանոյ իմմէ զբան ճշմարտութեան մինչեւ յոյժ, զի  
յիրաւունս քո յուսացայ:  
Պահեցի զօրէնս քո յամենայն ժամ, յաւիտեան եւ յաւիտեանս յաւիտենից:  
Գնայի ես յանդորրու, զի պատուիրանս քո խնդրեցի:  
Խօսէի զվկայութիւն քո առաջի թագաւորաց եւ ոչ ամաչէի:  
Խորհէի ի պատուիրանս քո, զոր սիրեցի:  
Համբարձի զձեռս իմ ի պատուիրանս քո զոր սիրեցի, եւ խորհէի յարդարութեան  
քում:

Յիշեա՛ զբան ծառայի քո, յոր եւ յուսացուցեր զիս:

Սա մխիթարեցէ զիս ի խոնարհութեան իմում, զի բան քո կեցոյց զիս:

Ամբարտաւանք անիրաւեցան յիս յոյժ, այլ յօրինաց քոց եւ ոչ խոտորեցայ:

Յիշեցի զիրաւունս քո յաւիտենից, Տէ՛ր, եւ մխիթարեցայ:

Տրտմութիւն կալաւ զիս ի մեղաւորաց եւ ոյք թողին զօրէնս քո:

Գովելի են ինձ իրաւունք քո ի տեղոջ պանդխտութեան իմոյ:

Յիշեցի ի գիշերի զանուն քո, Տէ՛ր, եւ պահեցի զօրէնս քո:

Սա եղեւ ինձ ճանապարհ ի կեանս, զի զարդարութիւնս քո խնդրեցի:

Բաժին իմ եւ դու, Տէ՛ր, ասացի՝ պահել ինձ զօրէնս քո:

Աղաչեցի զերեսս քո բոլորով սրտիւ իմով, ողորմեա՛ ինձ ըստ բանի քում:

Խորհեցայ ի ճանապարհս իմ եւ դարձուցի զոտս իմ ի վկայութիւնս քո:

Պատրաստեցայ եւ ոչ խռովեցայ, զի պահեցի զպատուիրանս քո:

Տոռունք մեղաց պատեցան զինեւ, այլ զօրէնս քո եւ ոչ մոռացայ:

Ի մէջ գիշերի յառնէի խոստովան լինել առ քեզ վասն իրաւանց եւ արդարութեան քո:

Հաղորդ էի եւ ամենայն երկիւղածաց քոց, որոց պահեալ է զպատուիրանս քո:

Ողորմութեամբ Տեառն լի եղեւ երկիր, զարդարութիւնս քո ուսո՛ ինձ:

Քաղցրութիւն արարեր ընդ ծառայի քում, Տէ՛ր, ըստ բանի քում:

Քաղցրութիւն, զխրատ եւ զգիտութիւն ուսո ինձ, զի ի պատուիրանս քո եւ հաւատացի:

Մինչչեւ խոնարհեալ էի եւ, մեղայ, վասն այսորիկ զբանս քո պահեցի յոյժ:

Քաղցր եւ դու, Տէ՛ր, եւ քաղցրութեամբ քով ուսո՛ ինձ զարդարութիւնս քո:

Բազմացան յիս անիրաւութիւնք ամբարտաւանից, այլ եւ բոլորով սրտիւ իմով քննեցի զպատուիրանս քո:

Մաճան որպէս կաթն սիրտք նոցա, այլ եւ զօրէնս քո խօսեցայ:

Բարի է ինձ, զի խոնարհ արարեր զիս, որպէս ուսայց զարդարութիւնս քո:

Բարի են ինձ օրէնք բերանոյ քո, քան զհազարս ոսկոյ եւ արծաթոյ:

Ձեռք քո արարին եւ ստեղծին զիս, իմաստո՛ւն արա զիս, եւ ուսայց զպատուիրանս քո:

Երկիւղածք քո տեսցեն զիս եւ ուրախ եղիցին, զի ես ի բանս քո յուսացայ:  
Ծանեայ, Տէ՛ր, զի արդարութեամբ են դատաստանք քո. յիրաւի խոնարհեցուցեր  
զիս:  
Եղիցի ողորմութիւն քո ի մխիթարել զիս ըստ բանի քում զծառայս քո:  
Եկեացեն յիս գթութիւնք քո, եւ կեցից, զի օրէնք քո խօսք իմ էին:  
Ամաչեացեն ամբարտաւանք, որ ի տարապարտուց անիրաւեցան յիս, այլ ես  
հոգացայ ի պատուիրանս քո:  
Խրատեցին զիս երկիւղածք քո եւ ոյք ճանաչեն զվկայութիւնս քո:  
Եղիցի սիրտ իմ ամբիժ յարդարութեան քում, զի մի՛ ամաչեցից:  
Կարօտացաւ անձն իմ ի փրկութիւնս քո, զի ես ի բանս քո յուսացայ:  
Սպասեցին աչք իմ բանի քում, ասացի՝ ե՞րբ մխիթարեցէ զիս:  
Եղէ ես որպէս տիկ ի պարզի, զարդարութիւնս քո եւ ոչ մոռացայ:  
Քանի՞ ինչ են աւուրք ծառայի քո, ե՞րբ արացես ինձ իրաւունս ի հալածչաց իմոց:  
Պատմեցին ինձ անօրէնք զխորհուրդս, այլ ոչ որպէս զօրէնս քո:  
Ամենայն պատուիրանք քո ճշմարիտ են. ի նանիր հալածեցին զիս, օգնեա՛ ինձ:  
Փոքր մի եւս, եւ կորուսանէին զիս յերկրի, այլ ես ոչ թողի զպատուիրանս քո:  
Ըստ ողորմութեան քում կեցո զիս, եւ պահեցից զվկայութիւնս բերանոյ քո:  
Յաւիտեան, Տէ՛ր, բան քո կայ յերկինս, ազգէ մինչեւ յազգ է ճշմարտութիւն քո:  
Հաստատեցեր զերկիր, եւ կայ:  
Հրամանի քում մնայ տիւ, զի ամենայն ծառայք քո են:  
Եթէ ոչ օրէնք քո խօսք իմ էին, կանխաւ եւս արդեօք կորուսեալ էի ի  
խոնարհութեան իմում:  
Յաւիտեան ոչ մոռացայ զարդարութիւնս քո, զի նոքօք կեցուցեր զիս:  
Քո եմ ես, եւ կեցո զիս, զի զարդարութիւնս քո խնդրեցի:  
Ինձ սպասեցին մեղաւորք ի կորուսանել, զի զվկայութիւնս քո ես ի միտ առի:  
Յամենայն կատարածի տեսի զվախճան, յոյժ անդորր էին ինձ պատուիրանք քո:  
Որպէս սիրեցի զօրէնս քո, զօրհանապագ խօսք իմ էին:  
Քան զթշնամիս իմ իմաստուն արարեր զիս ի պատուիրանս քո, զի յաւիտեան իմ  
էին:

Քան զամենայն ուսուցիչս իմ իմաստուն եղէ, զի վկայութիւնք քո խօսք իմ էին:

Քան զծերս իմաստուն եղէ, զի զպատուիրանս քո քննեցի:

Յամենայն ճանապարհս չարաց արգելի գոտս իմ, որպէս զի պահեցից զբանս քո:

Յիրաւանց քոց ես ոչ խոտորեցայ, զի դու օրէնսգէտ արարեր զիս:

Որպէս զի քաղցր են ի քիմս իմ բանք քո, քան զմեղր բերանոյ իմոյ:

Ի պատուիրանաց քոց իմացեալ՝ ատեցի զամենայն ճանապարհս չարաց, զի դու օրէնսգէտ արարեր զիս:

Ճրագ են բանք քո ոտից իմոց եւ լոյս տան շաւղաց իմոց:

Երդուայ եւ հաստատեցի, զի պահեցից զամենայն իրաւունս արդարութեան քո:

Խոնարհ եղէ մինչեւ յոյժ, Տէ՛ր, կեցո՛ զիս ըստ բանի քում:

Ըստ կամս բերանոյ իմոյ հաճեա՛, Տէ՛ր, եւ զիրաւունս քո ուսո՛ ինձ:

Անձն իմ ի ձեռս քո է յամենայն ժամ, եւ զօրէնս քո ես ոչ մոռացայ:

Եղին ինձ մեղաւորք որոզայթ, ի պատուիրանաց քոց ես ոչ մոլորեցայ:

Ժառագեցի զկայութիւնս քո յաւիտեան, զի ցնծութիւն է սրտի իմոյ:

Խոնարհեցուցի զսիրտ իմ առնել զարդարութիւնս քո յաւիտեան վասն հաստուցման:

Զանօրէնս ատեցի եւ զօրէնս քո սիրեցի:

Օգնական եւ փրկիչ իմ ես դու, եւ ես ի բանս քո յուսացայ:

Ի բա՛ց եղերուք յինէն, չա՛րք, եւ քննեցից զպատուիրանս Աստուծոյ իմոյ:

Օգնեա՛ ինձ ըստ բանի քում եւ կեցո՛ զիս եւ մի՛ յամօթ առնէր զիս ի յուսոյ իմմէ:

Օգնեա՛ ինձ եւ ապրեցո՛ զիս, եւ խորհեցայց յիրաւունս քո յամենայն ժամ:

Անարգեցեր զամենեսեան, որ ապստամբ եղեն յարդարութեանց քոց, զի անիրաւութեամբ էին խորհուրդք նոցա:

Յանցաւորս համարեցայ զամենայն մեղաւորս երկրի, վասն այսորիկ սիրեցի զպատուիրանս քո:

Բեւեռեա՛ ընդ երկիւղ քո զմարմին իմ, զի ի դատաստանաց քոց երկեայց յոյժ: Արարի իրաւունս եւ արդարութիւն, մի՛ մատնէր զիս ի ձեռս նեղչաց իմոց:

Ընկալ զծառայս քո ի բարի, զի մի՛ ամբարտաւանք զգուեսցեն զիս:

Սպասեցին աչք իմ փրկութեան քում, Տէ՛ր, եւ բանից արդարութեան քո:

Արա ընդ ծառայի քում, Տէ՛ր, ըստ ողորմութեան քում, զարդարութիւնս քո ուսո՛  
ինձ:

Ծառայ քո եմ ես, իմաստուն արա զիս, եւ ծանեայց զվկայութիւնս քո:

Ժամ է պաշտել զՏէր, խափանեցին զօրէնս քո:

Վասն այսորիկ սիրեցի զպատուիրանս քո, քան զամենայն ոսկի եւ զտպագիտն:

Ամենայն պատուիրանք քո յաջողեցան ինձ, զի ատեցի եւ զճանապարհս չարաց:

Սքանչելի են վկայութիւնք քո, վասն այսորիկ սիրեաց զնոսա անձն իմ:

Յայտնութիւն բանից քոց լուսաւոր է եւ իմաստուն առնէ զտղայս:

Զբերան իմ բացի եւ առի զՀոգի, ի պատուիրանս քո փափաքեաց անձն իմ:

Նայեա՛ առ իս եւ ողորմեա՛ ինձ ըստ իրաւունս սիրողաց անուան քում:

Զճանապարհս իմ ուղի՛ղ արա ինձ ըստ բանի քում, եւ մի՛ տիրեսցեն ինձ ամենայն  
մեղք:

Փրկեա՛ զիս ի զրպարտութենէ մարդկան, եւ պահեցից զպատուիրանս քո:

Երեւեցո՛ զերեսս քո ի ծառայս քո եւ ուսո՛ ինձ զարդարութիւնս քո:

Վտակք ջուրց իջին յաչաց իմոց, զի ոչ պահեցին զօրէնս քո:

Արդար եւ դու, Տէ՛ր, եւ ուղիղ են դատաստանք քո:

Պատուիրեցեր զարդարութիւն վկայութեանց քոց, եւ ճշմարիտ են յոյժ:

Մաշեաց զիս նախանձ քո, զի մոռացան զբանս քո թշնամիք իմ:

Ընտրեալ է բան քո յոյժ, եւ ծառայ քո սիրեաց զսա:

Մանուկ եմ ես արհամարհեալ եւ զարդարութիւնս քո եւ ոչ մոռացայ:

Արդարութիւն քո արդարութիւն յաւիտենից, եւ օրէնք քո ճշմարիտ են:

Նեղութիւնք եւ վիշտ գտին զիս, եւ պատուիրանք քո խօսք իմ էին:

Արդարութեամբ են վկայութիւնք քո յաւիտեան, իմաստո՛ւն արա եւ կեցո՛ զիս:

Կարդացի առ քեզ բոլորով սրտիս իմով, լո՛ւր ինձ, Տէ՛ր, զի զարդարութիւն քո  
խնդրեցի:

Աղաղակեցի առ քեզ, եւ փրկեա՛ զիս, եւ պահեցից զվկայութիւնս քո:

Կանխեցի տարածամու, աղաղակեցի եւ ես ի բանս քո յուսացայ:

Կանխեցին աչք իմ առաւօտուց ի խօսել ինձ զբանս քո:

Ձայնի իմում լուր, Տէ՛ր, ըստ ողորմութեան քում. Տէ՛ր, յիրաւունս քո կեցո  
զիս: Մերձեցուցին յիս հալածիչք իմ զանօրէնութիւն, զի յօրինաց քոց հեռի եղեն:  
Մերձ ես դու, Տէ՛ր, եւ ամենայն պատուիրանք քո ճշմարիտ են:  
Ի սկզբանէ ծանեայ ի վկայութեանց քոց, զի յաւիտեան հաստատեցեր զնոսա:  
Տե՛ս զխոնարհութիւն իմ եւ փրկեա՛ զիս, զի զօրէնս քո ես ոչ մոռացայ:  
Դատեա՛ զդատաստան իմ եւ փրկեա՛ զիս եւ ըստ բանի քում կեցո՛ զիս:  
Հեռի է ի մեղաւորաց փրկութիւն, զի զիրաւունս քո ոչ պահեցին:  
Գթութիւնք քո բազում են, Տէ՛ր, ըստ իրաւանց քոց կեցո՛ զիս:  
Բազում են որ հալածեն եւ նեղեն զիս, ի վկայութեանց քոց եւ ոչ խոտորեցայ:  
Հայէի յանագորոյնս եւ մաշէի, զի զպատուիրանս քո ոչ պահեցին:  
Տե՛ս, զի զպատուիրանս քո սիրեցի, Տէ՛ր, ողորմութեամբ քո կեցո՛ զիս:  
Սկիզբն բանից քոց ճշմարտութիւն է, յաւիտեան են ամենայն իրաւունք  
արդարութեան քո:  
Իշխանք հալածեցին զիս ի նանիր, եւ ի բանից քոց երկեաւ սիրտ իմ:  
Յնծացայ եւ ի բանս քո, որպէս այն, որ գտանէ աւար բազում:  
Զմեղս ատեցի եւ անարգեցի եւ զօրէնս քո սիրեցի:  
Եօթն անգամ յաւուր օրհնեցից զքեզ վասն իրաւանց եւ արդարութեան քո:  
Խաղաղութիւն բազում է այնցիկ, որ սիրեն զօրէնս քո, եւ ոչ գոյ ի նոսա  
գայթակղութիւն:  
Սպասեցի փրկութեան քում, Տէ՛ր, եւ զպատուիրանս քո սիրեցի:  
Պահեաց անձն իմ զվկայութիւնս քո եւ սիրեաց զնոսա յոյժ:  
Պահեցի զպատուիրանս եւ զվկայութիւնս քո, զի ամենայն ճանապարհք իմ առաջի  
քո են:  
Մերձեցին խնդրուածք իմ առաջի քո, Տէ՛ր, ըստ բանի քում իմաստո՛ւն արա զիս:  
Մտցեն աղօթք ի առաջի քո, Տէ՛ր, եւ բանիս քո փրկեա՛ զիս:  
Բոխեցեն շրթունք իմ զօրհնութիւնս քո, յորժամ ուսուցես ինձ զարդարութիւնս  
քո:  
Խօսեցի լեզու իմ զբանս քո, զի ամենայն պատուիրանք քո արդարութեամբ են:  
Եղիցի ձեռն քո ի կեցուցանել զիս, զի զպատուիրանս քո ընտրեցի:

Ցանկացայ փրկութեան քում, Տէ՛ր, եւ օրէնք քո խօսք իմ էին:

Կեցցէ անձն իմ, օրհնեսցէ զքեզ, եւ իրաւունք քո օգնեսցեն ինձ:

Մոլորեցայ եւ որպէս զոչխար կորուսեալ, խնդրեա՛ զծառայս քո, զի զպատուիրանս քո եւ ոչ մոռացայ:

Փառք Հօր: Այժմ եւ միշտ:

-----

Եւ զկնի ասի շարականս

(գձ) Ի քէն հայցեմք, Հա՛յր գթութեանց եւ Աստուա՛ծ մխիթարութեանց, ի տխրական զիշերային մերձեալ ժամուս՝ մխիթարեա՛ զմեզ ի տրտմութեանց մեղաց եւ շնորհեա՛ զուրախութիւն գործովք արդարութեան աղաչանօք սուրբ Աստուածածնին եւ ամենայն արդարոց:

Ըստ քաղցրագոյն աստուածային քո հրամանի կոչման, Որդի՛ Աստուծոյ, եկեալ եմք առաջի քո յերեկոյիս աշխատեալք եւ ծանրաբեռնեալք, թեթեւացո՛ ի ծանրութեանց մեղաց զանձինս եւ զօրացո՛ բառնալ կամաւ զքաղցր լուծ քոց պատուիրանաց աղա:

Պաղատիմք առ քեզ հոգւով ի հանգստեան հասեալ ժամուս, մարդասէր Հոգի՛ Աստուծոյ, յորժամ նորոգես զերեսս երկրի եւ վերստին ստանաս զոգիս մարդկան, նորափետուր զարդարեա՛ զննջեցեալսն մեր զծանեալսն ի քէն սուրբ աւագանան աղաչա:

Զկենդանագիր անարատ ծնողի քո արկաններք առաջի անոխակալ տէրութեանդ քո. յորժամ գաս փառօք Հօր դատել զթըշնամին խաչի քո, ներեա՛ յանցանաց մերոց բարեխօսութեամբ մօր քո եւ կուսի. աղաչեմք զքեզ, Տէ՛ր, պահպանեա՛ զմեզ ընդ հովանեաւ խաչի քո սուրբ:

Հաղորդս արա եւ զմեզ, Տէ՛ր, ընդ սրբոց քոց առաքելոցն, որք արժանի եղեն տեսանել զքեզ ի յարութեան քո. արժանատրեա՛, Տէ՛ր, տեսանել զքեզ ի միւսանգամ քո զալստեանն. օրհնութիւն առաքողին ի բարձունս:

Ի նստիլ քո յատենի, դատաւո՛ր ահեղ, աղաչանօք սուրբ Աստուածածնին յիշեա՛ զննջեցեալսն մեր, յորժամ գայցես անճառ փառօք, քանզի քո են փառք յաւիտեանս. ամէն:

-----

Չ Ո Ր Ե Ք Շ Ա Բ Թ Ի ստղ. ԴԿ.

Սրբուհի՛ Մարիամ, սափոր ոսկի եւ տապանակ կտակարանաց, որ զի վերուստ զհացն կենաց պարզեւեցեր քաղցեալ բնութեանս, առ նա միշտ բարեխօսեա՛ վասն քաւութեան մեղաց մերոց:

Դասք անմարմնոց հրեշտակաց քեզ երանեն, ամենօրհնեա՛լ կոյս Մարիամ, որ զեակից Բանն, որ ընդ Հօր, կրեցեր ի քեզ անսերմնապէս, առ նա միշտ բա:

Վասն որոյ եւ մեք՝ հաւատացեալքս, քեզ երկրպագեմք, Քրիստո՛ս, եւ արտասուօք հայցեմք ի քէն՝ բարեխօսութեամբ Աստուածածնին զաստուածային լոյս քո ծագեա՛ յանձինս մեր. օրհնեմք զքեզ ի յարութեան երեկոյիս, ահաւո՛ր թագաւոր:

Հ Ի Ն Գ Շ Ա Բ Թ Ի ստղ. ԴԿ.

Առաքեա՛լք Աստուծոյ, ընտրեա՛լք ի սկզբանէ նախ քան զաշխարհս, որք արժանի եղէք տեսանել զանտեսն հրեղինաց, բարեխօսեցէ՛ք առ Տէր վասն մանկանց եկեղեցոյ:

Բարեկա՛մք Քրիստոսի, հազարապե՛տք աստուածայինն խորհրդոցն, որք ի հոսանուտ մեղաց ծովէս վերածիք զմարդիկ ի կեանս անմահ, բարեխօսե:

Քերագոյն քան զբնաւս անճառելւոյն հասիք երանութեան, որք ի գալստեան Տեառն նստջիք յերկոտասան աթոռսն Քրիստոսի, բարեխօսե:

Ո Ի Ը Բ Ա Թ ստղ. ԴԿ.

Պարունակեալ պահէին յանեղաշէն դրախտին զճանապարհս ծառոյն կենաց քրովբեական հոյլքն բոցեղէն սրովբեիք, այսօր արտափայլեալ ցուցար յերկրի աստուածագարդ փայտ կենաց եւ փրկութեան, զքեզ օրհնեն մանկունք սուրբ եկեղեցոյ:

Սաբեկայ ծառոյն վերաբերեալ խոյ յողջակեզ փոխանակ Իսահակայ, այլ ի վերայ քո զենաւ Գառն անարատ ի հաշտութիւն Հօր եւ ի բառնալ զմեղս մեր, զքեզ օրհ:

Պարծա՛նք պօղոսեան, դաւանեալ զքեզ աստուածային Բանին տեղի եւ զենարան, քանզի քեւ ապրեցաք ի խածանող եւ յանմարմին գազանէն եւ ի վերայ քո հեղեալ շիթք անապական արեանն՝ զկողածնին ջնջեաց զմեղս. զքեզ օրհ:

Ե Ը Կ Ո Ի Շ Ա Բ Թ Ի ստղ. ԴԿ.

Երկնաւոր հօ՛տ ընտրեալ, գոր հովին քաջ թողեալ յերկինս եւ եկեալ ի խնդիր մեզ՝ մոլորելոցս, որով լցեալ զթիւ հարիւրոցոյ, արար ուրախութիւն ի յերկինս երկնաւորացոյ, աղաչե՛մք զձեզ, բարեխօ՛ս լերուք առ Տէր վասն քաւութեան մեղաց մերոց:

Տեսանո՛ղք անտեսին, խորհրդածո՛ւք խորոցն Աստուծոյ, որք իջեալ ընդ Միածնին սպասաւորել տնօրէնութեանն. ի ծննդեանն՝ աւետաւորք հովուացն, եւ կանանցն իւղաբերից՝ կենաց քարոզք զկենդանւոյն, աղաչե՛մք զձեզ, բարխօ՛ս լե:

Պահապա՛նք աշխարհի, բանա՛կք Տեառն շուրջ զերկիւղածովք, բարեկա՛մք ազգի մարդկան, միջնօրոք մահու եւ յարութեան, Միքայէ՛լ եւ Գաբրիէ՛լ, մե՛ծք, որ կայք միշտ առաջի Ամենասուրբ Երրորդութեանն, աղաչե՛մք զձեզ, բարեխօ՛ս լե:

Ե Ը Ե Ք Շ Ա Բ Թ Ի ստղ. ԴԶ.

Երկնաւոր փեսայ, անստուեր լոյս իմանալի, որ ի յերկնից իջեր ի սեր հարսին քո եկեղեցոյ, զոր խօսեցաւ քեզ բարեկամն եւ փեսաւերն քո Յովհաննէս, սորին մաղթանօք ողորմեա՛:

Քառակերպիցն անհա'ս եւ անտե'ս ի սերովբէից, սրբութեանց սո'ւրբ եւ Տէ'ր բոլորից, խոնարհեցար ի Յորդանան՝ հայցելով ի ծառայէն մաքրութիւն ջրոյ՝ ի լուանալ զմեղս Ադամայ, սորին մաղ:

Որ յամլորդոյն վկայեցար Գառն Աստուծոյ բարձող մեղաց, զոր գերագոյն արդարոց ծանուցեր մեծ ի ծնունդս կանանց եւ ճրագ օրինացն, որ եւ ի դժոխս զփրկական գալուստն քո քարոզեաց, սորին:

---

Մաղթանք

Հոգւոցն հանգուցելոց, Քրիստո'ս Աստուած, արա՛ հանգիստ եւ ողորմութիւն եւ մեզ՝ մեղաւորացս, շնորհեա՛ զթողութիւն յանցանաց:

Քարոզ

Եւ եւս խաղաղութեան զՏէր աղա:

Վասն հանգուցեալ հոգւոցն աղաչեսցուք զփրկիչն մեր Քրիստոս, զի գնոսա ընդ արդարսն դասեսցէ եւ զմեզ կեցուցէ շնորհիւ ողորմութեան իւրոյ: Ամենակա՛լ Տէր Աստուած մեր, կեցո՛ եւ ողորմեա՛:

Տէ՛ր, ողորմեա՛, Տէ՛ր, ողոր., Տէ՛ր,ողոր.:

Աղօթք

Քրիստո'ս, Որդի՛ Աստուծոյ անոխակալ եւ բարեգութ, գթա՛ քո արարչական սիրովդ ի հոգիս հանգուցեալ ծառայից քոց: Յիշեա՛ յաւուր մեծի գալստեան արքայութեան քոյ, արա՛ արժանի ողորմութեան, քաւութեան եւ թողութեան մեղաց, դասաւորեալ պայծառացո ընդ սուրբս քո յաջակողման դասուն: Զի դու ես Տէր եւ Արարիչ

ամենեցուն, դատաւոր կենդանեաց եւ մեռելոց: Եւ քեզ վայել է փառք, իշխանութիւն եւ պատիւ այժմ եւ միշտ եւ յաւիտեանս յաւիտենից. ամէն:

Օրհնեալ Տէր մեր Յիսուս Քրիստոս. ամէն:

Հա՛յր մեր, որ յերկինս:

Հ Ա Ն Գ Ս Տ Ե Ա Ն Ժ Ա Մ

*Կարգաւորութիւն հասարակաց աղօթից Հանգստեան Ժամուն, որ կատարի ի դէմս Հօր Աստուծոյ, զի պահպանողական աջով Միաձնին պահեցէ զմեզ ի խաւարային զիշերիս:*

Առաքեա՛, Տէ՛ր, զլոյս քո եւ զճշմարտութիւն քո, զի առաջնորդեցեն ինձ եւ հանցեն զիս ի լեռն սուրբ եւ ի յարկս քո:

Մտից առաջի սեղանոյ աստուծոյ առ Աստուած, որ ուրախ առնէ զմանկութիւն իմ: Խոստովան եղէց քեզ օրհնութեամբ, Աստուա՛ծ, Աստուա՛ծ իմ:

Արդ, ընէ՞ր տրտում ես, ա՛նձն իմ, կամ ընդէ՞ր խոռվես զիս. յուսա՛ առ Աստուած, խոստովանեա՛ նմա. փրկիչ երեսաց իմոց Աստուած է:

Փառք Հօր: Այժմ եւ միշտ:

Եւ եւս խաղաղութեան զՏէր աղա:

Օրհնութիւն եւ փառք Հօր եւ:

Սաղմոս ԸԺԸ

Եկեացէ ի վերայ իմ ողորմութիւն քո, Տէ՛ր, եւ փրկութիւն քո ըստ բանի քում:

Տաց պատասխանի, ոյք նախատեն զիս բանիւք, զի ես ի բանս քո յուսացայ:

Մի՛ ի բացեայ առներ ի բերանոյ իմմէ զբան ճշմարտութեան մինչեւ յոյժ, զի յիրաւունս քո յուսացայ:

Պահեցի զօրէնս քո յամենայն ժամ, յաւիտեան եւ յաւիտեանս յաւիտենից:

Գնայի ես յանդորրու, զի զպատուիրանս քո խնդրեցի:

Խօսէի զվկայութիւնս քո առաջի թագաւորաց եւ ոչ ամաչէի:

Խորհէի ի պատուիրանս քո, զոր սիրեցի:

Համբարձի զձեռս իմ ի պատուիրանս քո, զոր սիրեցի, եւ խորհէի յարդարութեան քում:

Յիշեա՛ զբան ծառայի քո, յոր եւ յուսացուցեր զիս:

Սա մխիթարեացէ զիս ի խոնարհութեան իմում, զի բան քո կեցոյց զիս:

Ամբարտաւանք անիրաւեցան յիս յոյժ, այլ յօրինաց քոց եւ ոչ խոտորեցայ:

Յիշեցի զիրաւունս քո յաւիտենից, Տէ՛ր, եւ մխիթարեցայ:

Տրտմութիւն կալաւ զիս ի մեղաւորաց եւ ոյք թողին զօրէնս քո:

Գովելի են ինձ իրաւունք քո ի տեղուջ պանդխտութեան իմոյ:

Յիշեցի ի զիշերի զանուն քո, Տէ՛ր, եւ պահեցի զօրէնս քո:

Սա եղեւ ինձ ճանապարհ ի կեանս, զի զարդարութիւնս քո խնդրեցի:

Զանօրէնս ատեցի եւ զօրէնս քո սիրեցի:

Օգնական եւ փրկիչ իմ եւ դու, եւ ես ի բանս քո յուսացայ:

Ի բա՛ց եղերուք յինէն, չա՛րք, եւ քննեցից զպատուիրանս Աստուծոյ իմոյ:

Օգնեա՛ ինձ ըստ բանի քում եւ կեցո՛ զիս, եւ մի՛ յամօթ առնէր զիս ի յուսոյ իմմէ:

Օգնեա՛ ինձ եւ ապրեցո՛ զիս, եւ խորհեցայց յիրաւունս քո յամենայն ժամ:

Անարգեցեր յամենեսեան, որ ապստամբ եղեն յարդարութեանց քոց, զի անիրաւութեամբ էին խորհուրդք նոցա:

Յանցաւորս համարեցայ զամենայն մեղաւորս երկրի, վասն այսորիկ սիրեցի զպատուիրանս քո:

Բեւեռեա ընդ երկիւղ քո զմարմին իմ, զի ի դատաստանաց քոց եկեայց յոյժ:

Մերձեցին խնդրուածք իմ առաջի քո, Տէ՛ր, ըստ բանի քում իմաստուն արա զիս:

Մտցեն աղօթք իմ առաջի քո, Տէ՛ր, եւ բանիւ քո փրկեա՛ զիս:

Բոխեցեն շրթունք իմ զօրհնութիւնս քո, յորժամ ուսուցես ինձ զարդարութիւնս քո:

Խօսեցցի լեզու իմ զբանս քո, զի ամենայն պատուիրանք քո արդարութեամբ են:

Եղիցի ձեռն քո ի կեցուցանել զիս, զի զպատուիրանս քո ընտրեցի:

Ցանկացայ փրկութեան քում, Տէ՛ր, եւ օրէնք քո խօսք իմ էին:

Կեցցէ անձն իմ, օրհնեցցէ զքեզ, եւ իրաւունք քո օգնեցեն ինձ:

Մոլորեցայ ես որպէս գոչխար կորուսեալ, ինդրեա՛ զծառայս քո, զի զպատուիրանս  
քո ես ոչ մոռացայ:

Մի՛ եկեացեն ի վերայ մեր ոտք ամբարտաւանից, եւ ձեռք մեղաւորաց մի՛  
դողացուցեն զմեզ:

Անդ անկցին ամենեքեան, ոյք գործեն զանօրէնութիւն, մերժեցցին եւ այլ մի՛  
կարասցեն հաստատիլ:

Ես ի Տէր յուսացայ, ցնծացայց եւ ուրախ եղէց յԱստուած փրկիչ իմ:

Տէր, Տէր ետ ինձ զօրութիւն եւ կացոյց զոտս իմ ի հաստատութեան, ի վերայ  
պարանոցի թշնամւոյն կացոյց զիս եւ հանգոյց զիս երագ երագ:

Որ բնակեալն է յօգնութիւն բարձրելոյն, ընդ հովանեաւ Աստուծոյ յերկինս  
հանգիցէ:

Ասացէ Տեառն՝ ընդունող իմ ես դու, ապաւե՛ն իմ Աստուած, եւ ես յուսամ ի նա:

Նա փրկեցէ զիս յորոգայթէ որսողին եւ ի բանից խռովութենէ:

Ի թիկնամէջս իւր ընկալցի զքեզ, ի հովանի թելոց նորա յուսացիս:

Որպէս զէն՝ շուրջ եղիցի զքեւ ճշմարտութիւն նորա:

Ոչ երկիցես դու յերկիւղէ գիշերի եւ ոչ ի նետէ, որ թռչի ի տուէ:

Յիրէ, որ շրջի ի խաւարի, ի գայթակղութենէ դիւին ի հասարակ աւուր:

Անկցին ի կողմանէ քումմէ հազարք, եւ բիրք ընդ աջմէ քումմէ, որ առ քեզ ինչ ոչ  
մերձեցցին:

Բայց միայն աչօք քովք հայեցցիս դու եւ զհատուցումն մեղաւորաց տեսցես, զի դու,  
Տէ՛ր, յոյս իմ ես:

ԶԲարձրեալն արարեր քեզ ապաւեն, ոչ հասցեն առ քեզ չարք, եւ տանջանք մի՛  
մերձեցցին ի յարկս քո:

Հրեշտակաց իւրոց պատուիրեալ է վասն քո՝ պահել զքեզ յամենայն ճանապարհս  
քո:

Ի բազուկս իւրեանց ընկալցին զքեզ, զի մի՛ երբէք հարցես զքարի գոտն քո:

Ի վերայ իժից եւ քարբից գնացես դու, առ ոտն կոխեսցես զառիւծն եւ զվիշապն:

Քանզի յիս յուսացաւ, եւ փրկեցից զնա, հովանի եղէց նմա, զի ծանեաւ զանուն իմ:

Կարդացէ առ իս, եւ ես լուայց նմա եւ առ նմա եղէց ի նեղութեան:

Փրկեցից եւ փառաւոր արարից զնա, երկայն աւուրբք լցուցից եւ ցուցից նմա զփրկութիւն իմ:

Առ քեզ, Տէ՛ր, համբարձի զաչս իմ, որ բնակեալդ ես ի յերկինս:

Որպէս այք ծառայի ի ձեռն տեսոն իւրոյ, եւ որպէս այք աղախնոյ ի ձեռն տիկնոջ իւրոյ:

Այնպէս են այք մեր առ քեզ, Տէ՛ր Աստուած մեր, մինչեւ ողորմեսցիս ի վերայ մեր:

Ողորմեա՛ մեզ, Տէ՛ր, ողորմեա՛ մեզ, զի բազում լցաք արհամարհանօք:

Եւս առաւել լցան անձինք մեր նախատանօք, որ նախատէին զմեզ, եւ արհամարհանօք ամբարտաւանից:

Աստուա՛ծ, յանուան քում կեցո՛ զիս, եւ ի զօրութեան քում իրա՛ւ արա ինձ:

Աստուա՛ծ, լո՛ւր աղօթից իմոց, ո՛ւնկն դիր բանից բերանոյ իմոյ:

Օտարք յարեան ի վերայ իմ, եւ հզօրք խնդրեցին զանձն իմ, եւ ոչ համարեցան զքեզ Աստուած առաջի իւրեանց:

Ահա Աստուած օգնական իմ, եւ Տէր ընդունելի հոգւոյ իմոյ:

Ի դարձուցանել զչարն ի թշնամիս իմ ճշմարտութեամբ քով սատակեա՛ զնոսս:

Ես կամօք իմովք պատարագս մատուցից քեզ, խոստովան եղեց անուան քում, Տէ՛ր, զի բարի է:

Յամենայն նեղութենէ իմմէ փրկեցեր զիս, եւ ի թշնամիս իմ ետես ակն իմ:

Օրհնեալ ես դու, Տէ՛ր Աստուած հարցն մերոց, զովեալ եւ առաւել բարձրացեալ յաւիտեան:

Եւ օրհնեալ է անուն սուրբ փառաց քոց, զովեալ եւ առա:

Օրհնեալ ես ի տաճարի փառաց սրբութեան քո, զովեալ եւ առա:

Օրհնեալ ես ի վերայ աթոռոյ արքայութեան քո, զովեալ եւ առա:

Օրհնեալ ես, որ նստիս ի քրովբէս եւ հայիս յանդունդս, զովեալ եւ առա:

Օրհնեալ ես ի վերայ հաստատութեան երկնից, զովեալ եւ առա:

Օրհնեցէ՛ք զԱստուած ի սրբութեան նորա, օրհնեցէ՛ք զնա ի հաստատութեան ի զօրութեան նորա:

Օրհնեցէ՛ք զնա ի զօրութեան նորա, օրհնեցէ՛ք զնա ի բազում մեծութեան նորա:

Օրհնեցէ՛ք զնա ի ձայն օրհնութեան, օրհնեցէ՛ք զնա սաղմոսիք եւ օրհնութեամբ:

Օրհնեցէ՛ք զնա ցնծութեամբ, գովեցէ՛ք զնա ուրախութեամբ:  
Օրհնեցէ՛ք զնա ի բանս քաղցր, գովեցէ՛ք զնա ի բարբառ լսելի:  
Օրհնեցէ՛ք զնա ի ձայն գոհութեան, ամենա՛յն հոգիք, օրհնեցէ՛ք զՏէր:  
Արդ, արձակեա՛ զծառայս քո, Տէ՛ր, ըստ բանի քում ի խաղաղութիւն, զի տեսին աչք  
իմ զփրկութիւն քո, զոր պատրաստեցեր առաջի ամենայն ժողովրդոց:  
Լոյս յայտնեցար հեթանոսաց, եւ փառք ժողովրդեան քում Իսրայելի:  
Ձգեցեր զձեռն քո, եւ փրկեաց զիս աջ քո, եւ Տէր հատուցէ ընդ իմ:  
Տէ՛ր, ողորմութիւն քո յաւիտեան, զգործս ձեռաց քոց մի՛ անտես առնէր:  
Տէ՛ր, հա՛ն ի բանտէ զանձն իմ, գոհանամ զանուանէ քումմէ:  
Եւ քեզ սպասեն արդարք մինչեւ հատուցես:  
Մեծացուցէ անձն իմ զՏէր, եւ ցնծացէ հոգի իմ Աստուծով Փրկչաւ իմով:  
Այց արար ի վերայ խոնարհութեան աղախնոյ իւրոյ. այսուհետեւ երանիցեն ինձ  
ամենայն ազգք:  
Արար ընդ իս մեծամեծս հզօրն, եւ սուրբ է անուն նորա:  
Ողորմութիւն արար ազգաց յազգս երկիւղածաց իւրոց, արար զօրութիւն բազկաւ  
իւրով:  
Յրուեաց զամբարտաւանս ի մտաց սրտից եւ քակեաց զհզօրս յաթոռոց:  
Զխոնարհս բարձրացոյց, զկարօտս ելից բարութեամբ եւ զմեծատունս արձակեաց  
ունայնս:  
Պաշտպանեաց Իսրայելի ծառայի իւրոյ՝ յիշելով զողորմութիւն իւր:  
Որպէս խօսեցաւ առ հարսն մեր ընդ Աբրահամու եւ զաւակի նորա յաւիտեան:  
Տո՛ւր զօրութիւն ծառայի քո, կեցո՛ զորդի աղախնոյ քո եւ արա՛ առ իս նշան  
բարութեան:  
Տեսցեն ատելիք իմ եւ ամաչեցեն, զի դու, Տէ՛ր, օգնեցեր ինձ եւ մխիթարեցեր զիս:  
Փառք Հօր: Այժմ եւ միշտ:

-----  
Մաղթանք

Անձն իմ ի ձեռս քո է յամենայն ժամ, եւ ի սուրբ խաչ քո յուսացեալ եմ, թագաւո՛ր երկնաւոր, զբազմութիւն սրբոց քոց բարեխօս ունիմ առ քեզ: Որ երկայնամիտդ ես առ ամենեսեան, մի՛ անտես առնէր զապաւիներալս ի քեզ, այլ պահեա՛ պատուական եւ սուրբ խաչիւ քով ի խաղաղութեան:

Քարոզ

Աղաչեսցուք զամենակալն Աստուած եւ խնդրեսցուք ի նմանէ, զի առաքեսցէ զհրեշտակ խաղաղութեան, որ եկեալ պահեսցէ զմեզ յերկիւղական գիշերիս ի դիւական խռովութենէ՝ ամբողջ պահելով զհոգի եւ զմարմին մեր մինչեւ ի կատարումն ժամանակի ամաց մերոց: Ամենակալ Տէր Աստուած մեր կեցուսցէ եւ ողորմեսցի:

Զհանգիստ գիշերիս խաղաղութեամբ անցուցանել հաւատով ի Տեառնէ խնդրեսցուք:

Զհրեշտակ խաղաղութեան պահա:

Զքաւութիւն եւ զթողութիւն յան:

Զսրբոյ խաչին մեծ եւ կարող զօրու:

Եւ եւս՝ միաբան վասն ճշմարիտ եւ:

Զանձինս մեր եւ զմիմեանս Տեառն:

Ողորմեա՛ց մեզ, Տէ՛ր Աստուած մեր:

Աղօթք

Տէ՛ր Աստուած մեր, դու պահեա զմեզ խաղաղութեամբ ի գիշերիս յայսմիկ եւ յամենայն ժամանակի: Ընդ սուրբ երկիւղ քո բեւեռեալ պահեա զմիտս եւ զխորհուրդս մեր: Որպէս զի յամենայն ժամ քեւ պահպանեալ լիցուք յորոգայթից թշնամւոյն եւ քեզ հանցուք զօրհնութիւն եւ զփառս Հօր եւ Որդւոյ եւ Հոգւոյդ Սրբոյ այժմ եւ միշտ եւ յաւիտեանս յաւիտենից. ամէն:

Խաղաղութիւն ամենեցուն:

Աստուծոյ երկիրպագեսցուք:

Հրեշտակի խաղաղութեան յանձն արա զանձինս մեր, Տէ՛ր զօրութեանց, որ եկեալ պահեսցէ զմեզ անխռովս ի տուէ եւ ի զիշերի, յարթութեան եւ ի հանգստեան մերում, զի դու ես արարիչ լուսոյ եւ հաստիչ զիշերի: Եւ այժմ աղաչե՛մք զքեզ, Տէ՛ր Աստուած մեր, զհանգիստ զիշերիս շնորհեա՛ ի խաղաղութեամբ անցուցանել եւ հասանիլ ի պաշտօն առաւօտու՝ յերկրպագութիւն եւ ի փառաբանութիւն Ամենասուրբ Երրորդութեանդ այժմ եւ միշտ եւ յաւիտեանս յաւիտենից. ամէն:

Սաղմոս Դ

Խաղաղութեամբ յայս ի սոյն ննջեսցուք եւ զարթիցուք, զի դու, Տէ՛ր, միայն առանձին յուսով քով բնակեցուցեր զմեզ:

Ի կարդալ իմում լուար ինձ, Աստուա՛ծ, ըստ արդարութեան, ի նեղութենէ ինձ անդորր արարեր, ողորմեա՛ ինձ եւ լո՛ւր աղօթից իմոց:

Որդի՛ք մարդկան, մինչեւ յե՛րբ էք իստասիրտք, ընդէ՛ր սիրէք զանրութիւն եւ խնդրէք զստութիւն:

Ծաներո՛ւք, զի սքանչելիս արար Տէր սրբոյ իւրում. եւ Տէր լուիցէ ինձ ի կարդալ իմում առ նա:

Բարկանայք եւ մի՛ մեղանչէք, զոր ինչ ասէք ի սիրտս ձեր, յանկողինս ձեր զղջացարուք:

Մատուցէ՛ք պատարագս արդարութեան եւ յուսացարո՛ւք ի Տէր:

Բազումք ասէին, թէ՛ ո՞ցուցցէ մեզ զբարութիւն Տեառն. նշանեցաւ առ մեզ լոյս երեսաց քոց, եւ ետուր ուրախութիւն սրտից մերոց:

Ի պտղոյ ցորենոյ, զինոյ եւ ձիթոյ իւրեանց լցուցեր զնոսս:

Խաղաղութեամբ յայս եւ ի սոյն ննջեսցուք եւ զարթիցուք, զի դու, Տէ՛ր, միայն առանձին յուսով քով բնակեցուցեր զմեզ:

Ալէլուիա Օրթի:

Խաղաղութիւն ամենեցուն:

Եւ ընդ հոգւոյդ քում:

Երկիւղածութեամբ լուարուք:

Սրբոյ աւետարանի Յիսուսի Քրիստոսի, որ ըստ Յովհաննու:

Փառք քեզ, Տէ՛ր Աստուած մեր:

Պոսիտումէ:

Ասէ Աստուած:

Տէրն մեր Յիսուս Քրիստոս ասէ.

□ Ամէն ամէն ասեմ ձեզ. եթէ ոչ հասն ցորենոյ անկեալ յերկիր մեռանիցի, ինքն միայն կայ. եթէ մեռանիցի, բազում արդիւնս առնէ: Որ սիրէ զանձն իւր, արձակէ զնա, եւ որ ատեայ զանձն իւր աշխարհիս յայսմիկ, ի կեանսն յաւիտենականս պահեսցէ զնա: Եթէ որ զիս պաշտիցէ, զկնի իմ եկեսցէ, եւ ուր եսն եմ, անդ եւ պաշտօնեայն իմ եղիցի. եթէ որ զիս պաշտիցէ, պատուեսցէ զնա հայրն իմ□:

Քարոզ

Փառք քեզ, Տէ՛ր Աստուած մեր:

Սուրբ խաչիւս աղաչեսցուք զՏէր, զի սովաւ փրկեսցէ զմեզ ի մեղաց եւ կեցուցէ շնորհիւ ողորմութեան իւրոյ: Ամենակա՛լ Տէր Աստուած մեր, կեցո՛ւ եւ ողորմեա՛:

Աղօթք

Պահպանեա՛ զմեզ, Քրիստո՛ս Աստուած մեր, ընդ հովանեաւ սուրբ եւ պատուական խաչիւդ քով ի խաղաղութեան, փրկեա՛ յերեւելի եւ յաներեւոյթ թշնամոյն:

Արժանաւորեա գոհութեամբ փառաւորել զքեզ ընդ Հօր եւ ընդ Սրբոյ Հոգւոյդ այժմ եւ միշտ եւ յաւիտեանս յաւիտենից. ամէն:

Օրհնեալ Տէր մեր Յիսուս Քրիստոս. ամէն:

Հայր մեր, որ յերկինս:

-----

Անկանիմք առաջի քոյ, սո'ւրբ Աստուածածին, եւ աղաչեմք զանարատ զԿոյսոյ,  
բարեխօսեա՛ վասն անձանց մերոց եւ աղաչեա՛ զՄիածին Որդիդ` փրկել զմեզ ի  
փորձութենէ եւ յամենայն վտանգից մերոց:

## ՄԱՂԹԱՆՔ ԶՕՐԱԻՈՐՔ ԱՐՀԱԻՐԱՅ ԳԻՇԵՐԱՅՆՈՑ

Սրբոյ Գրիգորի Նարեկացոյ ասացեալ:

Բան ԺԲ

Ընկալ քաղցրութեամբ, Տէ՛ր Աստուած հօր, զդառնացողիս զաղաչանս, մատի՛ր  
գրութեամբ առ պատկառեալս դիմօք. փարատեա՛, ամենապարգե՛ւ, զամօթական  
տխրութիւնս. բա՛րձ յինէն, ողորմա՛ծ, զանբերելի ծանրութիւնս. անջրպետեա՛,  
հնարաւո՛ր, զմահացու կրթութիւնս. աւարեա՛, մի՛շտ յաղթող, զխաբողին  
հաճութիւն. բացաղբեա՛, վերնայի՛ն, զմոլելոյն մառախուղ. կնքեա՛, կեցուցի՛չ,  
զկորուսչին ընթացմունս. ցրուեա՛, ծածկատե՛ս, զըմբռնողին չար գտմունս.  
խորտակեա՛, անքնի՛ն, զմարտողին դիմեցմունս: Տեառնագրեա՛ քո անուամբդ  
զլուսանցոյց երդ յարկիս. պարփակեա՛ քո ձեռամբդ զառաստաղ տաճարիս.  
գծագրեա՛ քո արեամբդ զմուտ սեմոց սենեկիս. կերպացո՛ զքո նշանդ ի հետս ելից  
մաղթողիս. ամրացո՛ քո աջովդ զհանգստեանս խշտի. մաքրեացես ի հաղբից  
գծածկարան անկողնոյս. պահեացես քո կամօքդ զտառապեալ անձն ոգոյս.  
անխարդախ արասցես զքո շնորհեալ շունչ մարմնոյս. կացուցես շրջափակ  
զպար զօրուդ երկնայնոյ. կարգեացես ի դիմի ընդդէմ դիւացն դասու: Տո՛ւր  
հանգիստ բերկրութեան մահահանգոյնս նիրհման ի խորութեան գիշերիս  
բարեխօսութեամբ հայցուածոց սրբուհոյ Աստուածածնիդ եւ ամենայն ընտրելոց:  
Ամփոփեալ պարուրեա՛ զպատուհան տեսութեանց զգայարանացս իմաստից  
անգարհուրելի զետեղմամբ ի ծփական խռովութեանց, կենցաղական զբաղմանց,  
անբջական երագոց, խօլականաց ցնորից յիշատակաւ քո յուսոյդ անվնասելի  
պաշտպանեալ: Եւ սթափեալ վերստին ի ննջմանէ ծանրութեան ամենազգաստ  
արթնութեամբ, հոգենորոգ զուարթութեամբ ի քեզ արձանացեալ, զայս ձայն  
մաղթանաց բուրմամբ հաւատոց քեզ, ամենօրինեալ թագաւո՛ր փառաց անճառից,

Վառաբանողաց երկնագումար խմբից երգակցեալ յերկինս առաքել: Զի դու  
Վառաւորեալ ես ամենայն արարածոց յաւիտեանս յաւիտենից. ամէն:

-----  
ԱՂՕԹՔ ԶՕՐԱԻՈՐ

Նորին Սրբոյ Գրիգորի

Բան ԽԱ

Որդի՛ Աստուծոյ կենդանոյ, օրհնեա՛լ յամենայնի, Հօրդ ահաւորի անքնին ծնո՛ւնդ,  
որ տկարանայ առ ի քէն եւ ոչինչ: Որ ի ծագել անստուեր նշուլից ողորմութեան քոյ  
Վառաց հալին մեղք, հալածին դէք, ջնջին յանցանք, խզին կապանք, խորտակին  
շղթայք, կենդանածնին մահացեալք, բժշկին հարուածք, ողջանան վերք, բառնին  
ապականութիւնք, տեղի տան տխրութիւնք, նահանջին հեծութիւնք, փախնու  
խաւարն, մեկնի մէզն, մերժի մառախուղն, փարատի մռայլն, սպառի աղջամուղջն,  
վերանայ մութն, գնայ գիշերն, տարագրի տագնապն, չքանան չարիքն, հալածին  
յուսահատութիւնքն, եւ թագաւորէ ձեռն քո ամենակար, քաւի՛չդ ամենայնի: Որ ոչ  
եկիր կորուսանել զմարդկան ոգիս, այլ կեցուցեանել, թո՛ղ ինձ զանթիւ չարիսն իմ  
բագում ողորմութեամբդ: Զի դու միայն ես յերկնի անճառ եւ յերկրի անզնին, ի  
տարր գոյի եւ յեզրս ծագաց աշխարհի, սկիզբն ամենայնի եւ յամենայնի ամենայն  
լրմամբ, օրհնեա՛լ ի բարձունս, եւ քեզ ընդ Հօր եւ Հոգւոյդ Սրբոյ Վառք յաւիտեանս.  
ամէն:

Մ Ա Ղ Թ Ա Ն Ք

Ի ԴԻԻԱՅ ՊԱՀՊԱՆՈՒԹԵԱՆ

Նորին Սրբոյ Գրիգորի

Բան ՂԳ

Աստուած յաւիտենական, բարերար՝ եւ ամենակալ, ստեղծիչ լուսոյ եւ յօրինիչ գիշերոյ, կեա՛նք ի մահու եւ լո՛յս ի խաւարի, յո՛յս ակնունդաց եւ երկայնմտութի՛ն տարակուսելոց, որ ամենարուեստ իմաստութեամբ քո դարձուցանես յայգ զստուերս մահու, աննուագ ծագումն եւ անմուտ արեգակն, քանզի ոչ զօրէ ծածկել զփառս տերութեան քո խաւար գիշերոյ, որում կրկնի ծունր երկրպագութեան ամենայն եղելոց՝ երկնաւորաց եւ երկրաւորաց եւ սանդարամետականաց, որ լսես զհեծութիւն կապելոց եւ հայիս յաղօթս խոնարհաց եւ ընդունիս զխնդրուածս նոցա, Աստուած իմ եւ թագաւոր իմ, կեա՛նք իմ եւ ապաւե՛ն իմ, յո՛յս իմ եւ վստահութի՛ն իմ, Յիսուս Քրիստոս, Աստուածո՞ր ամենայնի, սո՛ւրբդ հանգուցեալ ի հոգիս սրբոց, մխիթարութի՛ն վշտաց եւ քաւարա՛ն մեղուցելոց, որ զփտես զամենայն յառաջ, քան զլինել նոցա, առաքեա՛ զպահպանողական զօրութիւն աջոյ քոյ եւ փրկեա՛ զիս յերկիւղէ գիշերի եւ ի դիւէ չարէ, որպէս զի զիշատակ սոսկալի եւ սուրբ քո անուանդ միշտ համբուրեալ շրթամբք հոգոյ ըղձութեան շնչոյ, կեցից պահպանեալ ընդ այնոսիկ, որ կարդան զքեզ ի բոլոր սրտէ: Եւ ի դրոշմէ խաչի քոյոյ նշանիդ, զոր աստուածային արեամբ քո ներկեալ նորոգեցեր եւ ի նոյն շնորհ որդեգրութեան զմեզ մկրտեցեր եւ ի փառս պատկերի քո նկարեալ յօրինեցեր, այսու պարգեւօք աստուածականօք ամաչեսցէ սատանայ, քակտեսցին մեքենայքն, բարձցին որոգայթքն, պարտեսցին մարտուցեալքն, պակասեսցին զէնքն սայրասուրբ. մերժեսցի մեզն, փարատեսցի խաւարն, մեկնեսցի մառախուղն: Բազուկ քո հովանասցի, եւ աջ քո կնքեսցէ, վասն զի գթած ես եւ ողորմած, եւ անուն քո կոչեսցեալ է ի վերայ ծառայից քոց:

Եւ քեզ ընդ Հօր Հոգւովդ Սրբով փառք, իշխանութիւն եւ պատիւ յաւիտեանս յաւիտենից. ամէն:

-----

ԱՂԵՐՍ ԱՌ ՏԻՐԱՄԱՅՐ Ս. ԱՍՏՈՒԱԾԱԾԻՆՆ

Նորին Սրբոյն Գրիգորի

Բան 2

Եւ արդ, ի վերայ այսքանեաց յուսահատութեանց եւ ահարկու սրտաբեկութեանց, պակուցանողական սաստկութեանց, աստուածային բարկութեանց տազնապեալ ոգւով թախծութեան ի սպառ աղաչե՛մ զքեզ, սո՛ւրբ Աստուածածին, հրեշտա՛կ ի մարդկանէ, մարմնատեսի՛լ քերովբէ, երկնաւո՛ր արքայուհի, անխառն իբրեւ զօդ, մաքուր որպէս զլոյս, անշաղախ ըստ նմանութեան պատկերի արուսեկին բարձրութեան, գերազանց, քան զբնակութիւն անկոխելին սրբութեանց, երանաւոր խոստմանն տեղի՛, եղե՛մ շնչական, ծա՛ռ կենացն ամահից՝ բոցեղէն սրովն պարունակեալ, ի բարձրեալն Հօրէ զօրացեալ եւ հովանացեալ, հանգստեամբ Հոգւոյն հանդերձեալ եւ մաքրագործեալ, բնակութեամբ Որդւոյն յարդարեալ եւ տաղաւարեալ, Միածինն Հօր եւ քեզ անդրանիկ, որդի քո՝ ծննդեամբ, եւ Տէր՝ արարչութեամբ. ընդ անախտ մաքրութեանդ եւ ամբիծ բարի՛, ընդ անարատ սրբութեանդ եւ խնամակալ բարեխօ՛ս:

Ընկալ զմաղթանս այսր աղերսանաց քում դաւանողիս եւ մատո՛, ընծայեա՛՝ ընդ սմին խառնեալ զբանն իմ նախնի մեծիդ ներբողի ի քոյդ պաղատանս. հիւսեա՛, միացո՛ զմեղուցելոյս դառն հեծութիւն ընդ քումդ երջանիկ եւ խնկաւորեալ հայցուածոց, տո՛ւնկդ կենաց պտղոյն օրհնութեան, զի ի քէն միշտ օգնեալ եւ բարեգործեալ եւ ի մաքրական քո ծնելութիւնդ ապաւինեալ եւ լուսաւորեալ՝ կեցից Քրիստոսի՝ Որդւոյ քո եւ տՏեառն:

Օժանդակեա՛ թեւոցդ աղօթիք, խոստովանեալ մա՛յրդ կենդանեաց, եւ յելիցն իմ յերկրիս հովտէ առանց լլկանաց հետեւիլ ի կեանս՝ օթեվանացդ պատրաստութեան, զի թեթեւացի կատարածն իմ ինձ ծանրացելոյս անօրէնութեամբ: Արացես տօն ինձ բերկրութեան զօրն իմ տազնապի, ողջացուցի՛չ երկանցն Եւայի: Բարեխօսեա՛, խնդրեա՛, աղաչեա՛, զի ըստ անճառելի մաքրութեանդ եւ ահա զբանիդ հաւատամ զընդունելութիւն: Արտասուօք օգնեա՛ վտանգեցելոյս, գովեա՛լդ ի կանայս. ծո՛ւնր խոնարհեցո առ իմ հաշտութիւն, ծնո՛ղդ Աստուծոյ. ընդ իմում թշուառիս հոգա՛, խորա՛ն Բարձրելոյն, ձե՛ռն տուր անկելոյս, տաճա՛ր երկնային, փառաւորեա՛ զՈրդիդ քո ի քեզ աստուածօրէն ինձ

հրաշագործել քաութիւն եւ ողորմութիւն, աղախի'ն Աստուծոյ եւ մա'յր, բարձրացի պատիւ քո ինեւ, եւ ցուցցի փրկութիւնն իմ քեւ:

Եթէ զիս գտցես, տիրամա'յր, թէ ինձ ողորմեսցիս, սրբուհի', թէ զկորուսեալս շահեսցիս, անարա'տ, թէ զհարթուցեալս յանձանձեսցես, երջանի'կ, թէ զամաչեցեալս յառաջ մատուցես, բարեշնորհ, թէ յուսահատելոյս ինձ միջնորդեսցես, միշտ սուրբ կո'յս, թէ զմերժեալս ընտանեցուցես, մեծարեա'լոյ յԱստուծոյ, թէ յիս ցուցցես զգթածութիւն, լուծի'չոյ անիծից, թէ զծփեալս հաստատեսցես, հանգի'ստ, թէ ի խոռվութեանս յուզմանց փոխեսցես զիս, խաղաղարա'ր, թէ վրիպելոյս ինձ հնարաւորեսցես, գովեա'լ, թէ վասն իմ մտցես ի հանդէս, մահու նահանջի'չ, թէ զդառնութիւնս իմ անուշեսցես,՝ քաղցրութի'ւն, թէ զբաժանմանն իմ խտրոց քակտեսցես, հաշտութի'ւն, թէ զանմաքրութիւնս իմ բարձցես, եղծման ընդոտնի'չ, թէ զմատնեալս մահու փրկեսցես, կենդանի լո'յս, թէ զլալեացս ձայն հասցես, բերկրութի'ւն, թէ զխորտակեալս կազդուրեսցես, դե'ղ կենաց, թէ ի կործանեալս յիս ակնարկեսցես, հոգելի'ց, թէ ողորմութեամբ ինձ պատահեսցիս, կտա'կ նուիրեալ:

Օրհնեա'լոյ միայն ի շրթունս ամբիծս լեզուաց երջանկաց, ահա կաթիլ մի կաթին քումոյ կուսութեան յանձն իմ անձրեւեալ՝ կենաց ինձ զօրէ, մա'յրոյ բարձրելոյ Տեառն Յիսուսի՝ Արարչին երկրի եւ բնաւին երկրի, զոր անճառապէս ծնար բովանդակ մարմնովն եւ

համայն Աստուածութեամբն, որ փառաւորեալ է ընդ Հօր եւ Հոգւոյն Սրբոյ՝ էութեամբ եւ անքննութեամբ մերոյին բնութեամբս միացելով, ամենայն եւ յամենայնում, մի յԵրրորդութենէն. նմա փառք յաւիտեանս յաւիտենից. ամէն:

-----  
ԱՂՕԹՔ ԻԻՐԱՔԱՆՉԻԻՐ ԱՆՁԻՆ

ՀԱԻԱՏԱՅԵԼՈՅ Ի ՔՐԻՍՏՈՍ

Չոր արարեալ է սրբոյ տեառն Ներսիսի Հայոց Կաթողիկոսի:

Հաւատով խոստովանիմ եւ երկիրպագանեմ քեզ, Հա'յր եւ Որդի' եւ Սո'ւրբ Հոգի, անեղ եւ անմա'հ բնութիւն, Արարի'չ հրեշտակաց եւ մարդկան եւ ամենայն եղելոց, ողորմեա' քո արարածոց եւ ինձ` բազմամեղիս:

Հաւատով խոստովանիմ եւ երկիրպագանեմ քեզ, անբաժանելի լո'յս, միասնական Սո'ւրբ Երրորդութիւն եւ մի Աստուածութիւն, Արարի'չ լուսոյ եւ հալածի'չ խաւարի, հալածեա' ի հոգւոյ իմմէ զխաւար մեղաց եւ անգիտութեան եւ լուսաւորեա' զմիտս իմ ի ժամուս յայսմիկ` աղօթել քեզ ի հաճոյս եւ ընդունել ի քէն զխնդրուածս իմ, եւ ողոր.:

Հա'յր երկնաւոր, Աստուա'ծ ճշմարիտ, որ առաքեցեր զՈրդիդ քո սիրելի ի խնդիր մոլորեալ ոչխարին, մեղայ յերկինս եւ առաջի քո, ընկա'լ զիս որպէս զանառակ որդին, եւ զգեցո' ինձ զպատմուճանն զառաջին, զոր մերկացայ մեղօք. եւ ողոր.:

Որդի' Աստուծոյ, Աստուա'ծ ճշմարիտ, որ խոնարհեցար ի հայրական ծոցոյ եւ առեր մարմին ի սրբոյ կուսէն Մարիամայ վասն մերոյ փրկութեան, խաչեցար, թաղեցար եւ յարեար ի մեռելոց եւ համբարձար փառօք առ Հայր, մեղայ յերկինս եւ առաջի քո, յիշեա' զիս որպէս զաւազակն, յորժամ գաս արքայութեամբ քով, եւ ողոր.:

Հոգի' Աստուծոյ, Աստուա'ծ ճշմարիտ, որ իջեր ի Յորդանան եւ ի վերնատունն եւ լուսաւորեցեր զիս մկրտութեամբ սուրբ Աւագանին, մեղայ յերկինս եւ առաջի քո, մաքրեա' զիս վերստին աստուածային հրով քո, որպէս հրեղէն լեզուօք սուրբ զառաքեալսն, եւ ողոր.:

Անե'ղ բնութիւն, մեղայ քեզ մտօք իմովք, հոգւով եւ մարմնով իմով, մի' յիշեր զմեղս իմ զառաջինս վասն անուանդ քում սրբոյ, եւ ողոր.:

Տեսո'ղ ամենայնի, մեղայ քեզ խորհրդով, բանիւ եւ գործով. ջնջեա' զձեռագիր յանցանաց իմոց եւ գրեա' զանուն իմ ի դպրութեան կենաց, եւ ողոր.:

Քննող գաղտնեաց, մեղայ քեզ կամաւ եւ ակամայ, գիտութեամբ եւ անգիտութեամբ, թողութի՛ն շնորհեա մեղաւորիս, զի ծննդենէ սուրբ Աւագանին մինչեւ ցայսօր մեղուցեալ եմ առաջի Աստուածութեանդ քո զգայարանօք իմովք եւ ամենայն անդամօք մարմնոյս, եւ ողոր.:

Ամենախնամ՝մ Տէր, դի՛ր պահապան աչաց իմոց զերկիւղ քո սուրբ՝ ոչ եւս հայիլ յայրատ, եւ ականջաց իմոց՝ ոչ ախորժել լսել զբանս չարութեան, եւ բերանոյ իմոյ՝ ոչ խօսել զստութիւն, եւ սրտի իմոյ՝ ոչ խորհել զչարութիւն, եւ ձեռաց իմոց՝ ոչ գործել զանիրաւութիւն, եւ ոտից իմոց՝ ոչ գնալ ի ճանապարհս անօրէնութեան, այլ ուղղեա՛ զշարժումն սոցա՝ լինել միշտ ըստ պատուիրանաց քոց յամենայնի. եւ ողոր.:

Հո՛ւր կենդանի Քրիստոս, զհուր սիրոյ քո, զոր արկեր յերկիր, բորբոքեա՛ յանձն իմ, զի այրեցել զաղտ հոգւոյ իմոյ եւ սրբեցել զխիղճ մտաց իմոց եւ մաքրեցել զմեղս մարմնոյ իմոյ եւ վառեցել լոյս գիտութեան քո ի սրտի իմում. եւ ողոր.:

Իմաստութիւն Հօր Յիսու՛ս, տո՛ւր ինձ զիմաստութիւն զբարիս խորհել եւ խօսել եւ գործել առաջի քո յամենայն ժամ, ի չար խորհրդոց, ի բանից եւ ի գործոց փրկեա զիս. եւ ողոր.:

Կամեցող բարեաց Տէ՛ր կամարար, մի՛ թողուր զիս ի կամս անձին իմոյ գնալ, այլ առաջնորդեա՛ ինձ լինել միշտ ըստ կամաց քոց բարեսիրաց. եւ ողոր.:

Արքա՛յ երկնաւոր, տուր ինձ զարքայութիւն քո, զոր խոստացար սիրելեաց քոց, եւ զօրացո՛ զսիրտ իմ ատել զմեղս եւ սիրել զքեզ միայն եւ առնել զկամս քո, եւ ողոր.:

Խնամո՛ղ արարածոց, պահեա՛ նշանաւ խաչի քո զհոգի եւ զմարմին իմ ի պատրանաց մեղաց, ի փորձութեանց դիւաց եւ ի մարդոց անիրաւաց եւ յամենայն վտանգից հոգւոյ եւ մարմնոյ, եւ ողոր.:

Պահապա՛ն ամենայնի Քրիստոս, աջ քո հովանի լիցի եւ ի վերայ իմ ի տուէ եւ ի զիշերի, ի նստիլ ի տան, ի գնալ ի ճանապարհ, ի ննջել եւ ի յառնել, զի մի՛ երբեք սասանեցայց, եւ ողոր.:

Աստուա՛ծ իմ, որ բանաս զձեռն քո եւ լնուս զամենայն արարածս ողորմութեամբ քով, քեզ յանձն առնեմ զանձն իմ, դու հոգա՛ եւ պատրաստեա՛ զպէտս հոգւոյ եւ մարմնոյ իմոյ յայսմհետէ մինչեւ յաւիտեան, եւ ողոր.:

Դարձուցի՛չ մոլորելոց, դարձո զիս ի չար սովորութեանց իմոց ի բարի սովորութիւն եւ բեւեռեա՛ ի հոգի իմ զսոսկալի օր մահուն եւ զերկիւղ գեհեոյն եւ զսէր արքայութեանն, զի զղջացայց ի մեղաց եւ գործեցից զարդարութիւն, եւ ողոր.:

Աղբի՛ւր անմահութեան, աղբերացո՛ ի սրտէ իմմէ զարտասուս ապաշխարութեան, որպէս պոռնկին, զի լուացից զմեղս անձին իմոյ յառաջ, քան զելանելն իմ յաշխարհէս, եւ ողոր.:

Պարգեւի՛չ ողորմութեան, պարգեւեա՛ ինձ ուղղափառ հաւատով եւ բարի գործով եւ սուրբ մարմնոյ եւ արեան քո հաղորդութեամբ գալ առ քեզ, եւ ողոր.:

Բարերա՛ր Տէր, հրեշտակի բարւոյ յանձն արասցես զիս՝ քաղցրութեամբ աւանդել զհոգի իմ եւ անխռով անցուցանել ընդ չարութիւն այսոցն, որ են ի ներքոյ երկնից, եւ ողոր.:

Լո՛յս ճշմարիտ Քրիստոս, արժանաւորեա՛ զհոգի իմ՝ ուրախութեամբ տեսանել զլոյս փառաց քոց ի կոչման աւուրն եւ հանգչել յուսով բարեաց յօթեվանս արդարոց, մինչեւ յօր մեծի գալստեան քո, եւ ողոր.:

Դատաւո՛ր արդար, յորժամ գաս փառօք Հօր՝ դատել զկենդանիս եւ զմեռեալս, մի՛ մտաներ ի դատաստան ընդ ծառայի քում, այլ փրկեա՛ զիս ի յաւիտենական հրոյն եւ լսելի արա ինձ զերանաւետ կոչումն արդարոց յերկնից արքայութիւնդ. եւ ողոր.:

Ամենաողո՛րմ Տէր, ողորմեա ամենայն հաւատացելոց ի քեզ՝ իմոց եւ օտարաց, ծանօթից եւ անծանօթից, կենդանեաց եւ մեռելոց, շնորհեա՛ եւ թշնամեաց իմոց եւ ատելեաց զթողութիւն, որ առ իս յանցանացն, եւ դարձո՛ զնոսս ի չարեացն, զոր ունին վասն իմ, զի ողորմութեան քում արժանի եղիցին, եւ ողոր.:

Փառաւորեա՛լ Տէր, ընկալ զաղաչանս ծառայիս քո եւ կատարեա՛ ի բարի զինդրուածս իմ բարեխօսութեամբ սրբուհոյ Աստուածածնին եւ Յովհաննու մկրտչին, եւ սրբոյն Գրիգորի մերոյ Լուսաւորչին, եւ սրբոց առաքելոց, մարգարէից, վարդապետաց, մարտիրոսաց, հայրապետաց, ճգնաւորաց, կուսանաց եւ ամենայն սրբոց քոց երկնաւորաց եւ երկրաւորաց: Եւ քեզ փառք եւ երկրպագութիւն անբաժանելի Սուրբ Երրորդութեանդ յաւիտեանս յաւիտենից. ամէն:

#### Մաղթանք

Վասն սրբուհոյ Աստուածածնին բարեխօսութեանն, Տէ՛ր, ընկալ զաղաչանս մեր եւ կեցո՛ զմեզ:

#### Քարոզ

Սուրբ զԱստուածածինն եւ զամենայն սուրբս բարեխօս արասցուք առ Հայր ի յերկինս, զի կամեցեալ ողորմեսցի եւ գթացեալ կեցուցէ զարարածս իւր: Ամենակա՛լ Տէր Աստուած մեր, կեցո՛ եւ ողորմեա՛:

#### Աղօթք

Ընկալ, Տէ՛ր, զաղաչանս մեր բարեխօսութեամբ սուրբ Աստուածածնին՝ անարատ ծնողի Միածնի Որդւոյ քո, եւ աղաչանօք ամենայն սրբոց քոց եւ որոց այսօր է յիշատակ (կամ) աւուրս շնորհիւ: Լո՛ւր մեզ, Տէ՛ր, եւ ողորմեա՛. ներեա՛, քաւեա՛ եւ թո՛ղ զմեղս մեր:

Արժանաւորեա՛ գոհութեամբ փառաւորել զքեզ ընդ Որդւոյ եւ ընդ Սրբոյ Հոգւոյդ այժմ եւ միշտ եւ յաւիտեանս յաւիտենից. ամէն:

Օրհնեալ Տէր մեր Յիսուս Քրիստոս. ամէն:

Հայր մեր, որ յերկինս:

-----

### Մաղթանք

Ձեանգստեան զաղօթս եւ զաղաչանս ընկալ, մարդասէ՛ր Աստուած, ի հաճոյս բարերար կամաց քոց եւ մեր մեղաց եւ բազում յանցանացն թողութիւն շնորհեա. եւ քեզ փառք յաւիտեանս. ամէն:

Փառք քեզ, Տէ՛ր Աստուած մեր, որ պարգեւեցեր զօրս զայս բարեաւ եւ խաղաղութեամբ անցուցանել:

Մարդասէ՛ր Աստուած, զառաջակայ գիշերս, որ ի վերայ մեր գալոց է, ի մեղաց փրկեա՛, ի չարեաց ազատեա՛, եւ ի գործս բարիս առաջնորդեա՛:

Առաւօտու օրհնութեանցն եւ փառաբանութեանցն արժանի՛ արա զամենայն հաւատացեալս անուանդ քում սրբոյ եւ պահեա՛ ի խաղաղութեան:

Տէ՛ր Աստուած մեր, տո՛ւր զքո խաղաղութիւնդ ամենայն աշխարհի, բա՛րձ զցասումն եւ զպատուհասն ի յարարածոցս:

Ողորմեա՛ հարց եւ եղբարց մերոց կենդանեաց եւ հանգուցելոց:

Ողորմեա՛ զեկեղեցի շինողաց, երախտաւորաց, պտղատուից, սպասաւորաց եւ այնոցիկ, որք ընդ հովանեաւ սրբոյ եկեղեցւոյ են հանգուցեալ:

Տէ՛ր Աստուած, օգնեա՛ թագաւորացն քրիստոնէից եւ իշխանացն բարեպաշտից, զօրաց եւ զաւակաց նոցին՝ պահելով ի խաղաղութեան:

Տէ՛ր Աստուած մեր, պահեա՛ զառաջնորդս եւ զեղբայրութիւնս մեր ամբողջ եւ անխտով ի կամս ողորմութեան քոյ:

Նշանաւ սուրբ եւ պատուական խաչի քոյ հալածեա՛ զերեւելի եւ զաներեւոյթ թշնամին ի սահմանաց մերոց եւ ի բնակութենէս մերմէ:

Փրկեա՛ զմեզ ի հրոյն յաւիտենից. եւ քեզ փառք յաւիտեանս. ամէն:

Օրհնեալ եղերուք ի շնորհաց Սրբոյ Հոգւոյն, երթայք հանգերո՛ւք խաղաղութեամբ, եւ Տէր եղիցի ընդ ձեզ, ընդ ամենեսեանդ. ամէն:

Խրատք սարկաւագութեան եւ դպրութեան զարարողութենէ պատարագին:

Առնու քահանայն զերկու սարկաւագունս եւ մտանէ ի սրբազնատունն, եւ ասեն

Սաղմոս ՃԼԱ

Քահանայք քո զգեցցին զարդարութիւն, եւ սուրբք քո ցնծալով ցնծասցեն:

Յիշեա՛, Տէ՛ր, զԴաւիթ եւ զամենայն հեգութիւն նորա:

Խնդրեսցուք հաւատով միաբանութեամբ ի Տեառնէ, զի ողորմութեան զշնորհսն իւր արասցէ ի վերայ մեր. Տէրն ամենակալ կեցուցէ եւ ողորմեսցի:

Ողորմեա՛ց մեզ, Տէ՛ր Աստուած մեր, ըստ:

Եւ ասէ քահանայն երկոտասան Տէ՛ր, ողորմեա՛, եւ ապա զաղօթքն: Եւ սարկաւագն առնու զսաղաւարտն եւ ասէ.

Եւ եւս խաղաղութեան զՏէր աղա:

Օրհնութիւն եւ փառք Հօր եւ որդ:

ԽՈՐՀՆՈՒՐԴ Ս. ՊԱՏԱՐԱԳԻ

Սոյնպէս եւ շապկին ասէ եւ ուրարին եւ գօտւոյն եւ բազպանին եւ շուրջառին:

Շարական հանդերձի, յորժամ զգենու

(դձ)

Խորհուրդ խորին, անհաս, անսկիզբն, որ զարդարեցեր զվերին պետութիւնդ, ի յառազաստ անմատոյց լուսոյն զերապանծ փառք զդասս հրեղինաց:

Անճառահրաշ զօրութեամբ ստեղծեր զԱդամ պատկեր տիրական եւ նազելի փառք զգեստաւորեցեր ի դրախտն Ադենի տեղի բերկրանաց: Չարչարանօք քո

սուրբ Միածնիդ նորոգեցան արարածք ամենայն, եւ վերստին մարդն անմահացաւ՝ զարդարեալ ի զգեստ անկողոպտելի:

Անձրեւածին բաժա՛կ հրահոսան, որ հեղար յառաքեալսն ի սուրբ վերնատանն, հե՛ղ եւ ի մեզ, Հոգի՛դ Սուրբ Աստուած, ընդ պատմուճանին զքո զիմաստութիւն: Տան քում վայել է սրբութիւն, որ զգեցար զվայելչութիւն, սրբութիւն փառաց ընդ մէջ քո ածեալ, պատեա՛ զմէջս մեր ճշմարտութեամբ: Որ զարարչագործ բազուկս քո տարածեցեր ընդդէմ աստեղաց, հաստատեա՛ զբազուկս մեր կարողութեամբ, համբարձմամբ ձեռաց առ քեզ միջնորդիլ: Իհիւսմամբ թագ ի գլուխ պատեսցես զմիտս եւ զզգայարանս, խաչանիշ ուրարամբ ըստ Ահարովնի ծաղկեալ յոսկէթել ի զարդ խորանին:

Բամից բոլորից տիրապէս աստուածպետական նափորտապատ սիրով զմեզ զգեստաւորեցեր՝ քում սուրբ խորհրդոյդ լինել սպասաւոր:

Թագաւո՛ր երկնաւոր, զեկեղեցի քո անշա՛րժ պահեա եւ զերկրպագուս անուանդ քում պահեա՛ ի խաղաղութեան:

(քհ) Լուսցից սրբութեամբ զձեռս իմ եւ շուրջ եղէց զսեղանով քով, Տէ՛ր:

(սրկ) Դա՛տ արա ինձ, Տէ՛ր, զի ես յամբձութեան իմում գնացի. ի Տէր յուսացայ, զի մի՛ եղէց հիւանդ:

Փորձեա՛ զիս, Տէ՛ր, եւ քննեա՛ զիս, փորձեա՛ զերիկամունս իմ եւ զսիրտ իմ: Ողորմութիւն քո, Տէ՛ր, առաջի աչաց իմոց, եւ հաճոյ եղէց ճշմարտութեան քում:

Ոչ նստայց ես յաթոռս նանրաց եւ ընդ անօրէնս ես ոչ մտից:

Ատեցի ես զժողովս չարաց եւ ընդ ամպարիշտս ես ոչ նստայց:

Լուսցից սրբութեամբ զձեռս իմ եւ շուրջ եղէց զսեղանով քով, Տէ՛ր:

Լսել ինձ զձայն օրհնութեան քո եւ պատմել զամենայն սքանչելիս քո:

Տէ՛ր, սիրեցի զվայելչութիւն տան քո եւ զտեղի յարկի փառաց քոց:

Մի՛ կորուսաներ ընդ ամպարիշտս զանձն իմ եւ մի՛ ընդ արս արիւնահեղս զկեանս իմ:

Որոց ձեռք իւրեանց յանօրէնութեան են, եւ աջ նոցա լի է կաշառօք:

Ես յամբձութեան իմում գնացի, փրկեա՛ զիս, Տէ՛ր, եւ ողորմեա՛ ինձ:

Ոտն իմ կացցէ յուղղութեան. յեկեղեցիս մեծս օրհնեցից զքեզ:

Փառք Հօր. Այժմ եւ միշտ:

(քհ) Եւ վասն սրբուհւոյ Աստուածածնին:

(քրգ) Սուրբ զԱստուածածինն եւ զամենայն սուրբս բարեխօս արասցուք առ Հայր ի յերկինս, զի կամեցեալ ողորմեսցի եւ գթացեալ կեցուցէ զարարածս իւր. ամենակա՛լ:

(քհ) Ընկա՛լ, Տէ՛ր, զաղաչանս մեր բարե:

Եւ ապա ասէ՛ Խոստովանիմ առաջի Աստուծոյ:

Եւ մերձակայ քահանայն ասէ՛ Ողորմեսցի քեզ:

Եւ ինքն ասէ՛ Ազատեսցէ եւ զձեզ մար:

(դպ) Յիշեսցի՛ր եւ զմեզ առաջի անմահ Գառինն Աստուծոյ:

(քհ) Յիշեա՛լ լիջիք առաջի անմահ Գառինն Աստուծոյ:

(վի) Աղաղակեցէ՛ք առ Տէր, ամենա՛յն եր: եւ այլն որպէս յերեսն 364:

(սրկ) Սուրբ եկեղեցեաւս աղաչեսցուք զՏէր, զի սովաւ փրկեսցէ զմեզ ի մեղաց եւ կեցուցէ շնորհիւ ողորմութեան իւրոյ: Ամենակա՛լ Տէր Աս:

Ի մէջ տաճարիս եւ առաջի աստուածընկալ:

(քհ) Մտից առաջի սեղանոյ Աստուծոյ առ Աստուած, որ ուրախ առնէ զմանկութիւն իմ:

Դա՛տ արա ինձ. եւ այլն որպէս յերեսն 592:

(սրկ) Օրհնեսցուք զամենակալն Աստուած՝ զՀայր Տեառն մերոյ Յիսուսի Քրիստոսի, որ արժանի արար զմեզ կալ ի տեղոջ փառաբանութեան եւ երգել զերգս հոգեւորս: Ամենակա՛լ Տէր Աստուած մեր, կեցո՛ եւ ողորմեա՛:

(քհ) Ի յարկի սրբութեան եւ ի տեղոջս:

Եւ ապա ձգեն զվարագոյրն, եւ դպիրքն եղանակեն մեղեղի ըստ պատշաճի աւուրն կամ տաղ խորհրդով:

(աւե) Բարբառ աւետեաց ձայնիւ. *կրկնէ.*

Գաբրիէլ գոչէր սրբուհւոյն:

Առ քեզ առաքիմ, մաքուր. *կրկնէ.*

պատրաստեալ տեղի տէրունւոյն:

(ծնն) Նոր ծաղիկ այսօր բղխէ յարմատոյն յԵսսեայ:

Եւ որդի Դաւթի ծնանի զՈրդին Աստուծոյ:

(տնջ) Քրիստոս փառաց թագաւորն այսօր եկեալ յընծայումն:

Կատարելով նա զօրէնս քառասնօրեայ զալստեամբն:

(ծաղ) Աստ եբրայեցոց մանկունքն զերգ զքրովբէիցն առեալ, հեթանոսական դասուց տօնակից վեհիցն եղեալ:

(յար) Ես ձայն զառիժուն ասեմ, որ գոչէր ի քառաթելին:

Ի քառաթելին գոչէր. կրկնէ.

ձայն առնէր ի սանդարամետսն. կրկնէ:

(նոր կիր) Այսօր նոր արեւ հարեալ ի նորահրաշ արեգակնէն. կրկնէ:

Այսօր նոր շուշան ծաղկեալ ի նորատունկ բուրաստանէն:

(համ) Այսօր անդրանիկ Հօր Միածին Որդին յերկինս սլանայ ադամային կերպիւ:  
Նուազ ներբողից եղանակէն այսօր հոյլք հոգեղինաց երկնաւորացն խմբից՝  
նուագեմք հոգւոյն նուագս վայելուչս:

(հզլ) Վայելուչս բանիւ զարարչութիւնն նախ ասեմք:

(վար) Գոհար վարդն վառ առեալ. կրկնէ.

ի վեհից վարսիցն արփենից. (կրկնէ).

Ի վեր ի վերայ վարսիցն պղպջէր

ծաղիկ ծովային. պղպջէր:

(ածծ) Այսօր Գաբրիէլ հրեշտակապետն եկեալ, բերեալ զբրաբիոն պսակ յաղթող  
Կուսին: Այսօր կոչելով առ բոլորիցն Տէրն զտաճար Բարձրելոյն եւ զբնակարան  
Հոգւոյն:

(խաչ) Իսաչն ի նախնումն երեւեցաւ ծաղկեալ ի դրախտն աստուածատունկ,  
մխիթարիչ եղև Սեթայ նախագուշակ հօրն Ադամայ. մեք ի յայն փայտն եմք  
յուսացեալ, յոր Տէր Յիսուս բեւեռեցաւ, եւ խոնարհեալ երկրպագեմք  
աստուածընկալ սուրբ նշանիս:

(հրշ) Գովեստ բերկրանաց քաղցրաձայնեալ երգեմք ձեզ, հրեշտակապե՛տք եւ  
հրեշտակաց գումա՛րք:

(առք) Արեգակն արդար, որ ի Հօրէ ծագեալ, զառաքեալսն քո անճառ շնորհօք լցեալ:  
Ռահ լուսոյ ցուցեալ Հայստանեայց ազանց մեծն Թաղէոս Բարդուղիմեա  
փայլեալ:

(մրգ) Աստուածային խորոցն անճառ խորհրդածուք, սո'ւրբ մարգարէք, բանիւ  
պատմողք զապագայիցն յառաջագոյն զեղելութիւն:

(հայ) Ի հանդէս տօնի քո ըախացեալ ցնծամք, հա'յր եւ վարդապե'տ, սո'ւրբ  
հայրապետդ (այս անուն):

(եկդ) Եկեղեցի կաթողիկէ ի Հայաստան, այսօր զմանկունս ժողովեալ իւր  
համաձայն:

Ջընտրեալն որ ասես, մեղեդի մի' ասեր.

Ընտրեալդ յԱստուծոյ, ո'վ երջանիկ սուրբ քահանայ:

Նմանեալ Ահարոնի եւ Մովսէսի մարգարէին,

Այնմ, որ զգեստուցն էր յօրինող, զոր Ահարոն միշտ զգենոյր:

Յօրինէր զպատմութեանն, զոր ի չորից կազմեալ նիւթոց`

ի կարմրոյ, ի կապուտոյ, ի բեհեզոյ, ի ծիրանոյ:

Թել զթելն յօրինէր. կարգն առաջին էր կարկեհան:

Եւ օծումն զրապանին շուրջանակի բոլորաշէն:

Եւ յընթացս զարշապարին հնչէր երկիր, ցնծայր խորանն:

Արդ, ի նոյն նմանութեան Քրիստոս զմեր Տէրս յօրինէ:

Յորժամ մտցես ի սուրբ խորանն, անդ յիշեցես զմեր ննջեցեալսն:

Յորժամ առնես զպատարագս, յիշեա' եւ զիս` զբազմամեղս:

Ջի եւ մեզ ողորմեսցի ի միւսանգամ իւր գալստեանն:

Հօրն փառք, Որդոյն պատիւ եւ Սուրբ Հոգւոյն այժմ, յաւիտեան:

Յաւիտեանս յաւիտենից. Քրիստոս օրհնեալ ի համայնից:

Շարական ինկարկութեան սրբոյ պատարագին

Յայս յարկ նուիրանաց ուխտի Տեառն տաճարիս ժողովեալքս աստանօր ի  
խորհուրդ պաշտման պաղատանաց առաջիկայ սուրբ պատարագիս ինկօք

անուշիք խումբ առեալ պարենք ի վերնայարկ սրահս խորանիս. ուղղութեամբ ընկալ զաղօթս մեր, որպէս բուրումն անուշահոտ ինկոց, տաշխից եւ կինամոնաց, եւ զմատուցողս պահեա՛ սրբութեամբ միշտ եւ հանապազ քեզ սպասաւորել: Բարեխօսութեամբ մօր քո եւ կուսի ընկա՛լ զաղաչանս քոց պաշտօնէիցս:

Որ գերագոյն քան գերկինս պայծառացուցեր սուրբ գեկեղեցի արեամբ քո, Քրիստո՛ս, եւ ըստ երկնայնոցն կարգեցեր ի սմա զդասս առաքելոց եւ մարգարէից, սուրբ վարդապետաց. այսօր ժողովեալ դասք քահանայից, սարկաւագաց, դպրաց եւ կղերիկոսաց, խունկ մատուցանեմք առաջի քո, Տէ՛ր, յօրինակ ըստ հնումն Չաքարիայ. ընկա՛լ առ ի մէնջ զինկանուէր մաղթանս, որպէս զպատարագն Աբելի, զՆոյի եւ զԱբրահամու. բարեխօսութեամբ վերին քո զօրացդ միշտ անշա՛րժ պահեա զաթոռ Հայկազնեայս:

Խնդա՛ յոյժ, դո՛ւստր, լուսոյ մա՛յր, սուրբ կաթուղիկէ՛, մանկամբք քո, Սիո՛ն. զարդարեալ պճնեա՛, հա՛րսն պանծալի, երկնանման լուսաճեմ խորա՛ն, զի օծեալն Աստուած էնն ի յէէն անծախսապէս ի քեզ միշտ պատարագի, Հօր՝ ի հաշտութիւն, մեզ՝ ի քաւութիւն բաշխէ զմարմին եւ զարիւն իւր սուրբ, վասն իւր կատարման սուրբ տնօրէնութեան շնորհէ զթողութիւն կանգնողի տաճարիս:

Զանապական կոյսն Մարիամ Աստուածածին խոստովանի սուրբ Եկեղեցի, ուստի տուաւ հացն անմահութեան եւ բաժակ մեզ ուրախարար, տո՛ւք օրհնութիւն նմա հոգեւոր երգով:

(սրկ) Օրհնեա՛, Տէ՛ր:

(քհ) Օրհնեալ թագաւորութիւնն Հօր եւ :

Եւ ասի ժամամուտ ըստ պատշաճի աւուրն:

(սրկ) Եւ եւս խաղաղու: Օրհնեա՛, Տէ՛ր:

(քհ) Օրհնութիւն եւ: Խաղաղութիւն:

(դպ) Եւ ընդ հոգւոյդ քում:

(սրկ) Աստուծոյ երկրպագեցուք:

(դպ) Առաջի քո, Տէ՛ր:

(քհ) Տէր Աստուած մեր, որոյ կարողու:

Եւ ասի փոխն եւ շարականն՝ ըստ պատշաճի:

(սրկ) Օրհնեա՛, Տէ՛ր:

(քհ) Զի քո է կարողութիւն եւ զօրու:

(սրկ) Պոսիսումէ:

Նոյնպէս եւ զՍուրբ Աստուածն ըստ պատշաճի  
աւուրն գիտ եւ ասա:

(սրկ) Եւ եւս խաղաղութեան զՏէր աղա:

(դպ) Տէ՛ր, ողորմեա՛:

(սրկ) Վասն խաղաղութեան ամենայն աշխարհի

եւ հաստատութեան սրբոյ եկեղեցւոյ զՏէր աղա:

(դպ) Տէ՛ր, ողորմեա՛:

(սրկ) Վասն ամենայն սուրբ եւ ուղղափառ եպիսկոպոսաց զՏէր աղա:

(դպ) Տէ՛ր, ողորմեա՛:

(սրկ) Վասն հայրապետին մերոյ տեառն

(այս անուն) կենաց եւ փրկութեան հոգւոյ նորին. զՏէր աղա:

(դպ) Տէ՛ր, ողորմեա՛:

(սրկ) Վասն վարդապետաց, քահանայից, սարկաւազաց, դպրաց եւ ամենայն

ուխտի մանկանց եկեղեցւոյ զՏէր աղա:

(դպ) Տէ՛ր, ողորմեա՛:

(սրկ) Վասն բարեպաշտ թագաւորաց եւ աստուածասէր իշխանաց, զօրավարաց եւ

զօրաց նոցին զՏէր աղա:

(դպ) Տէ՛ր, ողորմեա՛:

(սրկ) Վասն հոգւոցն հանգուցելոց, որք:

(դպ) Յիշեա՛, Տէ՛ր, եւ ողորմեա՛:

(սրկ) Եւ եւս՝ միաբան վասն ճշմարիտ եւ:

(դպ) Տէ՛ր, ողորմեա՛:

(սրկ) Զանձինս մեր եւ զմիմեանս Տեառն:  
(դպ) Քեզ՝ Տեառնդ, յանձն եղիցուք:  
(սրկ) Ողորմեա՛ց մեզ, Տէ՛ր Աստուած մեր:  
(դպ) Տէ՛ր, ողորմեա՛, Տէ՛ր, ողոր., Տէ՛ր ողոր.:  
(սրկ) Օրհնեա՛, Տէ՛ր:  
(քհ) Զի ողորմած եւ մարդասէր ես Աստուած:

*Գիրքն, ալիշուն եւ Աւետարանն եւ Հաւատամքն ի ճաշուն գիտ եւ կարդա*

(սրկ) Օրհնեա՛, Տէ՛ր:  
(քհ) Իսկ մեք փառաւորեսցուք, որ յա:  
(սրկ) Եւ եւս խաղաղութեան զՏէր աղա:  
(դպ) Տէ՛ր, ողորմեա՛:  
(սրկ) Եւ եւս հաւատով աղաչեսցուք եւ խնդրեսցուք ի Տեառնէ Աստուծոյ եւ ի Փրկչէն մերմէ Յիսուսէ Քրիստոսէ ի ժամուս պաշտաման եւ աղօթից: Զի արժանի ընդունելութեան արասցէ, լուիցէ Տէր ձայնի աղաչանաց մերոց, ընկալցի զխնդրուածս սրտից մերոց, թողցէ զյանցանս մեր, ողորմեսցի ի վերայ մեր: Աղօթք մեր եւ խնդրուածք յամենայն ժամ մտցեն առաջի մեծի տէրութեան նորա: Եւ նա տացէ մեզ միաբան միով հաւատով արդարութեան վաստակիլ ի գործս բարիս: Զի զողորմութեան զշնորհսն իւր արասցէ ի վերայ մեր. Տէրն ամենակալ կեցուսցէ եւ ողորմեսցի:  
(դպ) Կեցո՛, Տէ՛ր:  
(սրկ) Զժամ սուրբ պատարագիս եւ զառաջակայ օրս խաղաղութեամբ անցուցանել հաւատով ի Տեառնէ խնդրեսցուք:  
(դպ) Շնորհեա՛, Տէ՛ր:  
(սրկ) Զհրեշտակ խաղաղութեան պահա:  
(դպ) Շնորհեա՛, Տէ՛ր:  
(սրկ) Զքաւութիւն եւ զթողութիւն յան:  
(դպ) Շնորհեա՛, Տէ՛ր:  
(սրկ) Զսրբոց խաչին մեծ եւ կարող զօրու:

(դպ) Շնորհեա', Տէ'ր:

(սրկ) Եւ եւս՝ միաբան վասն ճշմարիտ եւ:

(դպ) Շնորհեա', Տէ'ր:

(սրկ) Զանձինս մեր եւ զմիմեանս Տեառն:

(դպ) Քեզ Տեառնդ յանձն եղիցուք:

(սրկ) Ողորմեա'ց մեզ, Տէ'ր Աստուած մեր:

(դպ) Տէ'ր, ողորմեա', Տէ'ր, ողոր., Տէ'ր, ողոր.:

(սրկ) Օրհնեա', Տէ'ր:

(քհ) Որպէս զի արժա: Խաղաղութիւն:

(դպ) Եւ ընդ հոգւոյդ քում:

(սրկ) Աստուծոյ երկրպագեացուք:

(դպ) Առաջի քո, Տէ'ր:

(քհ) Խաղաղութեամբ քով, Քրիստո'ս:

(սրկ) Օրհնեա', Տէ'ր:

(քհ) Տէր Աստուած օրհնեցէ զամենէ:

(սրկ) Մի' ոք յերախայից, մի' ոք ի թերահաւատից եւ մի' ոք յապաշխարողաց եւ յանմաքրից մերձեցի յաստուածային խորհուրդս:

(դպ) Մարմին տէրունական եւ արիւն փրկչական, կայ առաջի. երկնային զօրութիւնքն յաներեւոյթս երգեն եւ ասեն անհանգիստ բարբառով՝ սուրբ, սուրբ, սուրբ, Տէ'ր զօրութեանց:

(սրկ) Սաղմոս ասացէք Տեառն Աստուծոյ մերում, դպի'րք, ձայնիւ քաղցրութեամբ զերգս հոգեւորս:

Եւ դպիրքն եղանակեն զսրբասացութիւնն ըստ խորհրդոյ աւուրն

Ծննդեան, Աւետեաց, Վարդավառի

եւ Աստուածածնի

Բազմութիւնք հրեշտակաց եւ զօրաց երկնաւորաց, իջեալ ի յերկնից ընդ Միածին թագաւորին:

Որք երգեին եւ ասէին՝ սա է Որդին Աստուծոյ. ամենեքեան ասասցուք՝ ուրախ լերուք երկինք, եւ ցնծասցեն հիմունք աշխարհի: Զի Աստուածն յաւիտենական ի յերկրի երեւեցաւ եւ ընդ մարդկան շրջեցաւ, զի կեցուցէ զանձինս մեր:

### Մեծի հինգշաբաթի

Որ վերայ նստիս ի կառս հրանիւթս քառակերպեանս, անճառելի Բա'նդ Աստուած: Այսօր իջեալ ի յերկնայնոցն վասն քոյ արարածոցս՝ յանձն առեր բազմիլ ընդ աշակերտսն: Եւ սերովբէքն եւ քերովբէքն հիացեալ զարմանային, եւ պետութիւնք վերին զօրացն սքանչացեալ աղաղակէին՝ ասելով՝ սուրբ, սուրբ, սուրբ, Տէ'ր զօրութեանց:

### Յինանց եւ Խաչի

Ով է որպէս Տէր Աստուած մեր, խաչեցաւ վասն մեր, թաղեցաւ եւ յարեաւ. հաւատարիմ եղեւ յաշխարհի եւ համբարձաւ փառօք: Եկա'յք, ժողովո'ւրդք, զօրհնութիւն ընդ հրեշտակս երգեսցուք նմա՝ ասելով՝ սուրբ, սուրբ, սուրբ եւ, Տէ'ր Աստուած մեր:

### Կիրակէի, Եկեղեցոյ, Ծաղկազարդի եւ Հրեշտակաց

Հրեշտակային կարգաւորութեամբ լցեր, Աստուա'ծ, զքո սուրբ զեկեղեցի: Հազարք հազարաց հրեշտակապետք կան առաջի քո: Եւ բիրք բիրուց հրեշտակք պաշտեն զքեզ, Տէ'ր, եւ ի մարդկանէ հաճեցար ընդունիլ զօրհնութիւն: Ձայնիւ խորհրդականաւ, սուրբ. սուրբ. Տէր զօրութեանց:

### Պահոց եւ ննջեցելոց

Վասն յիշատակի հանգուցելոցն ընկալ, Հա'յր, սո'ւրբ, մարդասէ'ր, զպատարագս: Եւ համարեա՛ զհոգիս նոցա ի թիւ սրբոց քոց յարքայութեանդ երկնից: Մանաւանդ զի հաւատով մատուցուք զպատարագս, հաշտեցի Աստուածութիւնդ եւ հանգուցէ զհոգիս նոցա:

### Մարտիրոսաց

Սրբութիւն սրբոց, մեծ եւ եւ ահաւոր: Եւ զինուորութիւնք հրեշտակացն օրհնեն զքեզ եւ ասեն՝

Փառք ի բարձունս Աստուծոյ եւ յերկիր խաղաղութիւն:

### Մարգարէից, առաքելոց եւ հայրապետաց

Ամենակալ եւ, Տէ'ր զօրութեանց, որ թագաւորդ եւ յաւիտենից: Որ նստիս յերկնից ի յերկինս եւ լոյս ծագես յարարածս քո: Որ խոնարհութեամբ իջեր ի յերկիր, քեզ պատարագս մատուցանեմք: Եւ սուրբ զանունդ քո փառաւորեմք, Տէ'ր, որ պսակիչդ եւ քոց սրբոց՝ (այս անուն):

Վասն զի սոքա են մեզ բարեխօս, Տէ'ր ամենակալ, ի քում յարքայութեանդ:

Եւ եթէ հանդիսաւոր օր լինի, եւ զսուրբ խորհուրդն վերաբերել կամիցիս, այս է արարողութիւնն.

Յորժամ քահանայն ասէ.

(քհ) Տէր Աստուած օրհնեցէ զամենեսեան:

Եւ սարկաւագն ձայնէ.

(սրկ) Սաղմոս ասացէք Տեառն Աստուծոյ:

Եւ դպիրքն երգեն զսրբասացութիւնն ըստ խորհրդոյ աւուրն, կանգնեալ

(սրկ) Մի' ոք յերախայից, մի' ոք ի թերա:

(դպ) Մարմին տերունական եւ արին:

Եւ գան խնկարկելով ի սուրբ խորհուրդն:

(սրկ) Յարեու եհար զխորան իւր, եւ ինքն,  
որպէս փեսայ, զի ելանէ յառագաստէ իւրմէ:

(դպ) Եւ ցնծայ նա որպէս հսկայ յընթանալ զճանապարհս իւր:

(սրկ) Որք զքրովբէիցն:

(դպ) Խորհրդաբար կերպարանիմք:

Եւ գան յարեւելից կողմն:

(սրկ) Ճանապարհ արարէք այնմիկ, որ նստի յերկնից երկինս ընդ արեւելս:

(դպ) Եւ կենդանարար Երրորդութեանն զերեքսրբեան օրհնութիւնս մատուցանեմք:

Եւ գան ի հարաւակողմն:

(սրկ) Աստուած ի հարաւոյ եկեացէ եւ սուրբն ի Փառան լեռնէ:

(դպ) Զամենայն զկենցաղականս ի բաց դնելով՝ զգործս:

Եւ գան յաստիճան խորանին. եւ բարձող ահաւոր խորհրդոյն ասացէ  
հանդարտութեամբ.

(սրկ) Հարբարձէ՛ք, իշխա՛նք, զորունս ձեր ի վեր. համբարձցին դրունք յաւիտենից,  
եւ մտցէ թագաւոր փառաց:

Եւ պատարագողն խնկարկէ եւ հարցանէ.

(քհ) Ո՞վ է սա թագաւոր փառաց. Տէր հօր զօրութեամբ իւրով, Տէր կարող ի  
պատերազմի:

(դպ) Որպէս զի զթագաւորն ամենեցուն ընդունիցիմք:

(սրկ) Համբարձէ՛ք, իշխա՛նք, զդրունս ձեր ի վեր. համբաձցին դրունք յաւիտենից, եւ մտցէ թագաւոր փառաց:

(քհ) Ո՞վ է սա թագաւոր փառաց եւ Տէր զօրութեանց:

(դպ) Եւ զհրեշտակացն հանդիսապէս ընծայեալ բերեմք զկարգ:

(սրկ) Սա ինքն է թագաւոր փառաց:

Եւ պատարագողն երկրպագէ ահիւ եւ դողութեամբ եւ առնու ի ձեռաց սարկաւագին եւ խաչակնքէ ի վերայ ժողվրդեանն՝ ասելով.

(քհ) Օրհնեալ եկեալ անուամբ տեառն:

(դպ) Ալէլուիա:

(սրկ) Եւ եւս խաղաղութեան զՏէր աղա:

(դպ) Տէ՛ր, ողորմե՛:

(սրկ) Եւ եւս հաւատով եւ սրբութեամբ կացցուք յաղօթս առաջի սրբոյ սեղանոյս Աստուծոյ ահիւ: Մի՛ խղճիւ եւ զայթակղութեամբ, մի՛ նենգութեամբ, խորամանկութեամբ, մի՛ պատրանօք եւ խաբէութեամբ, մի՛ երկմտութեամբ եւ մի՛ թերահաւատութեամբ, այլ ուղիղ վարուք, պարզ մտօք, միամիտ սրտիւ, կատարեալ հաւատով, լցեալ սիրով, լի եւ առաւելեալ ամենայն գործովք բարութեան կացցուք յաղօթս առաջի սրբոյ սեղանոյս Աստուծոյ եւ զտցուք զողորմութեան զշնորհս: Յաւուր յայտնութեան եւ ի միւսանգամ զալստեան Տեառն մերոյ եւ Փրկչին Յիսուսի Քրիստոսի կեցուցէ եւ ողորմեսցի:

(դպ) Կեցո՛, Տէ՛ր, եւ ողորմեա՛:

(սրկ) Օրհնեա՛, Տէ՛ր:

(քհ) Շնորհօք եւ մար: Խաղաղութիւն:

(դպ) Եւ ընդ հոգւոյդ քում:

(սրկ) Աստուծոյ երկրպագեսցուք:

(դպ) Առաջի քո, Տէ՛ր:

(սրկ) Ողջոյն տուք միմեանց ի համբոյր սրբութեան, եւ որք ոչ էք կարողք հաղորդիլ աստուածային խորհրդոյս, առ դրունս ելէք եւ աղօթեցէք:

(դպ) Քրիստոս ի մէջ մեր յայտնեցաւ, որ Էնն Աստուած աստ բազմեցաւ: Խաղաղութեան ձայն հնչեցաւ, սուրբ ողջունի հրաման տուաւ: Եկեղեցիս մի անձն եղև, համբոյրս յօդ լրման տուաւ: Թշնամութիւնն հեռացաւ. սէրն յընդհանուրս սփռեցաւ: Արդ, պաշտօնեա'յք, բարձեալ զձայն՝ տո'ւք զօրհնութիւն ի մի բերան միասնական Աստուածութեանն, որում սրովբէքն են զսրբաբան:

Ոմանք եւ զայս ասեն ի հանդիսի տօնի.

(սրկ) Որք հաւատով կայք յանդիման սուրբ սեղանոյս արքայական, տեսէք բազմեալ զՔրիստոս արքայն եւ շուրջ պատեալ զօրք վերնական:

(դպ) Վեր համբառնամք զաչս ունելով եւ պաղատիմք զայս ասելով՝ զմեղս մեր մի՛ յիշեսցես, այլ գթութեամբ քո քաւեսցես: Ընդ հրեշտակացն օրհնեմք զքեզ, եւ ընդ սրբոց քոց, Տէ՛ր, փառք քեզ:

(սրկ) Ահիւ կացցուք, երկիւղիւ կացցուք, բարւոք կացցուք եւ նայեցարուք զգուշութեամբ:

(դպ) Առ քեզ, Աստո՛ւած:

(սրկ) Պատարագ Քրիստոս մատչի անարատ Գառն Աստուծոյ:

(դպ) Ողորմութիւն եւ խաղաղութիւն եւ պատարագ օրհնութեան:

(սրկ) Օրհնեա՛, Տէ՛ր:

(քհ) Շնորհք, սէր եւ աստուածային սրբա:

(դպ) Ամէն. եւ ընդ հոգւոյդ քում:

(սրկ) Զդրունս, զդրունս. ամենայն իմաստութեամբ եւ զգուշութեամբ ի վեր ընծայեցուցէք զմիտըս ձեր աստուածային երկիւղիւ:

(դպ) Ունիմք առ քեզ, Տէ՛ր ամենակալ:

(սրկ) Եւ գոհացարուք զՏեառնէ բոլորով սրտիւ:

(դպ) Արժան եւ իրաւ:

(սրկ) Օրհնեա՛, Տէ՛ր:

(քհ) Եւ ընդ սերովբէսն եւ ընդ քերով:

Իսկ ի հանդիսի աւուրս ոմանք զկնի *Արժան*

*էւ իրաւին* ասեն զայս.

(սրկ) Եւ զստոյգ փրկութեան, որ միշտ ընդ ամենայն տեղիս գոհութիւն մատուցանենք քեզ, Քրիստոս'ս: Որով զհրաշալի զյարութիւնդ քո գովեն զօրութիւնք: Սարսին սերովբէքն, դողան քերովբէքն, եւ իշխանութիւնք վերին պետութեանցն պար առեալ քաղցր ձայնիւ եղանակեն եւ ասեն`

(դպ) Սուրբ, սուրբ, սուրբ, Տէ՛ր զօրութեանց, լի են երկինք եւ երկիր փառօք քո. օրհնութիւն ի բարձունս. օրհնեալ, որ եկիր եւ զալոցդ ես անուամբ Տեառն. ո՛վսաննա ի բարձունս:

(սրկ) Օրհնեա՛, Տէ՛ր:

(քհ) Առէք, կերէք այս է մարմին իմ, որ:

(դպ) Ամէն:

(սրկ) Օրհնեա՛, Տէ՛ր:

(քհ) Արբէք ի սմանէ ամենեքեան. այս է:

(դպ) Ամէն: Հա՛յր երկնաւոր, որ զՈրդիդ քո ետուր ի մահ վասն մեր պարտապան պարտեաց մերոց, հեղմամբ արեան նորա աղաչենք զքեզ` ողորմեա՛ քո բանաւոր հօտի:

(սրկ) Օրհնեա՛, Տէ՛ր:

(քհ) Եւ զքոյս ի քոյոց քեզ մատուցա:

(դպ) Յամենայնի օրհնեալ ես, Տէ՛ր, օրհնենք զքեզ, գովենք զքեզ, գոհանամք զքէն, աղաչենք զքեզ, Տէ՛ր Աստուած մեր:

(սրկ) Օրհնեա՛, Տէ՛ր:

(քհ) Խաղաղութիւն ամենեցուն:

(դպ) Եւ ընդ հոգւոյդ քում:

(սրկ) Աստուծոյ երկրպագեցուք:

(դպ) Առաջի քո, Տէ՛ր: Որդի՛ Աստուծոյ. որ պատարագեալ Հօր ի հաշտութիւն հաց կենաց բաշխիս ի մեզ, հեղմամբ արեան քո սուրբ աղաչենք զքեզ` ողորմեա՛ արեամբ քով փրկեալ հօտի:

(սրկ) Օրհնեա՛, Տէ՛ր:

(քհ) Որպէս զի եղիցի սա ամենեցուն:

(դպ) Հոգի՛ Աստուծոյ, որ զՓառակցի քո

զխորհուրդ իջեալ ի յերկնից կատարես ի ձեռն մեր, հեղմամբ արեան սորա աղաչեմք զքեզ՝ հանգո՛ր զհոգիս մեր ննջեցելոցն:

(սրկ) Օրհնեա՛, Տէ՛ր:

(քհ) Ընդ որս եւ մեզ այց արասցես բա:

(դպ) Յիշեա՛, Տէ՛ր, եւ ողորմեա՛:

(քհ) Աստուածածնին սրբոյ կուսին Մարի:

(դպ) Յիշեա՛, Տէ՛ր, եւ ողորմեա՛:

Սարկաւագն յաջակողմն սեղանոյն ձեռնամած ասասցէ.

(սրկ) Առաքելոց սրբոց, մարգարէից, վարդապետաց, մարտիրոսաց եւ ամենայն հայրապետաց սրբոց, առաքելագործ եպիսկոպոսաց, երիցանց, ուղղափառ սարկաւագաց եւ ամենայն սրբոց եղիցի յիշատակ ի սուրբ պատարագս, աղաչե՛մք: Յիշեա՛, Տէ՛ր, եւ ողորմեա՛:

Յարութեան կիրակէից զայս ասա.

(սրկ) Օրհնեալ, գովեալ եւ փառաւորեալ, հրաշալի եւ աստուածազարդ յարութեանն Քրիստոսի երկիրպագեմք:

(դպ) Փառք յարութեան քո, Տէ՛ր:

Ի տօնի սրբոցն զայս ասա.

(սրկ) Սուրբ եւ աստուահաճոյ մարգարէին, հայրապետին, առաքելոյն, մարտիրոսին (այս անուն), որոյ այսօր գլիշատակն կատարեցաք, եղիցի յիշատակ ի սուրբ պատարագս, աղա:

(դպ) Յիշեա՛, Տէ՛ր, եւ ողորմեա՛:

(սրկ) Առաջնորդացն մերոց եւ առաջին լուսաւորչացն՝ սրբոց Թադէոսի եւ Բարթուղիմէոսի առաքելոցն, եւ Գրիգորի Լուսաւորչին, Արիստակիսի, Վրթանիսի, Յուսկանն, Գրիգորիսի, Ներսիսի, Սահակայ, Դանիէլի եւ Խադայ, Մեսրոպայ վարդապետին եւ Գրիգորի Նարեկացոյն եւ Ներսիսի Կլայեցոյն, Յովհաննու Որոտնեցոյն եւ Գրիգորի եւ Սովսիսի Տաթեւացեացն եւ սրբոց Գրիգորիսեանց եւ Ներսիսեանց, հովուաց եւ հովուապետացն Հայաստանեայց եղիցի յիշատակ ի սուրբ պատարագս, աղաչե՛մք:

(դպ) Յիշեա՛, Տէ՛ր, եւ ողորմեա՛:

(սրկ) Միանձնացելոց սրբոց, առաքինասէր եւ աստուածուսոյց կրօնաւորացն՝ Պօղոսի, Անտոնի, Պօղայ, Մակարայ, Ոնոփրիոսի, արքայ Մարկոսի, Սրապիոնի, Նեղոսի, Արսէնի, Եւագրի, Պարսամայ, Յովհաննիսեանց եւ Սիմէոնեանց, սրբոց ոսկեանց եւ սուքիասանց եւ ամենայն սրբոց հարց եւ աշակերտելոց նոցին ընդ տիեզերս եղիցի յիշատակ ի սուրբ:

(դպ) Յիշեա՛, Տէ՛ր, եւ ողորմեա՛:

(սրկ) Թագաւորաց հաւատացելոց՝ սրբոց Արգարու, Կոստանդիանոսի, Տրդատայ եւ Թեոդոսից եւ ամենայն սուրբ եւ բարեպաշտ թագաւորաց եւ աստուածասէր իշխանաց եղիցի յիշատակ ի սուրբ պատարագս:

(դպ) Յիշեա՛, Տէ՛ր, եւ ողորմեա՛:

(սրկ) Ընդհանուր ամենայն հաւատացելոց՝ արանց եւ կանանց, ծերոց եւ տղայոց եւ ամենայն չափու հասակի հաւատով եւ սրբութեամբ ի Քրիստոս ննջեցելոցն եղիցի յիշատակ ի սուրբ պատարագս:

(դպ) Յիշեա՛, Տէ՛ր, եւ ողորմեա՛:

(սրկ) Օրհնեա՛, Տէ՛ր:

(քհ) Եւ առաւել զեպիսկոպոսապետն:

(սրկ) Գոհութիւն եւ փառաբանութիւն մատուցանեմք քեզ, Տէ՛ր Աստուած մեր, վասն սուրբ եւ անմահ պատարագիս, որ ի վերայ սրբոյ սեղանոյս. զի զսա մեզ ի սրբութիւն կենդանութեան պարգևեսցես: Սովաւ շնորհեա զսէր, զհաստատութիւն եւ զըղձալի զխաղաղութիւն ամենայն աշխարհի, սրբոյ եկեղեցոյ եւ ամենայն ուղղափառ եպիսկոպոսաց, եպիսկոպոսապետին մերոյ եւ պատուական հայրապետին ամենայն հայոց՝ տեառն (այս անուն), եւ մերոյ արհի եպիսկոպոսին եւ երջանիկ ընտանապետին՝ տեառն (այս անուն), եւ քահանայիս, որ զպատարագս մատուցանէ: Եւ վասն զօրութեանց եւ յաղթութեանց թագաւորաց քրիստոնէից եւ իշխանացն բարեպաշտից: Աղաչեսցուք եւ խնդրեսցուք եւ վասն հոգւոցն հանգուցելոց: Եւս առաւել վասն հանգուցեալ ընտանապետացն մերոց եւ շինողաց սուրբ եկեղեցոյս եւ որք ընդ հովանեաւ սորին են հանգուցեալ: Ազատութիւն եղբարց մերոց գերելոց եւ շնորհ առաջիկայ ժողովրդեանս: Հանգիստ հաւատով եւ սրբութեամբ ի Քրիստոս կատարելոց եղիցի յիշատակ ի սուրբ պատարագս, աղաչե՛մք:

(դպ) Ըստ ամենայնի եւ յաղագս ամենեցուն:

(սրկ) Օրհնեա՛, Տէ՛ր:

(քհ) Եւ եղիցի ողորմութիւն մեծիս Աս:

(դպ) Ամէն. եւ ընդ հոգւոյդ քում:

Եւ սարկաւագն քարոզէ ի թիւ.

(սրկ) Եւ եւս խաղաղութեան զՏէր աղա:

(դպ) Տէ՛ր, ողորմեա՛:

(սրկ) Ամենայն սրբովք, զորս յիշատակեցաք, եւս առաւելապէս զՏէր աղա:

(դպ) Տէ՛ր, ողորմեա՛:

(սրկ) Վասն մատուցեալ սուրբ եւ աստուածային պատարագիս, որ ի վերայ սրբոյ սեղանոյս, զՏէր աղա:

(դպ) Տէ՛ր, ողորմեա՛:

(սրկ) Որպէս զի Տէր Աստուած մեր, որ ընկալաւ զսա ի սուրբ յերկնային եւ յիմանալի իւր մատուցարանն, զփոխանակն առաքեցէ առ մեզ զշնորհս եւ զպարգեւս Հոգւոյն Սրբոյ, զՏէր աղա:

(դպ) Տէ'ր, ողորմեա':

(սրկ) Ընկա'լ, կեցո' եւ ողորմեա'. եւ պահեա' զմեզ, Տէ'ր, քոյին շնորհիւդ:

(դպ) Կեցո', տէ'ր, եւ ողորմեա':

(սրկ) Զամենասրբուհի զԱստուածածինն զմիշտ կոյսն Մարիամ, հանդերձ ամենայն սրբովք յիշելով, զՏէր աղա:

(դպ) Յիշեա', տէ'ր եւ ողորմեա':

Եւ եւս միաբան վասն ճշմարիտ եւ:

Տէ'ր, ողորմեա':

(սրկ) Զանձինս մեր եւ զմիմեանս Տեառն:

(դպ) Քեզ՝ Տեառնդ, յանձն եղիցուք:

(սրկ) Ողորմեա'ց մեզ, Տէ'ր Աստուած մեր, ըստ:

(դպ) Տէ'ր, ողորմեա', Տէ'ր, ողոր., Տէ'ր, ողոր:

(սրկ) Օրհնեա', տէ'ր:

(քհ) Եւ տուր մեզ համարձակաձայն:

(դպ) Հայր մեր, որ յերկինս եւ, սուրբ եղիցի անուն քո: Եկեացէ արքայութիւն քո, եղիցին կամք քո որպէս յերկինս եւ յերկրի: Զհաց մեր հանապազորդ տո'ւր մեզ այսօր: Եւ թո'ղ մեզ զպարտիս մեր, որպէս եւ մեք թողումք մերոց պարտապանաց: Եւ մի' տանիր զմեզ ի փորձութիւն, այլ փրկեա' ի չարէ:

(սրկ) Օրհնեա', Տէ'ր:

(քհ) Զի քո է արքայութիւն: Խաղաղութիւն:

(դպ) Եւ ընդ հոգւոյդ քում:

(սրկ) Աստուծոյ երկրպագեցուք:

(դպ) Առաջի քո, Տէ'ր:

Քահանայն խոնարհի, եւ ամենայն ժողովուրդքն խոնարհին ի վայր: Եւ սարկաւազն ձայնէ.

(սրկ) Օրհնեա՛, տէ՛ր:

(քհ) Քրիստոսի Յիսուսի Տերամբ:

Եւ սարկաւագն ձայնէ բարձր.

(սրկ) Պոսիսումէ:

(քհ) Ի սրբութիւն սրբոց:

(դպ) Միայն սուրբ, միայն Տէր Յիսուս Քրիստոս ի փառս Աստուծոյ Հօր. Ամէն:

(սրկ) Օրհնեա՛, Տէ՛ր:

(քհ) Օրհնեալ Հայր սուրբ Աստուած ճշմարիտ:

(դպ) Ամէն:

(սրկ) Օրհնեա՛, Տէ՛ր:

(քհ) Օրհնեալ Որդիդ սուրբ Աստուած ճշմարիտ:

(դպ) Ամէն:

(սրկ) Օրհնեա՛, Տէ՛ր:

(քհ) Օրհնեալ Հոգիդ սուրբ Աստուած ճշմարիտ:

(դպ) Ամէն:

(սրկ) Օրհնեա՛, Տէ՛ր:

(քհ) Օրհնութիւն եւ փառք Հօր եւ Որդ:

(դպ) Ամէն: Հայր սուրբ, Որդիդ սուրբ, Հոգիդ սուրբ: Օրհնութիւն Հօր եւ Որդւոյ եւ Սրբոյ Հոգւոյն այժմ եւ միշտ եւ յաւիտեանս յաւիտենից. ամէն:

(սրկ) Օրհնեա՛, Տէ՛ր:

(քհ) Ի սուրբ, ի սուրբ պատուական մար:

Եւ խաչակնքէ քահանայն սկիհովն ի վերայ ժողովրդեանն եւ դառնայ ի սուրբ սեղանն, եւ քարշեն զվարագոյրն:

Եւ քարոզէ սարկաւագն.

(սրկ) Սաղմոս ասացէք Տեառն Աստուծոյ մերոյ, դպի՛րք, ձայնիւ քաղցրութեամբ զերգս հոգեւորս: Զի սմա վայել են սաղմոսք եւ օրհնութիւնք, ալէլուք եւ երգք

հոգևորք: Պաշտօնեա՛յք, հանդերձ երգովք սաղմոս ասացէք եւ զՏէր յերկինս օրհնեցէք:

Եւ դպիրքն եղանակեն.

(դպ) Քրիստոս պատարագեալ բաշխի ի միջի մերում. ալէլուիա:

Զմարմին իւր տայ մեզ կերակուր եւ սուրբ զարին իւր ցօղէ ի մեզ. ալէլուիա:

Մատի՛ք առ Տէր եւ առէ՛ք զլոյս. ալէլուիա:

Ճաշակեցէք եւ տեսէք, զի քաղցր է Տէր. ալէլուիա:

Օրհնեցէ՛ք զՏէր յերկինս. ալէ:

Օրհնեցէ՛ք զնա ի բարձունս. ալէլուիա:

Օրհնեցէ՛ք զնա, ամենայն հրեշտա՛կք նորա. ալէլուիա:

Օրհնեցէ՛ք զնա, ամենայն զօրութի՛ւնք նորա. ալէլուիա:

Եւ դպիրքն եղանակեն զտաղս  
խորհրդաւորս ըստ պատշաճի աւուրն:

Եւ բանան զվարագոյրն: Եւ սարկաւագն  
քարոզէ բարձր ձայնիւ.

(սրկ) Երկիւղիւ եւ հաւատով յառաջ մատիք եւ սրբութեամբ հաղորդեցարուք:

Եւ դպիրքն ասեն ձայնիւ.

(դպ) Աստուած մեր եւ Տէր մեր երեւեցաւ մեզ. օրհնեալ եկեալ անուամբ Տեառն:

(քհ) Կեցո՛, Տէ՛ր, զժողովուրդս քո եւ:

Դարձեալ քարշեն զվարագոյրն:

Եւ դպիրքն երգեն.

(դպ) Լցաք ի բարութեանց քոց, Տէ՛ր, ճաշակելով զմարմին քո եւ զարիւն. փառք ի բարձունս կերակրողիդ զմեզ: Որ հանապազ կերակրես զմեզ, առաքեա՛ ի մեզ զհոգեւոր քո զօրհնութիւն. փառք ի բարձունս Կերակրողիդ զմեզ:

Եւ սարկաւագն քարոզէ.

(սրկ) Եւ եւս խաղաղութեան զՏէր աղա:

Եւ եւս հաւատով ընկալեալք յաստուածային, սուրբ, երկնային, անմահ, անարատ եւ անապական խորհրդոյս, զՏեառնէ գոհացարուք:

(դպ) Գոհանամք զքէն, Տէ՛ր, որ կերակրեցեր զմեզ յանմահական սեղանոյ քոյ՝ բաշխելով զմարմինդ եւ զարիւնդ ի փրկութիւն աշխարհի եւ կեանք անձանց մերոց:

Իսկ աստանօր դպիրքն եղանակեն խորհրդաւորս, մինչեւ քահանայն կատարեսցէ զկարգ աղօթիցն: Եւ յորժամ հաղորդին արժանաւորքն, դպիրքն երգեն զտաղս զայս.

(դպ) Մայր հաւատոյ, սուրբ հարսնարան

եւ առագաստ գերադրական

դու փեսայիդ անմահական.

որ զարդարեաց զքեզ անվախճան:

Երկրորդ երկինք դու հրաշական,

փառաց ի փառս բարձրական,

որ զմեզ ծնանիս լուսոյ նման

աւազանաւն որդիական:

Բաշխես զհացն մաքրական,

զարիւնդ ըմպել տաս սոսկական,

հանես ի վեր գերաստիճան

յիմանալեացն անջոկական:

Եկա՛յք, որդի՛ք Նոր Սիոնի,

մատիք առ Տէր մեր սրբութեամբ.  
ճաշակեցէք եւ տեսէք,  
զի քաղցր է Տէր մեր զօրութեամբ:

Նա բաժանեաց զՅորդանան,  
դու՝ զծով մեղաց աշխարհական  
նման Յեսուայ մեծ զօրական,  
զքեզ, Տէ՛ր Յիսուս Հօր էական:

Հինն օրինակ քեզ եւ նման,  
դու խորանին գերադրական.  
նա խորտակեաց զդրունս ադամանդ,  
դու՝ դժոխոց զդրունս ի հիմանց:

Հացս այս մարմին է Քրիստոսի,  
բաժակս՝ արին Նորոյ Ուխտի.  
Ճածկեալ խորհուրդն մեծ յայտնի,  
Աստուած ի սմա մեզ տեսանի:

Սա է Քրիստոս Բանն Աստուած,  
որ ընդ աջմէ Հօրն բազմի  
եւ աստ ի մեզ պատարագի,  
բառնայ զմեղս աշխարհի:

Այն, որ օրհնեալ է յաւիտեան  
Հարբ եւ Հոգւովն միական  
այժմ եւ յաւէտ եւ յապագայն  
եւ անըսպառ միշտ յաւիտեան:

Եւ ի վերջ տաղին ասէ սարկաւագն.

(սրկ) Օրհնեա՛, տէ՛ր:

(քհ) Որ օրհնես զայնոսիկ, որք օրհնեն զքեզ, Տէ՛ր, եւ սուրբ առնես զյուսացեալս ի քեզ:

(դպ) Եղիցի անուն Տեառն օրհնեալ յայսմհետէ մինչեւ յաւիտեան (երիցս կրկնեա):

(քհ) Կատարումն օրինաց եւ մարգարեից:

(սրկ) *Եւ ասեն՝* Ալէլուիա օրթի:

(քհ) Յետ յարութեան Տեառն մերոյ Յիսուսի Քրիստոսի:

Եւ իբրեւ ճաշեցին. կամ Ի սկզբանէ:

(դպ) Փառք քեզ, Տէ՛ր Աստուած մեր:

(սրկ) Սուրբ Աւետարանաւս աղաչեացուք:

(քհ) Պահպանեա՛ զճառայս քո, Քրիստո՛ս Աս:

(դպ) Օրհնեցից զՏէր յամենայն ժամ. յամենայն ժամ օրհնութիւն նորա ի բերան իմ:

(քհ) Օրհնեա՛լք եղերուք ի շնորհաց Սուրբ Հոգւոյն. երթայք խաղաղութեամբ, եւ Տէր եղիցի ընդ ձեզ եւ ընդ ամենեսեանդ. ամէն:

*Եւ ի բաշխելն զնշխարս առ ժողովորդսն դպիրքն երգեն զսաղմոսս զայս ԼԳ*

Ի Տէր պարծեսցի անձն իմ, լուիցեն հեզք եւ ուրախ եղիցին:

Մեծ արարէք զՏէր ինեւ եւ բարձր արասցուք զանուն նորա ի միասին:

Խնդրեցի ի Տեառնէ, եւ լուաւ ինձ, յամենայն նեղութենէ իմմէ փրկեաց զիս:

Մատիք առ Տէր եւ առէք զլոյս, եւ երեսք ձեր մի՛ ամաչեսցեն:

Այս աղբատ կարդաց առ Տէր, եւ Տէր լուաւ սմա, յամենայն նեղութենէ սորա փրկեաց զսա:

Բանակք հրեշտակաց Տեառն շուրջ են զերկիւղածովք իւրովք եւ պահեն զնոսա:

Ճաշակեցէ՛ք եւ տեսէ՛ք, զի քաղցր է Տէր. երանեալ է այր, որ յուսայ ի նա:

Երկերո՛ւք ի Տեառնէ, ամենայն սո՛ւրբք նորա, զի ոչինչ է պակասութիւն երկիւղածաց նորա:

Մեծամեծք աղբատացան եւ քաղցեան, բայց ոյք ինդրեն զՏէր, մի՛ պակասեսցի ի նոցանէ ամենայն բարութիւն:

Եկա՛յք, որդեա՛կք իմ, լուարո՛ւք ինձ, եւ զերկիւղ Տեառն ուսուցից ձեզ:

Ո՞վ է մարդ, որ կամի զկեանս, սիրէ զաւուրս իւր տեսանել ի բարութեան:  
Լռեցո՛ր զլեզու քո ի չարութենէ, եւ շրթունք քո մի՛ խօսեսցի զնենգութիւն:  
Խոտորեա՛ ի չարէ եւ արա՛ զբարի, ինդրեա՛ զխաղաղութիւն եւ ե՛րթ զհետ նորա:  
Աչք Տեառն ի վերայ արդարոց, եւ ականջք նորա ի վերայ աղօթից նոցա:  
Երեսք Տեառն ի վերայ չարագործաց՝ սատակել յերկրէ զյիշատակս նոցա:  
Կարդացին արդարքն առ Տէր, եւ Տէր լուաւ նոցա. յամենայն նեղութենէ նորա  
փրկեաց զնոսա:  
Մերձ է Տէր առ այնոսիկ, որք մաշեալ են սրտիւք, եւ զխոնարհս հոգւով կեցուցանէ:  
Բազում նեղութիւնք են արդարոց. յամենայն փրկէ զնոսա Տէր եւ պահէ զամենայն  
ոսկերս նոցա, եւ մի ի նոցանէ մի՛ փշրեսցի:  
Մահ մեղաւորին չար է, բայց որ ատէ զարդարն, զղջացի:  
Փրկէ Տէր զանձինս ծառայից իւրոց, մի՛ զղջացին ամենեքեան, ոյք յուսացեալ են ի  
նա:  
Փառք Հօր եւ Որդւոյ եւ Հոգւոյն Սրբոյ այժմ եւ միշտ եւ յաւիտեանս յաւիտենից.  
ամէն:

Յ Ա Ն Կ

Ալեկուք Աւագ Շաբաթուն  
Ալեկուք Եկեղեցւոյ  
Ալեկուք Խաչի  
Ալեկուք Ծննդեան  
Ալեկուք Համբարձմանն Քրիստոսի  
Ալեկուք Հոգւոյ զալստեան  
Ալեկուք Հրեշտակապետաց  
Ալեկուք Ծաղկազարդի  
Ալեկուք յարութեանն Ղազարու  
Ալեկուք Ճրագալուցի Ծննդեան  
Ալեկուք Յարութեանն Քրիստոսի  
Ալեկուք Վարդավառի

Ալէլուք Տեառնդառաջի  
Աղաղակեցէք առ Տէր  
Աղաչեսցուք զամենակալն Աստուած  
Աղօթք զկնի Օրհնութեանց  
Այնպէս պաշտեմ զհայրենի Աստուած  
Այսօր անճառ լուսոյն ծագումն  
Այսօր դասք հրեշտակաց  
Անբաժանելի եւ համագոյ  
Անդաստան  
Աշխարհ ամենայն, առ իս նայեցեալ  
Ապրեցո՛ զիս, Տէ՛ր, ի մարդոյ  
Առաւօտ լուսոյ, արեգակն  
Առաջնորդք եղեն մեզ (քարոզ)  
Ասասցուք ամենեքեան միաբանութեամբ  
Աստուած անեղ, անժամանակ  
Աստուած մեծ, հզօր եւ փառաւորեալ (քարոզք)  
Աստուած յաւիտենական (Նարեկ)  
Արարչական բանին հրաման  
Արեւազալի ժամն  
Աւետարանք հանգստեան  
Աւետարանք մարտիրոսաց, նախ քան զՀաւատամքն  
Բանից իմոց ունկն դիր  
Բժշկութեան ավետարանքն  
Գոհանամք զքէն, Տէ՛ր Աստուած  
Գոհացարուք զՏեառնէ  
Դատեա՛, Տէ՛ր, զայնոսիկ  
Եկեալքս ի խոստովանութիւն  
Եկեսցէ ի վերայ իմ ողորմութիւն (Սղմ.)  
Եղիցի անուն Տեառն օրհնեալ

Երանեալ են ամբիօք ի ճանապարհի  
Երգք զկնի Փառք ի բարձունսին  
Երգ ննջեցելոց զկնի Աստուած անեղի  
Եւ արդ, ի վերայ այսբանեաց (Նարեկ)  
Եւ եւս հաւատով աղաչեսցուք  
Զարթուցեալքս ամենեքեան  
Զուարճացեալքս մեծաւ ուրախութեամբ  
Զսաղմոսերգութիւնս եւ զաղաչանս  
Զքէն գոհանամք, Տէր Աստուած  
Էական Բանն, որ ընդ Հօր  
Ընկալ քաղցրութեամբ (Նարեկ)  
Թագաւորք ապաշխարութեան  
Թագաւորք մարտիրոսաց  
Ժամամուտքն  
Ժողովեալքս ի հրաժարումն  
Ի կարդալ իմում լուար ինձ, Աստուած  
Իշխանք հալածեցին զիս  
Իսկ այս ո՞վ է, որ դիմեալ  
Իւղաբերից երգք եւ աւետարանքն  
Ի քէն հայցեմք, բազումողո՛րմ  
Ի քէն հայցեմք, Հա՛յր գթութեանց  
Լոյս զուարթ սուրբ փառաց  
Լցաք առաւօտու ողորմութեամբ  
Խաչ քո եղիցի մեզ պահապան  
Խաղաղութեամբ յայս եւ ի սոյն (Սաղմոս)  
Խաւարն անգոյ եւ  
Խնդրեսցուք հաւատով միաբանութեամբ  
Խոնարհեցո՛, Տէ՛ր, զունկն քո  
Խոստովանիմք եւ հաւատամք

Խորհուրդ խորին  
Կանոնագլուխք  
Կանոնագլուխ Բուն բարեկենդանին  
Համբարձի զաչս իմ ի լերինս  
Հայր մեր, որ յերկինս ես  
Հարցի շարականք  
Հաւատամք ի մի Աստուած  
Հաւատով խոստովանիմ  
Հրաժարիմք ի սատանայէ  
Ճանապարհ մոլորելոց  
Ճաշու ակելութք (յետ գրքին)  
Ճաշու շարականք  
Ճաշու սաղմոսք (նախ քան զգիրսն)  
Ճաշու փոխք  
Ճառագայթեալ Բանն ի Հօրէ  
Մաղթանք տօնից  
Մայր սուրբ սքանչելի լուսոյն  
Մեծացուցէ անձն իմ  
Մեծացուցէ շարականք  
Մեղայ Ամենասուրբ Երրորդութեանն  
Մեսեղիք աղուհացից կիրակեփցն  
Մեսեղիք ճաշու աղուհացիցն  
Մեսեղիք երեկոյեան  
Մեսեղիք ճաշու յարութեան  
Մեսեղիք (յետ գրքին)  
Յիշեա՛, Տէ՛ր, զպաշտօնեայս քո  
Յիշեսցուք ի գիշերի  
Նայեաց սիրով  
Նորաստեղծեալ

Նորոգող տիեզերաց  
Շարականք հարցիցն  
Շարականք մանկանցն  
Շնորհեա՛ մեզ, Տէ՛ր, ի գիշերի  
Որ բնակեալն է յօգնութիւն  
Որ ընտրեցեր եւ ընկալար (Աղօթք)  
Ողորմեա՛ ինձ, Աստուա՛ծ, ըստ մեծի  
Ողորմեա շարականք  
Ողորմեսցի քեզ մարդասերն  
Որդի Աստուծոյ (Նարեկ)  
Ուրախ եղէ ես, ոչք ասէին ցիս (Սաղմոս)  
Չհանդուրժեալ բնութեամբ բարոյն  
Պսակիչ սրբոց Քրիստոս, որ պսակես  
Ռահ գործեալ  
Սաղմոսք հանգստեան աւետարանի  
Սեղանօրհնէքն  
Սիրեցի, զի լուիցէ Տէր  
Սուրբ Աստուած, սուրբ եւ հզօր  
Սուրբ ես, Տէր Աստուած մեր, հզօր  
Սուրբ խաչիւս աղաչեսցուք  
Սուրբ ես, Տէ՛ր զօրութեանց  
Ստեղիք խաղաղական ժամու  
Վասն սուրբ տեղոյս շինութեան  
Տէ՛ր ամենակալ, Աստուած Աբրահամու  
Տէ՛ր բարերար, որ մեծաւ զթութեամբ  
Տէ՛ր, զի՛ քազում եղեն նեղիչք իմ  
Տէր յերկնից *շարականք*  
Տէր յերկնից *փռիսն*  
Տէրն յետ ստեղծման արարածոց

Յնձասցէք առ Աստուած (Սաղմոս)  
Փառաւորեցուք զամենակալն Աստուած  
Փառք ի բարձունս Աստուծոյ  
Քարոզք զկնի *Օրհնութեանց*  
Քում ամենագոր եւ հրաշալի  
Քրիստո՛ս Աստուած մեր, վասն սուրբ  
Օրհնեալ եւ, Տէ՛ր Աստուած (*հարցի փոխն*)  
Օրհնեցէ՛ք, մանկո՛ւնք, զՏէր

Խ Ը Ա Տ

### Տոմարական աղիւսակիս

Կալ զթուական Հայոց, յորում ամի եւ իցես,  
յառաջիկայ Աղիւսակէ աստի, եւ զիտ ի կարգի այնր թուականի զՏարեգիրն նոյն  
տարւոյն, որոյ առաջի եղեալ կան *Եօթներեակն, Վերադիրն* եւ *Տանուտէրն*: Եւ  
աստի յառաջ գնացեալ յայն մշտնջենաւոր Աղիւսակն, որ յերկուս զոյգ երեսս թղթոց  
պարունակեալ է, գտցես անդ գնոյն Տարեգիրն, որ ըստ կարգի այբուբենից եղեալ  
կայ զլիսագրով, եւ ի շարս նորին գտցես յառաջին տուփն զօրն Յայտնութեան,  
յերկրորդումն՝ զմիջոց ուտիքն. եւ այսու կարգաւ յառաջ գնացես մինչեւ ցօր  
բերեկենդանի Յայտնութեան:

Օրինակ իմն՝ թուական այսր տարւոյ է ՌՆԴ, եւ Տարեգիրն Ծ, զոր գտցես յառաջին  
Աղիւսակի անդ. եւ ի նմին կարգի տուփսն առ ձեռն պատրաստ գտանես զօրն  
Յայտնութեան, որ է ԴԶ. եւ զմիջոց ուտիքն, որ է ԺԹ օր, եւ զԱռաջաւորաց  
բարեկենդանն՝ որ է *Յունուարի 24*, եւ զայլսն ամենայն ըստ վերոյգրեալ խրատուն: